

Namo tassa bhagavato arahato sammāsambuddhassa

Khuddakanikāye

Therīgāthā-aṭṭhakathā

1. Ekakanipāto

1. Aññatarātherīgāthāvaṇṇanā

Idāni therīgāthānaṃ atthasaṃvaṇṇanāya okāso anuppatto. Tattha yasmā bhikkhunīnaṃ ādito yathā pabbajjā upasampadā ca paṭiladdhā, taṃ pakāsetvā atthasaṃvaṇṇanāya karīyamānāya tattha tattha gāthānaṃ aṭṭhuppattiṃ vibhāvetuṃ sukarā hoti supākaṭā ca, tasmā taṃ pakāsetuṃ ādito paṭṭhāya saṅkhepato ayaṃ anupubbikathā –

Ayañhi lokanātho “manussattaṃ liṅgasampatti” tyādinā vuttāni aṭṭhaṅgāni samodhānetvā dīpaṅkarassa bhagavato pādamūle katamahābhinihāro samatiṃsapāramiyo pūrento catuvīsatiyā buddhānaṃ santike laddhabyākaraṇo anukkamena pāramiyo pūretvā ñātathacariyāya lokatthacariyāya buddhatthacariyāya ca koṭiṃ patvā tusitabhavane nibbattitvā tattha yāvatāyukaṃ ṭhatvā dasasahassacakkavāḷadevatāhi buddhabhāvāya –

“Kālo kho te mahāvīra, uppajja mātukucchiyaṃ;
Sadevakaṃ tārayanto, bujjhassu amataṃ pada”nti. (bu. vaṃ. 1.67) –

Āyācitamanussūpapattiko tāsāṃ devatānaṃ paṭiññaṃ datvā, katapañcamahāvilokano sakyaṛājakule suddhodanamahārājassa gehe sato sampajāno mātukucchiṃ okkanto dasamāse sato sampajāno tattha ṭhatvā, sato sampajāno tato nikkhanto lumbinīvane laddhābhijātiko vividhā dhātiyo ādiṃ katvā mahatā parihārena sammadeva parihariyamāno anukkamena vuḍḍhippatto tīsu pāsādesu vividhanātakajanaparivuto devo viya sampattiṃ anubhavanto jiṇṇabyādhimatadassanena jātasāṃvego ñāṇassa paripākataṃ gatattā, kāmesu ādīnavāṃ nekkhamme ca ānisaṃsaṃ disvā, rāhulakumārassa jātadivase channasahāyo kaṇḍakaṃ assarājāṃ āruya, devatāhi vivaṭena dvārena aḍḍharattikasamaye mahābhinnikkhamaṇaṃ nikkhamitvā, teneva rattāvasesena tīni rajjāni atikkamitvā anomānadīṭṭraṃ patvā ghaṭṭikāramahābrahmunā ānīte arahattaddhaje gahetvā pabbajito, tāvadeva vassasaṭṭhikatthero viya ākappasampanno hutvā, pāsādikena iriyāpathena anukkamena rājagahaṃ patvā, tattha piṇḍāya caritvā paṇḍavapabbatapabbhāre piṇḍapātaṃ paribhuñjitvā, māgadharājena rajjena nimantiyamāno taṃ paṭikkhipitvā, bhaggavassārāmaṃ gantvā, tassa samayaṃ pariggaṇhitvā tato ālārudakānaṃ samayaṃ pariggaṇhitvā, taṃ sabbāṃ analaṅkaritvā anukkamena uruvelaṃ gantvā tattha chabbassāni dukkarakārikaṃ katvā, tāya ariyadhammapaṭivedhassābhāvaṃ ñatvā “nāyaṃ maggo bodhāyā”ti oḷārikaṃ āhāraṃ āharanto katipāhena balaṃ gāhetvā visākhāpuṇṇamadivase sujātāya dinnāṃ varabhojanaṃ bhuñjitvā, suvaṇṇapātiṃ nadiyā paṭisotaṃ khipitvā, “ajja buddho bhavissāmī”ti katasanniṭṭhāno sāyanhasamaye **kālena** nāgarājena abhitthutiguṇo bodhimaṇḍaṃ āruya acalaṭṭhāne pācīnalokadhātuabhimukho aparājitapallaṅke nisinnō caturāṅgasamannāgataṃ vīriyaṃ adhiṭṭhāya, sūriye anattaṅgateyeva mārabalaṃ vidhamitvā, paṭhamayāme pubbenivāsaṃ anussaritvā, majjhimayāme dibbacakkhuṃ visodhetvā, pacchimayāme paṭiccasamuppāde ñāṇaṃ otāretvā, anulomapaṭilomaṃ paccayākāraṃ sammasanto vipassanaṃ vaḍḍhetvā sabbabuddhehi adhigataṃ anaññasādhāraṇaṃ sammāsambodhiṃ adhigantvā, nibbānārammaṇāya phalasaṃpattiyā tattheva sattāhaṃ vītināmetvā, teneva nayena itarasattāhepi bodhimaṇḍeyeva vītināmetvā, rājāyatanamūle madhupiṇḍikabhojanaṃ bhuñjitvā, puna ajapālanigrodhamūle nisinnō dhammatāya dhammagambhīrataṃ paccavekkhitvā apposukkatāya citte namante mahābrahmunā āyācito

buddhacakkhunā lokam volokento tikkhindriyamudindriyādibhede satte disvā mahābrahmunā dhammadesanāya katapaṭiñño “kassa nu kho aham paṭhamam dhammam deseyya”nti āvajjento ālārudakānam kālaṅkatabhāvam nītvā, “bahupakārā kho me pañcavaggiyā bhikkhū, ye maṃ padhānapahitattam upaṭṭhahimsu, yaṃnūnāham pañcavaggiyānam bhikkhūnam paṭhamam dhammam deseyya”nti (mahāva. 10) cintetvā, āsāhipuṇṇamāyam mahābodhito bārāṇasim uddissa aṭṭhārasayojanam maggam paṭipanno antarāmagge upakena ājīvakena saddhim mantetvā, anukkamena isipatanam patvā tattha pañcavaggiye saññāpetvā “dveme, bhikkhave, antā pabbajitena na sevītabbā”tiadinā (mahāva. 13; sam. ni. 5.1081; paṭi. ma. 2.30) dhammacakkapavattanasuttantadesanāya aññāsikoṇḍaññappamukhā aṭṭhārasabrahmakotiyo dhammāmatam pāyetvā pāṭipade bhaddiyattheram, pakkhassa dutiyāyam vappattheram, pakkhassa tatiyāyam mahānāmattheram, catutthiyam assajittheram, sotāpattiphale paṭiṭṭhāpetvā, pañcamiyam pana pakkhassa anattalakkhaṇasuttantadesanāya (mahāva. 20; sam. ni. 3.59) sabbepi arahatte paṭiṭṭhāpetvā tato param yasadārakappamukhe pañcapaṇṇāsapurise, kappāsikavanasaṇḍe tiṃsamatte bhaddavaggiye, gayāsīse piṭṭhipāsāṇe sahasamatte purāṇajaṭileti evam mahājanam ariyabhūmiṃ oṭāretvā bimbisārappamukhāni ekādasanahutāni sotāpattiphale nahutam saraṇattaye paṭiṭṭhāpetvā veḷuvanam paṭiggahetvā tattha viharanto assajittherassa vāhasā adhigatapaṭhamamagge sañcayam āpucchitvā, saddhim parisāya attano santikam upagate sārīputtamoggallāne aggaphalam sacchikatvā sāvakaṇāmiyā matthakam patte aggasāvakaṭṭhāne ṭhapetvā kāludāyittherassa abhiyācanāya kapilavatthum gantvā, mānatthaddhe nītake yamakapāṭihāriyena dametvā, pitaram anāgāmiphale, mahāpajāpatiṃ sotāpattiphale paṭiṭṭhāpetvā, nandakumāram rāhulakumāraṇca pabbājetvā, satthā punadeva rājagaham paccāgacchi.

Athāparena samayena satthari vesāliṃ upanissāya kūṭāgārasālāyam viharante suddhodanamahārājā setacchattassa heṭṭhāva arahattam sacchikatvā parinibbāyi. Atha mahāpajāpatiyā gotamiyā pabbajjāya cittam uppajji, tato rohinīnadītīre kalahavivādasuttantadesanāya (su. ni. 868 ādayo) pariyosāne nikkhamitvā, pabbajitānam pañcannaṃ kumārasatānam pādapariṇāyikā ekajjhāsāyāva hutvā mahāpajāpatiyā santikam gantvā, sabbāva “satthu santike pabbajissāmā”ti mahāpajāpatiṃ jeṭṭhikam katvā satthu santikam gantukāmā ahesuṃ. Ayaṇca mahāpajāpati pubbepi ekavāram satthāram pabbajjam yācitvā nālattha, tasmā kappakam pakkosāpetvā kese chindāpetvā kāsāyāni acchādetvā sabbā tā sākiyāniyo ādāya vesāliṃ gantvā ānandattherena dasabalam yācāpetvā, aṭṭhagarudhammapaṭiggahaṇena pabbajjam upasampadaṇca alattha. Itarā pana sabbāpi ekato upasampannā ahesuṃ. Ayamettha saṅkhepo. Vitthārato panetaṃ vatthu tattha tattha pāliyam (cūḷava. 402) āgatameva.

Evam upasampannā pana mahāpajāpati satthāram upasankamitvā abhivādetvā ekamantaṃ aṭṭhāsi. Athassā satthā dhammam desesi. Sā satthu santike kammaṭṭhānam gahetvā arahattam pāpuṇi. Sesā ca pañcasatabhikkhuniyo nandakovādapariyosāne (ma. ni. 3.398) arahattam pāpuṇimsu. Evam bhikkhunisaṅghe suppaṭiṭṭhite puthubhūte tattha tattha gāmanigamajanapadarājadhānīsu kulitthiyo kulasuṇhāyo kulakumārīkāyo buddhasubuddhatam dhammasudhammatam saṅghasuppaṭipattitaṇca sutvā, sāsane abhippasannā saṃsāre ca jātasamvegā attano sāmike mātāpitaro nītake ca anujānāpetvā, sāsane uram datvā pabbajimsu. Pabbajitvā ca sīlācārasampannā satthuno ca tesam therānaṇca santike ovādam labhitvā ghaṭentiyo vāyamantiyo nacirasseva arahattam sacchākaṃsu. Tāhi udānādivasena tattha tattha bhāsītā gāthā pacchā saṅgītikārahehi ekajjham katvā ekakanipātādivasena saṅgītiṃ āropayimsu “imā **therīgāthā** nāmā”ti. Tāsam nipātādivibhāgo heṭṭhā vuttoyeva. Tattha nipātesu ekakanipāto ādi. Tatthapi –

1. “Sukham supāhi therike, katvā coḷena pārutā;
Upasanto hi te rāgo, sukkaḍākaṃva kumbhiya”nti. –

Ayam gāthā ādi. Tassā kā uppatti? Atīte kira aññatarā kuladhītā koṇāgamanassa bhagavato kāle sāsane abhippasannā hutvā satthāram nimantetvā dutiyādivase sākhamāṇḍapam kāretvā vālikam attharivā upari vitānam bandhitvā gandhapupphādīhi pūjam katvā satthu kālam ārocāpesi. Satthā tattha gantvā paññatte āsane nisīdi. Sā bhagavantam vanditvā paṇītena khādanīyena bhojanīyena parivisitvā, bhagavantam

bhuttāviṃ onītapattapāṇiṃ ticīvarena acchādesi. Tassā bhagavā anumodanaṃ katvā pakkāmi. Sā yāvātāyukaṃ puññāni katvā āyupariyosāne devaloke nibbattitvā ekaṃ buddhantaraṃ sugatīsu eva saṃsarantī kassapassa bhagavato kāle gahapatikule nibbattitvā viññutaṃ patvā, saṃsāre jātasamvegā sāsane pabbajitvā upasampajjitvā vīsativassahassāni bhikkhunisīlaṃ pūretvā, puthujjanakālakiriyaṃ katvā, sagge nibbattā ekaṃ buddhantaraṃ saggasampattiṃ anubhavitvā imasmiṃ buddhuppāde vesāliyaṃ khattiyamahāsālakule nibbatti. Taṃ thirasantasārīratāya **therikāti** vohariṃsu. Sā vayappattā kulappadesādinā samānajatīkassa khattiyakumārassa mātāpitūhi dinnā patidevatā hutvā vasantī satthu vesāligamane sāsane paṭiladdhasaddhā upāsikā hutvā, aparabhāge mahāpajāpatigotamītheriyā santike dhammaṃ sutvā pabbajjāya ruciṃ uppādetvā “ahaṃ pabbajissāmi”ti sāmikassārocesi. Sāmiko nānujānāti. Sā pana katādhikāratāya yathāsutaṃ dhammaṃ paccavekkhitvā rūpārūpadhamme pariggahetvā vipassanaṃ anuyuttā viharati.

Athekadivasaṃ mahānase byañjane paccamāne mahatī aggijālā utṭhahi. Sā aggijālā sakalabhājanaṃ taṭataṭāyantaṃ jhāyati. Sā taṃ disvā tadevārammaṇaṃ katvā suṭṭhutaṃ aniccatāṃ upaṭṭhahantaṃ upadhāretvā tato tattha dukkhāniccānattatañca āropetvā vipassanaṃ vaḍḍhetvā anukkamena ussukkāpetvā maggapaṭipāṭiyā anāgāmiphale patiṭṭhahi. Sā tato paṭṭhāya ābharaṇaṃ vā alaṅkāraṃ vā na dhāreti. Sā sāmikena “kasmā tvaṃ, bhadde, idāni pubbe viya ābharaṇaṃ vā alaṅkāraṃ vā na dhāresi”ti vuttā attano gihibhāve abhabbhāvaṃ ārocetvā pabbajjaṃ anujānāpesi. So visākho upāsako viya dhammadinnaṃ mahatā parihārena mahāpajāpatigotamiyā santikaṃ netvā “imaṃ, ayye, pabbājethā”ti āha. Atha mahāpajāpatigotamī taṃ pabbājetvā upasampādetvā vihāraṃ netvā satthāraṃ dassesi. Satthāpissā pakatiyā diṭṭhārammaṇameva vibhāvento “**sukhaṃ supāhī**”ti gāthamāha.

Tattha **sukhanti** bhāvanapūṃsakaniddeso. **Supāhīti** āṇattivacanaṃ. **Theriketi** āmantanavacanaṃ. **Katvā coḷena pārutāti** appicchatāya niyojanaṃ. **Upasanto hi te rāgoti** paṭipattikittanaṃ. **Sukkhadākaṃvāti** upasametabbassa kilesassa asārabhāvanidassanaṃ. **Kumbhiyanti** tadādāhārassa aniccatucchādibhāvanidassanaṃ.

Sukhanti cetāṃ iṭṭhādhivacanaṃ. Sukhena nidukkhā hutvāti attho. **Supāhīti** nipajjanidassanañcetaṃ catunnaṃ iriyāpathānaṃ, tasmā cattāropi iriyāpathe sukheveva kappehi sukhaṃ viharāti attho. **Theriketi** idaṃ yadipi tassā nāmakittanaṃ, pacurena anvatthasaññābhāvato pana thire sāsane thirabhāvappatte, thirehi silādiddhammehi samannāgateti attho. **Katvā coḷena pārutāti** paṃsukūlacōḷehi cīvaraṃ katvā acchādītasārīrā taṃ nivatthā ceva pārutā ca. **Upasanto hi te rāgoti** hi-saddo hetvattho. Yasmā tava santāne uppajjanakakāmarāgo upasanto anāgāmimaggañāṇagginā daḍḍho, idāni tadavasesaṃ rāgaṃ aggamaggañāṇagginā dahetvā sukhaṃ supāhīti adhippāyo. **Sukkhadākaṃva kumbhiyanti** yathā taṃ pakke bhājane appakaṃ ḍākabyañjanaṃ mahatiyā aggijālāya paccamānaṃ jhāyitvā sussantaṃ vūpasammati, yathā vā udakamisse ḍākabyañjane uddhanaṃ āropetvā paccamāne udake vijjamāne taṃ ciccīṭāyati cīṭīcīṭāyati, udake pana chinne upasantameva hoti, evaṃ tava santāne kāmarāgo upasanto, itarampi vūpasammetvā sukhaṃ supāhīti.

Therī indriyānaṃ paripākaṃ gatattā satthu desanāvīlāsena ca gāthāpariyosāne saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.1.26-30).

“Koṇāgamanabuddhassa, maṇḍapo kārīto mayā;
Dhuvam ticīvaraṃdāsīm, buddhassa lokabandhuno.

“Yaṃ yaṃ janapadaṃ yāmi, nigame rājadhāniyo;
Sabbattha pūjito homi, puññakammassidaṃ phalaṃ.

“Kilesā jhāpitā mayhaṃ, bhavā sabbe samūhatā;
Nāgīva bandhanaṃ chetvā, viharāmi anāsavā.

“Svāgataṃ vata me āsi, buddhaseṭṭhassa santike;
Tisso vijjā anuppattā, kataṃ buddhassa sāsanaṃ.

“Paṭisambhidā catasso, vimokkhāpi ca aṭṭhime;
Chaḷabhiññā sacchikatā, kataṃ buddhassa sāsana’nti.

Arahattaṃ pana patvā therī udānenti tameva gāthaṃ abhāsi, tenāyaṃ gāthā tassā theriyā gāthā ahoṣi. Tattha theriyā vuttagāthāya anavaseso rāgo pariggahito aggamaggena tassa vūpasamassa adhippetattā. Rāgavūpasameneva cettha sabbesampi kilesānaṃ vūpasamo vuttoti daṭṭhabbaṃ tadekaṭṭhatāya sabbesaṃ kilesadhammānaṃ vūpasamasiddhito. Tathā hi vuccati –

“Uddhaccavicikicchāhi, yo moho sahajo mato;
Pahānekaṭṭhabhāvena, rāgena saraṇo hi so’nti.

Yathā cettha sabbesaṃ saṃkilesānaṃ vūpasamo vutto, evaṃ sabbatthāpi tesāṃ vūpasamo vuttoti veditabbaṃ. Pubbhāge tadaṅgavasena, samathavipassanākkhaṇe vikkhambhanavasena, maggakkhaṇe samucchavedavasena, phalakkhaṇe paṭippassaddhivasena vūpasamasiddhito. Tena catubbidhassāpi pahānassa siddhi veditabbā. Tattha tadaṅgappahānena sīlasampadāsiddhi, vikkhambhanapahānena samādhisampadāsiddhi, itarehi paññāsampadāsiddhi dassitā hoti pahānābhisamayopasijjhanato. Yathā bhāvanābhisamayaṃ sādheti tasmīṃ asati tadabhāvato, tathā sacchikiriyābhisamayaṃ pariññābhisamayaṃ sādheti evāti. Caturābhisamayasiddhiyā tisso sikkhā, paṭipattiyā tividhakalyāṇatā, sattavisuddhiyo ca paripuñṇā imāya gāthāya pakāsītā hontīti veditabbaṃ. **Aññatarātherī** apaññātā nāmagottādivasena apākatā, ekā therī lakkhaṇasampannā bhikkhunī imaṃ gāthaṃ abhāsīti adhippāyo.

Aññatarātherīgāthāvaṇṇanā niṭṭhitā.

2. Muttātherīgāthāvaṇṇanā

2. “Mutte muccassu yogehi, cando rāhuggahā iva;
Vippamuttana cittaena, anaṇā bhuñja piṇḍaka’nti. –

Ayaṃ muttāya nāma sikkhamānāya gāthā. Ayampi purimabuddhesu katādhikārā tattha tattha bhava vivaṭṭupanissayaṃ kusalaṃ upacinanti vipassissa bhagavato kāle kulagehe nibbattitvā viññutaṃ patvā ekadivasāṃ satthāraṃ rathiyāṃ gacchantaṃ disvā pasannamānasā pañcapaṭiṭṭhitena vanditvā pīṭivegena satthu pādāmūle avakujjā nipajji. Sā tena puññakammena devaloke nibbattitvā aparāparaṃ sugatīsuveva saṃsaranti imasmīṃ buddhuppāde sāvattiyāṃ brāhmaṇamahāsālakule nibbatti, **muttā**tissā nāmaṃ ahoṣi. Sā upanissayasampannatāya vīsativassakāle mahāpajāpatigotamiyā santike pabbajitvā sikkhamānāva hutvā kammaṭṭhānaṃ kathāpetvā vipassanāya kammaṃ karoti. Sā ekadivasāṃ bhattakiccaṃ katvā piṇḍapātaṭṭhāntā therīnaṃ bhikkhunīnaṃ vattaṃ dassetvā divāṭṭhānaṃ gantvā raho nisinnā vipassanāya manasikāraṃ ārabhi. Satthā surabhigandhakuṭiyā nisinnova obhāsaṃ vissajjetvā tassā purato nisinno viya attānaṃ dassetvā “**mutte muccassu yogehī**”ti imaṃ gāthamāha.

Tattha **mutteti** tassā ālapanāṃ. **Muccassu yogehī**ti maggaṭṭipāṭiyā kāmayogādīhi catūhi yogehi mucca, tehi vimuttacittā hohi. Yathā kiṃ? **Cando rāhuggahā ivāti** rāhusaṅkhāto gahato cando viya upakkilesato muccassu. **Vippamuttana cittaenāti** ariyamaggena samucchavedavimuttīyā suṭṭhu vimuttana cittaena, itthaṃ bhūtalakkhaṇe cetāṃ karaṇavacanaṃ. **Anaṇā bhuñja piṇḍakanti** kilesaṇaṃ pahāya anaṇā hutvā raṭṭhapīṇḍaṃ bhuñjeyyāsi. Yo hi kilese appahāya satthārā anuññātapaccaye paribhuñjati, so sāṇo paribhuñjati nāma. Yathāha āyasmā bākulo – “sattāhameva kho ahaṃ, āvuso, sāṇo raṭṭhapīṇḍaṃ bhuñji’nti (ma. ni. 3.211). Tasmā sāsane pabbajitena kāmacchandādiṇaṃ pahānāya anaṇena hutvā saddhādeyyaṃ paribhuñjitabbaṃ. **Piṇḍakanti** desanāsīsameva, cattāropi paccayeti attho. **Abhiṇhaṃ ovadatīti** ariyamaggapattiyā upakkilese visodhento bahuso ovādaṃ deti.

Sā tasmim ovāde ʒatvā nacirasseva arahattam pāpuṇi. Tena vuttam **apadāne** (apa. therī 2.1.31-36)

“Vipassissa bhagavato, lokajetthassa tādino;
Rathiyam paṭipannassa, tārayantassa pāṇino.

“Gharato nikkhamitvāna, avakujjā nipajjaham;
Anukampako lokanātho, sirasi akkamī mama.

“Akkamitvāna sirasi, agamā lokanāyako;
Tena cittappasādena, tusitam agamāsaham.

“Kilesā jhāpitā mayham...pe... katam buddhassa sāsana’’nti.

Arahattam pana patvā sā tameva gātham udānesi. Paripuṇṇasikkhā upasampajjitvā aparabhāge parinibbānakālepi tameva gātham paccabhāsīti.

Muttātherīgāthāvaṇṇanā niṭṭhitā.

3. Puṇṇātherīgāthāvaṇṇanā

Puṇṇe pūrassu dhammehīti puṇṇāya nāma sikkhamānāya gāthā. Ayampi purimabuddhesu katādhikārā tattha tattha bhava vivaṭṭūpanissayam kusalam upacinantī buddhasuññe loke candabhāgāya nadiyā tīre kinnarayoniyam nibbattā. Ekadivasaṃ tattha aññataram paccekabuddham disvā pasannamānasā naḷamālāya tam pūjetvā añjaliṃ paggayha aṭṭhāsī. Sā tena puññakammena sugatīsuyeva saṃsarantī imasmim buddhuppāde sāvattiyam gahapatimahāsālakule nibbatti. **Puṇṇā**tissā nāmam ahoṣi. Sā upanissayasampannatāya vīsativassāni vasamānā mahāpajāpatigotamiyā santike dhammam sutvā paṭiladdhasaddhā pabbajitvā sikkhamānā eva hutvā vipassanam ārabhi. Satthā tassā gandhakuṭiyam nisinno eva obhāsam vissajjetvā –

3. “Puṇṇe pūrassu dhammehi, cando pannaraseriva;
Paripuṇṇāya paññāya, tamokhandham padālayā’’ti. – imam gāthamāha;

Tattha **puṇṇeti** tassā ālapanam. **Pūrassu dhammehīti** sattatiṃsabodhipakkhiyadhammehi paripuṇṇā hohi. **Cando pannaraserivāti** ra-kāro padasandhikaro. Pannarase puṇṇamāsiyam sabbāhi kalāhi paripuṇṇo cando viya. **Paripuṇṇāya paññāyāti** soḷasannam kiccānam pāripūriyā paripuṇṇāya arahattamaggapaññāya. **Tamokhandham padālayāti** mohakkhandham anavasesato bhinda samucchinda. Mohakkhandhapadālanena saheva sabbepi kilesā padālitā hontīti.

Sā tam gātham sutvā vipassanam vadḍhetvā arahattam pāpuṇi. Tena vuttam **apadāne** (apa. therī 2.1.37-45) –

“Candabhāgānadītīre, ahoṣim kinnarī tadā;
Addasaṃ virajam buddham, sayambhum aparājitam.

“Pasannacittā sumanā, vedajātā katañjalī;
Naḷamālam gahetvāna, sayambhum abhipūjayim.

“Tena kamma sukatenā, cetanāpaṇidhīhi ca;
Jahitvā kinnarīdeham, agacchim tidaṣam gatim.

“Chattiṃsadevarājūnaṃ, mahesittamakārayiṃ;
Dasannaṃ cakkavattīnaṃ, mahesittamakārayiṃ;
Saṃvejetvāna me cittaṃ, pabbajiṃ anagāriyaṃ.

“Kilesā jhāpitā mayhaṃ, bhavā sabbe samūhatā;
Sabbāsavaparikkhīṇā, natthi dāni punabbhavo.

“Catunnavutito kappe, yaṃ pupphamabhipūjayiṃ;
Duggatiṃ nābhijānāmi, pupphapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā sā therī tameva gāthaṃ udānesi. Ayameva cassā aññābyākaraṇagāthā ahoṣīti.

Puññātherīgāthāvaṇṇanā niṭṭhitā.

4. Tissātherīgāthāvaṇṇanā

Tisse sikkhassu sikkhāyāti tissāya sikkhamānāya gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinitvā sambhatakusalapaccayā imasmim buddhuppāde kapilavattusmim sakyarājakule nibbattitvā vayappattā bodhisattassa orodhabhūtā pacchā mahāpajāpatigotamiyā saddhiṃ nikkhamitvā pabbajitvā vipassanāya kammaṃ karoti. Tassā satthā heṭṭhā vuttanayeneva obhāsaṃ vissajjetvā –

4. “Tisse sikkhassu sikkhāya, mā taṃ yogā upaccaguṃ;
Sabbayogavisamṃyuttā, cara loke anāsavā’nti. – gāthaṃ abhāsi;

Tattha **tisseti** tassā ālapanāṃ. **Sikkhassu sikkhāyāti** adhisīlasikkhādikāya tividhāya sikkhāya sikkha, maggasampayuttā tisso sikkhāyo sampādehīti attho. Idāni tāsāṃ sampādane kāraṇamāha “**mā taṃ yogā upaccagu**’nti manussattaṃ, indriyāvekallaṃ, buddhuppādo, saddhāpaṭilābhoti ime yogā samayā dullabhakkhaṇā taṃ mā atikkamuṃ. Kāmayogādayo eva vā cattāro **yogā taṃ mā upaccaguṃ** mā abhibhaveyyuṃ. **Sabbayogavisamṃyuttāti** sabbehi kāmayogādīhi yogehi vimuttā tato eva anāsavā hutvā loke cara, diṭṭhasukhavihārena viharāhīti attho.

Sā taṃ gāthaṃ sutvā vipassanaṃ vadḍhetvā arahattaṃ pāpuṇīti ādinayo heṭṭhā vuttanayeneva veditabbo.

Tissātherīgāthāvaṇṇanā niṭṭhitā.

5-10. Tissāditherīgāthāvaṇṇanā

Tisse yuñjassu dhammehīti tissāya theriyā gāthā. Tassā vatthu **tissā**sikkhamānāya vatthusadisam. Ayaṃ pana therī hutvā arahattaṃ pāpuṇi. Yathā ca ayaṃ, evaṃ ito paraṃ **dhīrā, vīrā, mittā, bhadrā, upasamāti** pañcannaṃ therīnaṃ vatthu ekasadisameva. Sabbāpi imā kapilavattuvāsiniyo bodhisattassa orodhabhūtā mahāpajāpatigotamiyā saddhiṃ nikkhantā obhāsaḡāthāya ca arahattaṃ pattā ṭhapetvā sattamiṃ. Sā pana obhāsaḡāthāya vinā pageva satthu santike laddhaṃ ovādaṃ nissāya vipassanaṃ ussukkāpetvā arahattaṃ pāpuṇitvā udānavasena “vīrā vīrehi’nti gāthaṃ abhāsi. Itarāpi arahattaṃ patvā –

5. “Tisse yuñjassu dhammehi, khaṇo taṃ mā upaccagā;
Khaṇātītā hi socanti, nirayamhi samappitā.

6. “Dhīre nirodhaṃ phusehi, saññāvūpasamaṃ sukhaṃ;
Ārādhayāhi nibbānaṃ, yogakkhemamanuttaraṃ.
7. “Vīrā vīrehi dhammehi, bhikkhunī bhāvitindriyā;
Dhāreti antimaṃ dehaṃ, jetvā māraṃ savāhanaṃ.
8. “Saddhāya pabbajitvāna, mitte mittaratā bhava;
Bhāvehi kusale dhamme, yogakkhemassa pattiyā.
9. “Saddhāya pabbajitvāna, bhadre bhadraratā bhava;
Bhāvehi kusale dhamme, yogakkhemamanuttaraṃ.
10. “Upasame tare oghaṃ, maccudheyyaṃ suduttaraṃ;
Dhārehi antimaṃ dehaṃ, jetvā māraṃ savāhana”nti. – gāthāyo abhāsimsu;

Tattha **yuñjassu dhammehī**ti samathavipassanādhammehi ariyehi bodhipakkhiyadhammehi ca yuñja yogaṃ karohi. **Khaṇo taṃ mā upaccagāti** yo evaṃ yogabhāvanaṃ na karoti, taṃ puggalaṃ patirūpadese uppattikkhaṇo, channaṃ āyatanānaṃ avekallakkhaṇo, buddhuppādakkhaṇo, saddhāya paṭiladdhakkhaṇo, sabbopi ayaṃ khaṇo atikkamati nāma. So khaṇo taṃ mā atikkami. **Khaṇātītāti** ye hi khaṇaṃ atītā, ye ca puggale so khaṇo abhīto, te nirayamhi samappitā hutvā socanti, tattha nibbattivā mahādukkhaṃ paccanubhavantīti attho.

Nirodhaṃ phusehīti kilesanirodhaṃ phussa paṭilabha. **Saññāvūpasamaṃ sukhaṃ, ārādhayāhi nibbānanti** kāmasaññādiṇaṃ pāpasaññānaṃ upasamanimittaṃ accantasukhaṃ nibbānaṃ ārādhehi.

Vīrā vīrehi dhammehīti vīriyapadhānatāya vīrehi tejussadehi ariyamaggadhammehi **bhāvitindriyā** vaḍḍhitasaddhādiindriyā vīrā bhikkhunī vatthukāmehi savāhanaṃ kilesamāraṃ jinitvā āyatim punabbhavābhāvato antimaṃ dehaṃ dhāretīti therī aññaṃ viya katvā attānaṃ dasseti.

Mitteti taṃ ālapati. **Mittaratāti** kalyāṇamittesu abhiratā. Tattha sakkārasammānakaraṇatā hohi. **Bhāvehi kusale dhammeti** ariyamaggadhamme vaḍḍhehi. **Yogakkhemassāti** arahattassa nibbānassa ca pattiyā adhiḡamaṃya.

Bhadreti taṃ ālapati. **Bhadraratāti** bhadresu sīlādidhammesu ratā abhiratā hohi. **Yogakkhemamanuttaranti** catūhi yogehi khemaṃ anupaddavaṃ anuttaraṃ nibbānaṃ, tassa pattiyā kusale bodhipakkhiyadhamme bhāvehīti attho.

Upasameti taṃ ālapati. **Tare oghaṃ maccudheyyaṃ suduttaranti** maccu ettha dhīyatīti maccudheyyaṃ, anupacitakusalasambhārehi suṭṭhu duttaranti suduttaraṃ, saṃsāramahoghaṃ **tare** ariyamaggaṇāvāya tareyyāsi. **Dhārehi antimaṃ dehanti** tassa taraṇeneva antimadehadharā hohīti attho.

Tissāditherīgāthāvaṇṇanā niṭṭhitā.

Niṭṭhitā paṭhamavaggavaṇṇanā.

11. Muttātherīgāthāvaṇṇanā

Sumuttā sādhumuttāmhītiādikā muttātheriyā gāthā. Ayampi purimabuddhesu katādhikārā tattha tattha bhava kusalaṃ upacinitvā imasmim buddhuppāde kosalaṃjanapade **oghātakassa** nāma daliddabrāhmaṇassa dhīta hutvā nibbatti, taṃ vayappattakāle mātāpitaro ekassa khujjabrāhmaṇassa adamsu. Sā tena gharāvāsaṃ arocantī taṃ anujānāpetvā pabbajitvā vipassanāya kammaṃ karoti. Tassā

bahiddhārammaṇesu cittaṃ vidhāvati, sā taṃ niggaṇhantī “sumuttā sādhumuttāmhī”’ti gāthaṃ vadantīyeva vipassanaṃ ussukkāpetvā saha paṭisambhidāhi arahattaṃ pāpuṇi. Tena vuttaṃ **apadāne** –

“Padumuttaro nāma jino, sabbadhammesu cakkhumā;
Pāṇine anugaṇhanto, piṇḍāya pāvisī puramaṃ.

“Tassa āgacchato satthu, sabbe nagaravāsino;
Haṭṭhatuṭṭhā samāgantvā, vālikā ākirimsu te.

“Vīthisammajjanaṃ katvā, kadalipuṇṇakaddhaje;
Dhūmaṃ cuṇṇaṇca māsaṇca, sakkāraṃ kacca satthuno.

“Maṇḍapaṃ paṭiyādetvā, nimantetvā vināyakaṃ;
Mahādānaṃ daditvāna, sambodhiṃ abhipatthayi.

“Padumuttaro mahāvīro, hārako sabbapāṇinaṃ;
Anumodaniyaṃ katvā, byākāsi aggapuggalo.

“Satasahassee atikkante, kappo hessati bhaddako;
Bhavābhavē sukhaṃ laddhā, pāpuṇissasi bodhiyaṃ.

“Hatthakammaṇca ye keci, katāvī naranāriyo;
Anāgatamhi addhāne, sabbā hessanti sammukhā.

“Tena kammavipākena, cetanāpaṇidhīhi ca;
Uppannadevabhavane, tuyhaṃ tā paricārikā.

“Dibbaṃ sukhamasaṅkhyeyaṃ, mānusaṇca asaṅkhiyaṃ;
Anubhonti ciraṃ kālaṃ, saṃsarimha bhavābhavē.

“Satasahassito kappe, yaṃ kammamakariṃ tadā;
Sukhumālā manusse, atho devapuresu ca.

“Rūpaṃ bhogaṃ yasaṃ āyuaṃ, atho kittisukhaṃ piyaṃ;
Labhāmi satataṃ sabbaṃ, sukataṃ kammasampadaṃ.

“Pacchime bhavē sampatte, jātāhaṃ brāhmaṇe kule;
Sukhumālahatthapādā, ramaṇiye nivesane.

“Sabbakālampi pathavī, na passāmanalaṅkataṃ;
Cikkhallabhūmiṃ asuciṃ, na passāmi kudācanaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā udānentī –

11. “Sumuttā sādhumuttāmhi, tīhi khujjehi muttiyā;
Udukkhalena musalena, patinā khujjakena ca;
Muttāmhi jātimaraṇā, bhavanetti samūhatā’nti. – imaṃ gāthaṃ abhāsī;

Tattha **sumuttā**ti suṭṭhu muttā. **Sādhumuttāmhī**ti sādhu sammadeva muttā amhi. Kuto pana sumuttā sādhumuttāti āha “**tīhi khujjehi muttiyā**”ti, tīhi vaṅkakehi parimuttīyāti attho. Idāni tāni sarūpato dassentī “**udukkhalena musalena, patinā khujjakena cā**”ti āha. Udukkhale hi dhaññaṃ pakkhipantiyā parivattentiya musalena koṭṭentiya ca piṭṭhi onāmetabbā hotīti khujjakaraṇahetutāya tadubhayaṃ “khujja”nti vuttaṃ. Sāmiko panassā khujjo eva. Idāni yassā muttiyā nidassanavasena tīhi khujjehi mutti vuttā. Tameva dassentī “**muttāmhī jātimaraṇā**”ti vatvā tattha kāraṇamāha “**bhavanetti samūhatā**”ti. Tassattho – na kevalamahaṃ tīhi khujjehi eva muttā, atha kho sabbasmā jātimaraṇāpi, yasmā sabbassāpi bhavassa netti nāyikā taṇhā aggamaggena mayā samugghāṭitāti.

Muttātherīgāthāvaṇṇanā niṭṭhitā.

12. Dhammadinnātherīgāthāvaṇṇanā

Chandajātā avasāyīti dhammadinnātheriyā gāthā. Sā kira padumuttarabuddhakāle haṃsavatīnagare parādhīnavuttikā hutvā jīvantī nirodhato vuṭṭhitassa aggasāvakaṃ pūjāsakkārapubbakaṃ dānaṃ datvā devaloke nibbattā. Tato cavitvā devamanussesu saṃsarantī **phussassa** bhagavato kāle satthu vemātikabhātikānaṃ kammikassa gehe vasamānā dānaṃ paṭicca “ekaṃ dehi”ti sāmikena vutte dve dentī, bahuṃ puññaṃ katvā kassapabuddhakāle **kiṭṭissa** kāsikarañño gehe paṭisandhiṃ gahetvā sattannaṃ bhaginīnaṃ abhantarā hutvā vīsativassasahassāni brahmacariyaṃ caritvā ekaṃ buddhantaṃ devamanussesu saṃsarantī imasmimṃ buddhuppāde rājagahe kulagehe nibbattitvā vayappattā visākhassa seṭṭhino gehaṃ gatā.

Athekadivasam visākho seṭṭhi satthu santike dhammaṃ sutvā anāgāmī hutvā gharaṃ gantvā pāsādaṃ abhiruhanto sopānamatthake ṭhitāya dhammadinnāya pasāritahatthaṃ anālambitvāva pāsādaṃ abhiruhitvā bhuñjamānopi tuṇhībhūtova bhuñji. Dhammadinnā taṃ upadhāretvā, “ayyaputta, kasmā tvaṃ ajja mama hatthaṃ nālambi, bhuñjamānopi na kiñci kathesi, atthi nu kho koci mayhaṃ doso”ti āha. Visākho “dhammadinne, na te doso atthi, ahaṃ pana ajja paṭṭhāya itthisarīraṃ phusituṃ āhāre ca lolabhāvaṃ kātuṃ anaraho, tādiso mayā dhammo paṭividdho. Tvaṃ pana sace icchasi, imasmimyeva gehe vasa. No ce icchasi, yattakena dhanena te attho, tattakaṃ gahetvā kulagharaṃ gacchāhi”ti āha. “Nāhaṃ, ayyaputta, tayā vantavamaṇaṃ ācamissāmi, pabbajjaṃ me anujānāhi”ti. Visākho “sādhu, dhammadinne”ti taṃ suvaṇṇasivikāya bhikkhuniupassayaṃ pesesi. Sā pabbajitvā kammaṭṭhānaṃ gahetvā katipāhaṃ tattha vasitvā vivekavāsaṃ vasitukāmā ācariyupajjhāyānaṃ santikaṃ gantvā, “ayyā, ākiṇṇaṭṭhāne mayhaṃ cittaṃ na ramati, gāmakāvāsaṃ gacchāmi”ti āha. Bhikkhuniyo taṃ gāmakāvāsaṃ nayimsu. Sā tattha vasantī atīte madditasāṅkhārātāya na cirasseva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.3.95-130) –

“Padumuttaro nāma jino, sabbadhammāna pāragū;
Ito satasahassamhi, kappe uppajji nāyako.

“Tadāhaṃ haṃsavatiyaṃ, kule aññatare ahuṃ;
Parakammakārī āsiṃ, nīpakā sīlasaṃvutā.

“Padumuttarabuddhassa, sujāto aggasāvako;
Vihārā abhinikkhamma, piṇḍapātāya gacchati.

“Ghaṭaṃ gahetvā gacchantī, tadā udakahārikā;
Taṃ disvā adadaṃ pūpaṃ, pasannā sehi pāṇibhi.

“Paṭiggahetvā tattheva, nisinno paribhuñji so;
Tato netvāna taṃ gehaṃ, adāsiṃ tassa bhojanaṃ.

“Tato me ayyako tuṭṭho, akarī suṇisaṃ sakam;
Sassuyā saha gantvāna, sambuddham abhivādayim.

“Tadā so dhammakathikaṃ, bhikkhuniṃ parikittayaṃ;
Ṭhapesi etadaggamhi, taṃ sutvā muditā aham.

“Nimantayitvā sugataṃ, sasaṅghaṃ lokanāyakaṃ;
Mahādānaṃ daditvāna, taṃ ṭhānamabhipatthayim.

“Tato maṃ sugato āha, ghananinnādasussaro;
Mamupaṭṭhānanirate, sasaṅghaparivesike.

“Saddhammassavane yutte, guṇavaddhitamānase;
Bhadde bhavassu muditā, lacchase paṇidhīphalaṃ.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādā, orasā dhammanimmitā;
Dhammadinnāti nāmena, hessati satthu sāvikā.

“Taṃ sutvā muditā hutvā, yāvajīvaṃ mahāmuniṃ;
Mettacittā paricariṃ, paccayehi vināyakaṃ.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Imamhi bhaddake kappe, brahmabandhu mahāyaso;
Kassapo nāma gottena, uppajji vadataṃ varo.

“Upaṭṭhāko mahesissa, tadā āsi narissaro;
Kāsirājā kikī nāma, bārāṇasipuruttame.

“Chaṭṭhā tassāsahaṃ dhītā, sudhammā iti vissutā;
Dhammaṃ sutvā jinaggassa, pabbajjaṃ samarocayim.

“Anujāni na no tāto, agāreva tadā mayaṃ;
Vīsavassasahassāni, vicarimha atanditā.

“Komāribrahmacariyaṃ, rājakaññā sukhedhitā;
Buddhopaṭṭhānaniratā, muditā satta dhītarō.

“Samaṇī samaṇaguttā ca, bhikkhuni bhikkhudāyikā;
Dhammā ceva sudhammā ca, sattamī saṅghadāyikā.

“Khemā uppalavaṇṇā ca, paṭācārā ca kuṇḍalā;
Gotamī ca ahañceva, visākhā hoti sattamī.

“Tehi kammehi sukatehi, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Pacchime ca bhavē dāni, giribbajapuruttame;
Jātā seṭṭhikule phīte, sabbakāmasamiddhine.

“Yadā rūpaḡuṇūpetā, paṭhame yobbane ṭhitā;
Tadā parakulaḡ gantvā, vasiḡ sukhasamappitā.

“Upetvā lokasaraṇaḡ, suṇitvā dhammadesanaḡ;
Anāḡāmiḡphalaḡ patto, sāmiko me subuddhimā.

“Tadāhaḡ anujānetvā, pabbajiḡ anagāriyaḡ;
Nacireneva kālena, arahattamaḡpāpuṇiḡ.

“Tadā upāsako so maḡ, upagantvā apucchatha;
Gambhīre nipuṇe pañhe, te sabbe byākariḡ ahaḡ.

“Jino tasmimḡ guṇe tuṭṭho, etadagge ṭhapesi maḡ;
Bhikkhuniḡ dhammakathikaḡ, nāññaḡ passāmi edisiḡ.

“Dhammadinnā yathā dhīrā, evaḡ dhāretha bhikkhavo;
Evāhaḡ paṇḡitā homi, nāyakenānukampitā.

“Pariciṇṇo mayā satthā, kataḡ buddhassa sāsanaḡ;
Ohito garuko bhāro, bhavanetti samūhatā.

“Yassatthāya pabbajitā, agārasmānagāriyaḡ;
So me attho anupatto, sabbasaḡyojanakkhayo.

“Iddhīsu ca vasī homi, dibbāya sotadhātuyā;
Paracittāni jānāmi, satthusāsanaḡkārikā.

“Pubbenivāsaḡ jānāmi, dibbacakkhu visodhitāḡ;
Khepetvā āsave sabbe, visuddhāsiḡ sunimmaḡ.

“Kilesā jhāpitā mayhaḡ...pe... kataḡ buddhassa sāsana”nti. (apa. therī 2.3.95-130);

Arahattaḡ pana patvā “mayhaḡ manaḡ matthakaḡ pattaḡ, idāni idha vasitvā kiḡ karissāmi, rājagahameva gantvā satthāraṇca vandissāmi, bahū ca me ñātakā puññaṇi karissantī”ti bhikkhuniḡ saddhiḡ rājagahameva paccāgatā. Visākho tassā āgatabhāvaḡ sutvā tassā adhigamaḡ vīmaḡsanto pañcakkhandhādivasena pañhaḡ pucchi. Dhammadinnā sunisitena satthena kumudanaḡle chindantī viya pucchitaḡ pucchitaḡ pañhaḡ vissajjesi. Visākho sabbhaḡ pucchāvissajjananayaḡ satthu ārocesi. Satthā “paṇḡitā, visākha, dhammadinnā bhikkhuni”tiadinā taḡ pasamsanto sabbaññaṇiṇaṇena saddhiḡ saḡsandetvā byākatabhāvaḡ pavedetvā tameva cūḡavedallasuttaḡ (ma. ni. 1.460) aṭṭhuppattiḡ katvā taḡ dhammakathikānaḡ bhikkhuniṇaḡ aggaṭṭhāne ṭhapesi. Yadā pana sā tasmimḡ ḡamakāvāse vasantī heṭṭhimamaḡge adhigantvā aggaḡaggatthāya vipassanaḡ patṭhapesi, tadā –

12. “Chandajātā avasāyī, manasā ca phuṭā siyā;
Kāmesu appaṭibaddhacittā, uddhaḡsotātī vuccatī”ti. –

Imaḡ ḡāthaḡ abhāsi.

Tattha **chandajātā**ti aggaḡphalattaḡ jātacchandaḡ. **Avasāyī**ti avasāyo vuccati avasānaḡ niṭṭhānaḡ,

tampi kāmesu appaṭibaddhacittatāya “uddhaṃsotā”ti vakkhamānattā samaṇakiccassa niṭṭhānaṃ veditabbaṃ, na yassa kassaci, tasmā padadvayenāpi appattamānasā anuttaram yogaḅkhemam patthayamānāti ayamatto vutto hoti. **Manasā ca phuṭā siyāti** heṭṭhimehi tīhi maggacittehi nibbānaṃ phuṭā phusitā bhavēyya. **Kāmesu appaṭibaddhacittāti** anāgāmimaggavasena kāmesu na paṭibaddhacittā. **Uddhaṃsotāti** uddhameva maggasoto saṃsārasoto ca etissāti uddhaṃsotā. Anāgāmino hi yathā aggamaggo uppajjati, na añño, evam avihādīsu uppannassa yāva akaniṭṭhā uddhameva uppatti hotīti.

Dhammadinnātherīgāthāvaṇṇanā niṭṭhitā.

13. Visākhātherīgāthāvaṇṇanā

Karotha buddhasāsananti visākhāya theriyā gāthā. Tassā vatthu dhīrātheriyāvatthusadisameva. Sā arahattaṃ patvā vimuttisukhena vītināmentī –

13. “Karotha buddhasāsanam, yaṃ katvā nānutappati;
Khippaṃ pādāni dhovivā, ekamante nisīdathā”ti. –

Imāya gāthāya aññaṃ byākāsi.

Tattha **karotha buddhasāsananti** buddhasāsanam ovādaanusitṭhim karotha, yathānusiṭṭham paṭipajjathāti attho. **Yaṃ katvā nānutappatīti** anusitṭhim katvā karaṇahetu na anutappati takkarassa sammadeva adhippāyānam samijjhanato. **Khippaṃ pādāni dhovivā, ekamante nisīdathāti** idam yasmā sayam pacchābhattaṃ piṇḍapātaṭikkantā ācariyupajjhāyānam vattaṃ dassetvā attano divāṭṭhāne pāde dhovivā raho nisinnā sadattaṃ matthakam pāpesi, tasmā tattha aññepi niyojenti avoca.

Visākhātherīgāthāvaṇṇanā niṭṭhitā.

14. Sumanātherīgāthāvaṇṇanā

Dhātuyo dukkhato disvāti sumanāya theriyā gāthā. Tassā vatthu tissātheriyā vatthusadisam. Imissāpi hi sathā obhāsam vissajjetvā purato nisinno viya attānam dassetvā –

14. “Dhātuyo dukkhato disvā, mā jātim punarāgami;
Bhave chandaṃ virājetvā, upasantā carissasī”ti. –

Imam gāthamāha. Sā gāthāpariyosāne arahattaṃ pāpuṇi.

Tattha **dhātuyo dukkhato disvāti** sasantatipariyāpannā cakkhādidhātuyo itarāpi ca udayabbayapaṭipīṇādinā “dukkhā”ti nāṇacakkhunā disvā. **Mā jātim punarāgamīti** puna jātim āyatim punabbhavaṃ mā upagacchi. **Bhave chandaṃ virājetvāti** kāmabhavādiḅe sabbasmim bhava taṇhāchandaṃ virāgasāṅkhātena maggena pajahivā. **Upasantā carissasīti** sabbaso pahīnakilesatāya nibbutā viharissasi.

Ettha ca “dhātuyo dukkhato disvā”ti iminā dukkhānupassanāmukhena vipassanā dassitā. “Bhave chandaṃ virājetvā”ti iminā maggo, “upasantā carissasī”ti iminā saupādisesā nibbānadhātu, “mā jātim punarāgami”ti iminā anupādisesā nibbānadhātu dassitāti daṭṭhabbaṃ.

Sumanātherīgāthāvaṇṇanā niṭṭhitā.

15. Uttarātherīgāthāvaṇṇanā

Kāyena saṃvutā āsinti uttarāya theriyā gāthā. Tassāpi vatthu tissātheriyā vatthusadisam. Sāpi hi sakyakulappasutā bodhisattassa orodhabhūtā mahāpajāpatigotamiyā saddhiṃ nikkhantā obhāsagāthāya arahattaṃ patvā pana –

15. “Kāyena saṃvutā āsiṃ, vācāya uda cetasā;
Samūlaṃ taṇhamabbuyha, sītibhūtāmi nibbutā”ti. –

Udānavasena tameva gātham abhāsi.

Tattha **kāyena saṃvutā āsinti** kāyikena saṃvarena saṃvutā ahoṣiṃ. **Vācāyāti** vācasikena saṃvarena saṃvutā āsinti yojanā, padadvayenāpi silasaṃvaramāha. **Udāti** atha. **Cetasāti** samādhicittena, etena vipassanābhāvanamāha. **Samūlaṃ taṇhamabbuyhāti** sānusayaṃ, saha vā avijjāya taṇham uddharitvā. Avijjāya hi paṭicchādītādīnave bhavattaye taṇhā uppajjati.

Aparo nayo – **kāyena saṃvutāti** sammākammanāna sabbaso micchākammanāna pahānā maggasaṃvareneva kāyena saṃvutā āsiṃ. **Vācāyāti** sammāvācāya sabbaso micchāvācāya pahānā maggasaṃvareneva vācāya saṃvutā āsinti attho. **Cetasāti** samādhinā. Cetosīsenā hettha sammāsamādhī vutto, sammāsamādhiggaṇṇeṇa maggalakkhaṇeṇa ekalakkhaṇā sammādiṭṭhiādayo maggadhammā gahitāva hontīti, maggasaṃvarena abhijjhādikassa asaṃvarassa anavasesato pahānaṃ dassitaṃ hoti. Tenevāha “samūlaṃ taṇhamabbuyhā”ti. **Sītibhūtāmi nibbutāti** sabbaso kilesapariḷāhābhāvena sītibhāvappattā anupādisesāya nibbānadhātuyā nibbutā amhīti.

Uttarātherīgāthāvaṇṇanā niṭṭhitā.

16. Vuḍḍhapabbajitasumanātherīgāthāvaṇṇanā

Sukhaṃ tvaṃ vuḍḍhike sehi sumanāya vuḍḍhapabbajitāya gāthā. Ayampi purimabuddhesu katādhikārā tattha tattha bhava kusalaṃ upacinitvā imasmīṃ buddhuppāde sāvattiyam mahākosalarāṇṇo bhaginī hutvā nibbatti. Sā satthārā raṇṇo pasenadissa kosalassa “cattāro kho me, mahārāja, daharāti na uññātabbā”tiādīnā (saṃ. ni. 1.112) desitaṃ dhammaṃ sutvā laddhappasādā saraṇesu ca sīlesu ca paṭiṭṭhāya pabbajitukāmāpi “ayyikaṃ paṭijaggissāmī”ti cirakālaṃ vītināmetvā aparabhāge ayyikāya kālaṅkatāya raṇṇā saddhiṃ mahagghāni attharaṇapāvuraṇāni gāhāpetvā vihāraṃ gantvā saṅghassa dāpetvā satthu santike dhammaṃ sutvā anāgāmiṃphale paṭiṭṭhitā pabbajjaṃ yāci. Satthā tassā ṇāṇaparipākāṃ disvā –

16. “Sukhaṃ tvaṃ vuḍḍhike sehi, katvā coḷena pārutā;
Upasanto hi te rāgo, sītibhūtāsi nibbutā”ti. –

Imaṃ gātham abhāsi. Sā gāthāpariyosāne saha paṭisambhidāhi arahattaṃ patvā udānavasena tameva gātham abhāsi. Idameva cassā aññābyākaraṇam ahoṣi, sā tāvadeva pabbajī. Gāthāya pana **vuḍḍhiketi** vuḍḍhe, vayovuḍḍheti attho. Ayaṃ pana silādiguṇehipi vuḍḍhā, theriyā vuttagāthāya catutthapāde sītibhūtāsi nibbutāti yojetabbaṃ. Sesam vuttanayameva.

Vuḍḍhapabbajitasumanātherīgāthāvaṇṇanā niṭṭhitā.

17. Dhammātherīgāthāvaṇṇanā

Piṇḍapātaṃ caritvānāti dhammāya theriyā gāthā. Ayampi purimabuddhesu katādhikārā tattha tattha bhava vivaṭṭupānissayaṃ kusalaṃ upacinitvā sambhatapuññasambhārā imasmīṃ buddhuppāde

sāvattiyaṃ kulaghare nibbattivā vayappattā patirūpassa sāmikassa gehaṃ gantvā sāsane paṭiladdhasaddhā pabbajitukāmā hutvā sāmikena ananuññātā pacchā sāmike kālānkate pabbajitvā vipassanāya kammaṃ karontī ekadivasam bhikkhāya caritvā vihāraṃ āgacchantī paripatitvā tameva ārammaṇaṃ katvā vipassanaṃ vaḍḍhetvā saha paṭisambhidāhi arahattaṃ patvā –

17. “Piṇḍapātaṃ caritvāna, daṇḍamolubbha dubbalā;
Vedhamānehi gattehi, tattheva nipatiṃ chamā;
Disvā ādīnavaṃ kāye, atha cittaṃ vimucci me”’ti. –

Udānavasena imaṃ gāthaṃ abhāsi.

Tattha **piṇḍapātaṃ caritvāna, daṇḍamolubbhāti** piṇḍapātathāya yaṭṭhiṃ upatthambhena nagare vicaritvā bhikkhāya āhiṇḍitvā. **Chamāti** chamāyaṃ bhūmiyaṃ, pādānaṃ avasena bhūmiyaṃ nipatinti attho. **Disvā ādīnavaṃ kāyeti** asubhāniccadukkhānattatādīhi nānappakārehi sarīre dosaṃ paññācakkhunā disvā. **Atha cittaṃ vimucci meti** ādīnavānupassanāya parato pavattehi nibbidānupassanādīhi vikkhambhanavasena mama cittaṃ kilesehi vimuccitvā puna maggaphalehi yathākkamaṃ samucchadavasena ceva paṭippassaddhivasena ca sabbaso vimucci vimuttaṃ, na dānissā vimocetabbaṃ atthīti. Idameva cassā aññābyākaraṇaṃ ahoṣīti.

Dhammātherīgāthāvaṇṇanā niṭṭhitā.

18. Saṅghātherīgāthāvaṇṇanā

Hitvā ghare pabbajitvāti saṅghāya theriyā gāthā. Tassā vatthu dhīrātheriyā vatthusadisam. Gāthā pana –

18. “Hitvā ghare pabbajitvā, hitvā puttaṃ pasuṃ piyaṃ;
Hitvā rāgañca dosañca, avijjañca virājiya;
Samūlaṃ taṇhamabbuyha, upasantāmi nibbutā”’ti. – gāthaṃ abhāsi;

Tattha **hitvāti** chaḍḍetvā. **Gharetī** gehaṃ. Gharasaddo hi ekasmimpi abhidheyve kadāci bahūsu bījaṃ viya rūlḥhivasena voharīyati. **Hitvā puttaṃ pasuṃ piyanti** piyāyitabbe putte ceva gomahiṃsādike pasū ca tappaṭibaddhachandarāgappahānena pahāya. **Hitvā rāgañca dosañcāti** rajjanasabhāvaṃ rāgaṃ, dussanasabhāvaṃ dosañca ariyamaggena samucchinditvā. **Avijjañca virājiyāti** sabbākusalesu pubbaṅgamaṃ mohañca virājetvā maggena samuggahāetvā icceva attho. Sesam vuttanayameva.

Saṅghātherīgāthāvaṇṇanā niṭṭhitā.

Ekakanipātavaṇṇanā niṭṭhitā.

2. Dukanipāto

1. Abhirūpanandātherīgāthāvaṇṇanā

Dukanipāte **āturaṃ asuciṃ pūti**tiādikā abhirūpanandāya sikkhamānāya gāthā. Ayaṃ kira vipassissa bhagavato kāle bandhumatīnagare gahapatimahāsālassa dhītā hutvā satthu santike dhammaṃ sutvā saraṇesu ca sīlesu ca paṭiṭṭhitā satthari parinibbute dhātucetiyaṃ ratanapaṭimaṇḍitena suvaṇṇacchattena pūjaṃ katvā, kālānkavā sagge nibbattivā aparāparaṃ sugatīsuyeva saṃsarantī imasmiṃ buddhuppāde kapilavatthunagare khemakassa sakkassa aggamaheṣiyā kucchismiṃ nibbatti. **Nandātissā** nāmaṃ ahoṣi. Sā atabhāvassa ativiya rūpasobhaggappattiyā abhirūpā dassanīyā pāsādikā

abhirūpanandātveva paññāyittha. Tassā vayappattāya vāreyyadivaseyeva varabhūto sakyakumāro kālamakāsi. Atha naṃ mātāpitaro akāmaṃ pabbājesuṃ.

Sā pabbajitvāpi rūpaṃ nissāya uppannamadā “satthā rūpaṃ vivaṇṇeti garahati anekapariyāyena rūpe ādīnavam dasseti”ti buddhupaṭṭhānaṃ na gacchati. Bhagavā tassā ñānaparipākaṃ ñatvā mahāpajāpatiṃ āñāpesi “sabbāpi bhikkhuniyo paṭipāṭiyā ovādaṃ āgacchantū”ti. Sā attano vāre sampatte aññaṃ pesesi. Bhagavā “vāre sampatte attanāva āgantabbam, na añña pesetabbā”ti āha. Sā satthu ānaṃ laṅghituṃ asakkontī bhikkhunīhi saddhiṃ buddhupaṭṭhānaṃ agamāsi. Bhagavā iddhiyā ekaṃ abhirūpaṃ itthirūpaṃ māpetvā puna jarājīṇṇaṃ dassetvā saṃvegaṃ uppādetvā –

19. “Āturaṃ asuciṃ pūtiṃ, passa nande samussayaṃ;
Asubhāya cittaṃ bhāvehi, ekaggaṃ susamāhitaṃ.

20. “Animittañca bhāvehi, mānānusayamujjaha;
Tato mānābhisamayā, upasantā carissasi”ti. –

Imā dve gāthā abhāsi. Tāsaṃ attho heṭṭhā vuttanayo eva. Gāthāpariyosāne abhirūpanandā arahattaṃ pāpuṇi. Tena vuttaṃ **apadāne** –

“Nagare bandhumatiyā, bandhumā nāma khattiyo;
Tassa rañño ahuṃ bhariyā, ekajjhaṃ cārayāmaṃ.

“Rahogatā nisīditvā, evaṃ cintesahaṃ tadā;
Ādāya gamanīyañhi, kusalaṃ natthi me kataṃ.

“Mahābhitāpaṃ kaṭukaṃ, ghorarūpaṃ sudāruṇaṃ;
Nirayaṃ nūna gacchāmi, ettha me natthi saṃsayo.

“Evāhaṃ cintayitvāna, paṃsetvāna mānaṃ;
Rājānaṃ upagantvāna, idaṃ vacanamabravim.

“Itthī nāma mayaṃ deva, purisānugatā sadā;
Ekaṃ me samaṇaṃ dehi, bhojayissāmi khattiya.

“Adāsi me mahārājā, samaṇaṃ bhāvitindriyaṃ;
Tassa pattaṃ gahetvāna, paramannena pūrayim.

“Pūrayitvā paramannaṃ, saḥassagghanakenahaṃ;
Vatthayugena chādetvā, adāsiṃ tuṭṭhamānasā.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Sahassaṃ devarājūnaṃ, mahesittamakārayim;
Sahassaṃ cakkavattīnaṃ, mahesittamakārayim.

“Padesarajjaṃ vipulaṃ, gaṇanāto asaṅkhiyaṃ;
Nānāvidhaṃ bahuṃ puññaṃ, tassa kammaphalā tato.

“Uppalasseva me vaṇṇā, abhirūpā sudassanā;
Itthī sabbaṅgasampannā, abhijātā jutindharā.

“Pacchime bhavasampatte, ajāyīm sākiye kule;
Nārīśahassapāmokkhā, suddhodanasutassahaṃ.

“Nibbinditvā agārehaṃ, pabbajīm anagāriyaṃ;
Sattamiṃ rattim sampatvā, catusaccaṃ apāpuṇim.

“Cīvarapiṇḍapātañca, paccayañca senāsanam;
Parimetuṃ na sakkomi, piṇḍapātassidaṃ phalaṃ.

“Yaṃ mayhaṃ purimaṃ kammaṃ, kusalaṃ janitaṃ muni;
Tuyhatthāya mahāvīra, pariciṇṇaṃ bahuṃ mayā.

“Ekatiṃse ito kappe, yaṃ dānamadadiṃ tadā;
Duggatiṃ nābhijānāmi, piṇḍapātassidaṃ phalaṃ.

“Duve gatī pajānāmi, devattaṃ atha mānusaṃ;
Aññaṃ gatiṃ na jānāmi, piṇḍapātassidaṃ phalaṃ.

“Ucce kule pajānāmi, tayo sāle mahādhanē;
Aññaṃ kulaṃ na jānāmi, piṇḍapātassidaṃ phalaṃ.

“Bhavābhavē saṃsaritvā, sukkamūlena coditā;
Amanāpaṃ na passāmi, somanassakataṃ phalaṃ.

“Iddhīsu ca vasī homi, dibbāya sotadhātuyā;
Cetopariyaññaṃ, vasī homi mahāmune.

“Pubbenivāsaṃ jānāmi, dibbacakkhu visodhitam;
Sabbāsavaparikkhīṇā, natthi dāni punabbhavo.

“Atthadhammaniruttīsu, paṭibhāne tatheva ca;
Ññaṃ mama mahāvīra, uppannaṃ tava santike.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ patvā pana sā sayampi udānavasena tāyeva gāthā abhāsi, idameva cassā aññābyākaraṇaṃ ahoṣīti.

Abhirūpanandātherīgāthāvaṇṇanā niṭṭhitā.

2. Jentātherīgāthāvaṇṇanā

Ye ime satta bojjaṅgātiādikā jentāya theriyā gāthā. Tassā atītaṃ paccuppannañca vatthu abhirūpanandāvattusadisamaṃ. Ayaṃ pana vesāliyaṃ licchavirājakule nibbattīti ayameva viseso. Sattārā desitaṃ dhammaṃ sutvā desanāpariyosāne arahattaṃ patvā attanā adhigataṃ visesaṃ paccavekkhitvā pītiवासena –

21. “Ye ime satta bojjaṅgā, maggā nibbānapattiyā;
Bhāvitā te mayā sabbe, yathā buddhena desitā.
22. “Diṭṭho hi me so bhagavā, antimoyaṃ samussayo;
Vikkhīṇo jātiśamsāro, natthi dāni punabbhavo’nti. –

Imā dve gāthā abhāsi.

Tattha ye **ime satta bojjhaṅgā**ti ye ime satidhammavicayavīriyapītipassaddhisamādhiupekkhāsāṅkhātā bodhiyā yathāvuttāya dhammasāmaggiyā, bodhissa vā bujjanakassa taṃsamaṅgino puggalassa aṅgabhūtattā “bojjhaṅgā”ti laddhanāmā satta dhammā. **Maggā nibbānapattiyā**ti nibbānādhigamassa upāyabhūtā. **Bhāvitā te mayā sabbe, yathā buddhena desitā**ti te sattatiṃsa bodhipakkhiyadhammā sabbepe mayā yathā buddhena bhagavatā desitā, tathā mayā uppādītā ca vaḍḍhitā ca.

Diṭṭho hi me so bhagavāti hi-saddo hetuattho. Yasmā so bhagavā dhammakāyo sammāsambuddho attanā adhigataariyadhammadassanena diṭṭho, tasmā antimoyaṃ samussayoti yojanā. Ariyadhammadassanena hi buddhā bhagavanto aññe ca ariyā diṭṭhā nāma honti, na rūpakāyadassanamattena. Yathāha – “yo kho, vakkali, dhammaṃ passati, so maṃ passati”ti (saṃ. ni. 3.87) ca “sutavā ca kho, bhikkhave, ariyasāvako ariyānaṃ dassāvī”ti (ma. ni. 1.20; saṃ. ni. 3.1) ca ādi. Sesam vuttanayameva.

Jentātherīgāthāvaṇṇanā niṭṭhitā.

3. Sumaṅgalamātutherīgāthāvaṇṇanā

Sumuttikātiādikā sumaṅgalamātāya theriyā gāthā. Ayampi purimabuddhesu katādhikārā tattha tattha bhava kusalaṃ upacinitvā imasmiṃ buddhuppāde sāvattiyam daliddakule nibbattivā vayappattā aññatarassa naḷakārassa dinnā paṭhamagabbheyeva pacchimabhavikaṃ puttam labhi. Tassa **sumaṅgaloti** nāmaṃ ahoṣi. Tato paṭṭhāya sā **sumaṅgalamātā**ti paññāyittha. Yasmā panassā nāmagottaṃ na pākaṭam, tasmā “aññatarā therī bhikkhunī apaññātā”ti pāliyaṃ vuttam. Sopissā putto viññutaṃ patto pabbajitvā saha paṭisambhidāhi arahattaṃ patvā **sumaṅgalattheroti** pākaṭo ahoṣi. Tassa mātā bhikkhunīsu pabbajitvā vipassanāya kammaṃ karontī ekadivasaṃ gihikāle attanā laddhadukkaṃ paccavekkhitvā saṃvegajātā vipassanaṃ vaḍḍhetvā saha paṭisambhidāhi arahattaṃ patvā udānentī –

23. “Sumuttikā sumuttikā, sādhumuttikāmi musalassa;
Ahiriko me chattaṃ vāpi, ukkhalikā me deḍḍubhaṃ vātī.
24. “Rāgañca ahaṃ dosañca, cicciṭi cicciṭi vihanāmi;
Sā rukkhamūlamupagamma, ‘aho sukha’nti sukhatō jhāyāmi”ti. –

Imā dve gāthā abhāsi.

Tattha **sumuttikā**ti sumuttā. Ka-kāro padapūraṇamattaṃ, suṭṭhu muttā vatāti attho. Sā sāsane attanā paṭiladdhasampattiṃ disvā pasādavasena, tassā vā pasamsāvasena āmantetvā vuttam “sumuttikā sumuttikā”ti. Yaṃ pana gihikāle visesato jigucchati, tato vimuttiṃ dassentī “**sādhumuttikāmi**”tiādimāha. Tattha **sādhumuttikāmi**ti sammadeva muttā vata amhi. **Musalassāti** musalato. Ayaṃ kira daliddabhāvena gihikāle sayameva musalakammaṃ karoti, tasmā evamāha. **Ahiriko meti** mama sāmiko ahiriko nillajjo, so mama na rucattīti vacanaseso. Pakatiyāva kāmesu virattacittatāya kāmādhimuttānaṃ pavattiṃ jigucchantī vadati. **Chattaṃ vāpi**ti jīvītahetukena kariyamānaṃ chattaṃ me na rucattīti attho. Vā-saddo avuttasamuccayattho, tena peḷācaṅkoṭakādiṃ saṅgaṇhāti. Veḷudaṇḍādīni gahetvā divase divase chattaṃ karaṇavasena dukkhajīvitam jigucchantī vadati. “Ahitako me vāto vātī”ti keci vatvā ahitako jarāvaho gihikāle mama sarīre vāto vāyatīti atthaṃ vadanti. Apare pana “ahitako paresam duggandhataro ca mama sarīrato vāto vāyatī”ti atthaṃ vadanti. **Ukkhalikā me deḍḍubhaṃ vātī**ti me mama bhattapacanabhājanam cirapārivāsikabhāvena aparissuddhatāya udakasappagandham vāyati, tato ahaṃ sādhumuttikāmi yojanā.

Rāgañca ahaṃ dosañca, ciccīti ciccīti vihanāmīti ahaṃ kilesajettḥakaṃ rāgañca dosañca ciccīti ciccīti iminā saddena saddhiṃ vihanāmi vināsemi, pajahāmīti attho. Sā kira attano sāmikaṃ jigucchanti tena divase divase phāliyamānānaṃ sukkhānaṃ veḷudaṇḍādīnaṃ saddaṃ garahantī tassa pahānaṃ rāgadosapahānena samaṃ katvā avoca. **Sā rukkhamaḷamupagammāti** sā ahaṃ sumaṅgalamātā vivittaṃ rukkhamaḷaṃ upasaṅkamitvā. **Sukhato jhāyāmīti** sukhanti jhāyāmi, kālena kālaṃ samāpajjantī phalasukhaṃ nibbānasukhañca paṭisaṃvediyamānā phalajjhānena jhāyāmīti attho. **Aho sukhanti** idaṃ panassā samāpattito pacchā pavattamanasikāravasena vuttaṃ, pubbābhogavasenātipi yujjateva.

Sumaṅgalamātutherīgāthāvaṇṇanā niṭṭhitā.

4. Aḍḍhakāsitherīgāthāvaṇṇanā

Yāva kāsijanapadotiādikā aḍḍhakāsiyā theriyā gāthā. Ayaṃ kira kassapassa dasabalassa kāle kulagehe nibbattitvā viññutaṃ patvā bhikkhunīnaṃ santikaṃ gantvā dhammaṃ sutvā paṭiladdhasaddhā pabbajitvā bhikkhunīsīle ṭhitaṃ aññataraṃ paṭisambhidāppattaṃ khīṇāsavatttheriṃ gaṇikāvādena akkositvā, tato cutā niraye paccitvā imasmim buddhuppāde kāsikaraṭṭhe uḷāravibhave seṭṭhikule nibbattitvā vuddhippattā pubbe katassa vacīduccaritassa nissandena ṭhānato paribhaṭṭhā gaṇikā aho. Nāmena **aḍḍhakāsī** nāma. Tassā pabbajjā ca dūtena upasampadā ca **khandhake** āgatāyeva. Vuttañhetam –

Tena kho pana samayena aḍḍhakāsī gaṇikā bhikkhunīsu pabbajitā hoti. Sā ca sāvattiṃ gantukāmā hoti “bhagavato santike upasampajjissāmī”ti. Assosum kho dhuttā – “aḍḍhakāsī kira gaṇikā sāvattiṃ gantukāmā”ti. Te magge pariyuṭṭhiṃsu. Assosi kho aḍḍhakāsī gaṇikā “dhuttā kira magge pariyuṭṭhitā”ti. Bhagavato santike dūtaṃ pāhesi – “ahañhi upasampajjitukāmā, kathaṃ nu kho mayā paṭipajjitabba”nti? Atha kho bhagavā etasmim nidāne etasmim pakaraṇe dhammim kathaṃ katvā bhikkhū āmantesi – “anujānāmi, bhikkhave, dūtenapi upasampādetu”nti (cūlava. 430).

Evam laddhūpasampadā pana vipassanāya kammaṃ karontī na cirasseva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.4.168-183) –

“Imamhi bhaddake kappe, brahmabandhu mahāyaso;
Kassapo nāma gottena, uppajji vadatam varo.

“Tadāhaṃ pabbajitvāna, tassa buddhassa sāsane;
Saṃvutā pātīmokkhamhi, indriyesu ca pañcasu.

“Mattaññunī ca asane, yuttā jāgariyepi ca;
Vasantī yuttayogāhaṃ, bhikkhuniṃ vigatāsavaṃ.

“Akkosim duṭṭhacittāhaṃ, gaṇiketi bhaṇim tadā;
Tena pāpena kammaṃ, nirayamhi apaccisaṃ.

“Tena kammāvasesena, ajāyim gaṇikākule;
Bahusova parādhīnā, pacchimāya ca jātiyaṃ.

“Kāsīsu seṭṭhikulajā, brahmacārībalenaṃ;
Accharā viya devesu, ahoṣim rūpasampadā.

“Disvāna dassanīyaṃ maṃ, giribajapuruttame;
Gaṇikatte nivesesum, akkosanabalena me.

“Sāhaṃ sutvāna saddhammaṃ, buddhaseṭṭhena desitaṃ;
Pubbavāsanasampannā, pabbajimā anagāriyaṃ.

“Tadūpasampadathāya, gacchantī jinasantikaṃ;
Magge dhutte ṭhite sutvā, labhiṃ dūtopasampadaṃ.

“Sabbakammaṃ parikkhīṇaṃ, puññaṃ pāpaṃ tatheva ca;
Sabbasaṃsāramuttiṇṇā, gaṇikattaṅca khepitaṃ.

“Iddhīsu ca vasī homi, dibbāya sotadhātuyā;
Cetopariyaññaṃ, vasī homi mahāmunē.

“Pubbenivāsaṃ jānāmi, dibbacakkhu visodhitaṃ;
Sabbāsavaparikkhīṇā, natthi dāni punabbhavo.

“Atthadhammaniruttīsu, paṭibhāne tatheva ca;
Ñāṇaṃ mama mahāvīra, uppannaṃ tava santike.

“Kilesā jhāpitā mayhaṃ...pe... kataṃ buddhassa sāsana’nti. (apa. therī 2.4.168-183);
Arahattaṃ pana patvā udānavasena –

25. “Yāva kāsijanapado, suṅko me tattako ahu;
Taṃ katvā negamo agghaṃ, aḍḍhenagghaṃ ṭhapesi maṃ.

26. “Atha nibbindahaṃ rūpe, nibbindaṅca virajjahaṃ;
Mā puna jātiṣaṃsāraṃ, sandhāveyyaṃ punappunaṃ;
Tisso vijjā sacchikatā, kataṃ buddhassa sāsana’nti. –

Imā gāthā abhāsi.

Tattha **yāva kāsijanapado, suṅko me tattako ahūti** kāsīsu janapadesu bhavo suṅko kāsijanapado, so yāva yattako, tattako mayhaṃ suṅko ahu ahosi. Kittako pana soti? Sahassamatto. Kāsiratṭhe kira tadā suṅkavasena ekadivasaṃ rañño uppajjanakaāyo ahosi sahassamatto, imāyapi purisānaṃ hatthato ekadivasaṃ laddhadhanaṃ tattakaṃ. Tena vuttaṃ – “yāva kāsijanapado, suṅko me tattako ahū”ti. Sā pana kāsīsuṅkaparimāṇatāya **kāsīti** samaññaṃ labhi. Tattha yebhuyyena manussā sahassaṃ dātuṃ asakkontā tato upaḍḍhaṃ datvā divasabhāgameva ramitvā gacchanti, tesāṃ vasaṇāyaṃ **aḍḍhakāsīti** paññāyittha. Tena vuttaṃ – “**taṃ katvā negamo agghaṃ, aḍḍhenagghaṃ ṭhapesi ma**”nti. Taṃ pañcasatamattaṃ dhaṇaṃ agghaṃ katvā negamo nigamavāsijano itthiratanabhāvena anagghampi samānaṃ aḍḍhena agghaṃ nimittaṃ aḍḍhakāsīti samaññāvasena maṃ ṭhapesi, tathā maṃ voharīti attho.

Atha nibbindahaṃ rūpeti evaṃ rūpūpajīvinī hutvā ṭhitā. Atha pacchā sāsanaṃ nissāya rūpe ahaṃ nibbindim “itipi rūpaṃ aniccaṃ, itipidaṃ rūpaṃ dukkhaṃ, asubha”nti passantī tattha ukkaṇṭhim. **Nibbindaṅca virajjahanti** nibbindantī cāhaṃ tato paraṃ virāgaṃ āpajjim. Nibbindaggahaṇena cettha taruṇavipassanaṃ dasseti, virāgaggahaṇena balavavipassanaṃ. “Nibbindanto virajjati virāgā vimuccati”ti hi vuttaṃ. **Mā puna jātiṣaṃsāraṃ, sandhāveyyaṃ punappunanti** iminā nibbindanavirajjanākāre nidasseti. **Tisso vijjāti**adinā tesāṃ matthakappattim, taṃ vuttanayameva.

Aḍḍhakāsītherīgāthāvaṇṇanā niṭṭhitā.

5. Cittātherīgāthāvaṇṇanā

Kiñcāpi khomhi kisikātiādikā cittāya theriyā gāthā. Ayampi purimabuddhesu katādhikārā tattha tattha bhava vivaṭṭupanissayaṃ kusalaṃ upacinantī ito catunnavutikappe candabhāgāya nadiyā tīre kinnarayoniyaṃ nibbatti. Sā ekadivasaṃ ekaṃ paccekabuddhaṃ rukkhamaññe nisinnaṃ disvā pasannamānasā naḷapupphehi pūjaṃ katvā vanditvā añjaliṃ paggahetvā padakkhiṇaṃ katvā pakkāmi. Sā tena puññakamma devamanussesu saṃsarantī imasmiṃ buddhuppāde rājagahe gahapatimahāsālakule nibbattitvā viññutaṃ patvā satthu rājagahappavesane paṭiladdhasaddhā pacchā mahāpajāpatigotamiyā santike pabbajitvā mahallikākāle gijjhakūṭapabbataṃ abhiruhitvā samañadhammaṃ karontī vipassanaṃ vaḍḍhetvā saha paṭisambhidāhi arahattaṃ pāpuṇi. Tena vuttaṃ **apadāne** –

“Candabhāgānadītīre, ahoṣiṃ kinnarī tadā;
Addasaṃ virajaṃ buddhaṃ, sayambhuṃ aparājitaṃ.

“Pasannacittā sumanā, vedaḷatā katañjalī;
Naḷamālaṃ gahetvāna, sayambhuṃ abhipūjayiṃ.

“Tena kammena sukatenā, cetanāpañidhīhi ca;
Jahitvā kinnarīdehaṃ, agacchiṃ tidaṣaṃ gatiṃ.

“Chattimsadevarājūnaṃ, mahesittamakārayiṃ;
Dasannaṃ cakkavattīnaṃ, mahesittamakārayiṃ;
Saṃvejetvāna me cittaṃ, pabbajiṃ anagāriyaṃ.

“Kilesā jhāpitā mayhaṃ, bhavā sabbe samūhatā;
Sabbāsavaparikkhīṇā, natthi dāni punabbhavo.

“Catunnavutito kappe, yaṃ pupphaṃ abhipūjayiṃ;
Duggatiṃ nābhijānāmi, pupphapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.
Sā pana arahattaṃ patvā attano paṭipattiṃ paccavekkhitvā –

27. “Kiñcāpi khomhi kisikā, gilānā bālhadubbalā;
Daṇḍamolubbha gacchāmi, pabbataṃ abhirūhiya.

28. “Saṅghāṭiṃ nikkhipitvāna, pattakañca nikuḷjiya;
Sele khambhesimattānaṃ, tamokhandhaṃ padāliya’’ti. –

Imā dve gāthā abhāsi.

Tattha **kiñcāpi khomhi kisikā**ti yadipi ahaṃ jarājīṇṇā appamaṃsalohitabhāvena kisasarīrā amhi. **Gilānā bālhadubbalā**ti dhātvaḍdivikārena gilānā, teneva gelaññena ativiya dubbalā. **Daṇḍamolubbha gacchāmi**ti yattha katthaci gacchantī kattarayaṭṭhiṃ ālambitvāva gacchāmi. **Pabbataṃ abhirūhiyā**ti evaṃ bhūtāpi vivekakāmatāya gijjhakūṭapabbataṃ abhiruhitvā.

Saṅghāṭiṃ nikkhipitvānāti santaruttarā eva hutvā yathāsaṃhataṃ aṃse ṭhapitaṃ saṅghāṭiṃ hatthapāse ṭhapetvā. **Pattakañca nikuḷjiyā**ti mayhaṃ valañjanamattikāpattaṃ adhomukhaṃ katvā ekamante ṭhapetvā. **Sele khambhesimattānaṃ, tamokhandhaṃ padāliyā**ti pabbate nisinnā iminā dīghena addhunā apadālitapubbaṃ mohakkhandhaṃ padāletvā, teneva ca mohakkhandhapadālanena attānaṃ attabhāvaṃ khambhesiṃ, mama santānaṃ āyatīṃ anuppattidhammatāpādanena vikkhambhesinti attho.

Cittātherīgāthāvaṇṇanā niṭṭhitā.

6. Mettikātherīgāthāvaṇṇanā

Kiñcāpi khomhi dukkhitātiādikā mettikāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ puññaṃ upacinantī siddhatthassa bhagavato kāle gahapatikule nibbattitvā viññutaṃ patvā satthu cetiye ratanena paṭimaṇḍitāya mekhalāya pūjaṃ akāsi. Sā tena puññakammena devamanussesu saṃsaranā imasmim buddhuppāde rājagahe brāhmaṇamahāsālakule nibbatti. Sesam anantare vuttasadisam. Ayaṃ pana paṭibhāgakūṭam abhiruhitvā samaṇadhammaṃ karontī vipassanaṃ vaḍḍhetvā saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.1.20-25) –

“Siddhatthassa bhagavato, thūpakārāpikā ahuṃ;
Mekhalikā mayā dinnā, navakammāya satthuno.

“Niṭṭhite ca mahāthūpe, mekhalam punadāsaham;
Lokanāthassa munino, pasannā sehi pāṇibhi.

“Catunnavutito kappe, yaṃ mekhalamadaṃ tadā;
Duggatiṃ nābhijānāmi, thūpakārassidaṃ phalaṃ.

“Kilesā jhāpitā mayham...pe... kataṃ buddhassa sāsana’nti.
Arahattaṃ pana patvā attano paṭipattiṃ paccavekkhitvā udānavasena –

29. “Kiñcāpi khomhi dukkhitā, dubbalā gatayobbanā;
Daṇḍamolubbha gacchāmi, pabbataṃ abhirūhiya.

30. “Nikkhipitvāna saṅghāṭiṃ, pattakañca nikujiya;
Nisinnā camhi selamhi, atha cittaṃ vimucci me;
Tisso vijjā anuppattā, kataṃ buddhassa sāsana’nti. –

Imā dve gāthā abhāsi.

Tattha **dukkhitā**ti rogābhavavena dukkhitā sañjātadukkhā dukkhappattā. **Dubbalā**ti tāya ceva dukkhappattiyā, jarājiṇṇatāya ca balavirahitā. Tenāha “**gatayobbanā**”ti, addhagatāti attho.

Atha cittaṃ vimucci meti selamhi pāsāṇe nisinnā camhi, atha tadanantaraṃ vīriyasamatāya sammadeva yojitattā maggaṭṭipāṭiyā sabbehipi āsavehi mama cittaṃ vimucci. Sesam vuttanayameva.

Mettikātherīgāthāvaṇṇanā niṭṭhitā.

7. Mittātherīgāthāvaṇṇanā

Cātuddasiṃ pañcadasitiādikā aparāya mittāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalam upacinantī vipassissa bhagavato kāle khattiyakule nibbattitvā viññutaṃ patvā bandhumassa rañño antepurikā hutvā vipassissa bhagavato sāvikaṃ ekaṃ khīṇāsavattheriṃ disvā pasannamānasā hutvā tassā hatthato pattaṃ gahetvā paṇītassa khādanīyabhojanīyassa pūretvā mahagghena sāṭakayugena saddhiṃ adāsi. Sā tena puññakammena devamanussesu saṃsaranā imasmim buddhuppāde kapilavatthusmiṃ sakyaṛājakule nibbattitvā viññutaṃ patvā satthu santike dhammaṃ sutvā paṭiladdhasaddhā upāsikā ahoṣi. Sā aparabhāge mahāpajāpatigotamiyā santike pabbajitvā katapubbakiccā vipassanāya kammaṃ karontī na cīrasseva

saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.1.46-59) –

‘‘Nagare bandhumatiyā, bandhumā nāma khattiyo;
Tassa rañño ahuṃ bhariyā, ekajjhaṃ cārayāmaḥaṃ.

‘‘Rahogaṭā nisīditvā, evaṃ cintesaḥaṃ tadā;
Ādāya gamanīyañhi, kusalaṃ natthi me kataṃ.

‘‘Mahābhitāpaṃ kaṭukaṃ, ghorarūpaṃ sudāruṇaṃ;
Nirayaṃ nūna gacchāmi, ettha me natthi saṃsayo.

‘‘Rājānaṃ upasaṅkamma, idaṃ vacanamabraviṃ;
Ekaṃ me samaṇaṃ dehi, bhojayissāmi khattiya.

‘‘Adāsi me mahārājā, samaṇaṃ bhāvitindriyaṃ;
Tassa pattaṃ gahetvāna, paramannena pūrayiṃ.

‘‘Pūrayitvā paramannaṃ, gandhālepaṃ akāsahaṃ;
Jālena pidahitvāna, vatthayugena chādayiṃ.

‘‘Ārammaṇaṃ mamaṃ etaṃ, sarāmi yāvajīvitaṃ;
Tattha cittaṃ pasādetvā, tāvatiṃsamagacchahaṃ.

‘‘Tiṃsānaṃ devarājūnaṃ, mahesittamakārayiṃ;
Manasā patthitaṃ mayhaṃ, nibbattati yathicchitaṃ.

‘‘Vīsānaṃ cakkavattīnaṃ, mahesittamakārayiṃ;
Ocittāva hutvāna, saṃsarāmi bhavesvahaṃ.

‘‘Sabbabandhanamuttāhaṃ, apetā me upādikā;
Sabbāsavaparikkhīṇā, natthi dāni punabbhavo.

‘‘Ekanavutito kappe, yaṃ dānamadadiṃ tadā;
Duggatiṃ nābhijānāmi, piṇḍapātassidaṃ phalaṃ.

‘‘Kilesā jhāpitā mayhaṃ...pe... kataṃ buddhassa sāsana’’nti. (apa. therī 2.1.46-59);
Arahattaṃ pana patvā attano paṭipattiṃ paccavekkhitvā pītisomanassajātā udānavasena –

31. ‘‘Cātuddasiṃ pañcadasiṃ, yā ca pakkhassa aṭṭhamī;
Pāṭihāriyapakkaṅka, aṭṭhaṅgasusamāgataṃ.

32. ‘‘Uposathaṃ upāgacchiṃ, devakāyābhinandinī;
Sājja ekena bhattena, muṇḍā saṅghāṭipārūtā;
Devakāyaṃ na patthehaṃ, vineyya hadaye dara’’nti. – imā dve gāthā abhāsi;

Tattha **cātuddasiṃ pañcadasinti** catuddasannaṃ pūraṇī cātuddasī, pañcadasannaṃ pūraṇī pañcadasī, taṃ cātuddasiṃ pañcadasīṅka, pakkhassāti sambandho. Accantasamyoge cetam upayogavacanaṃ. **Yā ca pakkhassa aṭṭhamī**, tañcāti yojanā. **Pāṭihāriyapakkaṅkācāti** pariharaṇakapakkaṅka cātuddasīpañcadasīaṭṭhamīnaṃ yathākkamaṃ ādito antato vā pavesaniggamavasena uposathasīlassa pariharitabbapakkaṅka terasīpāṭipadasattamīnavamīsū cāti attho. **Aṭṭhaṅgasusamāgatanti** pāṇātipātā veramaṇīādīhi aṭṭhahi aṅgehi suṭṭhu samannāgataṃ. **Uposathaṃ**

upāgacchinti upavāsaṃ upagamim, upavasinti attho. Yaṃ sandhāya vuttam –

“Pāṇaṃ na hane na cādinnaṃ mādiye, musā na bhāse na ca majjapo siyā;
Abrahmacariyā virameyya methunā, rattiṃ na bhuñjeyya vikālabhojanaṃ.

“Mālaṃ na dhāre na ca gandhamācare, mañce chamāyaṃ va sayetha santhate;
Etañhi aṭṭhaṅgikamāhuposathaṃ, buddhena dukkhantaṅgā pakāsita’nti. (su. ni. 402-403);

Devakāyābhinandinī tatrūpapattiākaṅkhāvasena cātumahārājikādiṃ devakāyaṃ abhipatthentī uposathaṃ upāgacchinti yojanā. **Sājja ekena bhattenā**ti sā ahaṃ ajja imasmiṃyeva divase ekena bhattabhojanakkhaṇena. **Muṇḍā saṅghāṭipārutāti** muṇḍitakesā saṅghāṭipārutasarīrā ca hutvā pabbajitāti attho. **Devakāyaṃ na patthehanti** aggamaggassa adhigatattā kañci devanikāyaṃ ahaṃ na patthaye. Tenevāha – “**vineyya hadaye dara**’nti, cittaṅgataṃ kilesadarathaṃ samucchadavasena vinetvāti attho. Idameva cassā aññābyākaraṇaṃ ahoṣi.

Mittātherīgāthāvaṇṇanā niṭṭhitā.

8. Abhayamātutherīgāthāvaṇṇanā

Uddham pādatalātiādikā abhayamātāya theriyā gāthā. Ayampi purimabuddhesu katādhikārā tattha tattha bhava puññāni upacinantī tissassa bhagavato kāle kulagehe nibbattitvā viññutaṃ patvā ekadivasam sathhāraṃ piṇḍāya carantaṃ disvā pasannamānasā pattaṃ gahetvā kaṭacchumattaṃ bhikkhaṃ adāsi. Sā tena puññakamma devamanussesu saṃsarantī imasmiṃ buddhuppāde tādisena kammanissandena ujjeniyam padumavatī nāma nagarasobhiṇī ahoṣi. Rājā bimbisāro tassā rūpasampattiādike guṇe sutvā purohitassa ācikkhi – “ujjeniyam kira padumavatī nāma gaṇikā ahoṣi, tamahaṃ daṭṭhukāmomhī’nti. Purohito “sādhu, devā’nti mantabalena **kumbhīraṃ** nāma yakkhaṃ āvahetvā yakkhānubhāvena rājānaṃ tāvadeva ujjenīnagaraṃ nesi. Rājā tāya saddhiṃ ekarattiṃ saṃvāsaṃ kappesi. Sā tena gabbhaṃ gaṇhi. Rañño ca ārocesi – “mama kucchiyaṃ gabbho patiṭṭhahī’nti. Taṃ sutvā rājā naṃ “sace putto bhavēyya, vaḍḍhetvā mamaṃ dassehī’nti vatvā nāmamuddikaṃ datvā agamāsi. Sā dasamāsaccayena puttaṃ vijāyitvā nāmaggahaṇadivase **abhayoti** nāmaṃ akāsi. Puttañca sattavassikakāle “tava pitā bimbisāramahārājā’nti rañño santikaṃ paṇiṇi. Rājā taṃ puttaṃ passitvā puttasiṇhaṃ paṭilabhitvā kumārakaparihārena vaḍḍhesi. Tassa saddhāpaṭilābho pabbajjā visesādhigamo ca heṭṭhā āgatoyeva. Tassa mātā aparabhāge puttassa abhayattherassa santike dhammaṃ sutvā paṭiladdhasaddhā bhikkhunīsu pabbajitvā vipassanāya kammaṃ karontī nacirasseva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.1.60-70) –

“Piṇḍacāraṃ carantassa, tissanāmassa satthuno;
Kaṭacchubhikkhaṃ paggayha, buddhasatthasāsaṃ.

“Paṭiggahetvā sambuddho, tisso lokagganāyako;
Vīthiyā saṅghito satthā, akā me anumodanaṃ.

“Kaṭacchubhikkhaṃ datvāna, tāvatimsaṃ gamissasi;
Chattimsadevarājūnaṃ, mahesittaṃ karissasi.

“Paññāsaṃ cakkavattīnaṃ, mahesittaṃ karissasi;
Manasaṃ patthitaṃ sabbam, paṭilacchasi sabbadā.

“Sampattiṃ anubhotvāna, pabbajissasi kiñcanā;
Sabbāsava pariññāya, nibbāyissasināsavā.

“Idaṃ vatvāna sambuddho, tisso lokaggaṇāyako;
Nabhaṃ abbhuggamī vīro, haṃsarājāva ambare.

“Sudinnaṃ me dānavaraṃ, suyitṭhā yāgasampadā;
Kaṭacchubhikkhaṃ datvāna, pattāhaṃ acalaṃ padaṃ.

“Dvenavute ito kappe, yaṃ dānamadadiṃ tadā;
Duggatiṃ nābhijānāmi, bhikkhādānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.

Arahattaṃ pana patvā attano puttana abhayattherena dhammaṃ kathentena ovādavasena yā gāthā bhāsītā, udānavasena sayampi tā eva paccudāharantī –

33. “Uddhaṃ pādatalā amma, adho ve kesamatthakā;
Paccavekkhassumaṃ kāyaṃ, asuciṃ pūtigandhikaṃ.

34. “Evaṃ viharamānāya, sabbo rāgo samūhato;
Pariḷāho samucchino, sītībhūtāmi nibbutā’’ti. – āha;

Tattha paṭhamagāthāya tāva ayaṃ saṅkhepattho – **amma** padumavati, pādatalato uddhaṃ kesamatthakato adho nānappakāraasucipūritāya **asuciṃ** sabbakālaṃ pūtigandhavāyanato **pūtigandhikaṃ**, imaṃ kucchitānaṃ āyatanatāya **kāyaṃ** sarīraṃ nāṇacakkhunā paccavekkhassūti. Ayañhi tassā puttana ovādādānavasena bhāsītā gāthā.

Sā taṃ sutvā arahattaṃ patvā udānentī ācariyapūjāvasena tameva gāthaṃ paṭhamaṃ vatvā attano paṭipattiṃ kathentī “**evaṃ viharamānāyā**’’ti dutiyaṃ gāthamāha.

Tattha **evaṃ viharamānāyā**ti evaṃ mama puttana abhayattherena “uddhaṃ pādatalā’’tiādinā dinne ovāde ṭhatvā sabbakāyaṃ asubhato disvā ekaggacittā tattha bhūtopādāyabhede rūpadhamme tappaṭibaddhe vedanādi ke arūpadhamme pariggahetvā tattha tilakkhaṇaṃ āropetvā aniccānupassanādivasena viharamānāya. **Sabbo rāgo samūhatoti** vuṭṭhānagāmini vipassanāya maggena ghaṭitāya maggapaṭipāṭiyā aggamaggena sabbo rāgo mayā samūhato samugghāṭito. **Pariḷāho samucchino**ti tato eva sabbo kilesapariḷāho sammadeva ucchino, tassa ca samucchinnatā eva **sītībhūtā** saupādisesāya nibbānadhātuyā nibbutā amhīti.

Abhayamātutherīgāthāvaṇṇanā niṭṭhitā.

9. Abhayātherīgāthāvaṇṇanā

Abhaye bhiduro kāyotiādikā abhayattheriyā gāthā. Ayampi purimabuddhesu katādhikārā tattha tattha bhaye vivaṭṭupanissayaṃ puññaṃ upacinantī sikhissa bhagavato kāle khattiyamahāsālakule nibbattitvā viññutaṃ patvā **aruṇarañño** aggamahesī ahoṣi. Rājā tassā ekadivasaṃ gandhasampannāni satta uppālāni adāsi. Sā tāni gahetvā “kiṃ me imehi piḷandhantehi. Yaṃnūnāhaṃ imehi bhagavantaṃ pūjessāmi’’ti cintetvā nisīdi. Bhagavā ca bhikkhācāra velāyaṃ rājanivesanaṃ pāvīsi. Sā bhagavantaṃ disvā pasannamānasā paccuggantvā tehi pupphehi pūjetvā pañcapaṭiṭṭhitena vandi. Sā tena puññakamma devamanussesu saṃsarantī imasmīṃ buddhuppāde ujjeniyaṃ kulagehe nibbattitvā viññutaṃ patvā abhayamātusahāyikā hutvā tāya pabbajitāya tassā sinehena sayampi pabbajitvā tāya saddhiṃ rājagahe vasamānā ekadivasaṃ asubhadassanattaṃ sītavanaṃ agamāsi. Satthā gandhakuṭiyaṃ nisinnova tassā anubhūtapubbaṃ ārammaṇaṃ purato katvā tassā uddhumātakādibhāvaṃ pakāsesi. Taṃ disvā saṃvegāmanasā aṭṭhāsi. Satthā obhāsaṃ pharitvā purato nisinnaṃ viya attānaṃ dassetvā –

35. “Abhaye bhiduro kāyo, yattha sattā puthujjanā;
Nikkhipissāmimaṃ dehaṃ, sampajānā satīmatī.
36. “Bahūhi dukkhadhammehi, appamādaratāya me;
Taṇhakkhayo anuppatto, kataṃ buddhassa sāsana’nti. –

Imā gāthā abhāsi. Sā gāthāpariyosāne arahattaṃ pāpuṇi. Tena vuttaṃ **apadāne** (apa. therī 2.1.71-90) –

“Nagare aruṇavatiyā, aruṇo nāma khattiyo;
Tassa rañño ahuṃ bhariyā, vāritaṃ vārayāmaṃ.

“Sattamālaṃ gahetvāna, uppalā devagandhikā;
Nisajja pāsādvare, evaṃ cintesi tāvade.

“Kiṃ me imāhi mālāhi, sirasāropitāhi me;
Varaṃ me buddhaseṭṭhassa, ñāṇamhi abhiropitaṃ.

“Sambuddhaṃ paṭimānentī, dvārāsanne nisīdamaṃ;
Yadā ehiti sambuddho, pūjayissaṃ mahāmuniṃ.

“Kakudho vilasantova, migarājāva kesarī;
Bhikkhusaṅghena sahito, āgacchi vīthiyā jino.

“Buddhassa raṃsiṃ disvāna, haṭṭhā saṃviggamānasā;
Dvāraṃ avāpuritvāna, buddhaseṭṭhamapūjayiṃ.

“Satta uppalapupphāni, parikiṇṇāni ambare;
Chadiṃ karonto buddhassa, matthake dhārayanti te.

“Udaggacittā sumanā, vedajātā katañjalī;
Tattha cittaṃ pasādetvā, tāvatimsamagacchamaṃ.

“Mahānelassa chādamaṃ, dhārenti mama muddhani;
Dibbagandhaṃ pavāyāmi, sattuppalassidaṃ phalaṃ.

“Kadāci nīyamānāya, ñātisaṅghena me tadā;
Yāvataṃ parisā mayhaṃ, mahānelaṃ dharīyati.

“Sattati devarājūnaṃ, mahesittamakārayiṃ;
Sabbattha issarā hutvā, saṃsarāmi bhavābhava.

“Tesaṭṭhi cakkavattīnaṃ, mahesittamakārayiṃ;
Sabbe mamanuvattanti, ādeyyavacanā ahuṃ.

“Uppalasseva me vaṇṇo, gandho ceva pavāyati;
Dubbaṇṇiyaṃ na jānāmi, buddhapūjāyidaṃ phalaṃ.

“Iddhipādesu kusalā, bojjhaṅgabhāvanārātā;
Abhiññāpāramippattā, buddhapūjāyidaṃ phalaṃ.

“Satipaṭṭhānakusalā, samādhijhānagocarā;
Sammappadhānamanuyuttā, buddhapūjāyidaṃ phalaṃ.

“Vīriyaṃ me dhuradhorayaṃ, yogakkhemādhivāhanaṃ;
Sabbāsavaparikkhīṇā, natthi dāni punabbhavo.

“Ekaṭimse ito kappe, yaṃ pupphamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti. (apa. therī 2.1.71-90);
Arahattaṃ pana patvā udānentī tā eva gāthā parivattitvā abhāsi.

Tattha **abhayeti** attānameva ālapati. **Bhiduroti** bhijjanasabhāvo, aniccoti attho. **Yattha sattā puthujjanāti** yasmiṃ khaṇena bhijjanasāle asuciduggandhajegucchapaṭikkūlasabhāve kāye ime andhaputhujjanā sattā laggā laggitā. **Nikkhipissāmimaṃ dehanti** ahaṃ pana imaṃ dehaṃ pūtikāyaṃ puna anādānena nirapekkhā khipissāmi chaḍḍessāmi. Tattha kāraṇamāha “**sampajānā satīmatī**”ti.

Bahūhi dukkhadhammehī jātijarādīhi anekehi dukkhadhammehi phuṭṭhāyāti adhippāyo. **Appamādaratāyāti** tāya eva dukkhotiṇṇatāya paṭiladdhasaṃvegattā sativippavāsasaṅkhāte appamāde ratāya. Sesam vuttanayameva. Ettha ca sathārā desitaniyāmena –

“Nikkhipāhi imaṃ dehaṃ, appamādaratāya te;
Taṇhakkhayaṃ pāpuṇāhi, karohi buddhasāsana”nti. –

Pāṭho, theriyā vuttaniyāmeneva pana saṃgītiṃ āropitattā. **Appamādaratāya** teti appamādaratāya tayā bhavitabbanti attho.

Abhayātherīgāthāvaṇṇanā niṭṭhitā.

10. Sāmātherīgāthāvaṇṇanā

Catukkhattum pañcakkhattuntīādikā sāmāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinitvā sugatīsuyeva saṃsarantī imasmiṃ buddhuppāde kosambiyaṃ gahapatimahāsālakule nibbattitvā **sāmā**tissā nāmaṃ ahoṣi. Sā viññutaṃ pattā sāmāvatīyā upāsikāya piyasahāyikā hutvā tāya kālaṅkatāya saṅjātasamvegā pabbajī. Pabbajitvā ca sāmāvatikaṃ ārabha uppannasokaṃ vinodetum asakkontī ariyamaggaṃ gaṇhitum nāsakkhi. Aparabhāge āsanāsālāya nisinnassa ānandattherassa ovādaṃ sutvā vipassanaṃ paṭṭhapetvā tato sattame divase saha paṭisambhidāhi arahattaṃ pāpuṇi.

Arahattaṃ pana patvā attano paṭipattiṃ paccavekkhitvā taṃ pakāsentī –

37. “Catukkhattum pañcakkhattum, viharā upanikkhamiṃ;
Aladdhā cetaso santiṃ, citte avasavattinī;
Tassā me aṭṭhamī ratti, yato taṇhā samūhatā.

38. “Bahūhi dukkhadhammehi, appamādaratāya me;
Taṇhakkhayaṃ anuppatto, kataṃ buddhassa sāsana”nti. –

Udānavasena imā dve gāthā abhāsi.

Tattha **catukkhattum pañcakkhattum, vihārā upanikkhaminti** “mama vasanakavihāre vipassanāmanasikārena nisinnā samaṇakiccaṃ matthakam pāpetum asakkontī utusappāyābhāvena nanu kho mayhaṃ vipassanā maggena ghaṭṭeti”ti cintetvā cattāro pañca cāti nava vāre vihārā upassayato bahi nikkhamiṃ. Tenāha “**aladdhā cetaso santim, citte avasavattinī**”ti. Tattha **cetaso santinti** ariyamaggasamādhim sandhāyāha. **Citte avasavattinī**ti vīriyasamatāya abhāvena mama bhāvanācitte na vasavattinī. Sā kira ativiya paggahitavīriyā ahoṣi. **Tassā me aṭṭhamī rattīti** yato paṭṭhāya ānandattherassa santike ovādaṃ paṭilabhiṃ, tato paṭṭhāya rattindivamatanditā vipassanāya kammaṃ karontī rattiyam catukkhattum pañcakkhattum vihārato nikkhamitvā manasikāram pavattenti visesaṃ anadhigantvā aṭṭhamiyam rattiyam vīriyasamataṃ labhitvā maggapaṭipāṭiyā kilese khepesinti attho. Tena vuttaṃ – “tassā me aṭṭhamī ratti, yato taṇhā samūhatā”ti. Sesam vuttanayameva.

Sāmātherīgāthāvaṇṇanā niṭṭhitā.

Dukanipātavaṇṇanā niṭṭhitā.

3. Tikanipāto

1. Aparāsāmātherīgāthāvaṇṇanā

Tikanipāte **pañṇavīsativassānī**tiādikā aparāya sāmāya theriyā gāthā. Ayampi purimabuddhesu katādhikārā tattha tattha bhava vivaṭṭupanissayam kusalam upacinanti vipassissa bhagavato kāle candabhāgāya nadiyā tīre kinnarayoniyam nibbatti. Sā tattha kinnarehi saddhim kīlāpasutā vicarati. Athekadivasaṃ satthā tassā kusalabjaropanattham tattha gantvā nadītīre caṅkami. Sā bhagavantaṃ disvā haṭṭhatuṭṭhā saḷalappupphāni ādāya satthu santikam gantvā vanditvā tehi pupphehi bhagavantaṃ pūjesi. Sā tena puññakamma devamanussesu saṃsaranāti imasmim buddhuppāde kosambiyam kulaghare nibbattitvā vayappattā sāmāvatīyā sahāyikā hutvā tassā matakāle saṃvegajātā pabbajitvā pañcavīsati vassāni cittasamādhānam alabhitvā mahallikākāle sugatovādaṃ labhitvā vipassanam vaḍḍhetvā saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.2.22-29) –

“Candabhāgānadītīre, ahoṣim kinnarī tadā;
Addasāham devadevaṃ, caṅkamantaṃ narāsabham.

“Ocinitvāna saḷalam, buddhaseṭṭhassadāsaham;
Upasiṅghi mahāvīro, saḷalam devagandhikam.

“Paṭiggahetvā sambuddho, vipassī lokanāyako;
Upasiṅghi mahāvīro, pekkhamānāya me tadā.

“Añjalim paggahetvāna, vanditvā dvipaduttamaṃ;
Sakaṃ cittaṃ pasādetvā, tato pabbatamāruhim.

“Ekanavutito kappe, yaṃ pupphamadadiṃ tadā;
Duggatiṃ nābhijānāmi, buddhapūjāyidaṃ phalam.

“Kilesā jhāpitā mayham...pe... kataṃ buddhassa sāsana”nti.
Arahattaṃ pana patvā attano paṭipattiṃ paccavekkhitvā udānavasena –

39. “Pañṇavīsati vassāni, yato pabbajitāya me;
Nābhijānāmi cittaṃ, samaṃ laddham kudācanaṃ.

40. “Aladdhā cetaso santim, citte avasavattinī;
Tato saṃvegamāpādim, saritvā jinasāsanam.
41. “Bahūhi dukkhadhammehi, appamādaratāya me;
Taṇhakkhayo anupatto, kataṃ buddhassa sāsanaṃ;
Ajja me sattamī ratti, yato taṇhā visositā’’ti. –

Imā gāthā abhāsi.

Tattha **cittassa samanti** cittassa vūpasamaṃ, cetosamathamaggaphalasaṃdhīti attho.

Tatoti tasmā cittavasamaṃ vattetuṃ asamatthabhāvato. **Saṃvegamāpādi**nti satthari dharantepi pabbajitakiccaṃ matthakaṃ pāpetuṃ asakkontī pacchā kathaṃ pāpayissāmīti saṃvegamaṃ ñāṇutrāsaṃ āpajjiṃ. **Saritvā jinasāsananti** kāṇakacchapopamādisatthuovādaṃ (saṃ. ni. 5.1117; ma. ni. 3.252) anussaritvā. Sesamaṃ vuttanayameva.

Aparāsāmātherīgāthāvaṇṇanā niṭṭhitā.

2. Uttamātherīgāthāvaṇṇanā

Catukkhattuṃ pañcakkhattuntīādikā uttamāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī vipassissa bhagavato kāle bandhumatīnagare aññatarassa kuṭumbikassa gehe gharadāsī hutvā nibbatti. Sā vayappattā attano ayyakānaṃ veyyāvaccamaṃ karontī jīvati. Tena ca samayena bandhumarājā puṇṇamīdivase uposathiko hutvā purebhattaṃ dānāni datvā pacchābhattaṃ gantvā dhammaṃ suṇāti. Atha mahājanā yathā rājā paṭipajjati, tatheva puṇṇamīdivase uposathaṅgāni samādāya vattanti. Athassa dāsiyā etadahosi – “etarahi kho mahārājā mahājanā ca uposathaṅgāni samādāya vattanti, yaṃnūnāhaṃ uposathadivasesu uposathasīlaṃ samādāya vatteyya’nti. Sā tathā karontī suparisuddhaṃ uposathasīlaṃ rakkhitvā tāvatimsesu nibbattā aparāparaṃ sugatīsuyeva saṃsarantī imasmiṃ buddhuppāde sāvattiyamaṃ seṭṭhikule nibbattitvā viññutaṃ patvā paṭācārāya theriyā santike dhammaṃ sutvā pabbajitvā vipassanaṃ paṭṭhapetvā taṃ matthakaṃ pāpetuṃ nāsakkhi. Paṭācārā therī tassā cittaṭṭhāraṃ ñatvā ovādamadāsi. Sā tassā ovāde ṭhatvā saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.2.1-21) –

“Nagare bandhumatiyā, bandhumā nāma khattiyo;
Divase puṇṇamāya so, upavasi uposathaṃ.

“Ahaṃ tena samayena, kumbhadāsī ahaṃ tahiṃ;
Disvā sarājakaṃ senaṃ, evāhaṃ cintayim tadā.

“Rājāpi rajjaṃ chaḍḍetvā, upavasi uposathaṃ;
Saphalaṃ nūna taṃ kammaṃ, janakāyo pamodito.

“Yoniso paccavekkhitvā, duggaccañca daliddataṃ;
Mānasaṃ sampahaṃsitvā, upavasiṃ uposathaṃ.

“Ahaṃ uposathaṃ katvā, sammāsambuddhasāsane;
Tena kammena sukatenā, tāvatimsamagacchahaṃ.

“Tattha me sukataṃ byamaṃ, ubbhayojanamuggataṃ;
Kūṭāgāravaruṇpetam, mahāsanasubhūsitam.

“Accharā satasahassā, upatiṭṭhanti maṃ sadā;
Aññe deve atikkamma, atirocāmi sabbadā.

“Catusaṭṭhidevarājūnaṃ, mahesittamakārayiṃ;
Tesaṭṭhicakkavattīnaṃ, mahesittamakārayiṃ.

“Suvaṇṇavaṇṇā hutvāna, bhavesu saṃsarāmahaṃ;
Sabbattha pavarā homi, uposathassidaṃ phalaṃ.

“Hatthiyānaṃ assayānaṃ, rathayānañca sīvikāṃ;
Labhāmi sabbamevetāṃ, uposathassidaṃ phalaṃ.

“Soṇṇamayaṃ rūpimayaṃ, athopi phalikāmayāṃ;
Lohitaṅgamayañceva, sabbāṃ paṭilabhāmahaṃ.

“Koseyyakambaliyāni, khomakappāsikāni ca;
Mahagghāni ca vatthāni, sabbāṃ paṭilabhāmahaṃ.

“Annaṃ pānaṃ khādanīyaṃ, vatthasenāsanāni ca;
Sabbametaṃ paṭilabhe, uposathassidaṃ phalaṃ.

“Varagandhañca mālāñca, cuṇṇakañca vilepanaṃ;
Sabbametaṃ paṭilabhe, uposathassidaṃ phalaṃ.

“Kūṭāgārañca pāsādaṃ, maṇḍapaṃ hammiyaṃ guhaṃ;
Sabbametaṃ paṭilabhe, uposathassidaṃ phalaṃ.

“Jātiyā sattavassāhaṃ, pabbajiṃ anagāriyaṃ;
Aḍḍhamāse asampatte, arahattamaṃ puṇiṃ.

“Kilesā jhāpitā mayhaṃ, bhavā sabbe samūhatā;
Sabbāsavaparikkhīṇā, natthi dāni punabbhavo.

“Ekanavutito kappe, yaṃ kammamakariṃ tadā;
Duggatiṃ nābhijānāmi, uposathassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā attano paṭipattiṃ paccavekkhitvā udānavasena –

42. “Catukkhattuṃ pañcakkhattuṃ, vihārā upanikkhamiṃ;
Aladdhā cetaso santiṃ, citte avasavattinī.

43. “Sā bhikkhuniṃ upāgacchiṃ, yā me saddhāyikā ahu;
Sā me dhammadesesi, khandhāyanadhātuyo.

44. “Tassā dhammaṃ suṇitvāna, yathā maṃ anusāsi sā;
Sattāhaṃ ekapallaṅkena, nisīdiṃ pītisukhasamappitā;
Aṭṭhamiyā pāde pasāresiṃ, tamokhandhaṃ padāliyā’nti. –

Imā gāthā abhāsi.

Tattha **sā bhikkhunim upāgacchim**, yā me **saddhāyikā ahūti** yā mayā saddhātabbā saddheyavacanā ahoṣi, taṃ bhikkhunim sāhaṃ upagacchim upasaṅkamim, paṭācārātherim saddhāya vadati. “Sā bhikkhunī upagacchi, yā me sādhayikā”tipi pāṭho. Sā paṭācārā bhikkhunī anukampāya maṃ upagacchi, yā mayhaṃ sadatthassa sādhekāti attho. **Sā me dhammadesesi**, **khandhāyatanadhātuyoti** sā paṭācārā therī “ime pañcakkhandhā, imāni dvādasāyatanāni, imā aṭṭhārasa dhātuyo”ti khandhādike vibhajitvā dassenti mayhaṃ dhammaṃ desesi.

Tassā dhammaṃ suṇitvānāti tassā paṭisambhidāppattāya theriyā santike khandhādivibhāgapubbaṅgamaṃ ariyamaggaṃ pāpetvā desitasāṅhasukhumavipassanādhammaṃ sutvā. **Yathā maṃ anusāsi sāti** sā therī yathā maṃ anusāsi ovadi, tathā paṭipajjantī paṭipattim matthakaṃ pāpetvāpi sattāhaṃ ekapallaṅkena nisīdim. Kathaṃ? **Pītisukhasamappitāti** jhānamayena pītisukhena samaṅgībhūtā. **Aṭṭhamiyā pāde pasāresim**, **tamokhandhaṃ padāliyaṃ** anavasesaṃ mohakkhandhaṃ aggamaggena padāletvā aṭṭhame divase pallaṅkaṃ bhindanti pāde pasāresim. Idameva cassā aññābyākaraṇaṃ ahoṣi.

Uttamātherīgāthāvaṇṇanā niṭṭhitā.

3. Aparā uttamātherīgāthāvaṇṇanā

Ye ime satta bojjaṅgātiādikā aparāya uttamāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī vipassissa bhagavato kāle bandhumatīnagare kuladāsī hutvā nibbatti. Sā ekadivasaṃ satthu sāvakaṃ ekaṃ khīṇāsavatttheraṃ piṇḍāya carantaṃ disvā pasannamānasā tīṇi modakāni adāsi. Sā tena puññakammena devamanussesu saṃsarantī imasmiṃ buddhuppāde kosalaṃjanapade aññatarasmiṃ brāhmaṇamahāsālakule nibbattitvā viññutaṃ pattā janapadacārikaṃ carantassa satthu santike dhammaṃ sutvā paṭiladdhasaddhā pabbajitvā nacirasseeva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.2.30-36) –

“Nagare bandhumatiyā, kumbhadāsī ahoṣaṃ;
Mama bhāgaṃ gahetvāna, gacchaṃ udakahārikā.

“Panthamhi samaṇaṃ disvā, santacittaṃ samāhitam;
Pasannacittā sumanā, modake tīṇidāsahaṃ.

“Tena kammena sukatenā, cetanāpaṇidhīhi ca;
Ekanavutikappāni, vinipātaṃ na gacchahaṃ.

“Sampatti taṃ karitvāna, sabbhaṃ anubhaviṃ ahaṃ;
Modake tīṇi datvāna, pattāhaṃ acalaṃ padaṃ.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā attano paṭipattim paccavekkhitvā udānavasena –

45. “Ye ime satta bojjaṅgā, maggā nibbānapattiyā;
Bhāvitā te mayā sabbe, yathā buddhena desitā.

46. “Suññatassānimittassa, lābhinihaṃ yadicchakaṃ;
Orasā dhītā buddhassa, nibbānābhiraṭā sadā.

47. “Sabbe kāmā samucchinnā, ye dibbā ye ca mānūsā;
Vikkhīṇo jātisamsāro, natthi dāni punabbhavo”ti. –

Imā gāthā abhāsi.

Tattha **suññatassānimittassa, lābhinihaṃ yadicchakanti** suññatasamāpattiyā ca animittasamāpattiyā ca ahaṃ yadicchakaṃ lābhini, tattha yaṃ yaṃ samāpajjitum icchāmi yattha yattha yadā yadā, taṃ taṃ tattha tattha tadā tadā samāpajjitvā viharāmīti attho. Yadihi suññatappaṇihitādināmakassa yassa kassacipi maggassa suññatādibhedam tividhampi phalaṃ sambhavati. Ayaṃ pana therī suññatānimittasamāpattiyova samāpajjati. Tena vuttaṃ – “suññatassānimittassa, lābhinihaṃ yadicchaka”nti. Yebhuyyavasena vā etaṃ vuttaṃ. Nidassanamattametanti apare.

Ye dibbā ye ca mānusāti ye devalokapariyāpannā ye ca manussalokapariyāpannā vatthukāmā, te sabbepi tappaṭṭibaddhachandarāgappahānena mayā sammadeva ucchinnā, aparibhogārāhā katā. Vuttañhi – “abhabbo, āvuso, khīṇāsavo bhikkhu kāme paribhuñjitum. Seyyathāpi pubbe agāriyabhūto”ti. Sesam vuttanayameva.

Aparā uttamātherīgāthāvaṇṇanā niṭṭhitā.

4. Dantikātherīgāthāvaṇṇanā

Divāvihārā nikkhammātiādikā dantikāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī buddhasuññakāle candabhāgāya nadiyā tīre kinnarayoniyam nibbatti. Sā ekadivasam kinnarehi saddhim kīlantī vicaramānā addasa aññataram paccekabuddham aññatarasmim rukkhāmūle divāvihāram nisinnam. Disvāna pasannamānasā upasaṅkamtivā sālappuphehi pūjam katvā vanditvā pakkāmi. Sā tena puññakammena devamanussesu saṃsarantī imasmim buddhuppāde sāvattiyam kosalarāñño purohitabrāhmaṇassa gehe nibbattitvā viññutam patvā jetavanapaṭiggahaṇe paṭiladdhasaddhā upāsikā hutvā pacchā mahāpajapatigotamiyā santike pabbajitvā rājagahe vasamānā ekadivasam pacchābhattam gijjhakūṭam abhiruhitvā divāvihāram nisinnā hatthārohakassa abhiruhanatthāya pādam pasārentam hatthim disvā tadeva ārammaṇam katvā vipassanam vaḍḍhetvā saha paṭisambhidāhi arahattam pāpuṇi. Tena vuttaṃ **apadāne** (apa. therī 2.2.86-96) –

“Candabhāgānadītīre, ahoṣim kinnarī tadā;
Addasaṃ virajaṃ buddham, sayambhum aparājitaṃ.

“Pasannacittā sumanā, vedajātā katañjalī;
Sālamālam gahetvāna, sayambhum abhipūjayim.

“Tena kamma sukatenā, cetanāpaṇidhīhi ca;
Jahitvā kinnarīdeham, tāvatimsamagacchaham.

“Chattimsadevarājūnam, mahesittamakārayim;
Manasā patthitam mayham, nibbattati yathicchitam.

“Dasanam cakkavattīnam, mahesittamakārayim;
Ocittatvā hutvāna, saṃsarāmi bhavesvham.

“Kusalam vijjate mayham, pabbajim anagāriyam;
Pūjārāhā aham ajja, sakyaputtassa sāsane.

“Visuddhamanasā ajja, apētamanapāpikā;
Sabbāsavaparikkhīnā, natthi dāni punabbhavo.

“Catunnavutito kappe, yaṃ buddhamabhipūjayiṃ;
Duggatiṃ nābhijānāmi, sālamālāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā attano paṭipattiṃ paccavekkhitvā pītisomanassajātā udānavasena –

48. “Divāvihārā nikkhamma, gijjhakūṭamhi pabbate;
Nāgaṃ ogāhamuttiṇṇaṃ, nadītīramhi addasaṃ.

49. “Puriso aṅkusamādāya, ‘dehi pāda’nti yācati;
Nāgo pasārayī pādaṃ, puriso nāgamāruhi.

50. “Disvā adantaṃ damitaṃ, manussānaṃ vasaṃ gataṃ;
Tato cittaṃ samādhesiṃ, khalu tāya vanaṃ gatā’ti. – imā gāthā abhāsi;

Tattha **nāgaṃ ogāhamuttiṇṇanti** hatthināgaṃ nadiyaṃ ogāhaṃ katvā ogayha tato uttiṇṇaṃ. ‘Ogayha muttiṇṇa’nti vā pāṭho. Ma-kāro padasandhikaro. **Nadītīramhi addasanti** candabhāgāya nadiyā tīre appassiṃ.

Kim karontanti cetaṃ dassetuṃ vuttaṃ “**puriso**”tiādi. Tattha ‘**dehi pāda’nti yācatīti** “pādaṃ dehi”iti piṭṭhiārohanatthaṃ pādaṃ pasāretuṃ saññaṃ deti, yathāparicitañhi saññaṃ dento idha yācatīti vutto.

Disvā adantaṃ damitanti pakatiyā pubbe adantaṃ idāni hatthācariyena hatthisikkhāya damitadamathaṃ upagamitaṃ. Kīdisaṃ damitaṃ? **Manussānaṃ vasaṃ gataṃ** yaṃ yaṃ manussā āṇāpentī, taṃ taṃ disvāti yojanā. **Tato cittaṃ samādhesiṃ, khalu tāya vanaṃ gatāti khalūti** avadhāraṇatthe nipāto. **Tato** hatthidassanato pacchā, **tāya** hatthino kiriyāya hetubhūtāya, **vanaṃ** araññaṃ gatā cittaṃ samādhesiṃyeva. Kathaṃ? “Ayampi nāma tiracchānagato hatthī hatthidamakassa vasena damathaṃ gato, kasmā manussabhūtāya cittaṃ purisadamakassa satthu vasena damathaṃ na gamissati”ti samvegajātā vipassanaṃ vaḍḍhetvā aggamaggasamādhinā mama cittaṃ samādhesiṃ accantasamādhānena sabbaso kilese khesinti attho.

Dantikātherīgāthāvaṇṇanā niṭṭhitā.

5. Ubbiritherīgāthāvaṇṇanā

Amma, jīvātiādikā ubbiriyaṃ theriyaṃ gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī padumuttarassa bhagavato kāle haṃsavatīnagare kulagehe nibbattitvā viññutaṃ pattā ekadivasaṃ mātāpitūsu maṅgalaṃ anubhavituṃ gehantaragatesu adutiyaṃ sayāṃ gehe ohīnā upakaṭṭhāya velāya bhagavato sāvakaṃ ekaṃ khīṇāsavatttheraṃ gehadvārasamīpena gacchantaṃ disvā bhikkhaṃ dātukāmā, “bhante, idha pavisaṭhā”ti vatvā there geḥaṃ pavitṭhe pañcapatiṭṭhitena therāṃ vanditvā gonakādīhi āsanaṃ paññāpetvā adāsi. Nisīdi thero paññatte āsane. Sā pattaṃ gahetvā piṇḍapātassa pūretvā therassa hatthe ṭhapesi. Thero anumodanaṃ katvā pakkāmi. Sā tena puññakamma tāvatiṃsesu nibbattitvā tattha yāvatāyukaṃ uḷāradibbasampattiṃ anubhavitvā tato cutā sugatīsuveva saṃsarantī imasmiṃ buddhuppāde sāvattthiyaṃ gahapatimahāsālakule nibbattitvā **ubbirīti** laddhanāmā abhirūpā dassanīyā pāsādikā ahosi. Sā vayappattakāle kosalaraññaṃ attano geḥaṃ nīṭā, katipayasaṃvaccharātikkaṃmena ekaṃ dhītaraṃ labhi. Tassā **jīvantīti** nāmaṃ akaṃsu. Rājā tassā dhītaraṃ disvā tuṭṭhamānaso ubbiriyaṃ abhisekaṃ adāsi. Dhītā panassā ādhāvitvā paridhāvitvā vicaraṇakāle kālamakāsi. Mātā yattha tassā sarīranikkhepo kato, taṃ susānaṃ gantvā divase divase paridevati. Ekadivasaṃ satthu santikaṃ gantvā vanditvā thokaṃ nisīditvā gatā aciravatīnadiyā tīre ṭhatvā dhītaraṃ ārabha paridevati. Taṃ disvā satthā gandhakuṭiyaṃ yathānisinnova attānaṃ dassetvā “kasmā

vippalapasī’’ti pucchi. ‘‘Mama dhītaraṃ ārabha vippalapāmi, bhagavā’’ti. ‘‘Imasmiṃ susāne jhāpitā tava dhītarō caturāsītisahassamattā, tāsam katara sandhāya vippalapasī’’ti. Tāsam taṃ taṃ āḷhanaṭṭhānaṃ dassetvā –

51. ‘‘Amma jīvāti vanamhi kandasī, attānaṃ adhigaccha ubbiri;
Cullāsītisahassāni, sabbā jīvasanāmikā;
Etamhāḷāhane daḍḍhā, tāsam kamanusocasī’’ti. – saupaḍḍhagāthamāha;

Tattha, **amma, jīvāti** mātupacāranāmena dhītuyā ālapanam, idaṅcassā vippalapanākāradassanaṃ. **Vanamhi kandasī**ti vanamajjhe paridevasi. **Attānaṃ adhigaccha ubbirī**ti ubbiri tava attānameva tāva bujjhassu yāthāvato jānāhi. **Cullāsītisahassānī**ti caturāsītisahassāni. **Sabbā jīvasanāmikā**ti tā sabbāpi jīvanti, yā samānanāmikā. **Etamhāḷāhane daḍḍhā**ti etamhi susāne jhāpitā. **Tāsam kamanusocasī**ti tāsū jīvantīnāmāsu caturāsītisahassamattāsu kaṃ sandhāya tvaṃ anusocasi anusokaṃ āpajjasīti evaṃ satthārā dhamme desite desanānusārena ñāṇaṃ pesetvā vipassanaṃ ārabhitvā satthu desanāvilāsena attano ca hetusampattiyā yathāṭṭhātāva vipassanaṃ ussukkāpetvā maggapaṭipāṭiyā aggaphale arahatte patiṭṭhāsi. Tena vuttaṃ **apadāne** (apa. therī 2.2.37-60) –

‘‘Nagare haṃsavatiyā, ahosiṃ bālikā tadā;
Mātā ca me pitā ceva, kammantaṃ agamaṃsu te.

‘‘Majjhanhikamhi sūriye, addasaṃ samaṇaṃ ahaṃ;
Vīthiyā anugacchantaṃ, āsanaṃ paññapesahaṃ.

‘‘Gonakāvīkatikāhi, paññāpetvā mamāsanam;
Pasannacittā sumanā, idaṃ vacanamabravim.

‘‘Santattā kuthitā bhūmi, sūro majjhanhike ṭhito;
Mālutā ca na vāyanti, kālo cevettha mehiti.

‘‘Paññattamāsanamidam, tavatthāya mahāmuni;
Anukampaṃ upādāya, nisīda mama āsane.

‘‘Nisīdi tattha samaṇo, sudanto suddhamānaso;
Tassa pattam gahetvāna, yathārandham adāsahaṃ.

‘‘Tena kamma sukatenā, cetanāpaṇidhīhi ca;
Jahitvā mānusaṃ deham, tāvatimsamagacchahaṃ.

‘‘Tattha me sukataṃ byamham, āsanena sunimmitam;
Saṭṭhiyojanamubbedham, tiṃsayojanavitthataṃ.

‘‘Soṇṇamayā maṇimayā, athopi phalikāmayā;
Lohitaṅgamayā ceva, pallaṅkā vividhā mama.

‘‘Tūlikāvīkatikāhi, kaṭṭissacittakāhi ca;
Uddhaekantalomī ca, pallaṅkā me susaṅṭhitā.

‘‘Yadā icchāmi gamaṇam, hāsakhiḍḍasamappitā;
Saha pallaṅkasetṭhena, gacchāmi mama patthitam.

‘‘Asītidevarājūnaṃ, mahesittamakārayim;

Sattaticakkavattīnaṃ, mahesittamakārayiṃ.

“Bhavābhavā saṃsarantī, mahābhogaṃ labhāmahaṃ;
Bhoge me ūnatā natthi, ekāsanassidaṃ phalaṃ.

“Duve bhavā saṃsarāmi, devatte atha mānuse;
Aññe bhavā na jānāmi, ekāsanassidaṃ phalaṃ.

“Duve kule pajāyāmi, khattiye cāpi brāhmaṇe;
Uccākulīnā sabbattha, ekāsanassidaṃ phalaṃ.

“Domanassaṃ na jānāmi, cittasantāpanaṃ mama;
Vevaṇṇiyaṃ na jānāmi, ekāsanassidaṃ phalaṃ.

“Dhātiyo maṃ upaṭṭhanti, khujjā celāpikā bahū;
Añkena añkaṃ gacchāmi, ekāsanassidaṃ phalaṃ.

“Aññā nhāpentī bhojenti, aññā ramenti maṃ sadā;
Aññā gandhaṃ vilimpanti, ekāsanassidaṃ phalaṃ.

“Maṇḍape rukkhamaññā vā, suññāgāre vasantiyā;
Mama saṅkappamaññāya, pallaṅko upatiṭṭhati.

“Ayaṃ pacchimako mayhaṃ, carimo vattate bhavo;
Ajjāpi rajjaṃ chaḍḍetvā, pabbajīṃ anagāriyaṃ.

“Satasahassito kappe, yaṃ dānamadadiṃ tadā;
Duggatiṃ nābhijānāmi, ekāsanassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.
Arahatte pana patiṭṭhāya attanā adhigatavisesaṃ pakāsentī –

52. “Abbahī tava me sallaṃ, duddasaṃ hadayassitaṃ;
Yaṃ me sokaparetāya, dhītusokaṃ byapānudi.

53. “Sājja abbūḷhasallāhaṃ, nicchātā parinibbutā;
Buddhaṃ dhammañca saṅghañca, upemi saraṇaṃ muni’’nti. –

Imā dve gāthā abhāsi.

Tattha **abbahī vata me sallaṃ, duddasaṃ hadayassitanti** anupacitakusalasambhārehi yāthāvato duddasaṃ mama cittasannissitaṃ pīḷājananato dunnīharaṇato anto tudanato ca “salla’’nti laddhanāmaṃ sokaṃ taṇhañca **abbahī vata nīhari vata. Yaṃ me sokaparetāyāti** yasmā sokena abhibhūtāya mayhaṃ dhītusokaṃ **byapānudi** anavasesato nīhari, tasmā abbahī vata me sallanti yojanā.

Sājja abbūḷhasallāhanti sā ahaṃ ajja sabbaso uddhaṭatanhāsallā tato eva nicchātā parinibbutā. **Muninti** sabbaññubuddhaṃ tadupadesitamaggaphalanibbānapabhedam navavidhalokuttarad**hammañca**, tattha patiṭṭhitaṃ aṭṭhaariyapuggalasamūhasaṅkhātāṃ **saṅghañca**, anuttarehi tehi yojanato sakalavaṭṭadukkhavināsanato ca **saraṇaṃ** tāṇaṃ leṇaṃ parāyaṇanti, **upemi** upagacchāmi bujjhāmi sevāmi cāti attho.

Ubbiritherīgāthāvaṇṇanā niṭṭhitā.

6. Sukkātherīgāthāvaṇṇanā

Kimme katā rājagahetiādikā sukkāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī vipassissa bhagavato kāle bandhumatīnagare kulagehe nibbattitvā viññutaṃ pattā upāsikāhi saddhiṃ vihāraṃ gantvā satthu santike dhammaṃ sutvā paṭiladdhasaddhā pabbajitvā bahussutā dhammadharā paṭibhānavatī ahosi. Sā tattha bahūni vassasahassāni brahmacariyaṃ caritvā puthujjanakālakiriyameva katvā tusite nibbatti. Tathā sikhissa bhagavato, vessabhussa bhagavato kāleti evaṃ tiṇṇaṃ sammāsambuddhānaṃ sāsane sīlaṃ rakkhitvā bahussutā dhammadharā ahosi, tathā kakusandhassa, koṇāgamanassa, kassapassa ca bhagavato sāsane pabbajitvā visuddhasīlā bahussutā dhammakathikā ahosi.

Evaṃ sā tattha tattha bahuṃ puññaṃ upacinitvā sugatīsuyeva saṃsarantī imasmiṃ buddhuppāde rājagahanagare gahapatimahāsālakule nibbatti, **sukkā**tissā nāmaṃ ahosi. Sā viññutaṃ pattā satthu rājagahapavesane laddhappasādā upāsikā hutvā aparabhāge dhammadinnāya theriyā santike dhammaṃ sutvā sañjātasamvegā tassā eva santike pabbajitvā vipassanāya kammaṃ karontī nacirasseva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.4.111-142) –

“Ekanavutito kappe, vipassī nāma nāyako;
Uppajji cārudassano, sabbadhammavipassako.

“Tadāhaṃ bandhumatiyaṃ, jātā aññatare kule;
Dhammaṃ sutvāna munino, pabbajim anagāriyaṃ.

“Bahussutā dhammadharā, paṭibhānavatī tathā;
Vicittakathikā cāpi, jinasāsanakārikā.

“Tadā dhammakathaṃ katvā, hitāya janataṃ bahuṃ;
Tato cutāhaṃ tusitaṃ, upapannā yasassinī.

“Ekattimse ito kappe, sikhī viya sikhī jino;
Tapanto yasasā loke, uppajji vadataṃ varo.

“Tadāpi pabbajitvāna, buddhasāsanakovidā;
Jotetvā jinavākyāni, tatopi tidivaṃ gatā.

“Ekattimseva kappamhi, vessabhū nāma nāyako;
Uppajjittha mahāñāṇī, tadāpi ca tathevahaṃ.

“Pabbajitvā dhammadharā, jotayim jinasāsaṃ;
Gantvā marupuraṃ rammaṃ, anubhosim mahāsukhaṃ.

“Imamhi bhaddake kappe, kakusandho jinuttamo;
Uppajji narasaraṇo, tadāpi ca tathevahaṃ.

“Pabbajitvā munimataṃ, jotayitvā yathāyukaṃ;
Tato cutāhaṃ tidivaṃ, agaṃ sabhavanaṃ yathā.

“Imasmiṃyeva kappamhi, koṇāgamanānāyako;

Uppajji lokasaraṇo, araṇo amataṅgato.

“Tadāpi pabbajitvāna, sāsane tassa tādino;
Bahussutā dhammadharā, jotayim̐ jinasāsaṇaṃ.

“Imasmim̐yeva kappamhi, kassapo munimuttamo;
Uppajji lokasaraṇo, araṇo maraṇantagū.

“Tassāpi naravīrassa, pabbajitvāna sāsane;
Pariyāpuṭasaddhammā, paripucchā visāradā.

“Susīlā lajjinī ceva, tīsu sikkhāsu kovidā;
Bahum̐ dhammakathaṃ katvā, yāvajīvaṃ mahāmune.

“Tena kammavipākena, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Pacchime ca bhava dāni, giribbajapuruttame;
Jātā seṭṭhikule phīte, mahāratanaśaṅcaye.

“Yadā bhikkhusahassena, parivuto lokanāyako;
Upāgami rājagahaṃ, sahasakkhena vaṇṇito.

“Danto dantehi saha purāṇajaṭilehi, vippamutto vippamuttehi;
Siṅgīnikkhasavaṇṇo, rājagahaṃ pāvīsi bhagavā.

“Disvā buddhānubhāvaṃ taṃ, sutvāva guṇasaṅcayaṃ;
Buddhe cittaṃ pasādetvā, pūjayim̐ taṃ yathābalaṃ.

“Aparena ca kālena, dhammadinnāya santike;
Agārā nikkhamitvāna, pabbajim̐ anagāriyaṃ.

“Kesesu chijjamānesu, kilese jhāpayim̐ ahaṃ;
Uggahim̐ sāsanaṃ sabbaṃ, pabbajitvā cirenaṃ.

“Tato dhammadesesim̐, mahājanasamāgame;
Dhamme desiyamānamhi, dhammābhisamayo ahu.

“Nekapāṇasahasānaṃ, taṃ viditvātivimhito;
Abhippasanno me yakkho, bhamitvāna giribbajaṃ.

“Kiṃme katā rājagahe manussā, madhum̐ pītāva acchare;
Ye sukkaṃ na upāsanti, desentim̐ amataṃ padaṃ.

“Taṅca appaṭivānīyaṃ, asecanakamojavaṃ;
Pivanti maññe sappaññā, valāhakamivaddhagū.

“Iddhīsu ca vasī homi, dibbāya sotadhātuyā;
Cetopariyaññaṇassa, vasī homi mahāmune.

“Pubbenivāsaṃ jānāmi, dibbacakkhu visodhitam;
Sabbāsavaparikkhīṇā, natthi dāni punabbhavo.

“Atthadhammaniruttīsu, paṭibhāne tatheva ca;
Ñāṇaṃ mama mahāvīra, uppannaṃ tava santike.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā pañcasatabhikkhuniparivārā mahādhammakathikā ahoṣi. Sā ekadivasaṃ rājagahe piṇḍāya caritvā katabhattakiccā bhikkhunupassayaṃ pavisitvā sannisināya mahatiyā parisāya madhubhaṇḍaṃ pīletvā sumadhuraṃ pāyentī viya amatena abhisīcanti viya dhammaṃ deseti. Parisā cassā dhammakathaṃ ohitasotā avikkhattacittā sakkaccaṃ suṇāti. Tasmim̐ khaṇe theriyā caṅkamanakoṭiyaṃ rukkhe adhivatthā devatā dhammadesanāya pasannā rājagaḥaṃ pavisitvā rathiyāya rathiyāṃ siṅghāṭakena siṅghāṭakaṃ vicarivā tassā guṇaṃ vibhāventī –

54. “Kiṃme katā rājagahe manussā, madhuṃ pītāva acchare;
Ye sukkaṃ na upāsanti, desentiṃ buddhasāsaṇaṃ.

55. “Tañca appaṭivānīyaṃ, asecanakamojayaṃ;
Pivanti maññe sappaññā, valāhakamivaddhagū”ti. –

Imā dve gāthā abhāsi.

Tattha **kiṃme katā rājagahe manussā**ti ime rājagahe manussā kiṃ katā, kismiṃ nāma kicce byāvaṭā. **Madhuṃ pītāva acchareti** yathā bhaṇḍamadhuṃ gahetvā madhuṃ pītavanto visaññino hutvā sīsaṃ ukkhipitum na sakkonti, evaṃ imepi dhammasaññāya visaññino hutvā maññe sīsaṃ ukkhipitum na sakkonti, kevalaṃ acchantiyevāti attho. **Ye sukkaṃ na upāsanti, desentiṃ buddhasāsananti** buddhassa bhagavato sāsanaṃ yāthāvato desentiṃ pakāsentim̐ sukkaṃ therim̐ ye na upāsanti na payirupāsanti. Te ime rājagahe manussā kiṃ katāti yojanā.

Tañca appaṭivānīyanti tañca pana dhammaṃ anivattitabhāvāvahaṃ niyyānikaṃ, abhikkantatāya vā yathā sotujanasavanamanoharabhāvena anapanīyaṃ, **asecanakaṃ** anāsittakaṃ pakatiyāva mahārasaṃ tato eva ojavantaṃ. “Osadha”ntipi pāli. Vaṭṭadukkhabyaḍhitikicchāya osadhabhūtaṃ. **Pivanti maññe sappaññā, valāhakamivaddhagūti** valāhakarato nikkhantaṃ udakaṃ nirudakakantāre pathagā viya taṃ dhammaṃ sappaññā paṇḍitapurisā pivanti maññe pivantā viya suṇanti.

Manussā taṃ sutvā pasannamānasā theriyā santikaṃ upasaṅkamitvā sakkaccaṃ dhammaṃ suṇim̐su. Aparabhāge theriyā āyupariyosāne parinibbānakāle sāsanaṃ niyyānikabhāvavibhāvanatthaṃ aññaṃ byākarontī –

56. “Sukkā sukkehi dhammehi, vītarāgā samāhitā;
Dhāreti antimāṃ dehaṃ, jetvā māraṃ savāhana”nti. – imaṃ gāthaṃ abhāsi;

Tattha **sukkāti** sukkātherī attānameva paraṃ viya dasseti. **Sukkehi dhammehi**ti superisuddhehi lokuttaradhammehi. **Vītarāgā samāhitā**ti aggamaggena sabbaso vītarāgā arahattaphalasamādhinā samāhitā. Sesāṃ vuttanayameva.

Sukkātherīgāthāvaṇṇanā niṭṭhitā.

7. Selātherīgāthāvaṇṇanā

Natthi nissaraṇaṃ loketiādikā selāya theriyā gāthā. Ayampi purimabuddhesu katādhikārā tattha tattha bhava vivaṭṭupaniṣsayam kusalam upacinantī haṃsavatīnagare kulagehe nibbattivā viññutam pattā mātāpitūhi samānājātikassa kulaputtassa dinnā, tena saddhiṃ bahūni vassasatāni sukhasaṃvāsam vasitvā tasmim kālāṅkate sayampi addhagatā vayoanuppattā saṃvegajātā kiṃkusalagavesinī kālena kālam ārāmena ārāmaṃ vihārena vihāraṃ anuvicarati “samaṇabrāhmaṇānaṃ santike dhammaṃ sossāmi”ti. Sā ekadivasam satthu bodhirukkham upasaṅkamitvā “yadi buddho bhagavā asamo asamasamo appaṭipuggalo, dassetu me ayaṃ bodhi pāṭihāriya”nti nisīdi. Tassā tathā cittuppādasamanantameva bodhi pajjali, sabbasoṇṇamayā sakhā uṭṭhahimsu, sabbā disā virocimsu. Sā taṃ pāṭihāriyam disvā pasannamānasā garucittikāraṃ upaṭṭhapetvā sirasi añjalim paggayha sattarattindivam tattheva nisīdi. Sattame divase uḷāraṃ pūjāsakkāraṃ akāsi. Sā tena puññakammena devamanussesu saṃsarantī imasmim buddhuppāde āḷavīraṭṭhe āḷavikassa rañño dhītā hutvā nibbatti. **Selātissā** nāmaṃ ahoṣi. Āḷavikassa pana rañño dhītāti katvā **āḷavikā**tipi naṃ voharanti. Sā viññutam pattā sathari āḷavakaṃ dametvā tassa hatthe pattacīvaraṃ datvā tena saddhiṃ āḷavīnagaraṃ upagate dārikā hutvā raññā saddhiṃ satthu santikaṃ upagantvā dhammaṃ sutvā paṭiladdhasaddhā upāsikā ahoṣi. Sā aparabhāge sañjātasavegā bhikkhunīsu pabbajitvā katapubbakiccā vipassanaṃ paṭṭhapetvā saṅkhāre sammasantī upaniṣayasampannattā paripakkaññā nacirasseva arahattaṃ pāpuṇi. Tena vuttaṃ **apadāne** (apa. therī 2.2.61-85) –

“Nagare haṃsavatīyā, cārikī āsahaṃ tadā;
Ārāmena ca ārāmaṃ, carāmi kusalatthikā.

“Kāḷapakkhāmi divase, addasaṃ bodhimuttamaṃ;
Tattha cittaṃ pasādetvā, bodhimūle nisīdahaṃ.

“Garucittaṃ upaṭṭhetvā, sire katvāna añjalim;
Somanassaṃ pavedetvā, evaṃ cintesi tāvade.

“Yadi buddho amitagaṇo, asamappaṭipuggalo;
Dassetu pāṭihāraṃ me, bodhi obhāsatu ayaṃ.

“Saha āvajjite mayhaṃ, bodhi pajjali tāvade;
Sabbasoṇṇamayā āsi, disā sabbā virocāti.

“Sattarattindivam tattha, bodhimūle nisīdahaṃ;
Sattame divase patte, dīpapūjaṃ akāsahaṃ.

“Āsanaṃ parivāretvā, pañcadīpāni pajjalum;
Yāva udeti sūriyo, dīpā me pajjalum tadā.

“Tena kamma sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Tattha me sukataṃ byamaṃ, pañcadīpāti vuccati;
Satṭhiyojanamubbedhaṃ, tiṃsayojanavittataṃ.

“Asaṅkhiyāni dīpāni, parivāre jalimsu me;
Yāvata devabhavanaṃ, dīpālokena jotati.

“Parammukhā nisīditvā, yadi icchāmi passitum;
Uddhaṃ adho ca tiriyaṃ, sabbaṃ passāmi cakkhunā.

“Yāvataḥ abhikaṅkhāmi, daṭṭhuṃ sugataduggate;
Tattha āvaraṇaṃ natthi, rukkhesu pabbatesu vā.

“Asītidevarājūnaṃ, mahesittamakārayiṃ;
Satānaṃ cakkavattīnaṃ, mahesittamakārayiṃ.

“Yaṃ yaṃ yonupapajjāmi, devattaṃ atha mānusaṃ;
Dīpasatasahassāni, parivāre jalanti me.

“Devalokā cavitvāna, uppajjiṃ mātukucchiyaṃ;
Mātukucchigatā santī, akkhi me na nimīlati.

“Dīpasatasahassāni, puññakammasamaṅgitā;
Jalanti sūtikāgehe, pañcadīpānidaṃ phalaṃ.

“Pacchime bhava sampatte, mānasaṃ vinivattayiṃ;
Ajarāmatāṃ sītibhāvaṃ, nibbānaṃ phassayiṃ ahaṃ.

“Jātiyā sattavassāhaṃ, arahattamaṃ puṇiṃ;
Upasampādayī buddho, guṇamaññāya gotamo.

“Maṇḍape rukkhamaṇḍale vā, suññāgāre vasantiyā;
Tadā pajjalate dīpaṃ, pañcadīpānidaṃ phalaṃ.

“Dibbacakkhuvisuddhaṃ me, samādhikusalā ahaṃ;
Abhiññāpāramippattā, pañcadīpānidaṃ phalaṃ.

“Sabbavositavosānā, katakiccā anāsavā;
Pañcadīpā mahāvīra, pāde vandāmi cakkhuma.

“Satasahassito kappe, yaṃ dīpamadadiṃ tadā;
Duggatiṃ nābhijānāmi, pañcadīpānidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.

Arahattaṃ pana patvā therī sāvattiyā viharantī ekadivasaṃ pacchābhattaṃ sāvattithito nikkhamitvā divāvihāratthāya andhavanaṃ pavisitvā aññatarasmiṃ rukkhamaṇḍale nisīdi. Atha naṃ māro vivekato vicchedetukāmo aññātakarūpena upagantvā –

57. “Natthi nissaraṇaṃ loke, kiṃ vivekena kāhasi;
Bhuñjāhi kāmaratiyo, māhu pacchānutāpini’’ti. – gāthamāha;

Tassattho – imasmiṃ loke sabbasamāyepi upaparikkhīyamānesu **nissaraṇaṃ** nibbānaṃ nāma natthi tesāṃ tesāṃ samaṇabrāhmaṇānaṃ chandaso paṭiññāyamānaṃ vohāramattamevetāṃ, tasmā **kiṃ vivekena kāhasi** evarūpe sampannapaṭhamavaye ṭhitā iminā kāyavivekena kiṃ karissasi? Atha kho **bhuñjāhi kāmaratiyo** vatthukāmakilesakāmasannissitā khiḍḍaratiyo paccanubhoḥi. Kasmā? **Māhu pacchānutāpini** “yadatthaṃ brahmacariyaṃ carāmi, tadeva nibbānaṃ natthi, tenevetāṃ nādhigataṃ, kāmabhogā ca parihīnā, anatto vata mayha’’nti pacchā vippaṭisārinī mā ahoṣīti adhippāyo.

Taṃ sutvā therī “bālo vatāyaṃ māro, yo mama paccakkhabhūtaṃ nibbānaṃ paṭikkhipati. Kāmesu ca maṃ pavāreti, mama khīṇāsavabhāvaṃ na jānāti. Handa naṃ taṃ jānāpetvā tajjessāmi’’ti cintetvā –

58. “Sattisūlūpamā kāmā, khandhāsaṃ adhikuṭṭanā;
Yaṃ tvam kāmaraṭiṃ brūsi, aratī dāni sā mama.
59. “Sabbattha vihatā nandī, tamokkhandho padālito;
Evaṃ jānāhi pāpima, nihato tvamasi antakā”ti. – imaṃ gāthādvayamāha;

Tattha **sattisūlūpamā kāmā**ti kāmā nāma yena adhiṭṭhitā, tassa sattassa vinivijjhanato nisitasatti viya sūlaṃ viya ca daṭṭhabbā. **Khandhā**ti upādānakkhandhā. **Āsanti** tesam. **Adhikuṭṭanā**ti chindanādhiṭṭhānā, accādānaṭṭhānanti attho. Yato khandhe accādāya sattā kāmehi chejjabhejjaṃ pāpuṇanti. **Yaṃ tvam kāmaraṭiṃ brūsi, aratī dāni sā mamā**ti, pāpima, tvam yaṃ kāmaraṭiṃ ramitabbaṃ sevītābbaṃ katvā vadasi, sā dāni mama niraṭijātikattā mīḷhasadisā, na tāya mama koci attho atthīti.

Tattha kāraṇamāha “**sabbattha vihatā nandī**”tiādīnā. Tattha **evaṃ jānāhī**ti “sabbaso pahīnataṇhāvijjā”ti maṃ jānāhi, tato eva balavidhamanavisayātikkamanehi **antaka** lāmakācāra, māra, tvam mayā **nihato** bādhitō asi, na panāhaṃ tayā bādhitābbāti attho.

Evaṃ theriyā māro santajjito tatthevantaradhāyi. Therīpi phalasaṃpattisukhena andhavane divasabhāgaṃ vītināmetvā sāyanhe vasanaṭṭhānameva gatā.

Selātherīgāthāvaṇṇanā niṭṭhitā.

8. Somātherīgāthāvaṇṇanā

Yaṃ taṃ isihi pattabbantiādīkā somāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī sikhissa bhagavato kāle khattiyamahāsālakule nibbattivā viññutaṃ patvā aruṇarañño aggamahesī ahoṣīti sabbaṃ atītavattu abhayattheriyā vatthusadisāṃ. Paccuppannavattu pana ayaṃ therī tattha tattha devamanussesu saṃsarantī imasmim buddhuppāde rājagahe bimbisārassa rañño purohitassa dhītā hutvā nibbatti. Tassā **somā**ti nāmaṃ ahoṣi. Sā viññutaṃ pattā satthu rājagahapavesane paṭiladdhasaddhā upāsikā hutvā aparabhāge sañjātasamvegā bhikkhunīsu pabbajitvā katapubbakiccā vipassanāya kammaṃ karontī na cirasseva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.1.71, 80-90) –

“Nagare aruṇavatiyā, aruṇo nāma khattiyō;
Tassa rañño ahuṃ bhariyā, vāritaṃ vārayāmahaṃ.

“Yāvata...pe... kataṃ buddhassa sāsana”nti. –
Sabbāṃ abhayattheriyā apadānasadisāṃ.

Arahattaṃ pana patvā vimuttisukhena sāvattiyaṃ viharantī ekadivasaṃ divāvihāratthāya andhavanaṃ pavisitvā aññatarasmim rukkhamaṇe nisīdi. Atha naṃ māro vivekato vicchedetukāmo adissamānurūpo upagantvā ākāse ṭhatvā –

60. “Yaṃ taṃ isihi pattabbaṃ, ṭhānaṃ durabhisambhavaṃ;
Na taṃ dvaṅgulapaññāya, sakkā pappotumitthiyā”ti. – imaṃ gāthamāha;

Tassattho – sīlakkhandhādīnaṃ esanaṭṭhena “isī”ti laddhanāmehi buddhādīhi mahāpaññehi pattabbaṃ, taṃ aññehi pana **durabhisambhavaṃ** dunnippādānīyaṃ. Yaṃ taṃ arahattasaṅkhātaṃ paramassāsaṭṭhānaṃ, na taṃ dvaṅgulapaññāya nihīnapaññāya itthiyā pāpuṇitum sakkā. Itthiyō hi sattaṭṭhavassakālato paṭṭhāya sabbakālaṃ odanaṃ pacantiyo pakkuthite udake taṇḍule pakkhipitvā “ettāvata odanaṃ pakka”nti na jānanti, pakkuthiyamāne pana taṇḍule dabbiyā uddharitvā dvīhi aṅgulīhi

pīletvā jānanti, tasmā **dvaṅgulipaṅṅāyā**ti vuttā.

Taṃ sutvā therī mārāṃ apasādentī –

61. “Itthibhāvo no kiṃ kayirā, cittamhi susamāhite;
Ñāṇamhi vattamānamhi, sammā dhammaṃ vipassato.
62. “Sabbattha vihatā nandī, tamokkhandho padālito;
Evaṃ jānāhi pāpima, nihato tvamasi antakā”ti. –

Itarā dve gāthā abhāsi.

Tattha **itthibhāvo no kiṃ kayirā**ti mātuḡāmabhāvo amhākaṃ kiṃ kareyya, arahattappattiyā kīdisaṃ vibandhaṃ uppādeyya. **Cittamhi susamāhite**ti citte aggamaḡgasamādhinā suṭṭhu samāhite. **Ñāṇamhi vattamānamhī**ti tato arahattamaḡgañāṇe pavattamāne. **Sammā dhammaṃ vipassatoti** catusaccadhammaṃ pariññādividhinā sammadeva passato. Ayañhettha saṅkhepo – pāpima, itthī vā hotu puriso vā, aggamaḡge adhiḡate arahattaṃ hatthagatamevāti.

Idāni tassa attanā adhiḡatabhāvaṃ ujukameva dassentī “**sabbattha vihatā nandī**”ti gāthamāha. Sā vuttatthāyeva.

Somātherīgāthāvaṇṇanā niṭṭhitā.

Tikanipātavaṇṇanā niṭṭhitā.

4. Catukkanipāto

1. Bhaddākāpilānītherīgāthāvaṇṇanā

Catukkanipāte **putto buddhassa dāyādoti**ādikā bhaddāya kāpilāniyā theriyā gāthā. Sā kira padumuttarassa bhagavato kāle haṃsavatīnagare kulagehe nibbattivā viññutaṃ patvā satthu santike dhammaṃ suṇantī satthāraṃ ekaṃ bhikkhuniṃ pubbenivāsaṃ anussarantīnaṃ aggaṭṭhāne ṭhapentaṃ disvā adhiḡarakammaṃ katvā sayampi taṃ ṭhānantaraṃ patthetvā yāvajīvaṃ puññāni katvā tato cutā devamanussesu saṃsarantī anuppanne buddhe bārāṇasiyaṃ kulagehe nibbattivā patikulaṃ gantvā, ekadivasaṃ attano nanandāya saddhiṃ kalahaṃ karontī tāya paccekabuddhassa piṇḍapāte dinne “ayaṃ imassa dānaṃ datvā uḷārasampattiṃ labhissatī”ti paccekabuddhassa hatthato pattaṃ gahetvā bhattaṃ chaḍḍetvā kalalassa pūretvā adāsi. Mahājano garahi – “bāle, paccekabuddho te kiṃ aparajjhī”ti? Sā tesam vacanena lajjamānā puna pattaṃ gahetvā kalalaṃ nīharitvā dhovitvā gandhacuṇṇena ubbaṭṭetvā catumadhurassa pūretvā upari āsittena padumagabbhavaṇṇena sappinā vijjotamānaṃ paccekabuddhassa hatthe ṭhapetvā “yathā ayaṃ piṇḍapāto obhāsajāto, evaṃ obhāsajātaṃ me sarīraṃ hotū”ti patthanam paṭṭhapesi. Sā tato cavitvā sugatīsuyeva saṃsarantī kassapabuddhakāle bārāṇasiyaṃ mahāvibhavassa seṭṭhino dhīta hutvā nibbatti. Pubbakammaphalena duggandhasarīrā manussehi jīgucchitabbā hutvā saṃvegajātā attano ābharaṇehi suvaṇṇiṭṭhakaṃ kāretvā bhagavato cetiye patiṭṭhapesi, uppalahatthena ca pūjaṃ akāsi. Tenassā sarīraṃ tasmīmyeva bhava sugandhaṃ manoharaṃ jātaṃ. Sā patino piyā manāpā hutvā yāvajīvaṃ kusalaṃ katvā tato cutā sagge nibbatti. Tatthāpi yāvajīvaṃ dibbasukhaṃ anubhavitvā, tato cutā bārāṇasirañño dhīta hutvā tattha devasampattisadisam sampattiṃ anubhavanti cirakālam paccekabuddhe upaṭṭhahitvā, tesu parinibbutesu saṃvegajātā tāpasapabbajjāya pabbajitvā uyyāne vasanti jhānāni bhāvetvā brahmaloke nibbattitvā tato cutā sāgalanagare kosiyagottassa brāhmaṇakulassa gehe nibbattitvā mahatā parihārena vaḍḍhitvā vayappattā mahātitthagāme pipphalikumārassa geḡam nīta. Tasmīṃ pabbajitum nikkhante mahantaṃ bhogakkhandhaṃ mahantañca ñātiparivaṭṭam pahāya

pabbajjathāya nikkhamitvā pañca vassāni titthiyārāme pavisitvā aparabhāge mahāpajāpatigotamiyā santike pabbajjaṃ upasampadañca labhitvā vipassanaṃ paṭṭhapetvā na cirasseva arahattaṃ pāpuṇi. Tena vuttaṃ **apadāne** (apa. therī 2.3.244-313) –

“Padumuttaro nāma jino, sabbadhammāna pāragū;
Ito satasahassamhi, kappe uppajji nāyako.

“Tadāhu haṃsavatiyaṃ, videho nāma nāmato;
Setṭhī pahūtaratano, tassa jāyā ahosahaṃ.

“Kadāci so narādiccaṃ, upecca saparijjano;
Dhammamassosi buddhassa, sabbadukkhahayappaṃ.

“Sāvakaṃ dhutavādānaṃ, aggamaṃ kittesi nāyako;
Sutvā sattāhikaṃ dānaṃ, datvā buddhassa tādino.

“Nipacca sirasā pāde, taṃ thānamabhipatthayaṃ;
Sa hāsayaṃto parisamaṃ, tadā hi narapuṅgavo.

“Setṭhino anukampāya, imā gāthā abhāsatha;
Lacchase patthitaṃ thānaṃ, nibbuto hohi puttaka.

“Satasahassito kappe, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādo, oraso dhammanimmitto;
Kassapo nāma gottena, hessati satthu sāvako.

“Taṃ sutvā mudito hutvā, yāvajīvaṃ tadā jinaṃ;
Mettacitto paricari, paccayehi vināyakaṃ.

“Sāsaṇaṃ jotayitvāna, so madditvā kutitthiye;
Veneyyaṃ vinayitvā ca, nibbuto so sasāvako.

“Nibbuta tamhi lokagge, pūjanatthāya satthuno;
Ñātimitte samānetvā, saha tehi akārayi.

“Sattayojanikaṃ thūpaṃ, ubbidhamaṃ ratanāmayamaṃ;
Jalantaṃ sataraṃsimva, sālārājaṃva phullitaṃ.

“Sattasatasahassāni, pātiyo tattha kārayi;
Naḷaggī viya jotantī, rataneheva sattahi.

“Gandhatelena pūretvā, dīpānujjalayī tahiṃ;
Pūjanatthāya mahesissa, sabbabhūtānukampino.

“Sattasatasahassāni, puṇṇakumbhāni kārayi;
Rataneheva puṇṇāni, pūjanatthāya mahesino.

“Majjhe aṭṭhaṭṭhakumbhīnaṃ, ussitā kañcanagghiyo;

Atirocanti vaṇṇena, saradeva divākaro.

“Catudvāresu sobhanti, toraṇā ratanāmayā;
Ussitā phalakā rammā, sobhanti ratanāmayā.

“Virocanti parikkhittā, avaṭṭamsā sunimmitā;
Ussitāni paṭākāni, ratanāni virocare.

“Surattaṃ sukattaṃ cittaṃ, cetiyaṃ ratanāmayāṃ;
Atirocati vaṇṇena, sasaṅghova divākaro.

“Thūpassa vediyo tisso, haritālena pūrayi;
Ekaṃ manosilāyekaṃ, añjanena ca ekikaṃ.

“Pūjaṃ eṭṭhisaṃ rammaṃ, kāretvā varavādino;
Adāsi dānaṃ saṅghassa, yāvajīvaṃ yathābalaṃ.

“Sahāva seṭṭhinā tena, tāni puññāni sabbaso;
Yāvajīvaṃ karitvāna, sahāva sugatiṃ gatā.

“Sampattiyonubhotvāna, devatte atha mānuse;
Chāyā viya sarīrena, saha teneva saṃsarim.

“Ekanavutito kappe, vipassī nāma nāyako;
Uppajji cārudassano, sabbadhammavipassako.

“Tadāyaṃ bandhupatiyaṃ, brāhmaṇo sādhusammato;
Aḍḍho santo guṇenāpi, dhanena ca suduggato.

“Tadāpi tassāhaṃ āsim, brāhmaṇī samacetasā;
Kadāci so dijavaro, saṅgamesi mahāmunim.

“Nisinnaṃ janakāyamhi, desentaṃ amataṃ padaṃ;
Sutvā dhammaṃ pamudito, adāsi ekasāṭakaṃ.

“Gharamekena vatthena, gantvānettaṃ sa mabravi;
Anumoda mahāpuññaṃ, dinnaṃ buddhassa sāṭakaṃ.

“Tadāhaṃ añjaliṃ katvā, anumodiṃ supīṇitā;
Sudinno sāṭako sāmi, buddhaseṭṭhassa tādino.

“Sukhito sajjito hutvā, saṃsaranto bhavābhava;
Bārāṇasipure ramme, rājā āsi mahīpati.

“Tadā tassa mahesīhaṃ, itthigumbassa uttamā;
Tassāti dayitā āsim, pubbasnehena bhattuno.

“Piṇḍāya vicarante te, aṭṭha paccekanāyake;
Disvā pamudito hutvā, datvā piṇḍaṃ mahārahaṃ.

“Puno nimantayitvāna, katvā ratanamaṇḍapaṃ;
Kammārehi kataṃ pattamaṃ, sovaṇṇamaṃ vata tattakamaṃ.

“Samānetvāna te sabbe, tesamaṃ dānamadāsi so;
Soṇṇāsane pavitṭhānaṃ, pasanno sehi pāṇibhi.

“Tampi dānaṃ sahadāsiṃ, kāsirājenahaṃ tadā;
Punāhaṃ bārāṇasiyaṃ, jāta kāsikaḡāmake.

“Kuṭumbikakule phīte, sukhito so sabhātuko;
Jeṭṭhassa bhātuno jāyā, ahoṣiṃ supatibbatā.

“Paccekabuddhaṃ disvāna, kaniyassa mama bhattuno;
Bhāḡannaṃ tassa datvāna, āgate tamhi pāvadiṃ.

“Nābhinandittha so dānaṃ, tato tassa adāsahaṃ;
Ukhā āniya taṃ annaṃ, puno tasseva so adā.

“Tadannaṃ chaḍḍayitvāna, duṭṭhā buddhassaḡahaṃ tadā;
Pattaṃ kalalapuṇṇaṃ taṃ, adāsiṃ tassa tādino.

“Dāne ca gahaṇe ceva, apace padusepi ca;
Samacittamukhaṃ disvā, tadāhaṃ saṃvijjiṃ bhusaṃ.

“Puno pattaṃ gahetvāna, sodhayitvā sugandhinā,
Pasannacittā pūretvā, saḡhataṃ sakkaraṃ adamaṃ.

“Yattha yatthūpapajjāmi, surūpā homi dānato;
Buddhassa apakārena, duggandhā vadanena ca.

“Puna kassapavīrassa, nidhāyantamhi cetiye;
Sovaṇṇamaṃ iṭṭhakaṃ varaṃ, adāsiṃ muditā ahaṃ.

“Catujjātena gandhena, nicayitvā tamitṭhakaṃ;
Muttā duggandhadosaṃhā, sabbaṅgasusamaḡatā.

“Satta pāṭisahassāni, rataneheva sattahi;
Kāretvā ghatapūrāni, vaṭṭīni ca saḡassaso.

“Pakkipitvā padīpetvā, ṭhapayiṃ sattapantiyo;
Pūjanatthaṃ lokanāthassa, vipasannaṃ cetasā.

“Tadāpi tamhi puññaṃhi, bhāḡinīyi visesato;
Puna kāsiṃ sañjāto, sumittā iti vissuto.

“Tassāhaṃ bhariyā āsiṃ, sukhitā sajjitā piyā;
Tadā paccekamunino, adāsiṃ ghanaveṭhanaṃ.

“Tassāpi bhāḡinī āsiṃ, moditvā dānamuttamaṃ;
Punāpi kāsiraṭṭhaṃhi, jāto koliyajātiyā.

“Tadā koliyaputtānaṃ, satehi saha pañcahi;
Pañca paccekabuddhānaṃ, satāni samupaṭṭhahi.

“Temāsaṃ tappayitvāna, adāsi ca ticīvare;
Jāyā tassa tadā āsiṃ, puññakammaṭṭhānugā.

“Tato cuto ahu rājā, nando nāma mahāyaso;
Tassāpi mahesī āsiṃ, sabbakāmasamiddhinī.

“Tadā rājā bhavitvāna, brahmadatto mahīpati;
Padumavatīputtānaṃ, paccekamuninaṃ tadā.

“Satāni pañcanūnāni, yāvajīvaṃ upaṭṭhahiṃ;
Rājuyyāne nivāsetvā, nibbutāni ca pūjayiṃ.

“Cetiyaṇi ca kāretvā, pabbajitvā ubho mayaṃ;
Bhāvetvā appamaññāyo, brahmalokaṃ agamhase.

“Tato cuto mahātitthe, sujāto pippalāyano;
Mātā sumanadevīti, kosigotto dijo pitā.

“Ahaṃ madde janapade, sākalāya puruttame;
Kappilassa dijassāsiṃ, dhītā mātā sucīmati.

“Gharakañcanabimbena, nimminivāna maṃ pitā;
Adā kassapadhīrassa, kāmehi vajjitassamaṃ.

“Kadāci so kāruṇiko, gantvā kammantapekkhako;
Kākādikehi khajjante, pāṇe disvāna saṃvijji.

“Gharevāhaṃ tile jāte, disvānātapatāpane;
Kimī kākehi khajjante, saṃvegamaḷabhiṃ tadā.

“Tadā so pabbajī dhīro, ahaṃ tamanupabbajiṃ;
Pañca vassāni nivasīṃ, paribbājavate ahaṃ.

“Yadā pabbajitā āsi, gotamī jinaposikā;
Tadāhaṃ tamupagantvā, buddhena anusāsītā.

“Na cireneva kālena, arahattamaṭṭhānaṃ;
Aho kalyāṇamittattaṃ, kassapassa sirīmato.

“Suto buddhassa dāyādo, kassapo susamāhito;
Pubbenivāsaṃ yo vedī, saggāpāyañca passati.

“Atha jātikkhayaṃ patto, abhiññāvosi muni;
Etāhi tīhi vijjāhi, tevijjo hoti brāhmaṇo.

“Tatheva bhaddākāpilānī, tevijjā maccuhāyini;
Dhāreti antimaṃ dehaṃ, jivā māraṃ savāhanaṃ.

“Disvā ādīnavaṃ loke, ubho pabbajitā mayaṃ;
Tyamha khīṇāsavā dantā, sītībhūtāṃha nibbutā.

“Kilesā jhāpitā mayhaṃ...pe... kataṃ buddhassa sāsana’nti. (apa. therī 2.3.244-313);
Arahattaṃ pana patvā pubbenivāsañāṇe ciñṇavasī ahoṣi. Tattha sātisaṃyamaṃ katādhikārattā
aparabhāge taṃ satthā jetavane ariyaṅamaṃjje nisinna bhikkhuniyo paṭipāṭiyā ṭhānantaresu ṭhapento
pubbenivāsaṃ anussarantīnaṃ aggaṭṭhāne ṭhapesi. Sā ekadivasaṃ mahākassapaṭtherassa
guṇābhittavanapubbakaṃ attano katakiccatādivibhāvanamukhena udānaṃ udānentī –

63. “Putto buddhassa dāyādo, kassapo susamāhito;
Pubbenivāsaṃ yovedi, saggāpāyaṅca passati.
64. “Atha jātikkhayaṃ patto, abhiññāvosi muni;
Etāhi tīhi vijjāhi, tevijjo hoti brāhmaṇo.
65. “Tatheva bhaddākāpilānī, tevijjā maccuhāyini;
Dhāreti antimamaṃ dehaṃ, jetvā māraṃ savāhanaṃ.
66. “Disvā ādīnavaṃ loke, ubho pabbajitā mayaṃ;
Tyamha khīṇāsavā dantā, sītībhūtāṃha nibbutā’nti. –

Imā gāthā abhāsi.

Tattha **putto buddhassa dāyādoti** buddhānubuddhabhāvato sammāsambuddhassa anujātasuto tato eva tassa dāyabhūtassa navalokuttaradhammassa ādānena dāyādo kassapo lokiyalokuttarehi samādhīhi suṭṭhu samāhitacittatāya **susamāhito. Pubbenivāsaṃ yovedīti** yo mahākassapaṭthero pubbenivāsaṃ attano paresaṅca nivutthakkhandhasantānaṃ pubbenivāsānussatiñāṇena pākaṭaṃ katvā avedi aññāsi paṭivijjhi. **Saggāpāyaṅca passatīti** chabbīsatiḍevalokabhedamaṃ saggamaṃ catubbidhamaṃ apāyaṅca dibbacakkhunā hatthatale āmalakamaṃ viya passati.

Atha jātikkhayaṃ pattoti tato paraṃ jātikkhayaśaṅkhātaṃ arahattaṃ patto. **Abhiññāya** abhivisiṭṭhena ñāṇena abhiññeyyamaṃ dhammaṃ abhijānitvā pariññeyyamaṃ parijānitvā, pahātabbaṃ pahāya, sacchikātabbaṃ sacchikatvā **vosito** niṭṭhamaṃ patto katakicco. Āsavakkhayaapaññāśaṅkhātaṃ monamaṃ pattattā **muni**.

Tatheva bhaddākāpilānīti yathā mahākassapo etāhi yathāvuttāhi tīhi vijjāhi tevijjo maccuhāyī ca, tatheva bhaddākāpilānī tevijjā maccuhāyini. Tato eva **dhāreti antimamaṃ dehaṃ, jetvā māraṃ savāhananti** attānameva paraṃ viya katvā dasseti.

Idāni yathā therassa paṭipatti ādimajjhapariyosānakalyāṇā, evamaṃ mamaṃpīti dassenti “**disvā ādīnava**’nti osānagāthamāha. Tattha **tyamha khīṇāsavā dantāti** te mayaṃ mahākassapaṭthero ahaṅca uttamena damena dantā sabbaso khīṇāsavā ca amha. **Sītībhūtāṃha nibbutāti** tato eva kilesapariḷāhābhāvato sītībhūtā saupādisesāya nibbānadhātuyā nibbutā ca amha bhavāmāti attho.

Bhaddākāpilānītherīgāthavaṇṇanā niṭṭhitā.

Catukkanipātavaṇṇanā niṭṭhitā.

5. Pañcakanipāto

1. Aññatarātherīgāthāvaṇṇanā

Pañcakanipāte **pañṇavīsati vassānī**tiādikā aññatarāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī imasmiṃ buddhuppāde devadahanagare mahāpajāpatigotamiyā dhātī hutvā vaḍḍhesi. Nāmagottato pana apaññātā ahoṣi. Sā mahāpajāpatigotamiyā pabbajitakāle sayampi pabbajitvā pañcavīsati saṃvaccharāni kāmarāgena upaddutā accharāsaṅghātamattampi kālaṃ cित्तेkaggataṃ alabhantī bāhā paggayha kandamānā dhammadinnātheriyā santike dhammaṃ sutvā kāmehi vinivattitamānasā kammaṭṭhānaṃ gahetvā bhāvanamanuyañjantī na cirasseva chaḷabhiññā hutvā attano paṭipattiṃ paccavekkhitvā udānavasena –

67. “Pañṇavīsati vassāni, yato pabbajitā ahaṃ;
Nāccharāsaṅghātamattampi, cittassūpasamajjhagaṃ.
68. “Aladdhā cetaso santiṃ, kāmarāgenavassutā;
Bāhā paggayha kandantī, vihāraṃ pāvisiṃ ahaṃ.
69. “Sā bhikkhuniṃ upāgacchiṃ, yā me saddhāyikā ahu;
Sā me dhammadesesi, khandhāyatanadhātuyo.
70. “Tassā dhammaṃ suṇitvāna, ekamante upāvisiṃ;
Pubbenivāsaṃ jānāmi, dibbacakkhu visodhitā.
71. “Cetopariccañāṇaṇca, sotadhātu visodhitā;
Iddhīpi me sacchikatā, patto me āsavakkhayo;
Chaḷabhiññā sacchikatā, kataṃ buddhassa sāsana”nti. –

Imā gāthā abhāsi.

Tattha **nāccharāsaṅghātamattampi**ti accharāghaṭitamattampi khaṇaṃ aṅguliphoṭanamattampi kālanti attho. **Cittassūpasamajjhaganti** cittassa upasamaṃ cित्तेkaggaṃ na ajjhaganti yojanā, na paṭilabhinti attho.

Kāmarāgenavassutāti kāmaguṇasaṅkhātesu vatthukāmesu daḷhatarābhini vesitāya bahalena chandarāgena tintacittā.

Bhikkhuninti dhammadinnattheriṃ sandhāya vadati.

Cetopariccañāṇaṇcāti cetopariyañāṇaṇca visodhitanti sambandho, adhigatanti attho. Sesāṃ vuttanayameva.

Aññatarātherīgāthāvaṇṇanā niṭṭhitā.

2. Vimalātherīgāthāvaṇṇanā

Mattā vaṇṇena rūpenātiādikā vimalāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinitvā imasmiṃ buddhuppāde vesāliyaṃ aññatarāya rūpūpajīvinīyā itthiyā dhītā hutvā nibbatti. **Vimalātissā** nāmaṃ ahoṣi. Sā vayappattā tatheva jīvikaṃ kappentī ekadivasaṃ āyasmantaṃ mahāmoggallānaṃ vesāliyaṃ piṇḍāya carantaṃ disvā paṭibaddhacittā hutvā therassa vasanaṭṭhānaṃ gantvā therāṃ uddissa palobhanakammaṃ kātuṃ ārabhi. “Titthiyehi uyyojitā tathā akāsī”ti keci vadanti. Thero tassā asubhavibhāvanamukhena santajjanaṃ katvā ovādamadāsi. Taṃ heṭṭhā theragāthāya āgatameva, tathā pana therena ovāde dinne sā saṃvegajātā

hirottappam paccupaṭṭhapetvā sāsane paṭiladdhasaddhā upāsikā hutvā aparabhāge bhikkhunīsu pabbajitvā ghaṭentī vāyamantī hetusampannatāya na cirasseva arahattam patvā attano paṭipattim paccavekkhitvā udānavasena –

72. “Mattā vaṇṇena rūpena, sobhaggena yasena ca;
Yobbanena cupatthaddhā, aññāsamatimaññihaṃ.
73. “Vibhūsetvā imaṃ kāyaṃ, sucittam bālalāpanaṃ;
Aṭṭhāsiṃ vesidvāramhi, luddo pāsamivoḍḍiya.
74. “Piḷandhanaṃ vidaṃsentī, guyhaṃ pakāsikaṃ bahuṃ;
Akāsiṃ vividhaṃ māyaṃ, ujjhagghantī bahuṃ janam.
75. “Sājja piṇḍaṃ caritvāna, muṇḍā saṅghāṭipārutā;
Nisinnā rukkhāmūlamhi, avitakkassa lābhinī.
76. “Sabbe yogā samucchinnā, ye dibbā ye ca mānūsā;
Khepetvā āsave sabbe, sītibhūtāmhi nibbutā’ ti. –

Imā gāthā abhāsi.

Tattha **mattā vaṇṇena rūpenā**ti guṇavaṇṇena ceva rūpasampattiyā ca. **Sobhaggenā**ti subhagabhāvena. **Yasenā**ti parivārasampattiyā. **Mattā** vaṇṇamadarūpamadāsobhaggamadaparivāramadavasena madam āpannāti attho. **Yobbanena cupatthaddhā**ti yobbanamadena uparūpari thaddhā yobbananimittena ahaṅkārena upatthaddhacittā anupasantamānasā. **Aññāsamatimaññihanti** aññā itthiyo attano vaṇṇādiguṇehi sabbathāpi atikkamitvā maññim ahaṃ. Aññāsaṃ vā itthīnaṃ vaṇṇādiguṇe atimaññim atikkamitvā amaññim avamānaṃ akāsiṃ.

Vibhūsitvā imaṃ kāyaṃ, sucittam bālalāpananti imaṃ nānāvidhaasucibharitaṃ jegucchaṃ ahaṃ mamāti bālānaṃ lāpanato vācanato bālalāpanaṃ mama kāyaṃ chavirāgakarānakesaṭṭhapanādinā sucittam vatthābharaṇehi vibhūsitvā sumaṇḍitapasāditam katvā. **Aṭṭhāsiṃ vesidvāramhi, luddo pāsamivoḍḍiyā**ti migaluddo viya migānaṃ bandhanatthāya daṇḍavākuraḍimigapāsaṃ, mārasa pāsabhūtaṃ yathāvuttaṃ mama kāyaṃ vesidvāramhi vesiyā gharadvāre oḍḍiyitvā aṭṭhāsiṃ.

Piḷandhanaṃ vidaṃsentī, guyhaṃ pakāsikaṃ bahunti ūrujaghanathanadassanādikaṃ guyhañceva pādajāṇusirādikaṃ pakāsañcāti guyhaṃ pakāsikañca bahuṃ nānappakāraṃ piḷandhanaṃ ābharaṇaṃ dassentī. **Akāsiṃ vividhaṃ māyaṃ, ujjhagghantī bahuṃ jananti** yobbanamadamatam bahuṃ bālajanaṃ vipalambhetuṃ hasantī gandhamālāvattābharaṇādīhi sarīrasabhāvapaṭicchādanena hasavilāsabhāvādīhi tehi ca vividhaṃ nānappakāraṃ vañcanaṃ akāsiṃ.

Sājja piṇḍaṃ caritvāna...pe... avitakkassa lābhinīti sā ahaṃ evaṃ pamādavihārinī samānā ajja idāni ayyassa mahāmoggallānattherassa ovāde thatvā sāsane pabbajitvā muṇḍā saṅghāṭipārutā hutvā piṇḍaṃ caritvāna bhikkhāhāraṃ bhuñjitvā **nisinnā** rukkhāmūlamhi rukkhāmūle vivittāsane nisinnā dutiyajjhānapādakassa aggaphalassa adhigamena avitakkassa lābhinī amhīti yojanā.

Sabbe yogāti kāmayogādayo cattāropi yogā. **Samucchinnā**ti paṭhamamaggādinā yathārahaṃ sammadeva ucchinnā pahīnā. Sesam vuttanayameva.

Vimalātherīgāthāvaṇṇanā niṭṭhitā.

3. Sīhātherīgāthāvaṇṇanā

Ayoniso manasikārātiādikā sīhāya theriyā gāthā. Ayampi purimabuddhesu katādhikārā tattha tattha bhava vivatṭūpanissayaṃ kusalaṃ upacinitvā imasmiṃ buddhuppāde vesāliyaṃ sīhasenāpatino bhaginiyā dhītā hutvā nibbatti. Tassā “mātulassa nāmaṃ karomā”ti **sīhā**ti nāmaṃ akaṃsu. Sā viññutaṃ patvā ekadivasaṃ satthārā sīhassa senāpatino dhamme desiyamāne taṃ dhammaṃ sutvā paṭiladdhasaddhā mātāpitaro anujānāpetvā pabbaji. Pabbajitvā ca vipassanaṃ ārabhitvāpi bahiddhā puthuttārammaṇe vidhāvantaṃ cittaṃ nivattetuṃ asakkontī satta saṃvaccharāni micchāvitakkehi bādhiyamānā cittassādaṃ alabhanti “kiṃ me iminā pāpajīvitena, ubbandhitvā marissāmī”ti pāsaṃ gahetvā rukkhāsākhāyaṃ laggitvā taṃ attano kaṅṅhe paṭimuñcantī pubbāciñṇavasena vipassanāya cittaṃ abhinīhari, antimabhavikatāya pāsassa bandhanaṃ gīvaṭṭhāne ahosi, ñāṇassa paripākaṃ gatattā sā tāvadeva vipassanaṃ vaḍḍhetvā saha paṭisambhidāhi arahattaṃ pāpuṇi. Arahattaṃ pattasamakālemeva ca pāsabandho gīvato mucchitvā vinivatti. Sā arahatte patiṭṭhitā udānavasena –

77. “Ayoniso manasikārā, kāmarāgena aṭṭitā;
Ahoṣiṃ uddhatā pubbe, citte avasavattinī.
78. “Pariyuṭṭhitā klesehi, subhasaññānuvattinī;
Samaṃ cittassa na labhiṃ, rāgacittavasānugā.
79. “Kisā paṇḍu vivaṇṇā ca, satta vassāni cārihaṃ;
Nāhaṃ divā vā rattim vā, sukhaṃ vindiṃ sudukkhitā.
80. “Tato rajjuṃ gahetvāna, pāvisiṃ vanamantaram;
Varam me idha ubbandhaṃ, yañca hīnaṃ punācare.
81. “Daḷhapāsaṃ karitvāna, rukkhāsākhāya bandhiya;
Pakkhipiṃ pāsaṃ gīvāyaṃ, atha cittaṃ vimucci me”ti. –

Imā gāthā abhāsi.

Tattha **ayoniso manasikārā**ti anupāyamanasikārena, asubhe subhanti vipallāsaggāhena. **Kāmarāgena aṭṭitā**ti kāmaguṇesu chandarāgena pīlitā. **Ahoṣiṃ uddhatā pubbe, citte avasavattinī**ti pubbe mama citte mayhaṃ vase avattamāne uddhatā nānārammaṇe vikkhittacittā asamāhitā ahoṣiṃ.

Pariyuṭṭhitā klesehi, subhasaññānuvattinīti pariyuṭṭhānapattehi kāmarāgādikilesehi abhibhūtā rūpādīsu subhanti pavattāya kāmasaññāya anuvattanasīlā. **Samaṃ cittassa na labhiṃ, rāgacittavasānugā**ti kāmarāgasampayuttacittassa vasaṃ anugacchantī īsakampi cittassa samaṃ cetosamathaṃ cittekaggataṃ na labhiṃ.

Kisā paṇḍu vivaṇṇā cāti evaṃ ukkaṅṅhitabhāvena kisā dhamanisanthatagattā uppaṇḍuppaṇḍukajātā tato eva vivaṇṇā vigatachavivaṇṇā ca hutvā. **Satta vassāni**ti satta saṃvaccharāni. **Cārihanti carim ahaṃ. Nāhaṃ divā vā rattim vā, sukhaṃ vindiṃ sudukkhitā**ti evamahaṃ sattaṃ saṃvaccharesu kilesadukkhena dukkhitā ekadāpi divā vā rattim vā samaṇasukhaṃ na paṭilabhiṃ.

Tatoti kilesapariyuṭṭhānena samaṇasukhālābhābhāvato. **Rajjuṃ gahetvāna pāvisiṃ, vanamantaranti** pāsarajjuṃ ādāya vanantaraṃ pāvisiṃ. Kimatthaṃ pāvisīti ce āha – “**varam me idha ubbandhaṃ, yañca hīnaṃ punācare**”ti yadahaṃ samaṇadhammaṃ kātuṃ asakkontī hīnaṃ gihibhāvaṃ puna ācare ācareyyaṃ anuṭṭheyyaṃ, tato sataguṇena saḥassaguṇena imasmiṃ vanantare ubbandhaṃ bandhitvā maraṇaṃ me varam seṭṭhanti attho. **Atha cittaṃ vimucci meti** yadā rukkhāsākhāya bandhapāsaṃ gīvāyaṃ pakkhipi, atha tadanantameva vuṭṭhānagāminivipassanāmaggena ghaṭitattā maggapaṭipāṭiyā sabbāsavehi mama cittaṃ vimucci vimuttaṃ ahoṣīti.

Sīhātherīgāthāvaṇṇanā niṭṭhitā.

4. Sundarīnandātherīgāthāvaṇṇanā

Āturaṃ asucintiādikā sundarīnandāya theriyā gāthā. Ayampi kira padumuttarassa bhagavato kāle haṃsavatīnagare kulagehe nibbattivā viññutaṃ patvā, satthu santike dhammaṃ suṇantī sathhāraṃ ekaṃ bhikkhuniṃ jhāyinīnaṃ aggaṭṭhāne ṭhapentaṃ disvā adhikārakammaṃ katvā taṃ ṭhānantaraṃ patthetvā kusalaṃ upacinantī kappasatasahassaṃ devamanussesu saṃsarantī imasmiṃ buddhuppāde sakyaṃ rājakule nibbatti. **Nandātissā** nāmaṃ akaṃsu. Aparabhāge rūpasampattiyā sundarīnandā, janapadakalyāṇīti ca paññāyittha. Sā amhākaṃ bhagavati sabbaññutaṃ patvā anupubbena kapilavatthum gantvā nandakumāraṃcā rāhulakumāraṃcā pabbājetvā gate suddhodanamahārāje ca parinibbuta mahāpajāpatigotamiyā rāhulamātāya ca pabbajitāya cintesi – “mayhaṃ jeṭṭhabhātā cakkavattirajjaṃ pahāya pabbajitvā loke aggapuggalo buddho jāto, puttupissa rāhulakumāro pabbaji, bhattāpi me nandarājā, mātāpi mahāpajāpatigotamī, bhaginīpi rāhulamātā pabbajitā, idānāhaṃ gehe kiṃ karissāmi, pabbajissāmi”ti bhikkhunupassayaṃ gantvā ñāṭisinehena pabbaji, no saddhāya. Tasmā pabbajitvāpi rūpaṃ nissāya uppannamadā. “Sathhā rūpaṃ vivaṇṇeti garahati, anekapariyāyena rūpe ādīnavam dasseti”ti buddhupaṭṭhānaṃ na gacchatītiādi sabbaṃ heṭṭhā abhirūpanandāya vatthusmiṃ vuttanayeneva vedītabbaṃ. Ayaṃ pana vireso – sathhārā nimmitaṃ itthirūpaṃ anukkamena jarābhūtaṃ disvā aniccato dukkhato anattato manasikarontiyā theriyā kammaṭṭhānābhimukhaṃ cittaṃ ahoṣi. Taṃ disvā sathhā tassā sappāyavasena dhammaṃ desento –

82. “Āturaṃ asuciṃ pūtiṃ, passa nande samussayaṃ;
Asubhāya cittaṃ bhāvehi, ekaggaṃ susamāhitaṃ.
83. “Yathā idaṃ tathā etaṃ, yathā etaṃ tathā idaṃ;
Duggandhaṃ pūtikaṃ vāti, bālānaṃ abhinanditaṃ.
84. “Evametaṃ avekkhantī, rattindivamatanditā;
Tato sakāya paññāya, abhinibbijjha dakkhisa”nti. –

Imā tisso gāthā abhāsi.

Sā desanānusārena ñānaṃ pesetvā sotāpattiṃphale patiṭṭhahi. Tassā uparimaggatthāya kammaṭṭhānaṃ ācikkhanto “nande, imasmiṃ sarīre appamattakopi sāro natthi, maṃsalohitalepano jarādīnaṃ vāsabhūto, aṭṭhipuñjamatto evāya”nti dassetuṃ –

“Aṭṭhinaṃ nagaraṃ kataṃ, maṃsalohitalepanaṃ;
Yattha jarā ca maccu ca, māno makkho ca ohito”ti. (dha. pa. 150) –

Dhammapade imaṃ gāthamāha.

Sā desanāvasāne arahattaṃ pāpuṇi. Tena vuttaṃ **apadāne** (apa. therī 2.3.166-219) –

“Padumuttaro nāma jino, sabbadhammāna pārāgū;
Ito satasahassamhi, kappe uppajji nāyako.

“Ovādako viññāpako, tāraṃ sabbapāṇinaṃ;
Desanākusalo buddho, tāresi janataṃ bahum.

“Anukampako kāruṇiko, hitesī sabbapāṇinaṃ;
Sampatte titthiye sabbe, pañcasīle patiṭṭhapi.

“Evaṃ nirākulaṃ āsi, suññataṃ titthiyehi ca;
Vicittaṃ arahantehi, vasībhūtehi tādibhi.

“Ratanānaṭṭhapaññāsaṃ, uggatova mahāmuni;
Kañcanagghiyasaṅkāso, bāttimsavaralakkhaṇo.

“Vassasatasahassāni, āyu vijjati tāvade;
Tāvataṃ tiṭṭhamāno so, tāresi janataṃ bahuṃ.

“Tadāhaṃ haṃsavatiyaṃ, jātā seṭṭhikule ahuṃ;
Nānāratanaṃpajjote, mahāsukhasamappitā.

“Upetvā taṃ mahāvīraṃ, assosiṃ dhammadesanaṃ;
Amataṃ paramassādaṃ, paramatthanivedakaṃ.

“Tadā nimantayitvāna, sasaṅghaṃ lokanāyakaṃ;
Datvā tassa mahādānaṃ, pasannā sehi paṇibhi.

“Jhāyinīnaṃ bhikkhunīnaṃ, aggaṭṭhānamapattayaṃ;
Nipacca sirasā dhīraṃ, sasaṅghaṃ lokanāyakaṃ.

“Tadā adantadamako, tilokasaraṇo pabhū;
Byākāsi naraśārathi, lacchase taṃ supatthitaṃ.

“Satasahassito kappe, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādā, orasā dhammanimmitā;
Nandāti nāma nāmena, hessati satthu sāvikā.

“Taṃ sutvā muditā hutvā, yāvajīvaṃ tadā jinaṃ;
Mettacittā paricariṃ, paccayehi vināyakaṃ.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Tato cutā yāmamaḡaṃ, tatohaṃ tusitaṃ gatā;
Tato ca nimmānaraṭiṃ, vasavattipuraṃ tato.

“Yattha yatthūpapajjāmi, tassa kammaṣa vāhasā;
Tattha tattheva rājūnaṃ, mahesittamakārayiṃ.

“Tato cutā manussatte, rājānaṃ cakkavattinaṃ;
Maṅḡalīnañca rājūnaṃ, mahesittamakārayiṃ.

“Sampattiṃ anubhotvāna, devesu manujesu ca;
Sabbattha sukhitā hutvā, nekaḡappesu saṃsariṃ.

“Pacchime bhava sampatte, suramme kapilavhaye;
Rañño suddhodanassāhaṃ, dhītā āsiṃ aninditā.

“Siriya rūpinim disvā, nanditaṃ āsi taṃ kulaṃ;
Tena nandāti me nāmaṃ, sundaraṃ pavaraṃ ahu.

“Yuvafīnañca sabbāsaṃ, kalyāṇīti ca vissutā;
Tasmimpi nagare ramme, ṭhapetvā taṃ yasodharaṃ.

“Jeṭṭho bhātā tilokaggo, pacchimo arahā tathā;
Ekākinī gahaṭṭhāhaṃ, mātarā paricoditā.

“Sākiyamhi kule jātā, putte buddhānujā tuvaṃ;
Nandenapi vinā bhūtā, agāre kinnu acchasi.

“Jarāvasānaṃ yobbaññaṃ, rūpaṃ asucisammaṃ;
Rogantamapicārogyaṃ, jīvitaṃ maraṇantikaṃ.

“Idampi te subhaṃ rūpaṃ, sasīkantaṃ manoharaṃ;
Bhūsanānaṃ alaṅkāraṃ, sirisaṅghāṭasaṃnibhaṃ.

“Puñjitaṃ lokasāraṃva, nayanānaṃ rasāyanaṃ;
Puññaṃ kittijanaṃ, ukkākulanandaṃ.

“Na cireneva kālena, jarā samadhisessati;
Vihāya gehaṃ kāruṇṇe, cara dhammamanindite.

“Sutvāhaṃ mātu vacanaṃ, pabbajim anagāriyaṃ;
Dehena natu cittena, rūpayobbanalāṭitā.

“Mahatā ca payattena, jhānajjhena paraṃ mama;
Kātuñca vadate mātā, na cāhaṃ tattha ussukā.

“Tato mahākāruṇiko, disvā maṃ kāmālāsaṃ;
Nibbandanattaṃ rūpasmim, mama cakkhupathe jino.

“Sakena ānubhāvena, itthim māpesi sobhiniṃ;
Dassanīyaṃ suruciraṃ, mamatopi surūpinim.

“Tamahaṃ vimhitā disvā, ativimhitadehiniṃ;
Cintayim saphalaṃ meti, nettalābhañca mānusaṃ.

“Tamahaṃ ehi subhage, yenattho taṃ vadehi me;
Kulaṃ te nāmagottañca, vada me yadi te piyaṃ.

“Na vañcakālo subhage, ucchaṅge maṃ nivāsaya;
Sīdantīva mamaṅgāni, pasuppayamuhuttakaṃ.

“Tato sīsaṃ mamaṅge sā, katvā sayi sulocanā;
Tassā nalāṭe patitā, luddhā paramadāruṇā.

“Saha tassā nipātena, piḷakā upapajjatha;
Paggharimsu pabhinnā ca, kuṇapā pubbalohitā.

“Pabhinnaṃ vadanañcāpi, kuṇapaṃ pūtigandhanaṃ;
Uddhumātaṃ vinilañca, pubbañcāpi sarīrakaṃ.

“Sā paveditasabbaṅgī, nissasantī muhuṃ muhuṃ;
Vedayantī sakaṃ dukkhaṃ, karuṇaṃ paridevayi.

“Dukkheṇa dukkhitā homi, phusayanti ca vedanā;
Mahādukkhe nimuggamhi, saraṇaṃ hohi me sakhī.

“Kuhiṃ vadanasoṭaṃ te, kuhiṃ te tuṅgañāsikā;
Tambabimbavaroṭṭhante, vadaṇaṃ te kuhiṃ gataṃ.

“Kuhiṃ sasānibhaṃ vaṇṇaṃ, kambugīvā kuhiṃ gatā;
Doḷā lolāva te kaṇṇā, vevaṇṇaṃ samupāgatā.

“Makuḷakhārahākārā, kalikāva payodharā;
Pabhinnā pūtikūṇapā, duṭṭhagandhittamāgatā.

“Vedimajjhāva susoṇī, sūnāva nītakibbisā;
Jātā amajjhabharitā, aho rūpamasassataṃ.

“Sabbhaṃ sarīrasañjātaṃ, pūtigandhaṃ bhayānakaṃ;
Susānamiva bībhaccaṃ, ramante yattha bālisā.

“Tadā mahākāruṇiko, bhātā me lokanāyako;
Disvā saṃviggacittaṃ maṃ, imā gāthā abhāsatha.

“Āturaṃ kuṇapaṃ pūtiṃ, passa nande samussayaṃ;
Asubhāya cittaṃ bhāvehi, ekaggaṃ susamāhitaṃ.

“Yathā idaṃ tathā etaṃ, yathā etaṃ tathā idaṃ;
Duggandhaṃ pūtikaṃ vāti, bālānaṃ abhinanditaṃ.

“Evametaṃ avekkhantī, rattindivamatanditā;
Tato sakāya paññāya, abhinibbijjha dakkhisaṃ.

“Tatohaṃ atisaṃviggā, sutvā gāthā subhāsītā;
Tatraṭṭhitāvahaṃ santī, arahattamaṃpāpuṇiṃ.

“Yattha yattha nisinnāhaṃ, sadā jhānaparāyaṇā;
Jino tasmīṃ guṇe tuṭṭho, etadagge ṭhapesi maṃ.

“Kilesā jhāpitā mayhaṃ...pe... kataṃ buddhassa sāsana’’nti.

Arahattaṃ pana patvā attano paṭipattiṃ paccavekkhitvā udānavasena “**āturaṃ asuci**’’ntiādīnā
sathārā desitāhi tīhi gāthāhi saddhiṃ –

85. “Tassā me appamattāya, vicinantiyā yoniso;
Yathābhūtaṃ ayaṃ kāyo, diṭṭho santarabāhiro.

86. “Atha nibbindahaṃ kāye, ajjhatañca virajjahaṃ;
Appamattā viṣaṃyuttā, upasantāmi nibbutā’’ti. –

Imā dve gāthā abhāsi.

Tattha **evametaṃ avekkhantī...pe... dakkhisanti** etaṃ āturādisabhāvaṃ kāyaṃ evaṃ ‘yathā idaṃ tathā eta’ntiādīnā vuttappakārena **rattindivaṃ** sabbakālaṃ atanditā hutvā parato ghosahetukaṃ sutamayaññaṃ muñcitvā, **tato** taṃnimittaṃ attani sambhūtattā **sakāyabhāvanāmayāya paññāya** yāthāvato ghanavinibbhogakaraṇena abhinibbijjha, kathaṃ nu kho **dakkhisam** passissanti ābhogapurecārikaṇa pubbhāgaññacakkhunā **avekkhantī** vicinantīti attho.

Tenāha “**tassā me appamattāyā**”tiādi. Tassattho – tassā me satiavippavāseṇa **appamattāya yoniso** upāyena aniccādivasena vipassanāpaññāya **vicinantiyā** vīmaṃsantiyā, **ayaṃ** khandhapañcakasaṅkhāto **kāyo** sasantānaparasantānavibhāgato **santarabāhiro** yathābhūtaṃ diṭṭho.

Atha tathā dassanato pacchā **nibbindahaṃ kāye** vipassanāpaññāsahitāya maggapaññāya attabhāve nibbindiṃ, visesatova ajjhattasantāne **virajji** virāgaṃ āpajjiṃ, ahaṃ yathābhūtāya appamādapatiṭṭhiyā matthakappatiyā **appamattā** sabbaso saṃyojanānaṃ samucchinnattā **visaṃyuttā** upasantā ca nibbutā ca amhīti.

Sundarīnandātherīgāthāvaṇṇanā niṭṭhitā.

5. Nanduttarātherīgāthāvaṇṇanā

Aggiṃ candañcatiādīkā nanduttarāya theriyā gāthā. Ayampi purimabuddhesu katādhikārā tattha tattha bhava vivaṭṭupaniṣṣayaṃ kusalaṃ upacinitvā imasmiṃ buddhuppāde kururaṭṭhe kammāsadhammanigame brāhmaṇakule nibbattitvā, ekaccāni vijjāṭṭhānāni sippāyatanāni ca uggahetvā nigaṇṭhapabbajjaṃ upagantvā, vādappasutā jambusākhaṃ gahetvā bhaddākuṇḍalakesā viya jambudīpatale vicarantī mahāmoggallānattheraṃ upasaṅkamitvā pañhaṃ pucchitvā parājayaṃ pattā therassa ovāde ṭhatvā sāsane pabbajitvā samaṇadhammaṃ karontī na cirasseva saha paṭisambhidāhi arahattaṃ patvā attano paṭipattiṃ paccavekkhitvā udānavasena –

87. “Aggiṃ candañca sūriyañca, devatā ca namassiham;
Nadītitthāni gantvāna, udakaṃ oruhāmiham.
88. “Bahūvatasamādānā, aḍḍhaṃ sīsassa olikhiṃ;
Chamāya seyyaṃ kappemi, rattiṃ bhattaṃ na bhuñjahaṃ.
89. “Vibhūsamaṇḍanaratā, nhāpanucchādanehi ca;
Upakāsiṃ imaṃ kāyaṃ, kāmarāgena aṭṭitā.
90. “Tato saddhaṃ labhitvāna, pabbajiṃ anagāriyaṃ;
Disvā kāyaṃ yathābhūtaṃ, kāmarāgo samūhato.
91. “Sabbe bhavā samucchinnā, icchā ca patthanāpi ca;
Sabbayogavisamūyuttā, santiṃ pāpuṇi cetaso’ti. –

Imā pañca gāthā abhāsi.

Tattha **aggiṃ candañca sūriyañca, devatā ca namassihanti** aggippamukhā devāti indānaṃ devānaṃ ārādhanaṭṭhaṃ āhutiṃ paggaḥetvā aggiñca, māse māse sukkapakkhassa dutiyāya candañca, divase divase sāyaṃ pātaṃ sūriyañca, aññā ca bāhirā hiraññagabbhādayo devatā ca, visuddhimaggaṃ gavesantī namassiham namakkāraṃ ahaṃ akāsiṃ. **Nadītitthāni gantvāna, udakaṃ oruhāmihanti** gaṅgādīnaṃ nadīnaṃ pūjātitthāni upagantvā sāyaṃ pātaṃ udakaṃ otarāmi udae nimujjitvā

aṅgasiñcanaṃ karomi.

Bahūvatasamādānāti pañcātapatappanādi bahuvidhavatasamādānā. Gāthāsukhatthaṃ bahūti dīghakaraṇaṃ. **Aḍḍhaṃ sīsassa olikhinti** mayhaṃ sīsassa aḍḍhameva muṇḍemi. Keci ‘‘aḍḍhaṃ sīsassa olikhinti kesakalāpassa aḍḍhaṃ jaṭābandhanavasena bandhitvā aḍḍhaṃ vissajjesi’’nti atthaṃ vadanti. **Chamāya seyyaṃ kappemī**ti thaṇḍilasāyinī hutvā anantarahitāya bhūmiyā sayāmi. **Rattiṃ bhattaṃ na bhuñjahanti** rattūparatā hutvā rattiyaṃ bhojanaṃ na bhuñjiṃ.

Vibhūsamaṇḍanaratāti cirakālaṃ attakilamathānuyogena kilantakāyā ‘‘evaṃ sarīrassa kilamanena natthi paññāsuddhi. Sace pana indriyānaṃ tosanavasena sarīrassa tappanena suddhi siyā’’ti mantvā imaṃ kāyaṃ anuggaṇhantī vibhūsāyaṃ maṇḍane ca ratā vatthālaṅkārehi alaṅkaraṇe gandhamālādīhi maṇḍane ca abhiratā. **Nhāpanucchādanehi cāti** sambāhanādīni kāretvā nhāpanena ucchādanena ca. **Upakāsiṃ imaṃ kāyanti** imaṃ mama kāyaṃ anuggaṇhiṃ santappesiṃ. **Kāmarāgena aṭṭitāti** evaṃ kāyadaḷhībahulā hutvā ayonisomanasikārapaccayā pariyuṭṭhitena kāmarāgena aṭṭitā abhiṇhaṃ upaddutā ahoṣiṃ.

Tato saddhaṃ labhitvānāti evaṃ samādinnavatāni bhinditvā kāyadaḷhībahulā vādappasutā hutvā tattha tattha vicarantī tato pacchā aparabhāge mahāmoggallānattherassa santike laddhovādānusāsanaṃ saddhaṃ paṭilabhitvā. **Disvā kāyaṃ yathābhūtaṃ** saha vipassanāya maggapaññāya imaṃ mama kāyaṃ yathābhūtaṃ disvā anāgāmimaggena sabbaso kāmarāgo samūhato. Tato paraṃ aggamaggena **sabbe bhavā samucchinnā, icchā ca patthanāpi** cāti paccuppannavisayābhilāsasaṅkhātā icchā ca āyatibhavābhilāsasaṅkhātā patthanāpi sabbe bhavāpi samucchinnāti yojanā. **Santiṃ pāpuṇi cetasoti** accantaṃ santiṃ arahattaphalaṃ pāpuṇiṃ adhigacchinti attho.

Nanduttarātherīgāthāvaṇṇanā niṭṭhitā.

6. Mittākālītherīgāthāvaṇṇanā

Saddhāya pabbajitvānātiadikā mittākāliyā theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī imasmiṃ buddhuppāde kururaṭṭhe kammāsadhammanigame brāhmaṇakule nibbattitvā viññutaṃ pattā mahāsatiṭṭhānadesanāya paṭiladdhasaddhā bhikkhunīsu pabbajitvā satta saṃvaccharāni lābhasakkāragiddhikā hutvā samaṇadhammaṃ karontī tattha tattha vicaritvā aparabhāge yoniso ummujjantī saṃvegajātā hutvā vipassanaṃ paṭṭhapetvā na cirasseva saha paṭisambhidāhi arahattaṃ patvā attano paṭipattiṃ paccavekkhitvā udānavasena –

92. ‘‘Saddhāya pabbajitvāna, agārasmānagāriyaṃ;
Vicarīhaṃ tena tena, lābhasakkāraussukā.
93. ‘‘Riñcitvā paramaṃ atthaṃ, hīnamatthaṃ asevihaṃ;
Kilesānaṃ vasaṃ gantvā, sāmāññatthaṃ na bujjhihaṃ.
94. ‘‘Tassā me ahu saṃvego, nisinnāya vihārake;
Ummaggaṭṭipannāmi, taṇhāya vasamāgatā.
95. ‘‘Appakaṃ jīvitaṃ mayhaṃ, jarā byādhi ca maddati;
Purāyaṃ bhijjati kāyo, na me kālo pamajjituṃ.
96. ‘‘Yathābhūtamavekkhantī, khandhānaṃ udayabbayaṃ;
Vimuttacittā uṭṭhāsiṃ, kataṃ buddhassa sāsana’’nti. – imā gāthā abhāsi;

Tattha **vicariṃhaṃ tena tena, lābhasakkāraussukāti** lābhe ca sakkāre ca ussukā yuttappayuttā hutvā tena tena bāhusaccadhammakathādīnā lābhuppādahetunā vicariṃhaṃ ahaṃ.

Riñcitvā paramaṃ atthanti jhānavipassanāmaggaḥāḍiṃ uttamaṃ atthaṃ jahitvā chaḍḍetvā. **Hīnamatthaṃ asevihanti** catupaccayasāṅkhātaāmisabhāvato hīnaṃ lāmakam atthaṃ ayoniso pariyesanāya paṭiseviṃ ahaṃ. **Kilesānaṃ vasaṃ gantvāti** mānamadatanḥādīnaṃ kilesānaṃ vasaṃ upagantvā **sāmaññatthaṃ** samaṇakiccaṃ **na bujhiṃ** na jāniṃ ahaṃ.

Nisinnāya vihāraketi mama vasanakaovarake nisinnāya ahu saṃvego. Kathanti ce, āha “**ummaggapaṭipannāmhī**”ti. Tattha **ummaggapaṭipannāmhīti** yāvadeva anupādāya parinibbānatthamidaṃ sāsanaṃ, tattha sāsane pabbajitvā kammaṭṭhānaṃ amanasikarontī tassa ummaggaṭipannā amhīti. **Taṇhāya vasamāgatāti** paccayuppādanatanḥāya vasaṃ upagatā.

Appakaṃ jīvitam mayhanti paricchinnakālā vajjitato bahūpaddavato ca mama jīvitam appakaṃ parittaṃ lahukaṃ. **Jarā byādhi ca maddatīti** tañca samantato āpatitvā nippothentā pabbatā viya jarā byādhi ca maddatī nimmathati. “Maddare”tipi pāṭho. **Purāyaṃ bhijjati kāyoti** ayaṃ kāyo bhijjati purā. Yasmā tassa ekaṃsiko bhedo, tasmā **na me kālo pamajjitum** ayaṃ kālo aṭṭhakkhaṇavajjito navamo khaṇo, so pamajjitum na yuttoti tassāhuṃ saṃvegoti yojanā.

Yathābhūtamavekkhantīti evaṃ jātasamvegā vipassanaṃ paṭṭhapetvā aniccādimanasikārena yathābhūtamavekkhantī. Kiṃ avekkhantīti āha “**khandhānaṃ udayabbaya**”nti. “Avijjāsamudayā rūpasamudayo”tiādīnā (paṭi. ma. 1.50) samapaññāsappabhedānaṃ pañcannaṃ upādānakkhandhānaṃ uppādanīrodhañca udayabbayānupassanāya avekkhantī vipassanaṃ ussukkāpetvā maggaṭipāṭiyā sabbaso kilesehi ca bhavehi ca vimuttacittā uṭṭhāsiṃ, ubhato uṭṭhānena maggena bhavattayato cāti vuṭṭhitā ahoṣiṃ. Sesam vuttanayameva.

Mittākālītherīgāthāvaṇṇanā niṭṭhitā.

7. Sakulātherīgāthāvaṇṇanā

Agārasmiṃ vasantītiādīkā sakulāya theriyā gāthā. Ayaṃ kira padumuttarassa bhagavato kāle haṃsavatīnagare ānandassa rañño dhītā hutvā nibbattā, satthu vemātikabhaginī **nandāti** nāmena. Sā viññutaṃ patvā ekadivasam satthu santike dhammaṃ suṇantī satthārā ekaṃ bhikkhuniṃ dibbacakkhukānaṃ aggaṭṭhāne ṭhapentaṃ disvā ussāhajātā adhiḥāraṃ katvā sayampi taṃ ṭhānantaraṃ patthentī paṇidhānamakāsi. Sā tattha yāvajīvaṃ bahuṃ ulāraṃ kusalakammaṃ katvā devaloke nibbattitvā aparāparaṃ sugatīsuyeva saṃsarantī kassapassa bhagavato kāle brāhmaṇakule nibbattitvā paribbājapabbajjamaṃ pabbajitvā ekacārīnī vicarantī ekadivasam telabhikkhāya āhiṇḍitvā telaṃ labhitvā tena telena satthu cetiye sabbarattim dīpapūjamaṃ akāsi. Sā tato cutā tāvatimse nibbattitvā suvisuddhadibbacakkhukā hutvā ekaṃ buddhantaṃ devesuyeva saṃsaritvā imasmim buddhuppāde sāvattiyamaṃ brāhmaṇakule nibbatti. **Sakulātissā** nāmaṃ ahoṣi. Sā viññutaṃ pattā satthu jetavanapaṭiggahaṇe paṭiladdhasaddhā upāsikā hutvā aparabhāge aññatarassa khīṇāsavatttherassa santike dhammaṃ sutvā sañjātasamvegā pabbajitvā vipassanaṃ paṭṭhapetvā ghaṭentī vāyamantī na cirasseva arahattaṃ pāpuṇi. Tena vuttaṃ **apadāne** (apa. therī 2.3.131-165) –

“Padumuttaro nāma jino, sabbadhammāna pāragū;
Ito satasahassamhi, kappe uppajji nāyako.

“Hitāya sabbasattānaṃ, sukhāya vadatam varo;
Atthāya purisājañño, paṭipanno sadevake.

“Yasaggaṭto sirimā, kittivaṇṇagato jino;

Pūjito sabbalokassa, disā sabbāsu vissuto.

“Uttiṇṇavicikiccho so, vītivattakathaṃkatho;
Sampunṇamanasaṅkappo, patto sambodhimuttamaṃ.

“Anuppannassa maggassa, uppādetā naruttamo;
Anakkhātañca akkhāsi, asaṅjātañca saṅjanī.

“Maggaññū ca maggavidū, maggakkhāyī narāsabho;
Maggassa kusalo satthā, sārathīnaṃ varuttamo.

“Mahākāruṇiko satthā, dhammaṃ deseti nāyako;
Nimugge kāmapaṅkamhi, samuddharati pāṇine.

“Tadāhaṃ haṃsavatiyaṃ, jātā khattiyandanā;
Surūpā sadhanā cāpi, dayitā ca sirīmatī.

“Ānandassa mahārañño, dhītā paramasobhanā;
Vemātā bhaginī cāpi, padumuttaranāmino.

“Rājakaññāhi sahitā, sabbābharaṇabhūsitā;
Upāgamma mahāvīraṃ, assosiṃ dhammadesanaṃ.

“Tadā hi so lokagaru, bhikkhuṇiṃ dibbacakkhukaṃ;
Kittayaṃ parisāmajjhe, aggaṭṭhāne ṭhapesi taṃ.

“Suṇitvā tamahaṃ haṭṭhā, dānaṃ datvāna satthuno;
Pūjivāna ca sambuddhaṃ, dibbacakkuṃ apatthayiṃ.

“Tato avoca maṃ satthā, nande lacchasi patthitaṃ;
Padīpadhammadānaṃ, phalametaṃ sunicchitaṃ.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādā, orasā dhammanimmitā;
Sakulā nāma nāmena, hessati satthu sāvikā.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Imamhi bhaddake kappe, brahmabandhu mahāyaso;
Kassapo nāma gottena, uppajji vadataṃ varo.

“Paribbājakinī āsiṃ, tadāhaṃ ekacārini;
Bhikkhāya vicarivāna, alabhiṃ telamattakaṃ.

“Tena dīpaṃ padīpetvā, upaṭṭhiṃ sabbasaṃvarim;
Cetiyaṃ dvīpadaggassa, vippasannena cetasā.

“Tena kamma sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Yattha yatthūpapajjāmi, tassa kamma vāhasā;
Pajjalanti mahādīpā, tattha tattha gatāya me.

“Tirokuṭṭaṃ tiroselāṃ, samatiggayha pabbataṃ;
Passāmahaṃ yadicchāmi, dīpadānassidaṃ phalaṃ.

“Visuddhanayanā homi, yasaṃ ca jalāmahaṃ;
Saddhāpaññavatī ceva, dīpadānassidaṃ phalaṃ.

“Pacchime ca bhava dāni, jātā vipakule ahaṃ;
Pahūtadhanadhaññaṃhi, mudite rājapūjite.

“Ahaṃ sabbaṅgasampannā, sabbābharaṇabhūsitā;
Purappaveṣe sugataṃ, vātapāne ṭhitā ahaṃ.

“Disvā jalantaṃ yasaṃ, devamanussasakkataṃ;
Anubyañjanasampannaṃ, lakkhaṇehi vibhūsitāṃ.

“Udaggacittā sumanā, pabbajjaṃ samarocayim;
Na cireneva kālena, arahattamaṃ puṇim.

“Iddhīsu ca vasī homi, dibbāya sotadhātuyā;
Paracittāni jānāmi, satthusāsanakārikā.

“Pubbenivāsaṃ jānāmi, dibbacakkhu visodhitāṃ;
Khepetvā āsave sabbe, visuddhāsiṃ sunimmaṃ.

“Paricīṇṇo mayā satthā, kataṃ buddhassa sāsanaṃ;
Ohito garuko bhāro, bhavanettisamūhatā.

“Yassatthāya pabbajitā, agārasmānagāriyaṃ;
So me attho anupatto, sabbasaṃyojanakkhaya.

“Tato mahākāruṇiko, etadagge ṭhapesi maṃ;
Dibbacakkhukānaṃ aggā, sakulāti naruttamo.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā katādhikāratāya dibbacakkhuññaṃ cīṇṇavasī ahoṣi. Tena naṃ satthā dibbacakkhukānaṃ bhikkhunīnaṃ aggaṭṭhāne ṭhapesi. Sā attano paṭipattiṃ paccavekkhitvā pītisomanassajātā udānavasena –

97. “Agārasmiṃ vasantīhaṃ, dhammaṃ sutvāna bhikkhuno;
Addasaṃ virajaṃ dhammaṃ, nibbānaṃ padamaccutaṃ.

98. “Sāhaṃ puttaṃ dhītaraṇca, dhanadhaññaṇca chaḍḍiya;
Kese chedāpayitvāna, pabbajim anagāriyaṃ.

99. “Sikkhamānā ahaṃ santī, bhāventī maggamañjasaṃ;

Pahāsiṃ rāgadosaṅca, tadekaṭṭhe ca āsave.

100. “Bhikkhunī upasampajja, pubbajātimanussariṃ;
Dibbacakkhu visodhitam, vimalam sādhubhāvitam.
101. “Saṅkhāre parato disvā, hetujāte palokite;
Pahāsiṃ āsave sabbe, sītibhūtāmhi nibbutā”’ti. –

Imā gāthā abhāsi.

Tattha **agārasmiṃ vasantīhaṃ, dhammaṃ sutvāna bhikkhunoti** ahaṃ pubbe agāramajjhe vasamānā aññatarassa bhinnakilesassa bhikkhuno santike catusaccagabbhaṃ dhammakathaṃ sutvā. **Addasaṃ virajaṃ dhammaṃ, nibbānaṃ padamaccutanti** rāgarajādīnaṃ abhāvena virajaṃ, vānato nikkhantattā nibbānaṃ, cavanābhāvato adhigatānaṃ accutihetutāya ca nibbānaṃ accutaṃ, padanti ca laddhanāmaṃ asaṅkhatadhammaṃ, sahasanayapaṭimaṇḍitena dassanasāṅkhātena dhammacakkhunā addasaṃ passim.

Sāhanti sā ahaṃ vuttappakārena sotāpannā homi.

Sikkhamānā ahaṃ santīti ahaṃ sikkhamānāva samānā pabbajitvā vasse aparipuṇṇe eva. **Bhāventī maggamañjasanti** majjhimaṇḍitaṃ aṅgasaṃ uparimaggam uppādentī. **Tadekaṭṭhe ca āsaveti** rāgadosehi sahaṅkhaṭṭhe pahānekaṭṭhe ca tatiyamaggavajjhe āsave **pahāsiṃ** samucchindim.

Bhikkhunī upasampajjāti vasse paripuṇṇe upasampajjitvā bhikkhunī hutvā. **Vimalanti** avijjādīhi upakkilesehi vimuttatāya vigatamaṃ, **sādhu** sakkacca sammadeva **bhāvitam**, sādhuhi vā buddhādīhi **bhāvitam** uppāditaṃ dibbacakkhu visodhitanti sambandho.

Saṅkhāreti tebhūmakasaṅkhāre. **Paratoti** anattato. **Hetujātetī** paccayuppanne. **Palokitetī** palujjanasabhāve pabhaṅgune paññācakkhunā disvā. **Pahāsiṃ āsave sabbeti** aggamaggena avasiṭṭhe sabbepi āsave pajahim, khepesinti attho. Sesam vuttanayameva.

Sakulātherīgāthāvaṇṇanā niṭṭhitā.

8. Soṇātherīgāthāvaṇṇanā

Dasa putte vijāyitvātiādikā soṇāya theriyā gāthā. Ayampi padumuttarassa bhagavato kāle haṃsavatīnagare kulagehe nibbattitvā viññutaṃ patvā ekadivasam satthu santike dhammaṃ suṇantī satthāraṃ ekaṃ bhikkhuniṃ āradhaviyānaṃ bhikkhunīnaṃ aggaṭṭhāne ṭhapentaṃ disvā, adhikāraṃ katvā sayampi taṃ ṭhānantaraṃ patthetvā yāvajīvaṃ puññāni katvā, tato cutā kappasatasahassaṃ devamanussesu saṃsaritvā imasmiṃ buddhuppāde sāvatthiyam kulagehe nibbattitvā vayappattā patikulaṃ gatā dasa puttadhītarō labhitvā **bahuputtikā**ti paññāyittha. Sā sāmike pabbajite vayappatte puttadhītarō gharāvāse patiṭṭhāpetvā sabbaṃ dhanam puttānaṃ vibhajitvā adāsi, na kiñci attano ṭhapesi. Taṃ puttā ca dhītarō ca katipāhameva upaṭṭhāhitvā paribhavaṃ akaṃsu. Sā “kiṃ mayhaṃ imehi paribhavāya ghare vasantiyā”’ti bhikkhuniyo upasaṅkamtivā pabbajam yāci. Taṃ bhikkhuniyo pabbājesum. Sā laddhūpasampadā “ahaṃ mahallikākāle pabbajitvā appamattāya bhavitabba”’nti bhikkhunīnaṃ vattapaṭivattaṃ karontī “sabbarattim samaṇadhammaṃ karissāmi”’ti heṭṭhāpāsāde ekathambhaṃ hatthena gahetvā taṃ avijahamānā samaṇadhammaṃ karontī caṅkamamānāpi “andhakāre ṭhāne rukkhādīsū yattha katthaci me sīsam paṭihañneyyā”’ti rukkhāṃ hatthena gahetvā taṃ avijahamānāva samaṇadhammaṃ karoti. Tato paṭṭhāya sā āradhaviyātāya pākāṭā ahoṣi. Satthā tassā nānaparipākaṃ disvā gandhakuṭiyam nisinnova obhāsam pharitvā sammukhe nisinno viya attānaṃ dassetvā –

“Yo ca vassasataṃ jīve, apassaṃ dhammamuttamaṃ;
Ekāhaṃ jīvitaṃ seyyo, passato dhammamuttama’nti. (dha. pa. 115) –

Gāthaṃ abhāsi. Sā gāthāpariyosāne arahattaṃ pāpuṇi. Tena vuttaṃ **apadāne** (apa. therī 2.3.220-243) –

“Padumuttaro nāma jino, sabbadhammāna pāragū;
Ito satasahassamhi, kappe uppajji nāyako.

“Tadā seṭṭhikule jātā, sukhitā pūjitā piyā;
Upetvā taṃ munivaraṃ, assosiṃ madhuraṃ vacaṃ.

“Āraddhavīriyānaggaṃ, vaṇṇesi bhikkhuniṃ jino;
Taṃ sutvā muditā hutvā, kāraṃ katvāna satthuno.

“Abhivādiya sambuddhaṃ, thānaṃ taṃ patthayiṃ tadā;
Anumodi mahāvīro, sījjhataṃ paṇidhī tava.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādā, orasā dhammanimmitā;
Soṇāti nāma nāmena, hessati satthu sāvīkā.

“Taṃ sutvā muditā hutvā, yāvajīvaṃ tadā jinaṃ;
Mettacittā paricariṃ, paccayehi vināyakaṃ.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Pacchime ca bhava dāni, jātā seṭṭhikule ahaṃ;
Sāvattthiyaṃ puravare, iddhe phīte mahaddhane.

“Yadā ca yobbanappattā, gantvā patikulaṃ ahaṃ;
Dasa puttāni ajaniṃ, surūpāni visesato.

“Sukhedhitā ca te sabbe, jananettamanoharā;
Amittānampi rucitā, mama pageva te siyā.

“Tato mayhaṃ akāmāya, dasaputtapurakkhato;
Pabbajittha sa me bhattā, devadevassa sāsane.

“Tadekikā vicintesiṃ, jīvitenālamatthu me;
Cattāya patiputtehi, vuḍḍhāya ca varākiyā.

“Ahampi tattha gacchissaṃ, sampatto yattha me pati;
Evāhaṃ cintayitvāna, pabbajiṃ anagāriyaṃ.

“Tato ca maṃ bhikkhuniyo, ekaṃ bhikkhunupassaye;
Vihāya gacchumovādaṃ, tāpehi udakaṃ iti.

“Tadā udakamāhitvā, okiritvāna kumbhiyā;
Culle ṭhapetvā āsīnā, tato cittaṃ samādahiṃ.

“Khandhe aniccato disvā, dukkhato ca anattato;
Khepetvā āsave sabbe, arahattamapāpuṇiṃ.

“Tadāgantvā bhikkhuniyo, uṇhodakamapucchisum;
Tejodhātumadhiṭṭhāya, khippaṃ santāpayiṃ jalaṃ.

“Vimhitā tā jinavaraṃ, etamatthamasāvayum;
Taṃ sutvā mudito nātho, imaṃ gāthaṃ abhāsatha.

“Yo ca vassasataṃ jīve, kusīto hīnavīriyo;
Ekāhaṃ jīvitam seyyo, vīriyamārabhato daḷhaṃ.

“Ārādhito mahāvīro, mayā suppaṭipattiyā;
Āraddhavīriyānaggam, mamāha sa mahāmuni.

“Kilesā jhāpitā mayhaṃ...pe... kataṃ buddhassa sāsana”nti.

Atha naṃ bhagavā bhikkhuniyo paṭipāṭiyā ṭhānantare ṭhapento āraddhavīriyānaṃ aggaṭṭhāne ṭhapesi. Sā ekadivasaṃ attano paṭipattiṃ paccavekkhitvā udānavasena –

102. “Dasa putte vijāyitvā, asmiṃ rūpasamussaye;
Tatohaṃ dubbalā jiṇṇā, bhikkhuniṃ upasaṅkamim.

103. “Sā me dhammadesesi, khandhāyatanadhātuyo;
Tassā dhammaṃ suṇitvāna, kese chetvāna pabbajim.

104. “Tassā me sikkhamānāya, dibbacakkhu visodhitam;
Pubbenivāsaṃ jānāmi, yattha me vusitaṃ pure.

105. “Animittaṅca bhāvemī, ekaggā susamāhitā;
Anantarāvimokkhāsim, anupādāya nibbutā.

106. “Pañcakkhandhā pariññātā, tiṭṭhanti chinamūlakā;
Dhi tavatthu jare jamme, natthi dāni punabbhavo”ti. – imā gāthā abhāsi;

Tattha **rūpasamussayeti** rūpasaṅkhāte samussaye. Ayañhi rūpasaddo “cakkhuṅca paṭicca rūpe ca uppajjati cakkhuviññāṇa”ntiādīsu (saṃ. ni. 4.60) rūpāyatane āgato. “Yaṃkiñci rūpaṃ atītanāgatapaccuppanna”ntiādīsu (a. ni. 4.181) rūpakhandhe. “Piyarūpe satarūpe rajjati”tiādīsu (ma. ni. 1.409) sabhāve. “Bahiddhā rūpāni passati”tiādīsu (dī. ni. 3.338; a. ni. 1.427-434) kasiṇāyatane. “Rūpī rūpāni passati”tiādīsu (dī. ni. 3.339; a. ni. 1.435-442) rūpajhāne. “Aṭṭhiṅca paṭicca nharuṅca paṭicca maṃsaṅca paṭicca cammaṅca paṭicca ākaso parivārito rūpantveva saṅkhaṃ gacchati”tiādīsu (ma. ni. 1.306) rūpakāye. Idhāpi rūpakāyeva daṭṭhabbo. **Samussayasaddopi** aṭṭhīnaṃ sarīrassa pariyāyo. “Satanti samussaya”tiādīsu aṭṭhisarīrapariyāye. “Āturaṃ asuciṃ pūtiṃ, passa nande samussaya”ntiādīsu (theragā. 19) sarīre. Idhāpi sarīre eva daṭṭhabbo. Tena vuttaṃ – “rūpasamussaye”ti, rūpasaṅkhāte samussaye sarīreti attho. Ṭhatvāti vacanaseso. Asmiṃ rūpasamussayeti hi imasmiṃ rūpasamussaye ṭhatvā imaṃ rūpakāyaṃ nissāya dasa putte vijāyitvāti yojanā. **Tatoti** tasmā dasaputtavijāyanahetu. Sā hi paṭhamavayaṃ atikkamitvā puttake vijāyantī anukkamena dubbalasarīrā jarājiṇṇā ca ahosi. Tena vuttaṃ “**tatohaṃ dubbalā jiṇṇā**”ti.

Tassāti tato, **tassāti** vā tassā santike. Puna tassāti karaṇe sāmivacaṇaṃ, tātāti attho. **Sikkhamānāyāti** tissopi sikkhā sikkhamānā.

Anantarāvimokkhāsinti aggamaggassa anantarā uppannavimokkhā āsiṃ. Rūpī rūpāni passatītiādayo hi aṭṭhapi vimokkhā anantarāvimokkhā nāma na honti. Maggānantaraṃ anuppattā hi phalavimokkhā phalasaṃpattikāle pavattamānāpi paṭhamamaggānantarameva samuppattito taṃ upādāya anantarāvimokkhā nāma, yathā maggasamādhī ānantarikasamādhīti vuccati. **Anupādāya nibbutāti** rūpādīsu kiñcīpi aggahetvā kilesaparinibbānena nibbutā āsiṃ.

Evam vijjāttayaṃ vibhāvetvā arahattaphalena kūṭaṃ gaṇhantī udānetvā, idāni jarāya cirakālaṃ upaddutasarīraṃ vīgārahantī saha vatthunā tassa samatikkantabhāvaṃ vibhāvetuṃ “**pañcakkhandhā pariññātā**”ti osānagāthamāha. Tattha **dhi tavatthu jare jammeti** aṅgānaṃ sīthilabhāvākaraṇādīnā jare jamme lāmake hīne tava tuyhaṃ dhi atthu dhikāro hotu. **Natthi dāni punabbhavoti** tasmā tvam mayā atikkantā abhibhūtāsīti adhippāyo.

Soṇātherīgāthāvaṇṇanā niṭṭhitā.

9. Bhaddākuṇḍalakesātherīgāthāvaṇṇanā

Lūnakesītiādīkā bhaddāya kuṇḍalakesāya theriyā gāthā. Ayampi padumuttarassa bhagavato kāle haṃsavatīnagare kulagehe nibbattitvā viññutaṃ patvā ekadivasaṃ satthu santike dhammaṃ suṇantī satthāraṃ ekaṃ bhikkhuniṃ khippābhīññānaṃ aggaṭṭhāne ṭhapentaṃ disvā, adhikāraṃ katvā taṃ ṭhānantaraṃ patthetvā yāvajīvaṃ puññāni katvā kappasatasahassaṃ devamanussesu saṃsaritvā kassapabuddhakāle **kikissa** kāsirañño gehe sattannaṃ bhaginīnaṃ abhantaṃ hutvā, vīsati vassasahassāni dasa sīlāni samādāya komāribrahmacariyaṃ carantī saṅghassa vasanapariveṇaṃ kāretvā, ekaṃ buddhantaṃ sugatīsusueva saṃsaritvā imasmiṃ buddhuppāde rājagahe seṭṭhikule nibbatti. **Bhaddātissā** nāmaṃ ahoṣi. Sā mahatā parivārena vaḍḍhamānā vayappattā, tasmīnyeva nagare purohitassa puttāṃ sattukaṃ nāma coraṃ sahoḍḍhaṃ gahetvā rājāṇāya nagaraguttikena māretuṃ āghātaṃ niyyamānaṃ, sīhapañjarena oloketī disvā paṭibaddhacittā hutvā sace taṃ labhāmi, jīvissāmi; no ce, marissāmi ti sayane adhomukhī nipajji.

Athassā pitā taṃ pavattim sutvā ekadhītutāya balavasineho saḥassalañjaṃ datvā upāyeneva coraṃ vissajjāpetvā gandhodaḥkena nhāpetvā sabbābharaṇapaṭimaṇḍitaṃ kāretvā pāsādaṃ pesesi. Bhaddāpi paripuṇṇamanorathā atirekālaṅkārena alaṅkaritvā taṃ paricarati. Sattuko katipāhaṃ vītināmetvā tassā ābharaṇesu uppannalobho bhadda, ahaṃ nagaraguttikena gahitamattova corapapāte adhipatthāya devatāya “sacāhaṃ jīvitaṃ labhāmi, tuyhaṃ balikammaṃ upasaṃharissāmi”ti patthanaṃ āyācīṃ, tasmā balikammaṃ sajjāpehīti. Sā “tassa manaṃ pūressāmi”ti balikammaṃ sajjāpetvā sabbābharaṇavibhūsitā sāmikena saddhim ekaṃ yānaṃ abhiruyha “devatāya balikammaṃ karissāmi”ti corapapātaṃ abhiruhitūṃ āradhā.

Sattuko cintesi – “sabbesu abhiruhantesu imissā ābharaṇaṃ gahetuṃ na sakkā”ti parivāraṇaṃ tattheva ṭhapetvā tameva balibhājanaṃ gāhāpetvā pabbataṃ abhiruhanto tāya saddhim piyakathaṃ na kathesi. Sā iṅgiteneva tassādhīpāyaṃ aññāsī. Sattuko, “bhadda, tava uttarasātaṃ omuñcītvā kāyārūlhapasādhanaṃ bhaṇḍikaṃ karohī”ti. Sā, “sāmi, mayhaṃ ko aparādhō”ti? “Kiṃ nu maṃ, bāle, ‘balikammattaṃ āgato’ti saññaṃ karosi? Balikammāpadesena pana tava ābharaṇaṃ gahetuṃ āgato”ti. “Kassa pana, ayya, pasādhanaṃ, kassa aha”nti? “Nāhaṃ etaṃ vibhāgaṃ jānāmi”ti. “Hotu, ayya, ekaṃ pana me adhippāyaṃ pūrehi, alaṅkataniyāmena ca āliṅgituṃ dehī”ti. So “sādhū”ti sampācīchi. Sā tena sampācīchitabhāvaṃ ṇatvā purato āliṅgitvā pacchato āliṅgantī viya pabbatapapāte pātesi. So patitvā cuṇṇavicuṇṇaṃ ahoṣi. Tāya kataṃ acchariyaṃ disvā pabbate adhipatthā devatā kosallaṃ vibhāventī imā gāthā abhāsi –

“Na hi sabbesu ṭhānesu, puriso hoti paṇḍito;
Itthīpi paṇḍitā hoti, tattha tattha vicakkhaṇā.

“Na hi sabbesu ṭhānesu, puriso hoti paṇḍito;
Itthīpi paṇḍitā hoti, lahuṃ atthavicintikā”ti. (apa. therī. 2.3.31-32);

Tato bhaddā cintesi – “na sakkā mayā iminā niyāmena gehaṃ gantuṃ, itova gantvā ekaṃ pabbajjaṃ pabbajissāmi”ti nigaṇṭhārāmaṃ gantvā nigaṇṭhe pabbajjaṃ yāci. Atha naṃ te āhaṃsu – “kena niyāmena pabbajjā hotū”ti? “Yaṃ tumhākaṃ pabbajjāya uttamaṃ, tadeva karothā”ti. Te “sādhū”ti tassā tālaṭṭhinā kese luñcivā pabbājesuṃ. Puna kesā vaḍḍhantā kuṇḍalāvaṭṭā hutvā vaḍḍhesuṃ. Tato paṭṭhāya sā **kuṇḍalakesā**ti nāma jātā. Sā tattha uggahettabbaṃ samayaṃ vādamaggaṇca uggahetvā “ettakaṃ nāma ime jānanti, ito uttari viseso natthī”ti ṇatvā tato apakkamitvā yattha yattha paṇḍitā atthi, tattha tattha gantvā tesam jānanasippaṃ uggahetvā attanā saddhiṃ kathetuṃ samatthaṃ adisvā yaṃ yaṃ gāmaṃ vā nigamaṃ vā pavisati, tassa dvāre vālukārāsimaṃ katvā tattha jambusākhaṃ ṭhapetvā “yo mama vādaṃ āropetuṃ sakkoti, so imaṃ sākhaṃ maddatū”ti samīpe ṭhitadārakānaṃ saññaṃ datvā vasanaṭṭhānaṃ gacchati. Sattāhampi jambusākhāya tatheva ṭhitāya taṃ gahetvā pakkamati.

Tena ca samayena amhākaṃ bhagavā loke uppajjivā pavattitavaradhammacakko anupubbena sāvatthiṃ upanissāya jetavane viharati. Kuṇḍalakesāpi vuttanayena gāmanigamarājadhānīsu vicarantī sāvatthiṃ patvā nagaradvāre vālukārāsimaṃ jambusākhaṃ ṭhapetvā dārakānaṃ saññaṃ datvā sāvatthiṃ pāvīsi.

Athāyasmā dhammasenāpati ekakova nagaraṃ pavisanto taṃ sākhaṃ disvā taṃ dametukāmo dārake pucchi – “kasmāyaṃ sākhaṃ evaṃ ṭhapitā”ti? Dārakā tamatthaṃ ārocesuṃ. Thero “yadi evaṃ imaṃ sākhaṃ maddathā”ti āha. Dārakā taṃ maddiṃsu. Kuṇḍalakesā katabhattakiccā nagarato nikkhamantī taṃ sākhaṃ madditaṃ disvā “kenidaṃ maddita”nti pucchitvā therena maddāpitabhāvaṃ ṇatvā “apakkhiko vādo na sobhati”ti sāvatthiṃ pavisitvā vīthito vīthiṃ vicarantī “passeyyātha samaṇehi sakyaputtiyehi saddhiṃ mayhaṃ vāda”nti ugghosetvā mahājanaparivutā aññatarasmim rukkhamūle nisinnaṃ dhammasenāpatiṃ upasaṅkamitvā paṭisanthāraṃ katvā ekamantaṃ ṭhitā “kiṃ tumhehi mama jambusākhā maddāpitā”ti pucchi. “Āma, mayā maddāpitā”ti. “Evaṃ sante tumhehi saddhiṃ mayhaṃ vādo hotū”ti. “Hotu, bhadde”ti. “Kassa pucchā, kassa vissajjana”ti? “Pucchā nāma amhākaṃ pattā, tvaṃ yaṃ attano jānanakaṃ pucchā”ti. Sā sabbameva attano jānanakaṃ vādaṃ pucchi. Thero taṃ sabbaṃ vissajjesi. Sā upari pucchitabbaṃ ajānantī tuṇhī ahosi. Atha naṃ thero āha – “tayā bahuṃ pucchitaṃ, mayampi taṃ ekaṃ pañhaṃ pucchāmā”ti. “Pucchatha, bhante”ti. Thero “ekaṃ nāma ki”nti imaṃ pañhaṃ pucchi. Kuṇḍalakesā neva antaṃ na koṭiṃ passantī andhakāraṃ pavitṭhā viya hutvā “na jānāmi, bhante”ti āha. “Tvaṃ ettakampi ajānantī aññaṃ kiṃ jānissasī”ti vatvā dhammaṃ desesi. Sā therassa pādesu patitvā, “bhante, tumhe saraṇaṃ gacchāmi”ti āha. “Mā maṃ tvaṃ, bhadde, saraṇaṃ gaccha, sadevake loke aggapuggalaṃ bhagavantameva saraṇaṃ gacchā”ti. “Evaṃ karissāmi, bhante”ti sā sāyanhasamaye dhammadesanāvelāyaṃ satthu santikaṃ gantvā pañcapatiṭṭhitena vanditvā ekamantaṃ aṭṭhāsī. Satthā tassā ṇāṇaparipākaṃ ṇatvā –

“Sahassamapi ce gāthā, anatthapadasaṃhitā;
Ekaṃ gāthāpadaṃ seyyo, yaṃ sutvā supasammatī”ti. –

Imaṃ gāthamāha. Gāthāpariyosāne yathāṭṭhitāva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.3.1-54) –

“Padumuttaro nāma jino, sabbadhammāna pāragū;
Ito satasahassamhi, kappe uppajji nāyako.

“Tadāhaṃ haṃsavatiyaṃ, jātā seṭṭhikule ahuṃ;
Nānāratanaṃpajjote, mahāsukhasamappitā.

“Upetvā taṃ mahāvīraṃ, assosiṃ dhammadesanaṃ;
Tato jātapasādāhaṃ, upesiṃ saraṇaṃ jinaṃ.

“Tadā mahākāruṇiko, padumuttaranāmaḥ;
Khippābhiññānamagganti, ṭhapesi bhikkhuniṃ subhaṃ.

“Taṃ sutvā muditā hutvā, dānaṃ datvā mahesino;
Nipacca siraṣā pāde, taṃ ṭhānamabhipatthayaṃ.

“Anumodi mahāvīro, bhadde yaṃ tebhipatthitaṃ;
Samijjhissati taṃ sabbaṃ, sukhiṇi hohi nibbutā.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādā, orasā dhammanimmitā;
Bhaddākuṇḍalakesāti, hessati satthu sāvika.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatiṃsamagacchahaṃ.

“Tato cutā yāmaṃmagāṃ, tatohaṃ tusitaṃ gatā;
Tato ca nimmānaraṭiṃ, vasavattipuraṃ tato.

“Yattha yatthūpapajjāmi, tassa kammaṃsā vāhasā;
Tattha tattheva rājūnaṃ, mahesittamakārayaṃ.

“Tato cutā manussesu, rājūnaṃ cakkavattinaṃ;
Maṇḍalīnaṃca rājūnaṃ, mahesittamakārayaṃ.

“Sampattiṃ anubhotvāna, devesu mānussesu ca;
Sabbattha sukhitā hutvā, nekaḥkappesu saṃsariṃ.

“Imamhi bhaddake kappe, brahmabandhu mahāyaso;
Kassapo nāma gottena, uppajji vadataṃ varo.

“Upaṭṭhāko mahesissa, tadā āsi narissaro;
Kāsiraṇḍā kiki nāma, bārāṇasipuruttame.

“Tassa dhītā catutthāsiṃ, bhikkhudāyīti vissutā;
Dhammaṃ sutvā jinaggassa, pabbajjaṃ samarocayaṃ.

“Anujāni na no tāto, agāreva tadā mayaṃ;
Vīsavassasahassāni, vicarimha atanditā.

“Komāribrahmacariyaṃ, rājakaññā sukhedhitā;
Buddhopaṭṭhānaniratā, muditā satta dhītaro.

“Samaṇī samaṇaguttā ca, bhikkhunī bhikkhudāyikā;
Dhammā ceva sudhammā ca, sattamī saṅghadāyikā.

“Khemā uppalavaṇṇā ca, paṭācārā ahaṃ tadā;
Kisāgotamī dhammadinnā, visākhā hoti sattamī.

“Tehi kammehi sukatehi, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Pacchime ca bhava dāni, giribajapuruttame;
Jātā seṭṭhikule phīte, yadāhaṃ yobbane ṭhitā.

“Coramaṃ vadhatthaṃ nīyantaṃ, disvā rattā tahiṃ ahaṃ;
Pitā me taṃ sahasena, mocayitvā vadhā tato.

“Adāsi tassa maṃ tātō, viditvāna manaṃ mama;
Tassāhamāsiṃ visaṭṭhā, atīva dayitā hitā.

“So me bhūsanalobhena, balimajjhāsayo diso;
Corappapātaṃ netvāna, pabbataṃ cetayī vadhaṃ.

“Tadāhaṃ paṇamitvāna, sattukaṃ sukatañjalī;
Rakkhantī attano pāṇaṃ, idaṃ vacanamabravim.

“Idaṃ suvaṇṇakeyūraṃ, muttā veḷuriyā bahū;
Sabbamaṃ harassu bhaddante, mañca dāsīti sāvaya.

“Oropayassu kalyāṇī, mā bālhaṃ paridevasi;
Na cāhaṃ abhijānāmi, ahantvā dhanamābhataṃ.

“Yato sarāmi attānaṃ, yato pattosmi viññutaṃ;
Na cāhaṃ abhijānāmi, aññaṃ piyataraṃ tayā.

“Ehi taṃ upagūhissaṃ, katvāna taṃ padakkhiṇaṃ;
Na ca dāni puno atthi, mama tuyhañca saṅgamo.

“Na hi sabbesu ṭhānesu, puriso hoti paṇḍito;
Itthīpi paṇḍitā hoti, tattha tattha vicakkhaṇā.

“Na hi sabbesu ṭhānesu, puriso hoti paṇḍito;
Itthīpi paṇḍitā hoti, lahuṃ atthavicintikā.

“Lahuñca vata khippañca, nikaṭṭhe samacetayim;
Migaṃ uṇṇā yathā evaṃ, tadāhaṃ sattukaṃ vadhim.

“Yo ca uppatitaṃ atthaṃ, na khippamanubujjhati;
So haññate mandamati, corova girigabbhare.

“Yo ca uppatitaṃ atthaṃ, khippameva nibodhati;
Muccate sattusambādhā, tadāhaṃ sattukā yathā.

“Tadāhaṃ pātayitvāna, giriduggamhi sattukaṃ;
Santikaṃ setavatthānaṃ, upetvā pabbajīṃ ahaṃ.

“Saṅḍāsena ca kese me, luñcivā sabbaso tadā;
Pabbajitvāna samayaṃ, ācikkhiṃsu nirantaraṃ.

“Tato taṃ uggahetvāhaṃ, nisīditvāna ekikā;
Samayaṃ taṃ vicintesīṃ, suvāno mānusaṃ karaṃ.

“Chinnaṃ gayha samīpe me, pātayitvā apakkami;
Disvā nimittamalabhiṃ, hatthaṃ taṃ puḷavākulaṃ.

“Tato uṭṭhāya saṃviggā, apucchīṃ sahadhammike;
Te avocaṃ vijānanti, taṃ atthaṃ sakyabhikkhavo.

“Sāhaṃ tamatthaṃ pucchissaṃ, upetvā buddhasāvake;
Te mamādāya gacchiṃsu, buddhaseṭṭhassa santikaṃ.

“So me dhammadesesi, khandhāyatanadhātuyo;
Asubhāniccadukkhāti, anattāti ca nāyako.

“Tassa dhammaṃ suṇitvāhaṃ, dhammacakkhuṃ visodhayīṃ;
Tato viññātasaddhammā, pabbajjaṃ upasampadaṃ.

“Āyācito tadā āha, ehi bhaddeti nāyako;
Tadāhaṃ upasampannā, parittaṃ toyamaddasaṃ.

“Pādapakkhālanenāhaṃ, ñatvā saudayabbayaṃ;
Tathā sabbepi saṅkhāre, īdisaṃ cintayīṃ tadā.

“Tato cittaṃ vimucci me, anupādāya sabbaso;
Khippābhiññānamaggaṃ me, tadā paññāpayī jino.

“Iddhīsu ca vasī homi, dibbāya sotadhātuyā;
Paracittāni jānāmi, satthusāsanakārikā.

“Pubbenivāsaṃ jānāmi, dibbacakkhu visodhitam;
Khepetvā āsave sabbe, visuddhāsīṃ sunimmaḷā.

“Pariciṇṇo mayā satthā, kataṃ buddhassa sāsanaṃ;
Ohito garuko bhāro, bhavanetti samūhatā.

“Yassatthāya pabbajitā, agārasmānagāriyaṃ;
So me attho anupatto, sabbasaṃyojanakkhayo.

“Atthadhammaniruttīsu, paṭibhāne tatheva ca;
Ñānaṃ me vimalaṃ suddhaṃ, buddhaseṭṭhassa sāsane.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā tāvadeva pabbajjaṃ yāci. Satthā tassā pabbajjaṃ anujāni. Sā

bhikkhunupassayaṃ gantvāna pabbajitvā phalasukhena nibbānasukhena ca vītināmentī attano paṭipattim paccavekkhitvā udānavasena –

107. “Lūnakesī paṅkadharī, ekasāṭī pure carim;
Avajje vajjamatīnī, vajje cāvajjadassinī.
108. “Divāvihārā nikkhamma, gijjhakūṭamhi pabbate;
Addasaṃ virajaṃ buddhaṃ, bhikkhusaṅghapurakkhataṃ.
109. “Nihacca jāṇuṃ vanditvā, sammukhā añjaliṃ akaṃ;
Ehi bhaddeti maṃ avaca, sā me āsūpasampadā.
110. “Ciṅṇā aṅgā ca magadhā, vajjī kāsī ca kosalā;
Anakā paṇṇāsa vassāni, raṭṭhapiṇḍaṃ abhuñjahaṃ.
111. “Puññaṃ vata pasavi bahuṃ, sappañño vatāyaṃ upāsako;
Yo bhaddāya cīvaraṃ adāsi, vippamuttāya sabbaganthehī” ti. –

Imā gāthā abhāsi.

Tattha **lūnakesī**ti lūnā luñcitā kesā mayhanti lūnakesī, nigaṅthesu pabbajjāya tālaṭṭhinā luñcitakesā, taṃ sandhāya vadati. **Paṅkadharī**ti dantakaṭṭhassa akhādanena dantesu malapaṅkadhāraṇato paṅkadharī. **Ekasāṭī**ti nigaṅthacārittavasena ekasāṭikā. **Pure carinti** pubbe nigaṅṭhī hutvā evaṃ vicarim. **Avajje vajjamatīnī**ti nhānucchādanadantakaṭṭhakhādanādike anavajje sāvajjasaññī. **Vajje cāvajjadassinī**ti mānamakkhapalāsavipallāsādike sāvajje anavajjadiṭṭhī.

Divāvihārā nikkhammāti attano divāvihāraṭṭhānato nikkhamitvā. Ayampi ṭhitamajjhānikavelāyaṃ therena samāgatā tassa pañhassa vissajjanena dhammadesanāya ca nihata mānadabbā pasannamānasā hutvā satthu santikaṃ upasaṅkamtukāmāva attano vasanaṭṭhānaṃ gantvā divāṭṭhāne nisīditvā sāyanhasamaye satthu santikaṃ upasaṅkamtivā.

Nihacca jāṇuṃ vanditvāti jāṇudvayaṃ pathaviyaṃ nihantvā patiṭṭhapetvā pañcapatiṭṭhitena vanditvā. **Sammukhā añjaliṃ akanti** satthu sammukhā dasanakhasamodhānasamujjalaṃ añjaliṃ akāsim. **Ehi, bhaddeti maṃ avaca, sā me āsūpasampadā**ti yaṃ maṃ bhagavā arahattaṃ patvā pabbajjaṅca upasampadaṅca yācitvā ṭhitaṃ “ehi, bhaddeti, bhikkhunupassayaṃ gantvā bhikkhunīnaṃ santike pabbajja upasampajjassū” ti avaca añāpesi. Sā satthu añā mayhaṃ upasampadāya kāraṇattā upasampadā āsi aho.

Ciṅṇātiādikā dve gāthā aññābyākaraṇagāthā. Tattha **ciṅṇā aṅgā ca magadhā**ti ye ime aṅgā ca magadhā ca vajjī ca kāsī ca kosalā ca janapadā pubbe sāṅgāya mayā raṭṭhapiṇḍaṃ bhuñjantiyā ciṅṇā caritā, tesuyeva satthārā samāgamato paṭṭhāya anaṅgā niddosā apagata kilesā hutvā pañṇāsa saṃvaccharāni raṭṭhapiṇḍaṃ abhuñjijim ahaṃ.

Yena abhippasannamānasena upāsakena attano cīvaraṃ dinnāṃ, tassa puññāvisesakittanamukhena aññaṃ byākarontī “**puññaṃ vata pasavī bahu**”nti osānagāthamāha. Sā suviññeyyāva.

Bhaddākuṇḍalakesātherīgāthāvaṇṇanā niṭṭhitā.

10. Paṭācārātherīgāthāvaṇṇanā

Naṅgalehi kasaṃ khettantiādikā paṭācārāya theriyā gāthā. Ayampi padumuttarassa bhagavato kāle

haṃsavatīnagare kulagehe nibbattivā viññutaṃ patvā, ekadivasam satthu santike dhammam suṇantī sathhāraṃ ekaṃ bhikkhuniṃ vinayadharānaṃ aggaṭṭhāne ṭhapentaṃ disvā, adhikārakammaṃ katvā taṃ ṭhānantaraṃ patthesi. Sā yāvajīvaṃ kusalaṃ katvā devamanussesu saṃsaraṇī kassapabuddhakāle kikissa kāsirañño gehe paṭisandhiṃ gahetvā sattannaṃ bhaginīnaṃ abbhantarā hutvā vīsati vassasahassāni brahmacariyaṃ caritvā bhikkhusaṅghassa pariveṇaṃ akāsi. Sā tato cutā devaloke nibbattā, ekaṃ buddhantaṃ dibbasampattiṃ anubhavitvā imasmiṃ buddhuppāde sāvattīyaṃ seṭṭhigehe nibbattivā vayappattā attano gehe ekena kammakārena saddhiṃ kilesasanthavaṃ akāsi. Taṃ mātāpitaro samajātikassa kumārassa dātuṃ divasaṃ saṅṭhapesuṃ. Taṃ ñatvā sā hatthasāraṃ gahetvā tena katasanthavena purisena saddhiṃ aggadvārena nikkhamitvā ekasmiṃ gāmake vasantī gabbhinī ahoṣi. Sā paripakke gabbhe “kiṃ idha anāthavāseṇa, kulagehaṃ gacchāma, sāmī”ti vatvā tasmim “ajja gacchāma, sve gacchāmā”ti kālakkhepaṃ karonte “nāyaṃ bālo maṃ nessatī”ti tasmim bahi gate gehe paṭisāmetabbaṃ paṭisāmetvā “kulagharaṃ gatāti mayhaṃ sāmikassa kathethā”ti paṭivissakagharavāsīnaṃ ācikkhitvā “ekikāva kulagharaṃ gamissāmī”ti maggaṃ paṭipajji. So āgantvā gehe taṃ apassanto paṭivissake pucchitvā “kulagharaṃ gatā”ti sutvā “maṃ nissāya kuladhītā anāthā jātā”ti padānupadaṃ gantvā sampāpuṇi. Tassā antarāmagge eva gabbhavuṭṭhānaṃ ahoṣi. Sā pasutakālato paṭṭhāya paṭippassaddhagamanussukkā sāmikaṃ gahetvā nivatti. Dutiyavārampi gabbhinī ahoṣitīādi sabbaṃ purimanayeneva vitthāretabbaṃ.

Ayaṃ pana viseso – yadā tassā antarāmagge kammajavātā calīsu, tadā mahāakāramegho udapādi. Samantato vijjulātāhi ādittaṃ viya meghathanitehi bhijjamānaṃ viya ca udakadhārānipātanirantaraṃ nabhaṃ ahoṣi. Sā taṃ disvā, “sāmi, me anovassakaṃ ṭhānaṃ jānāhī”ti āha. So ito cito ca olokento ekaṃ tiṇasañchannaṃ gumbaṃ disvā tattha gantvā hatthagatāya vāsiyā tasmim gumba daṇḍake chinditukāmo tiṇehi sañchādītavammikasīsante uṭṭhitarukkhadāṇḍakaṃ chindi. Tāvadeva ca naṃ tato vammikato nikkhamitvā ghoraviso āsīvo ḍaṃsi. So tattheva patitvā kālamakāsi. Sā mahādukkhaṃ anubhavantī tassa āgamaṃ oloketī dvepi dārake vātavuṭṭhiṃ asahamāne viravante urantare katvā, dvīhi jāṇukehi dvīhi hatthehi ca bhūmiṃ uppīletvā yathāṭṭhitāva rattim vītināmetvā vibhātāya rattiyā maṃsapesivaṇṇaṃ ekaṃ puttaṃ pilotikacumbaṭake nipajjāpetvā hatthehi urehi ca pariggahetvā, itaraṃ “ehi, tāta, pitā te ito gato”ti vatvā sāmikena gatamaggena gacchantī taṃ vammikasamīpe kālānkatam nisinnaṃ disvā “maṃ nissāya mama sāmiko mato”ti rodantī paridevantī sakalarattim devena vuṭṭhattā jaṇṇukappamāṇaṃ thanappamāṇaṃ udakaṃ savantiṃ antarāmagge nadim patvā, attano mandabuddhitāya dubbalatāya ca dvīhi dārakehi saddhiṃ udakaṃ otarituṃ avisahantī jeṭṭhaputtaṃ orimatīre ṭhapetvā itaraṃ ādāya paratīraṃ gantvā sākhaḅhaṅgaṃ attharitvā tattha pilotikacumbaṭake nipajjāpetvā “itarassa santikaṃ gamissāmī”ti bālaputtakaṃ pahātuṃ asakkontī punappunaṃ nivattitvā olokayamānā nadim otarati.

Athassā nadīmajjhaṃ gatakāle eko seno taṃ dārakaṃ disvā “maṃsapesī”ti saññāya ākāsato bhassi. Sā taṃ disvā ubho hatthe ukkhipitvā “sūsū”ti tikkhattuṃ mahāsaddaṃ nicchāresi. Seno dūrabhāvena taṃ anādiyanto kumāraṃ gahetvā vehāsaṃ uppati. Orimatīre ṭhito putto ubho hatthe ukkhipitvā mahāsaddaṃ nicchārayamānaṃ disvā “maṃ sandhāya vadatī”ti saññāya vegena uduke pati. Iti bālaputtako senena, jeṭṭhaputtako udakena hatto. Sā “eko me putto senena gahito, eko udakena vūlho, panthe me pati mato”ti rodantī paridevantī gacchantī sāvattihito āgacchantaṃ ekaṃ purisaṃ disvā pucchi – “kattha vāsikosi, tātā”ti? “Sāvattihivāsikomhi, amma”ti. “Sāvattīyaṃ asukavīthiyaṃ asukakulaṃ nāma atthi, taṃ jānāsi, tātā”ti? “Jānāmi, amma, taṃ pana mā pucchi, aññaṃ pucchā”ti. “Aññaṃ me payoṇaṃ natthi, tadeva pucchāmi, tātā”ti. “Amma, tvaṃ attano anācikkhituṃ na desi, ajja te sabbarattim devo vassanto diṭṭho”ti? “Diṭṭho me, tāta, mayhameva so sabbarattim vuṭṭho, taṃ kāraṇaṃ pacchā kathessāmi, etasmim tāva me seṭṭhigehe pavattim katthehī”ti. “Amma, ajja rattiyaṃ seṭṭhi ca bhariyā ca seṭṭhiputto cāti tayopi jane avattharamānaṃ gehaṃ pati, te ekacitakāyaṃ jhāyanti, svāyaṃ dhūmo paññāyati, amma”ti. Sā tasmim khaṇe nivatthavatthampi patamānaṃ na sañjāni. Sokummattattaṃ patvā jātarūpeneva –

“Ubho puttā kālānkatā, panthe mayhaṃ pati mato;

Mātā pitā ca bhātā ca, ekacitamhi ḍayhare’’ti. (apa. therī 2.2.498) –

Vilapantī paribbhamati.

Tato paṭṭhāya tassā nivāsanamattenapi paṭena acaraṇato patitācārattā **paṭācārā**veva samaññā ahosi. Taṃ disvā manussā “gaccha, ummattike’’ti keci kacavaraṃ matthake khipanti, aññe paṃsuṃ okiranti, apare leḍḍuṃ khipanti. Satthā jetavane mahāparisāmajjhe nisīditvā dhammaṃ desento taṃ tathā paribbhamantiṃ disvā ñāṇaparipākañca oloketvā yathā vihārābhimukhī āgacchati, tathā akāsi. Parisā taṃ disvā “imissā ummattikāya ito āgantūṃ mādatthā’’ti āha. “Bhagavā mā naṃ vārayitthā’’ti vatvā avidūraṭṭhānaṃ āgatakāle “satīṃ paṭilabha bhaginī’’ti āha. Sā tāvadeva buddhānubhāvena satīṃ paṭilabhitvā nivatthavattassa patitabhāvaṃ sallakkhetvā hirottappaṃ paccupaṭṭhapetvā ukkuṭikaṃ upanisajjāya nisīdi. Eko puriso uttarasāṭakaṃ khipi. Sā taṃ nivāsetvā satthāraṃ upasaṅkamitvā pañcapaṭiṭṭhitena vanditvā, “bhante, avassayo me hoṭṭha, ekaṃ me puttaṃ seno gaṇhi, eko udakena vūlho, panthe pati mato, mātāpitaro bhātā ca gehena avatthaṭā matā ekacitakasmīṃ jhāyanti’’ti sā sokakāraṇaṃ ācikkhi. Satthā “paṭācāre, mā cintayi, tava avassayo bhavituṃ samatthasseva santikaṃ āgatāsi. Yathā hi tvaṃ idāni puttādīnaṃ maraṇanimittaṃ assūni pavattesi, evaṃ anamatagge saṃsāre puttādīnaṃ maraṇahetu pavattitaṃ assu catunnaṃ mahāsamuddānaṃ udakato bahutara’’nti dassento –

“Catūsu samuddesu jalaṃ parittakaṃ, tato bahuṃ assujalaṃ anappakaṃ;
Dukkheṇa phuṭṭhassa narassa socanā, kiṃ kāraṇā amma tvaṃ pamajjasi’’ti. (dha. pa. aṭṭha. 1.112 paṭācārātherīvatthu) –

Gāthaṃ abhāsi.

Evaṃ satthari anamataggapariyāyakathaṃ (saṃ. ni. 2.125-126) kathente tassā soko tanutarabhāvaṃ agamāsi. Atha naṃ tanubhūtasokaṃ ñatvā “paṭācāre, puttādayo nāma paralokaṃ gacchantassa tāṇaṃ vā leṇaṃ vā saraṇaṃ vā bhavituṃ na sakkonti’’ti vijjamaṇāpi te na santi eva, tasmā paṇḍitena attano sīlaṃ visodhetvā nibbānagāmiṃ maggoyeva sādhetabboti dassento –

“Na santi puttā tāṇāya, na pitā nāpi bandhavā;
Antakenādhīpanassa, natthi ñātīsu tāṇatā.

“Etamatthavasam ñatvā, paṇḍito sīlasamvuto;
Nibbānagamaṇaṃ maggaṃ, khippameva visodhaye’’ti. (dha. pa. 288-289) –

Imāhi gāthāhi dhammaṃ desesi. Desanāvasāne paṭācārā sotāpattiphale paṭiṭṭhahitvā satthāraṃ pabbajjaṃ yāci. Satthā taṃ bhikkhunīnaṃ santikaṃ netvā pabbājesi. Sā laddhūpasampadā uparimaggatthāya vipassanāya kammaṃ karontī ekadivasaṃ ghaṭena udakaṃ ādāya pāde dhovanti udakaṃ āsiñci. Taṃ thokaṃ ṭhānaṃ gantvā pacchijji, dutiyavāraṃ āsittaṃ tato dūraṃ agamāsi, tatiyavāraṃ āsittaṃ tatopi dūraraṃ agamāsi. Sā tadeva ārammaṇaṃ gahetvā tayo vaye paricchinditvā “mayā paṭhamaṃ āsittaudakaṃ viya ime sattā paṭhamavayepi maranti, tato dūraṃ gataṃ dutiyavāraṃ āsittaṃ udakaṃ viya majjhimavayepi, tato dūraraṃ gataṃ tatiyavāraṃ āsittaṃ udakaṃ viya pacchimavayepi marantiyevā’’ti cintesi. Satthā gandhakuṭiyaṃ nisinnova obhāsaṃ pharivā tassā sammukhe ṭhatvā kathento viya “evametaṃ, paṭācāre, sabbepime sattā maraṇadhammā, tasmā pañcannaṃ khandhānaṃ udayabbayaṃ apassantassa vassasataṃ jīvato taṃ passantassa ekāhampi ekakkhaṇampi jīvitaṃ seyyo’’ti imamatthaṃ dassento –

“Yo ca vassasataṃ jīve, apassaṃ udayabbayaṃ;
Ekāhaṃ jīvitaṃ seyyo, passato udayabbaya’’nti. (dha. pa. 113) –

Gāthamāha. Gāthāpariyosāne paṭācārā saha paṭisambhidāhi arahattaṃ pāpuṇi. Tena vuttaṃ **apadāne**

(apa. therī 2.2.468-511) –

“Padumuttaro nāma jino, sabbadhammāna pāragū;
Ito satasahassamhi, kappe uppajji nāyako.

“Tadāhaṃ haṃsavatīyaṃ, jātā seṭṭhikule ahuṃ;
Nānāratanaṃpajjote, mahāsukhasamappitā.

“Upetvā taṃ mahāvīraṃ, assosiṃ dhammadesanaṃ;
Tato jātapaśādāhaṃ, upesiṃ saraṇaṃ jinaṃ.

“Tato vinayadhārīnaṃ, aggaṃ vaṇṇesi nāyako;
Bhikkhuniṃ lajjiniṃ tādiṃ, kappākappavisāraḍaṃ.

“Tadā muditacittāhaṃ, taṃ ṭhānamabhikaṅkhinī;
Nimantetvā dasabalaṃ, sasaṅghaṃ lokanāyakaṃ.

“Bhojayitvāna sattāhaṃ, daditvāva ticīvaraṃ;
Nipacca sirasā pāde, idaṃ vacanamabraviṃ.

“Yā tayā vaṇṇitā vīra, ito aṭṭhamake muni;
Tādisāhaṃ bhavissāmi, yadi sijjhati nāyaka.

“Tadā avoca maṃ satthā, bhadde mā bhāyi assasa;
Anāgatamhi addhāne, lacchase taṃ manorathaṃ.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādā, orasā dhammanimmitā;
Paṭācārāti nāmena, hessati satthu sāvīkā.

“Tadāhaṃ muditā hutvā, yāvajīvaṃ tadā jinaṃ;
Mettacittā paricariṃ, sasaṅghaṃ lokanāyakaṃ.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatīmsamagacchahaṃ.

“Imamhi bhaddake kappe, brahmabandhu mahāyaso;
Kassapo nāma gottena, uppajji vadataṃ varo.

“Upaṭṭhāko mahesissa, tadā āsi narissaro;
Kāsīrājā kikī nāma, bārāṇasipuruttame.

“Tassāsiṃ tatiyā dhītā, bhikkhunī iti vissutā;
Dhammaṃ sutvā jinaggassa, pabbajjaṃ samarocayiṃ.

“Anujāni na no tāto, agāreva tadā mayaṃ;
Vīsavassasahassāni, vicarimha atanditā.

“Komāribrahmacariyaṃ, rājakaññā sukhedhitā;
Buddhopaṭṭhānaniratā, muditā sattadhītarō.

“Samaṇī samaṇaguttā ca, bhikkhunī bhikkhudāyikā;
Dhammā ceva sudhammā ca, sattamī saṅghadāyikā.

“Ahaṃ uppalavaṇṇā ca, khemā bhaddā ca bhikkhunī;
Kisāgotamī dhammadinnā, visākhā hoti sattamī.

“Tehi kammehi sukatehi, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Pacchime ca bhava dāni, jātā seṭṭhikule ahaṃ;
Sāvattthiyaṃ puravare, iddhe phīte mahaddhane.

“Yadā ca yobbanūpetā, vitakkavasagā ahaṃ;
Naraṃ jārapatiṃ disvā, tena saddhiṃ agacchahaṃ.

“Ekaputtapasūtāhaṃ, dutiyo kucchiyā mama;
Tadāhaṃ mātāpitaro, okkhāmīti sunicchitā.

“Nārocesim patim mayhaṃ, tadā tamhi pavāsīte;
Ekikā niggaṭā gehā, gantuṃ sāvattthimuttamaṃ.

“Tato me sāmī āgantvā, sambhāvesi pathe mamaṃ;
Tadā me kammajā vātā, uppannā atidāruṇā.

“Uṭṭhito ca mahāmegho, pasūtisamaye mama;
Dabbatthāya tadā gantvā, sāmī sappena mārito.

“Tadā vijātadukkhena, anāthā kapaṇā ahaṃ;
Kunnadiṃ pūritaṃ disvā, gacchantī sakulālayaṃ.

“Bālaṃ ādāya atariṃ, pārakūle ca ekakaṃ;
Sāyetvā bālakaṃ puttāṃ, itaraṃ taraṇāyaṃ.

“Nivattā ukkuso hāsi, taruṇaṃ vilapantakaṃ;
Itaraṇca vahī soto, sāhaṃ sokasamappitā.

“Sāvattthinagaraṃ gantvā, assosiṃ sajane mate;
Tadā avocaṃ sokaṭṭā, mahāsokasamappitā.

“Ubho puttā kālaṅkatā, panthe mayhaṃ patī mato;
Mātā pitā ca bhātā ca, ekacitamhi ḍayhare.

“Tadā kisā ca paṇḍu ca, anāthā dīnamānasā;
Ito tato bhamantīhaṃ, addasaṃ narasārathiṃ.

“Tato avoca maṃ sathā, putte mā soci assasa;
Attānaṃ te gavesassu, kiṃ niratthaṃ vihaññasi.

“Na santi puttā tāṇāya, na ñātī nāpi bandhavā;
Antakenādhīpannessa, natthi ñātīsu tāṇatā.

“Taṃ sutvā munino vākyam, paṭhamam phalamajjhagam;
Pabbajitvāna naciram, arahattamapāpuṇim.

“Iddhīsu ca vasī homi, dibbāya sotadhātuyā;
Paracittāni jānāmi, satthusāsanakārikā.

“Pubbenivāsam jānāmi, dibbacakkhu visodhitam;
Khepetvā āsave sabbe, visuddhāsim sunimmaḷā.

“Tatoham vinayam sabbam, santike sabbadassino;
Uggahim sabbavittāram, byāhariṇca yathātatham.

“Jino tasmim guṇe tuṭṭho, etadagge ṭhapesi maṃ;
Aggā vinayadhārīnam, paṭācārāva ekikā.

“Paricīṇṇo mayā satthā, kataṃ buddhassa sāsanam;
Ohito garuko bhāro, bhavanetti samūhatā.

“Yassatthāya pabbajitā, agārasmānagāriyam;
So me attho anupatto, sabbasamyojanakkhayo.

“Kilesā jhāpitā mayham...pe... kataṃ buddhassa sāsana’nti.

Arahattam pana patvā sekkhakāle attano paṭipattim paccavekkhitvā uparivisesassa nibbattitākāram vibhāventī udānavasena –

112. “Naṅgalehi kasam khetam, bījāni pavapam chamā;
Puttadārāni posentā, dhanam vīdanti māṇavā.

113. “Kimaham sīlasampannā, satthusāsanakārikā;
Nibbānam nādhigacchāmi, akusītā anuddhatā.

114. “Pāde pakkhālayitvāna, udakesu karomaham;
Pādodakaṇca disvāna, thalato ninnamāgataṃ.

115. “Tato cittaṃ samādhesiṃ, assam bhadramvajāniyam;
Tato dīpaṃ gahetvāna, vihāram pāvisiṃ aham;
Seyyam olokayitvāna, mañcakamhi upāvisiṃ.

116. “Tato sūciṃ gahetvāna, vaṭṭim okassayāmaham;
Padīpasseva nibbānam, vimokkho ahu cetaso’nti. – imā gāthā abhāsi;

Tattha **kasanti** kasantā kasikammaṃ karontā. Bahutthe hi idaṃ ekavacanaṃ. **Pavapanti** bījāni vapantā. **Chamāti** chamāyam. Bhummatthe hi idaṃ paccattavacanaṃ. Ayañhettha saṅkhepattho – ime māṇavā sattā naṅgalehi phālehi khetam kasantā yathādhīpāyam khettabhūmiyam pubbaṇṇāparaṇṇabhedāni bījāni vapantā tamhetu tamnimittam attānam puttadārādīni posentā hutvā dhanam paṭilabhanti. Evaṃ imasmim loke yoniso payutto paccattapurisakāro nāma saphalo saudayo.

Tattha **kimaham sīlasampannā, satthusāsanakārikā. Nibbānam nādhigacchāmi, akusītā**

anuddhatāti ahaṃ suvisuddhasīlā āradhāvīriyatāya akusītā ajjhataṃ susamāhitacittatāya anuddhatā ca hutvā catusaccakammaṭṭhānabhāvanāsankhātāṃ satthu sāsanaṃ karontī kasmā nibbānaṃ nādhigacchāmi, adhigamissāmi evāti.

Evaṃ pana cintetvā vipassanāya kammaṃ karontī ekadivasaṃ pādadhovanaudake nimittaṃ gaṇhi. Tenāha “**pāde pakkhālayitvānā**”tiādi. Tassattho – ahaṃ pāde dhovantī pādapakkhālanahetu tikkhattuṃ āsittesu udakesu thalato ninnamāgataṃ pādodakaṃ disvā nimittaṃ karomi.

“Yathā idaṃ udakaṃ khayadhammaṃ vayadhammaṃ, evaṃ sattānaṃ āyusaṅkhārā”ti evaṃ aniccalakkhaṇaṃ, tadanusārena dukkhalakkhaṇaṃ, anattalakkhaṇaṃca upadhāretvā vipassanaṃ vaḍḍhentī **tato cittaṃ samādhesiṃ, assaṃ bhadraṃ vajāniyanti** yathā assaṃ bhadraṃ ājāniyaṃ kusalo sārathi sukkena sāreti, evaṃ mayhaṃ cittaṃ sukheva samādhesiṃ, vipassanāsamādhinā samāhitaṃ akāsiṃ. Evaṃ pana vipassanaṃ vaḍḍhentī utusappāyanijigīsāya ovarakaṃ pavisaṅti andhakāraividhamanattaṃ dīpaṃ gahetvā gabbhaṃ pavisitvā dīpaṃ ṭhapetvā mañcake nisinnamattāva dīpaṃ vijjhāpetuṃ aggaḷasūciyā dīpavaṭṭiṃ ākaḍḍhiṃ, tāvadeva utusappāyalābhena tassā cittaṃ samāhitaṃ ahosi, vipassanāvīthiṃ otari, maggena ghaṭṭesi. Tato maggapaṭipāṭiyā sabbaso āsavānaṃ khayā ahosi. Tena vuttaṃ – “**tato dīpaṃ gahetvāna...pe... vimokkho ahu cetaso**”ti. Tattha **seyyaṃ olokayitvānāti** dīpālakena seyyaṃ passitvā.

Sūcinti aggaḷasūciṃ. **Vaṭṭiṃ okassayāmi**ti dīpaṃ vijjhāpetuṃ telābhimukhaṃ dīpavaṭṭiṃ ākaḍḍhemi. **Vimokkhoti** kilesehi vimokkho. So pana yasmā paramatthato cittassa santati, tasmā vuttaṃ “**cetaso**”ti. Yathā pana vaṭṭitelādike paccaye satī uppajjanāraho padīpo tadabhāve anuppajjanato nibbutoti vuccati, evaṃ kilesādipaccaye satī uppajjanārahaṃ cittaṃ tadabhāve anuppajjanato vimuttanti vuccatīti āha – “padīpasseva nibbānaṃ, vimokkho ahu cetaso”ti.

Paṭācārātherīgāthāvaṇṇanā niṭṭhitā.

11. Timsamattātherīgāthāvaṇṇanā

Musalāni gahetvānātiādikā timsamattānaṃ therīnaṃ gāthā. Tāpi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantiyo anukkamena upacitivimokkhasambhārā imasmiṃ buddhuppāde sakakammasaṅcoditā tattha tattha kulagehe nibbattitvā viññutaṃ patvā paṭācārāya theriyā santike dhammaṃ sutvā paṭiladdhasaddhā pabbajitvā parisuddhasīlā vattapaṭivattaṃ paripūrentiyo viharanti. Athekadivasaṃ paṭācārātherī tāsāṃ ovādaṃ dentī –

117. “Musalāni gahetvāna, dhaññaṃ koṭṭenti māṇavā;
Puttadārāni posentā, dhanam vindanti māṇavā.

118. “Karotha buddhasānaṃ, yaṃ katvā nānutappati;
Khippaṃ pādāni dhovitvā, ekamante nisīdatha;
Cetosamathamanyuttā, karotha buddhasāna”nti. – imā dve gāthā abhāsi;

Tatthāyaṃ saṅkhepattho – ime sattā jīvitahetu musalāni gahetvā paresaṃ dhaññaṃ koṭṭenti, udukkhalakammaṃ karontī. Aññaṃpi edisaṃ nihīnakammaṃ katvā puttadāraṃ posentā yathārahaṃ dhanampi saṃharanti. Taṃ pana nesaṃ kammaṃ nihīnaṃ gammaṃ pothujjanikaṃ dukkhaṃ anattasañhitaṃca. Tasmā edisaṃ saṃkilesikapapañcaṃ vajjetvā **karotha buddhasānaṃ** sikkhattayasāṅkhātāṃ sammāsambuddhasānaṃ karotha sampādettha attano santāne nibbattetha. Tattha kāraṇamāha – “**yaṃ katvā nānutappati**”ti, yassa karaṇahetu etarahi āyatīṃca anutāpaṃ nāpajjati. Idāni tassa karaṇe pubbakiccaṃ anuyogavidhiṃca dassetuṃ, “**khippaṃ pādāni dhovitvā**”tiādi vuttaṃ. Tattha yasmā adhovitapādassa avikkhālitamukhassa ca nisajjasukhaṃ utusappāyalābho ca na hoti, pāde pana dhovitvā mukhaṃca vikkhāletvā ekamante nisinnassa tadubhayaṃ labhati, tasmā **khippaṃ** imaṃ

yathāladdhaṃ khaṇaṃ avirādhentiyo **pādāni** attano pāde dhovivā **ekamante** vivitte okāse **nisīdatha** nisajjatha. Aṭṭhatimsāya ārammaṇesu yattha kattthaci cittarucike ārammaṇe attano cittaṃ upanibandhitvā **cetosaṃmathamanuyuttā** samāhitena cittaṃ catusaccakammaṭṭhānabhāvanāvasena buddhassa bhagavato sāsanaṃ ovādaṃ anusīṭṭhiṃ **karotha** sampādehāti.

Atha tā bhikkhuniyo tassā theriyā ovāde ṭhatvā vipassanaṃ paṭṭhapetvā bhāvanāya kammaṃ karontiyo ñāṇassa paripākaṃ gatattā hetusaṃpannatāya ca saha paṭisambhidāhi arahattaṃ patvā attano paṭipattiṃ paccavekkhitvā ovādagāthāhi saddhiṃ –

119. “Tassā tā vacanaṃ sutvā, paṭācārāya sāsanaṃ;
Pāde pakkhālayitvāna, ekamantaṃ upāvisuṃ;
Cetosaṃmathamanuyuttā, akaṃsu buddhasāsanaṃ.

120. “Rattiyā purime yāme, pubbajātimanussaraṃ;
Rattiyā majjhime yāme, dibbacakkhuṃ visodhayaṃ;
Rattiyā pacchime yāme, tamokhandhaṃ padālayuṃ.

121. “Uṭṭhāya pāde vandimsu, katā te anusāsani;
Indaṃva devā tidasā, saṅgāme aparājitaṃ;
Purakkhatvā vihasāma, tevijjāma anāsavā” ti. –

Imā gāthā abhāsimsu.

Tattha **tassā tā vacanaṃ sutvā, paṭācārāya sāsanaṃ** tassā paṭācārāya theriyā kilesapaṭisattusāsanaṭṭhena sāsanaabhūtaṃ ovādavacanaṃ, **tā** tiṃsamattā bhikkhuniyo sutvā paṭissutvā sirasā sampaṭicchitvā.

Uṭṭhāya pāde vandimsu, katā te anusāsaniti yathāsampaṭicchitaṃ tassā sāsanaṃ aṭṭhiṃ katvā manasi katvā yathāphāsukaṭṭhāne nisīditvā bhāventiyo bhāvanaṃ matthakaṃ pāpetvā attanā adhigatavisesaṃ ārocetuṃ nisinnāsanaṃ uṭṭhāya tassā santikaṃ gantvā “mahātheri tavānusāsani yathānusiṭṭhaṃ amhehi katā” ti vatvā tassā pāde pañcapaṭiṭṭhitena vandimsu. **Indaṃva devā tidasā, saṅgāme aparājitaṃ**ti devāsurasāṅgāme aparājitaṃ vijitāviṃ indaṃ tāvatimsā devā viya mahātheri, mayaṃ taṃ purakkhatvā viharissāma aññassa kattabbassa abhāvato. Tasmā “tevijjāma anāsavā” ti attano kataññubhāvaṃ pavedentī idameva tāsā aññābyākaraṇaṃ ahosi. Yaṃ panettha atthato avibhattaṃ, taṃ heṭṭhā vuttanayameva.

Tiṃsamattātherīgāthāvaṇṇanā niṭṭhitā.

12. Candātherīgāthāvaṇṇanā

Duggatāhaṃ pure āsintiādikā candāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī anukkamena sambhatavimokkhasambhārā paripakkaññā imasmiṃ buddhuppāde aññatarasmiṃ brāhmaṇagāme apaññātassa brāhmaṇassa gehe paṭisandhiṃ gaṇhi. Tassā nibbattito paṭṭhāyaṃ taṃ kulaṃ bhogehi parikkhayaṃ gataṃ. Sā anukkamena viññutaṃ patvā dukkhena jīvati. Atha tasmīṃ gehe ahivātarogo uppajji. Tenassā sabbepi ñātakā maraṇabyasanaṃ pāpuṇimsu. Sā ñātikkhaye jāte aññattha jīvitum asakkontī kapālahatthā kule kule vicarivā laddhaladdhena bhikkhāhārena yāpentī ekadivasaṃ paṭācārāya theriyā bhattavissaggaṭṭhānaṃ agamāsi. Bhikkhuniyo taṃ dukkhitaṃ khuddābhībhūtaṃ disvāna sañjātakāruññā piyasamudācārena saṅgahetvā tattha vijjāmanena upacāramanoharena āhārena santappesuṃ. Sā tāsā ācārasīle pasīditvā theriyā santikaṃ upasaṅkamitvā vanditvā ekamantaṃ nisīdi. Tassā therī dhammaṃ kathesi. Sā taṃ dhammaṃ sutvā sāsane abhippasannā saṃsāre ca sañjātasamvegā pabbaji. Pabbajitvā ca theriyā ovāde

thatvā vipassanaṃ paṭṭhapetvā bhāvanaṃ anuyuñjanti katādhikāratāya ñāṇassa ca paripākaṃ gatattā na cirasseva saha paṭisambhidāhi arahattaṃ patvā attano paṭipattiṃ paccavekkhitvā –

122. “Duggatāhaṃ pure āsiṃ, vidhavā ca aputtikā;
Vinā mittehi ñātīhi, bhattacoḷassa nādhigaṃ.
123. “Pattaṃ daṇḍaṅca gaṇhitvā, bhikkhamānā kulā kulaṃ;
Sītuṇhena ca ḍayhantī, satta vassāni cārihaṃ.
124. “Bhikkhuniṃ puna disvāna, annapānassa lābhiniṃ;
Upasaṅkammaṃ avocaṃ, pabbajjaṃ anagāriyaṃ.
125. “Sā ca maṃ anukampāya, pabbājesi paṭācārā;
Tato maṃ ovaditvāna, paramatthe niyojaya.
126. “Tassāhaṃ vacanaṃ sutvā, akāsiṃ anusāsaniṃ;
Amogho ayyāyovādo, tevijjāmi anāsavā”’ti. –

Udānavasena imā gāthā abhāsi.

Tattha **duggatā**ti daliddā. **Pure**ti pabbajitato pubbe. Pabbajitakālato paṭṭhāya hi idha puggalo bhogehi aḍḍho vā daliddo vāti na vattabbo. Guṇehi pana ayaṃ therī aḍḍhāyeva. Tenāha “duggatāhaṃ pure āsi”’nti. **Vidhavā**ti dhavo vuccati sāmiko, tadabhāvā vidhavā, matapatikāti attho. **Aputtikā**ti puttarahitā. **Vinā mitte**ti mittehi bandhavehi ca parihīnā rahitā. **Bhattacoḷassa nādhiganti** bhattassa coḷassa ca pāripūriṃ nādhigacchiṃ, kevalaṃ pana bhikkhāpiṇḍassa pilotikākhaṇḍassa ca vasena ghāsacchādanamattameva alathanti adhippāyo. Tenāha “**pattaṃ daṇḍaṅca gaṇhitvā**”’tiādi.

Tattha **pattanti** mattikābhājanaṃ. **Daṇḍanti** goṇasunakhādipariharaṇadaṇḍakaṃ. **Kulā kulanti** kulato kulaṃ. **Sītuṇhena ca ḍayhantī**ti vasanagehābhāvato sītena ca uṇhena ca pīlyamānā.

Bhikkhuninti paṭācārātheriṃ sandhāya vadati. **Punā**ti pacchā, sattaṃvaccharato aparabhāge.

Paramattheti parame uttame atthe, nibbānagāminiyā paṭipadāya nibbāne ca. **Niyojayī**ti kammaṭṭhānaṃ ācikkhantī niyojesi. Sesam vuttanayameva.

Candātherīgāthāvaṇṇanā niṭṭhitā.

Pañcakanipātavaṇṇanā niṭṭhitā.

6. Chakkanipāto

1. Pañcasatamattātherīgāthāvaṇṇanā

Chakkanipāte **yassa maggaṃ na jānāsī**tiādikā pañcasatamattānaṃ therīnaṃ gāthā. Imāpi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantiyo anukkamena upacitavimokkhasambhārā hutvā imasmim buddhuppāde tattha tattha kulagehe nibbattitvā vayappattā mātāpitūhi patikulaṃ ānītā tattha tattha putte labhitvā gharāvāsaṃ vasantiyo samānajatikassa tādisassa kammaṃsa katattā sabbāva matapputtā hutvā, puttāsokena abhibhūtā paṭācārāya theriyā santikaṃ upasaṅkamtivā vanditvā nisinnā attano sokakāraṇaṃ ārocesuṃ. Therī tāsam sokaṃ vinodentī –

127. “Yassa maggaṃ na jānāsi, āgatassa gatassa vā;
Taṃ kuto cāgataṃ sattaṃ, mama puttoti rodasi.
128. “Maggañca khossa jānāsi, āgatassa gatassa vā;
Na naṃ samanusoceṣi, evaṃdhammā hi paṇino.
129. “Ayācito tatāgacchi, nānuññāto ito gato;
Kutoci nūna āgantvā, vasitvā katipāhakaṃ;
Itopi aññena gato, tatopaññena gacchati.
130. “Peto manussarūpena, saṃsaranto gamissati;
Yathāgato tathā gato, kā tattha paridevanā’”ti. –

Imāhi catūhi gāthāhi dhammaṃ desesi.

Tā tassā dhammaṃ sutvā sañjātasamvegā theriyā santike pabbajimsu. Pabbajitvā vipassanāya kammaṃ karontiyo vimuttiparipācanīyānaṃ dhammānaṃ paripākaṃ gatattā na cirasseva saha paṭisambhidāhi arahatte paṭiṭṭhahimsu. Atha tā adhigatārahattā attano paṭipattiṃ paccavekkhitvā udānavasena “**yassa maggaṃ na jānāsi**”tiādikāhi ovādagāthāhi saddhiṃ –

131. “Abbahī vata me sallaṃ, duddasaṃ hadayassitaṃ;
Yā me sokaparetāya, puttasaṃ byapānudi.
132. “Sājja abbūlhasallāhaṃ, nicchātā parinibbutā;
Buddhaṃ dhammañca saṅghañca, upemi saraṇaṃ muni’”nti. –

Imā gāthā visuṃ visuṃ abhāsimsu.

Tattha **yassa maggaṃ na jānāsi, āgatassa gatassa vā**ti yassa sattaṃ idha āgatassa āgatamaggaṃ vā ito gatassa gatamaggaṃ vā tvaṃ na jānāsi. Anantarā atītānāgatabhavūpapattiyo sandhāya vadati. **Taṃ kuto cāgataṃ sattaṃ** taṃ evaṃ aviññātāgatagatamaggaṃ kutoci gatito āgatamaggaṃ āgacchantena antarāmagge sabbena sabbam akataparicayasamāgatapurisasadisam sattaṃ kevalam mamattaṃ uppādetvā mama puttoti kuto kena kāraṇena rodasi. Appaṭikārato mama puttassa ca akātābato na ettha rodanakāraṇaṃ atthīti adhippāyo.

Maggañca khossa jānāsiti assa tava puttābhimatassa sattaṃ āgatassa āgatamaggañca gatassa gatamaggañca atha jāneyyāsi. **Na naṃ samanusoceṣi**ti evampi naṃ na samanusoceyyāsi. Kasmā? **Evaṃdhammā hi paṇino**, diṭṭhadhammepi hi sattānaṃ sabbehi piyehi manāpehi nānābhāvā vinābhāvā tattha vasavattitāya abhāvato, pageva abhisamparāyaṃ.

Ayācito tatāgacchīti tato paralokato kenaci ayācito idha āgacchi. “Āgato”tipi pāḷi, so evattho. **Nānuññāto ito gatoti** idhalokato kenaci ananuññāto paralokaṃ gato. **Kutocīti** nirayādito yato kutoci gatito. **Nūnāti** parisānkāyaṃ. **Vasitvā katipāhakaṃ**ti katipayadivasamattaṃ idha vasitvā. **Itopi aññena gatoti** itopi bhavato aññena gato, ito aññampi bhavaṃ paṭisandhivasena upagato. **Tatopaññena gacchati**ti tatopi bhavato aññena gamissati, aññameva bhavaṃ upagamissati.

Petoti apeto taṃ taṃ bhavaṃ upapajjitvā tato apagato. **Manussarūpenāti** nidassanamattametaṃ, manussabhāvena tiracchānādibhāvena cāti attho. **Saṃsarantoti** aparāparaṃ upapattivasena saṃsaranto. **Yathāgato tathā gatoti** yathā aviññātāgatito ca anāmantetvā āgato tathā aviññātāgatiko ananuññātova gato. **Kā tattha paridevanāti** tattha tādise avasavattini yathākāmāvacare kā nāma paridevanā, kiṃ paridevitena payojananti attho. Sesam vuttanayameva.

Ettha ca ādito catasso gāthā paṭācārāya theriyā tesam pañcamattānaṃ itthisatānaṃ sokavinodanavasena visuṃ visuṃ bhāsītā. Tassā ovāde ṭhatvā pabbajitvā adhigatavisesāhi tāhi pañcasatamattāhi bhikkhunīhi chapi gāthā paccekam bhāsītāti datṭhabbā.

Pañcasatā paṭācārāti paṭācārāya theriyā santike laddhaovādatāya paṭācārāya vuttam avedisunti katvā “paṭācārā”ti laddhanāmā pañcasatā bhikkhuniyo.

Pañcasatamattātherīgāthāvaṇṇanā niṭṭhitā.

2. Vāsetṭhītherīgāthāvaṇṇanā

Puttasokenahaṃ aṭṭātiādikā vāsetṭhiyā theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī anukkamena sambhatavimokkhasambhārā devamanussesu saṃsarantī imasmiṃ buddhuppāde vesāliyaṃ kulagehe nibbattitvā vayappattā māṭāpitūhi samānajātikassa kulaputtassa dinnā patikulam gantvā tena saddhiṃ sukhasaṃvāsaṃ vasantī ekaṃ puttaṃ labhitvā tasmīṃ ādhāvitvā paridhāvitvā vicaraṇakāle kālam kate puttasokena aṭṭitā ummattikā ahoṣi. Sā ñātakesu sāmike ca ticicchaṃ karontesu tesam ajānantānaṃyeva palāyitvā yato tato paribbhamantī mithilānagaraṃ sampattā tathaddasa bhagavantaṃ antaravīthiyaṃ gacchantaṃ dantaṃ guttaṃ saṃyatindriyaṃ nāgaṃ. Disvāna saha dassanena buddhānubhāvato apagatummādā pakaticcittam paṭilabhi. Athassā satthā saṃkhittena dhammaṃ desesi. Sā taṃ dhammaṃ sutvā paṭiladdhasaṃvegā satthāraṃ pabbajjaṃ yācitvā satthu āṇāya bhikkhunīsu pabbajitvā katapubbakiccā vipassanaṃ paṭṭhapetvā ghaṭentī vāyamaṇṭī paripakkañāṇatāya na cirasseva saha paṭisambhidāhi arahattaṃ patvā attano paṭipattiṃ paccavekkhitvā udānavasena –

133. “Puttasokenahaṃ aṭṭā, khittacittā visaññinī;
Naggā pakiṇṇakesī ca, tena tena vicārihaṃ.
134. “Vīthisaṅkarakūṭesu, susāne rathiyāsu ca;
Acariṃ tīni vassāni, khuppipāsā samappitā.
135. “Athaddasāsiṃ sugataṃ, nagaraṃ mithilaṃ pati;
Adantānaṃ dametāraṃ, sambuddhamakutobhayaṃ.
136. “Sacittam paṭiladdhāna, vanditvāna upāvisiṃ;
So me dhammadesesi, anukampāya gotamo.
137. “Tassa dhammaṃ suṇitvāna, pabbajiṃ anagāriyaṃ;
Yuñjantī satthuvacane, sacchākāsiṃ padaṃ sivaṃ.
138. “Sabbe sokā samucchinnā, pahīnā etadantikā;
Pariññātā hi me vatthū, yato sokāna sambhavo”ti. –

Imā gāthā abhāsi.

Tattha **aṭṭāti** aṭṭitā. Ayameva vā pāṭho, aṭṭitā pīlītāti attho. **Khittacittāti** sokummādena khittahadaya. Tato eva pakatisaññāya vigamena **visaññinī**. Hirottappābhāvato apagatavatthatāya **naggā**. Vidhutakesatāya **pakiṇṇakesī**. **Tena tenāti** gāmena gāmaṃ nagarena nagaraṃ vīthiyā vīthiṃ vicariṃ ahaṃ.

Athāti pacchā ummādasamvattaniyassa kammaṃsa parikkhaye. **Sugatanti** sobhanagamanattā sundaraṃ ṭhānaṃ gatattā sammā gadattā sammā ca gatattā sugataṃ bhagavantaṃ. **Mithilaṃ patīti**

mithilābhimukhaṃ, mithilānagarābhimukhaṃ gacchantanti attho.

Sacittaṃ paṭiladdhānāti buddhānubhāvena ummādaṃ pahāya attano pakaticittaṃ paṭilabhitvā.

Yuñjantī satthuvacaneti satthu sammāsambuddhassa sāsane yogaṃ karontī bhāvanāṃ anuyuñjantī. **Sacchākāsiṃ padaṃ sivanti** sivaṃ khemaṃ catūhi yogehi anupaddutaṃ nibbānaṃ padaṃ sacchiakāsiṃ.

Etadantikāti etaṃ idāni mayā adhigataṃ arahattaṃ anto pariyosānaṃ etesanti etadantikā, sokā. Na dāni tesāṃ sambhavo atthīti attho. **Yato sokāna sambhavoti** yato antonijjhānalakkhaṇānaṃ sokānaṃ sambhavo, tesāṃ sokānaṃ pañcupādānakkhandhasaṅkhātā vatthū adhiṭṭhānāni ñātātiṇapaṇāpariññāhi pariññātā. Tasmā sokā etadantikāti yojanā.

Vāsetṭhītherīgāthāvaṇṇanā niṭṭhitā.

3. Khemātherīgāthāvaṇṇanā

Daharā tvaṃ rūpavattītiādikā khemāya theriyā gāthā. Ayaṃ kira padumuttarassa bhagavato kāle haṃsavatīnagare parādhīnavuttikā paresaṃ dāsī ahoṣi. Sā paresaṃ veyyāvaccakaraṇena jīvikaṃ kappentī ekadivasāṃ padumuttarassa sammāsambuddhassa aggasāvakaṃ sujātattheraṃ piṇḍāya carantaṃ disvā tayo modake datvā taṃdivasameva attano kese vissajjetvā therassa dānaṃ datvā “anāgate mahāpaññā buddhassa sāvikā bhaveyya”nti patthanaṃ katvā yāvajīvaṃ kusalakamme appamattā hutvā devamanussesu saṃsarantī anukkamena chakāmasagge, tesāṃ tesāṃ devarājūnaṃ mahesibhāvena upapannā, manussalokepi anekavāraṃ cakkavattīnaṃ maṇḍalarājūnaṃca mahesibhāvaṃ upagatā mahāsampattiyo anubhavitvā vipassissa bhagavato kāle manussaloke uppajjitvā viññutaṃ patvā, satthu santike dhammaṃ sutvā paṭiladdhasaṃvegā pabbajitvā dasavassasahassāni brahmacariyaṃ carantī bahussutā dhammakathikā hutvā bahujaṇassa dhammakathanādinā paññāsaṃvattaniyakammaṃ katvā tato cavitvā sugatīsuyeva saṃsarantī imasmiṃ kappe bhagavato ca kakusandhassa bhagavato ca koṇāgamanassa kāle vibhavasampanne kule nibbattitvā viññutaṃ patvā mahantaṃ saṅghārāmaṃ kāretvā buddhappamukhassa bhikkhusaṅghassa niyyādesi.

Bhagavato pana kassapadasabalassa kāle kikissa kāsirañño sabbajetṭhikā samaṇī nāma dhītā hutvā, satthu santike dhammaṃ sutvā paṭiladdhasaṃvegā agāreyeva ṭhitā, vīsati vassasahassāni komāribrahmacariyaṃ carantī samaṇaguttādīhi attano bhaginīhi saddhiṃ ramaṇiyaṃ pariveṇaṃ kāretvā buddhappamukhassa bhikkhusaṅghassa niyyādesi. Evameva tattha tattha bhavē āyatanagataṃ uḷāraṃ puññakammaṃ katvā sugatīsuyeva saṃsaritvā imasmiṃ buddhuppāde maddaraṭṭhe sākalanagare rājakule nibbatti. **Khemātissā** nāmaṃ ahoṣi, suvaṇṇavaṇṇā kañcanasannibhattacā. Sā vayappattā bimbisārarañño geḥaṃ gatā. Satthari veḷuvane viharante rūpamattā hutvā “rūpe dosaṃ dasseti”ti satthu dassanāya na gacchati.

Rājā manussehi veḷuvanassa vaṇṇe pakāsāpetvā deviyā vihāradassanāya cittaṃ uppādesi. Atha devī “vihāraṃ passissāmī”ti rājānaṃ paṭipucchi. Rājā “vihāraṃ gantvā sathāraṃ adisvā āgantuṃ na labhissā”ti vatvā purisānaṃ saññaṃ adāsi – “balakkārenapi deviyaṃ dasabalaṃ dassethā”ti. Devī vihāraṃ gantvā divasabhāgaṃ khepetvā nivattentī sathāraṃ adisvāva gantuṃ āradhā. Atha naṃ rājapurisā anicchantimpi satthu santikaṃ nayiṃsu. Satthā taṃ āgacchantiṃ disvā iddhiyā devaccharāsadiṣaṃ itthiṃ nimminivā tālapaṇṇaṃ gahetvā bījāyamaṇaṃ akāsi. Khemā devī taṃ disvā cintesi – “evarūpā nāma devaccharapaṭibhāgā itthiyo bhagavato avidūre tiṭṭhanti, ahaṃ etāsaṃ paricārikatāyapi nappahomi, manampi nikkāraṇā pāpacittassa vasena naṭṭhā”ti nimittaṃ gahetvā tameva itthiṃ olokayamānā atṭhāsī. Athassā passantiyāva satthu adhiṭṭhānabalena sā itthī paṭhamavayaṃ atikkamma majjhimavayampi atikkamma pacchimavayaṃ patvā khaṇḍadantā palitakesā valittacā hutvā saddhiṃ tālapaṇṇena parivattitvā pati. Tato khemā katādhikāraṭṭā evaṃ cintesi – “evaṃvidhampi

sarīraṃ īdisaṃ vipattiṃ pāpuṇi, mayhampi sarīraṃ evaṃgatikameva bhavissatī”ti. Athassā cittaścāraṃ ñatvā sathā –

“Ye rāgarattānupatanti sotaṃ, sayamaṃ kataṃ makkaṭakova jālaṃ;
Etampi chetvāna paribbajanti, anapekkhino kāmasukhaṃ pahāyā”ti. –

Gāthamāha. Sā gāthāpariyosāne saha paṭisambhidāhi arahattaṃ pāpuṇīti aṭṭhakathāsu āgataṃ. Apadāne pana “īmaṃ gāthaṃ sutvā sotāpattiphale paṭiṭṭhitā rājānaṃ anujānāpetvā pabbajitvā arahattaṃ pāpuṇī”ti āgataṃ. Tatthāyaṃ **apadānapāli** (apa. therī 2.2.289-383) –

“Padumuttaro nāma jino, sabbadhammesu cakkhumā;
Ito satasahassamhi, kappe uppajji nāyako.

“Tadāhaṃ haṃsavatiyaṃ, jātā seṭṭhikule ahuṃ;
Nānāratanapajjote, mahāsukhasamappitā.

“Upeṭvā taṃ mahāvīraṃ, assosiṃ dhammadesanaṃ;
Tato jātappasādāhaṃ, upemi saraṇaṃ jinaṃ.

“Mātaraṃ pitaraṃ cāhaṃ, āyācitvā vināyakaṃ;
Nimantayitvā sattāhaṃ, bhojayiṃ sahasāvakaṃ.

“Atikkante ca sattāhe, mahāpaññānamuttamaṃ;
Bhikkhuniṃ etadaggamhi, ṭhapesi naraśārathi.

“Taṃ sutvā muditā hutvā, puno tassa mahesino;
Kāraṃ katvāna taṃ ṭhānaṃ, paṇipacca paṇīdahiṃ.

“Tato mama jino āha, sijjhatam paṇidhī tava;
Sasaṅge me kataṃ kāraṃ, appameyyaphalaṃ tayā.

“Satasahassito kappe, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādā, orasā dhammanimmitā;
Etadaggamanuppattā, khemā nāma bhavissati.

“Tena kamma sukatenā, cetanāpaṇidhīhi ca;
Jahitvā mānusaṃ dehaṃ, tāvatimsūpagā ahaṃ.

“Tato cutā yāmagamaṃ, tatohaṃ tusitaṃ gatā;
Tato ca nimmānaratiṃ, vasavattipuraṃ tato.

“Yattha yatthūpapajjāmi, tassa kamma vāhasā;
Tattha tattheva rājūnaṃ, mahesittamakārayiṃ.

“Tato cutā manussatte, rājūnaṃ cakkavattiṇaṃ;
Maṇḍalīnaṃ rājūnaṃ, mahesittamakārayiṃ.

“Sampattiṃ anubhotvāna, devesu manujesu ca;

Sabbattha sukhitā hutvā, nekakappesu saṃsarim.

“Ekanavutito kappe, vipassī lokanāyako;
Uppajji cārudassano, sabbadhammavipassako.

“Tamahaṃ lokanāyakam, upetvā narasārathim;
Dhammaṃ bhaṇitaṃ sutvāna, pabbajim anagāriyam.

“Dasavassasahassāni, tassa vīrassa sāsane;
Brahmacariyam caritvāna, yuttayogā bahussutā.

“Paccayākārakusalā, catusaccavisārādā;
Nipuṇā cittakathikā, satthusāsanakārikā.

“Tato cutāhaṃ tusitaṃ, upapannā yasassinī;
Abhibhomi tahiṃ aññe, brahmacārīphalenahaṃ.

“Yattha yatthūpapannāhaṃ, mahābhogā mahaddhanā;
Medhāvinī sīlavatī, vinītaparisāpi ca.

“Bhavāmi tena kamma, yogena jīnasāsane;
Sabbā sampattiyo mayhaṃ, sulabhā manaso piyā.

“Yopi me bhavate bhattā, yattha yattha gatāyapi;
Vimāneti na maṃ koci, paṭipattibalena me.

“Imamhi bhaddake kappe, brahmabandhu mahāyaso;
Nāmena koṇāgamano, uppajji vadataṃ varo.

“Tadā hi bārāṇasiyam, susamiddhakulappajā;
Dhanañjānī sumedhā ca, ahampi ca tayo janā.

“Saṅghārāmadāsīmha, dānasahāyikā pure;
Saṅghassa ca vihārampi, uddissa kārikā mayam.

“Tato cutā mayam sabbā, tāvatimsūpagā ahum;
Yasasā aggataṃ pattā, manussesu tatheva ca.

“Imasmimyeva kappamhi, brahmabandhu mahāyaso;
Kassapo nāma gottena, uppajji vadataṃ varo.

“Upaṭṭhāko mahesissa, tadā āsi narissaro;
Kāsirājā kikī nāma, bārāṇasipuruttame.

“Tassāsim jeṭṭhikā dhītā, samaṇī iti vissutā;
Dhammaṃ sutvā jīnaggassa, pabbajjam samarocayim.

“Anujāni na no tāto, agāreva tadā mayam;
Vīsavassasahassāni, vicarimha atanditā.

“Komāribrahmacariyaṃ, rājakaññā sukhedhitā;
Buddhopaṭṭhānaniratā, muditā satta dhītarō.

“Samaṇī samaṇaguttā ca, bhikkhunī bhikkhudāyikā;
Dhammā ceva sudhammā ca, sattamī saṅghadāyikā.

“Ahaṃ uppalavaṇṇā ca, paṭācārā ca kuṇḍalā;
Kisāgotamī dhammadinnā, visākhā hoti sattamī.

“Kadāci so narādicco, dhammaṃ desesi abbhutaṃ;
Mahānidānasuttantaṃ, sutvā taṃ pariyāpuṇiṃ.

“Tehi kammehi sukatehi, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Pacchime ca bhava dāni, sākalāya puruttame;
Rañño maddassa dhītāmi, manāpā dayitā piyā.

“Saha me jātamaṃ tamhi, khemaṃ tamhi pure ahu;
Tato khemāti nāmaṃ me, guṇato upapajjatha.

“Yadāhaṃ yobbaṇaṃ pattā, rūpalāvaññabhūsitā;
Tadā adāsi maṃ tāto, bimbisārassa rājino.

“Tassāhaṃ suppiyā āsiṃ, rūpapelāyane ratā;
Rūpānaṃ dosavādīti, na upesiṃ mahādayaṃ.

“Bimbisāro tadā rājā, mamānuggahabuddhiyā;
Vaṇṇayitvā veḷuvanaṃ, gāyake gāpayī mamaṃ.

“Rammaṃ veḷuvanaṃ yena, na diṭṭhaṃ sugatālayaṃ;
Na tena nandanaṃ diṭṭhaṃ, iti maññāmaṃse mayaṃ.

“Yena veḷuvanaṃ diṭṭhaṃ, naranandanandananaṃ;
Sudiṭṭhaṃ nandanaṃ tena, amarindasunandananaṃ.

“Vihāya nandanaṃ devā, otarivā mahītaṃ;
Rammaṃ veḷuvanaṃ disvā, na tappanti suvimhitā.

“Rājapuññaena nibbattaṃ, buddhapuññaena bhūsitāṃ;
Ko vattā tassa nissesaṃ, vanassa guṇasañcayaṃ.

“Taṃ sutvā vanasamiddhaṃ, mama sotamanoharaṃ;
Daṭṭhukāmā tamuyyānaṃ, rañño ārocayiṃ tadā.

“Mahatā parivārena, tadā ca so mahīpati;
Maṃ pesesi tamuyyānaṃ, dassanāya samussukaṃ.

“Gaccha passa mahābhoge, vanaṃ nettarasāyanaṃ;
Yaṃ sadā bhāti siriya, sugatābhānurañjitaṃ.

“Yadā ca piṇḍāya muni, giribajapuruttamaṃ;
Paviṭṭhoṃ tadāyeva, vanaṃ daṭṭhumupāgamiṃ.

“Tadā taṃ phullavipinaṃ, nānābhamarakūjitaṃ;
Kokilāgītasahitaṃ, mayūragaṇanaccitaṃ.

“Appasaddamanākiṇṇaṃ, nānācaṅkamabhūsitāṃ;
Kuṭiṃmaṇḍapasamkiṇṇaṃ, yogīvaravirājitaṃ.

“Vicarantī amaññissaṃ, saphalaṃ nayanaṃ mama;
Tatthāpi taruṇaṃ bhikkhuṃ, yuttaṃ disvā vicintayim.

“Īdise vipine ramme, ṭhitoyaṃ navayobbane;
Vasantamiva kantena, rūpena ca samanvito.

“Nisinno rukkhamūlamhi, muṇḍo saṅghāṭipāruto;
Jhāyate vatayaṃ bhikkhu, hitvā visayaṃ ratim.

“Nanu nāma gahaṭṭhena, kāmaṃ bhutvā yathāsukhaṃ;
Pacchā jiṇṇena dhammoyaṃ, caritabbo subhaddako.

“Suññakanti viditvāna, gandhagehaṃ jinālayaṃ;
Upetvā jinamaddakkhaṃ, udayantaṃ va bhākaraṃ.

“Ekakaṃ sukhamāsīnaṃ, bījamānaṃ varitthiyā;
Disvānevaṃ vicintesim, nāyaṃ lūkho narāsabho.

“Sā kaññā kanakābhāsā, padumānanalocanā;
Bimboṭṭhī kundadasanā, manonettarasāyanā.

“Hemadolābhasavanā, kalikākārasutthanī;
Vedimajjhāva sussoṇī, rambhoru cārubhūsanā.

“Rattaṃsakupasaṃbyānā, nīlammaṭṭhanivāsanā;
Atappaneyyarūpena, hāsabhāvasamanvitā.

“Disvā tamevaṃ cintesim, ahoyamabhirūpinī;
Na mayānena nettena, diṭṭhapubbā kudācanaṃ.

“Tato jarābhibhūtā sā, vivaṇṇā vikatānanā;
Bhinnadantā setasirā, salālā vadanāsuci.

“Saṃkhittakaṇṇā setakkhī, lambāsubhapaṇodharā;
Valivittasabbaṅgī, sirāvitadehinī.

“Nataṅgā daṇḍadutiyā, upphāsulikatā kisā;
Pavedhamānā patitā, nissasantī muhuṃ muhuṃ.

“Tato me āsī saṃvego, abbhuto lomahaṃsano;
Dhiratthu rūpaṃ asuciṃ, ramante yattha bālisā.

“Tadā mahākāruṇiko, disvā saṃviggamānasam;
Udaggacitto sugato, imā gāthā abhāsatha.

“Āturaṃ asuciṃ pūtiṃ, passa kheme samussayaṃ;
Uggharantaṃ paggharantaṃ, bālānaṃ abhinanditaṃ.

“Asubhāya cittaṃ bhāvehi, ekaggaṃ susamāhitaṃ;
Sati kāyagatā tyatthu, nibbidā bahulā bhava.

“Yathā idaṃ tathā etaṃ, yathā etaṃ tathā idaṃ;
Ajjhattaṅca bahiddhā ca, kāye chandaṃ virājaya.

“Animittaṅca bhāvehi, mānānusayamujjaha;
Tato mānābhisamayā, upasantaṃ carissasi.

“Ye rāgarattānupatanti sotaṃ, sayam kataṃ makkaṭakova jālaṃ;
Etampi chetvāna paribbajanti, anapekkhino kāmasukhaṃ pahāya.

“Tato kallitacittaṃ maṃ, ñatvāna narasārathi;
Mahānidānaṃ desesi, suttantaṃ vinayāya me.

“Sutvā suttantaseṭṭhaṃ taṃ, pubbasaññamanussariṃ;
Tattha ṭhitāvahaṃ santī, dhammacakkuṃ visodhayiṃ.

“Nipatitvā mahesissa, pādamūlamhi tāvade;
Accayaṃ desanattāya, idaṃ vacanamabravim.

“Namo te sabbadassāvi, namo te karuṇākara;
Namo te tiṇṇasaṃsāra, namo te amataṃ dada.

“Diṭṭhigahanapakkhandā, kāmarāgavimohitā;
Tayā sammā upāyena, vinītā vinaye ratā.

“Adassanena vibhogā, tādisānaṃ mahesinaṃ;
Anubhonti mahādukkhaṃ, sattā saṃsārasāgare.

“Yadāhaṃ lokasaraṇaṃ, araṇaṃ araṇantaḡuṃ;
Nāddasāmi adūraṭṭhaṃ, desayāmi tamaccayaṃ.

“Mahāhitaṃ varadadaṃ, ahitoti visaṅkitā;
Nopesiṃ rūpaniratā, desayāmi tamaccayaṃ.

“Tadā madhuranigghoso, mahākāruṇiko jino;
Avoca tiṭṭha khemeti, siṅcanto amatena maṃ.

“Tadā pakamya sirasā, katvā ca naṃ padakkhiṇaṃ;
Gantvā disvā narapatiṃ, idaṃ vacanamabravim.

“Aho sammā upāyo te, cintitoyamarindama;
Vanadassanakāmāya, diṭṭho nibbānato muni.

“Yadi te ruccate rāja, sāsane tassa tādino;
Pabbajissāmi rūpehaṃ, nibbinnā munivāṇinā.

“Añjaliṃ paggahetvāna, tadāha sa mahīpati;
Anujānāmi te bhadde, pabbajjā tava sijjhatu.

“Pabbajitvā tadā cāhaṃ, addhamāse upaṭṭhite;
Dīpodayañca bhedañca, disvā saṃvigamānasā.

“Nibbinnā sabbasaṅkhāre, paccayākāraṅkovidā;
Caturoghe atikkamma, arahattamaṃpāpuṇiṃ.

“Iddhīsu ca vasī āsiṃ, dibbāya sotadhātuyā;
Cetopariyaññāssa, vasī cāpi bhavāmahaṃ.

“Pubbenivāsaṃ jānāmi, dibbacakkhu visodhitam;
Sabbāsavaparikkhīṇā, natthi dāni punabbhavo.

“Atthadhammaniruttīsa, paṭibhāne tatheva ca;
Parisuddham mama ñāṇam, uppannam buddhasāsane.

“Kusalāhaṃ visuddhīsu, kathāvatthuvisāradā;
Abhidhammanayaññū ca, vasippattāmi sāsane.

“Tato toraṇavatthusmiṃ, raññā kosalasāminā;
Pucchitā nipuṇe pañhe, byākarontī yathātatham.

“Tadā sa rājā sugatam, upasaṅkamma pucchatha;
Tatheva buddho byākāsi, yathā te byākatā mayā.

“Jino tasmim guṇe tuṭṭho, etadagge ṭhapesi maṃ;
Mahāpaññānamaggāti, bhikkhunīnam naruttamo.

“Kilesā jhāpitā mayham...pe... katam buddhassa sāsana’’nti. (apa. therī 2.2.289-383);

Arahattam pana patvā phalasukhena nibbānasukhena ca viharantiyā imissā theriyā satipi aññāsam khīṇāsavatttherīnam paññāvepullappattiyam tattha pana katādhikāratāya mahāpaññābhāvo pākaṭo ahoṣi. Tathā hi nam bhagavā jetavanamahāvihāre ariyagaṇamajjhe nisinnō paṭipāṭiyā bhikkhuniyo ṭhānantare ṭhapento “etadaggaṃ, bhikkhave, mama sāvīkānam bhikkhunīnam mahāpaññānam yadidaṃ khemā’’ti (a. ni. 1.235-236) mahāpaññatāya aggaṭṭhāne ṭhapesi. Tam ekadivasam aññatarasmim rukkhamaṃ divāvihāram nisinnam māro pāpimā taruṇarūpena upasaṅkamitvā kāmehi palobhento –

139. “Daharā tvaṃ rūpavatī, ahampi daharo yuvā;
Pañcaṅgikena turiyena, ehi kheme ramāmase’’ti. – gāthamāha;

Tassattho – kheme, tvaṃ taruṇappattā, yobbane ṭhitā rūpasampannā, ahampi taruṇo yuvā, tasmā mayam yobbaññam akhepetvā pañcaṅgikena turiyena vajjamānena ehi kāmakhīḍḍaratiyā ramāma kīlāmāti.

Tam sutvā sā kāmesu sabbadhammesu ca attano virattabhāvaṃ tassa ca mārabhāvaṃ attābhinivesesu sattesu attano thāmagatam appasādam katakiccatañca pakāsenti –

140. “Iminā pūtikāyena, āturena pabhaṅgunā;
Aṭṭiyāmi harāyāmi, kāmataṅhā samūhatā.
141. “Sattisūlūpamā kāmā, khandhāsaṃ adhikuṭṭanā;
Yaṃ tvaṃ kāmaratiṃ brūsi, aratī dāni sā mama.
142. “Sabbattha vihatā nandī, tamokhandho padālito;
Evaṃ jānāhi pāpima, nihato tvamasi antaka.
143. “Nakkhattāni namassantā, aggiṃ paricaraṃ vane;
Yathābhuccamajānantā, bālā suddhimamaññatha.
144. “Ahañca kho namassantī, sambuddhaṃ purisuttamaṃ;
Pamuttā sabbadukkhehi, satthusāsanakārikā’ ti. – imā gāthā abhāsi;

Tattha **aggiṃ paricaraṃ vaneti** tapovane aggihuttaṃ paricaranto. **Yathābhuccamajānantā**ti pavattiyo yathābhūtaṃ aparijānantā. Sesamettha heṭṭhā vuttanayattā uttānameva.

Khemātherīgāthāvaṇṇanā niṭṭhitā.

4. Sujātātherīgāthāvaṇṇanā

Alaṅkatā suvasanātiādikā sujātāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī anukkamena sambhatavimokkhasambhārā hutvā imasmiṃ buddhuppāde sāketanagare seṭṭhikule nibbattitvā vayappattā mātāpitūhi samānajātikassa seṭṭhiputtassa dinnā hutvā patikulaṃ gatā. Tattha tena saddhiṃ sukhasaṃvāsam vasantī ekadivasam uyyānaṃ gantvā nakkhattakīḷaṃ kīḷitvā parijanena saddhiṃ nagaraṃ āgacchantī añjanavane satthāraṃ disvā pasannamānasā upasaṅkamitvā vanditvā ekamantaṃ nisīdi. Sathā tassā anupubbim kathaṃ kathetvā kallacittataṃ ñatvā upari sāmukkaṃsikaṃ dhammadesanaṃ pakāsesi. Sā desanāvasāne attano katādhikāratāya ñāṇassa paripākaṃ gatattā ca, satthu ca desanāvīlāsena yathānisinnāva saha paṭisambhidāhi arahattaṃ patvā satthāraṃ vanditvā gehaṃ gantvā sāmikañca mātāpitāro ca anujānāpetvā satthuāṇāya bhikkhunupassayaṃ gantvā bhikkhunīnaṃ santike pabbaji. Pabbajitvā ca attano paṭipattiṃ paccavekkhitvā udānavasena –

145. “Alaṅkatā suvasanā, mālinī candanokkhitā;
Sabbābharāṇasañchannā, dāsīgaṇapurakkhatā.
146. “Annaṃ pānañca ādāya, khajjaṃ bhojjaṃ anappakaṃ;
Gehato nikkhamitvāna, uyyānamabhihārayiṃ.
147. “Tattha ramitvā kīḷitvā, āgacchantī sakaṃ gharaṃ;
Vihāraṃ daṭṭhuṃ pāvisiṃ, sākete añjanaṃ vanam.
148. “Disvāna lokapajjotaṃ, vanditvāna upāvisiṃ;
So me dhammadesesi, anukampāya cakkhumā.
149. “Sutvā ca kho mahesissa, saccaṃ sampaṭivijjhamaṃ;
Tattheva virajaṃ dhammaṃ, phusayiṃ amataṃ padaṃ.
150. “Tato viññātasaddhammā, pabbajiṃ anagāriyaṃ;
Tisso vijjā anuppattā, amoghaṃ buddhasāsana’nti. –

Imā gāthā abhāsi.

Tattha **alaṅkatā**ti vibhūsitā. Taṃ pana alaṅkatākāraṃ dassetuṃ “**suvasanā mālinī candanokkhitā**”ti vuttaṃ. Tattha **mālinī**ti mālādhārinī. **Candanokkhitā**ti candanānulittā. **Sabbābharaṇasañchannā**ti hatthūpagādīhi sabbehi ābharaṇehi alaṅkārasena sañchādītasarīrā.

Annaṃ pānañca ādāya, khajjaṃ bhojjaṃ anappakanti sāliodanādiannaṃ, ambapānādīpānaṃ, piṭṭhakhādanīyādikhajjaṃ, avasiṭṭhaṃ āhārasaṅkhātaṃ bhojjañca pahūtaṃ gahetvā. **Uyyānamabhihārayinti** nakkhattakīlāvasena uyyānaṃ upanesiṃ. Annaṃpānādiṃ tattha ānetvā saha pariṇānaṃ kiṇṭanti ramanti paricāresinti adhippāyo.

Sākete añjanaṃ vananti sāketasamīpe añjanavane vihāraṃ pāvīsiṃ.

Lokapajjotanti ñāṇapajjotena lokassa pajjotabhūtaṃ.

Phusayinti phusiṃ, adhigacchinti attho. Sesāṃ vuttanayameva.

Sujātātherīgāthāvaṇṇanā niṭṭhitā.

5. Anopamātherīgāthāvaṇṇanā

Ucce kuletiādīkā anopamāya theriyā gāthā. Ayampi purimabuddhesu katādhikārā tattha tattha bhave vivaṭṭūpanissayaṃ kusalaṃ upacinantī anukkamena vimuttiṃparipācāniye dhamme paribrūhitvā imasmiṃ buddhuppāde sāketanagare majjhassa nāma seṭṭhino dhītā hutvā nibbatti. Tassā rūpasampattiyā **anopamā**ti nāmaṃ ahoṣi. Tassā vayappattakāle bahū seṭṭhiputtā rājamahāmattā rājāno ca pitu dūtaṃ pāhesuṃ – “attano dhītaraṃ anopamaṃ dehi, idañcīdañca te dassāmā”ti. Sā taṃ sutvā upanissayasampannatāya “gharāvāsena mayhaṃ attho natthī”ti satthu santikaṃ gantvā dhammaṃ sutvā ñāṇassa paripākaṃ gatattā desanānusārena vipassanaṃ ārabhitvā taṃ ussukkāpentī maggapaṭipāṭiyā tatiyaphale paṭiṭṭhāsi. Sā satthāraṃ pabbajjaṃ yācitvā satthuāṇāya bhikkhunupassayaṃ upagantvā bhikkhunīnaṃ santike pabbajitvā sattame divase arahattaṃ sacchikatvā attano paṭipattiṃ paccavekkhitvā udānavasena –

151. “Ucce kule ahaṃ jātā, bahuvitte mahaddhane;
Vaṇṇarūpena sampannā, dhītā majjhassa atrajā.

152. “Patthitā rājaputtehi, seṭṭhiputtehi gijjhītā;
Pitu me pesayī dūtaṃ, deṭha mayhaṃ anopamaṃ.

153. “Yattakaṃ tulitā esā, tuyhaṃ dhītā anopamā;
Tato aṭṭhaguṇaṃ dassaṃ, hiraññaṃ ratanāni ca.

154. “Sāhaṃ disvāna sambuddhaṃ, lokajeṭṭhaṃ anuttaraṃ;
Tassa pādāni vanditvā, ekamantaṃ upāvīsiṃ.

155. “So me dhammadesesi, anukampāya gotamo;
Nisinnā āsane tasmīṃ, phusayiṃ tatiyaṃ phalaṃ.

156. “Tato kesāni chetvāna, pabbajijjā anagāriyaṃ;
Ajja me sattamī ratti, yato taṇhā visesitā”ti. –

Imā gāthā abhāsi.

Tattha **ucce kuleti** uḷāratame vessakule. **Bahuvitteti** alaṅkāradīpahūtavittūpakaraṇe. **Mahaddhaneti** nidhānagatasseva cattārīsakoṭīparimāṇassa mahato dhanassa atthibhāvena mahaddhane ahaṃ jātāti yojanā. **Vaṇṇarūpena sampannāti** vaṇṇasampannā ceva rūpasampannā ca, siniddhabhāsūrāya chavisampattiyā vatthābharaṇādīsarīrāvayavasampattiyā ca samannāgatāti attho. **Dhītā majjhassa atrajāti** majjhanāmassa seṭṭhino orasā dhītā.

Patthitā rājaputtehīti “kathaṃ nu kho taṃ labheyyāma”ti rājakumārehi abhipatthitā. **Seṭṭhiputtehi gijjhītāti** tathā seṭṭhikumārehipi abhigijjhītā paccāsītā. **Detha mayhaṃ anopamanti** rājaputtādayo “detha mayhaṃ anopamaṃ detha mayha”nti pitu santike dūtaṃ pesayiṃsu.

Yattakaṃ tulitā esāti “tuyhaṃ dhītā anopamā yattakaṃ dhanaṃ agghatī”ti tulitā lakkhaṇaññūhi paricchinnā, “tato aṭṭhaguṇaṃ dassāmi”ti pitu me pesayi dūtanti yojanā. Sesam heṭṭhā vuttanayameva.

Anopamātherīgāthāvaṇṇanā niṭṭhitā.

6. Mahāpajāpatigotamītherīgāthāvaṇṇanā

Buddha vīra namo tyatthūtiādikā mahāpajāpatigotamiyā gāthā. Ayampi kira padumuttarassa bhagavato kāle haṃsavatīnagare kulagehe nibbattitvā viññutaṃ patvā satthu santike dhammaṃ suṇantī sathhāraṃ ekaṃ bhikkhuniṃ rattaññūnaṃ aggaṭṭhāne ṭhapentaṃ disvā, adhikārakammaṃ katvā taṃ ṭhānantaraṃ patthetvā yāvajīvaṃ dānādīni puññāni katvā kappasatasahassaṃ devamanussesu saṃsaritvā, kassapassa ca bhagavato antare amhākañca bhagavato buddhasuññe loke bārāṇasiyaṃ pañcannaṃ dāsisatānaṃ jeṭṭhikā hutvā nibbatti. Atha sā vassūpanāyikasamaye pañca paccekabuddhe nandamūlakapabbhārato isipatane otarivā, nagare piṇḍāya caritvā isipataneveva gantvā, vassūpanāyikasamaye kuṭiyā atthāya hatthakammaṃ pariyesante disvā, tā dāsiyo tāsam attano ca sāmike samādapetvā caṅkamādi parivārasampannā pañca kuṭiyo kāretvā, mañcapīṭhapānīyaparibhojanīyabhājanādīni upaṭṭhapetvā paccekabuddhe temāsaṃ tattheva vasanatthāya paṭiññaṃ kāretvā vārabhikkhaṃ paṭṭhapesuṃ. Yā attano vāradivase bhikkhaṃ dātuṃ na sakkoti, tassā sayam sakagehato nīharitvā deti. Evaṃ temāsaṃ paṭijaggitvā pavāraṇāya sampattāya ekekaṃ dāsiṃ ekekaṃ sātakaṃ vissajjāpesi. Pañcathūlasātakasatāni ahesuṃ. Tāni parivattāpetvā pañcannaṃ paccekabuddhānaṃ ticīvarāni katvā adāsi. Paccekabuddhā tāsam passantīnaṃyeva ākāsenā gandhamādanapabbataṃ agamaṃsu.

Tāpi sabbā yāvajīvaṃ kusalaṃ katvā devaloke nibbattiṃsu. Tāsam jeṭṭhikā tato cavitvā bārāṇasiyā avidūre pesakāragāme pesakārajeṭṭhakassa gehe nibbattitvā viññutaṃ patvā, padumavatiyā putte pañcasate paccekabuddhe disvā sampiyāyamaṇā sabbe vanditvā bhikkhaṃ adāsi. Te bhattakiccaṃ katvā gandhamādanameva agamaṃsu. Sāpi yāvajīvaṃ kusalaṃ katvā devamanussesu saṃsarantī amhākaṃ satthu nibbattito puretarameva devadahanagare mahāsuppabuddhassa gehe paṭisandhiṃ gaṇhi, **gotamī**tissā gottāgatameva nāmaṃ ahoṣi; mahāmāyāya kaniṭṭhabhaginī. Lakkhaṇapāṭhakāpi “imāsaṃ dvinnampi kucchiyaṃ vasitā dāraḱā cakkavattino bhavissanti”ti byākarīṃsu. Suddhodanamahārājā vayappattakāle dvepi maṅgalaṃ katvā attano gharaṃ abhinesī.

Aparabhāge amhākaṃ sathhari uppajjitvā pavattitavaradhammacakke anupubbena tattha tattha veneyyānaṃ anuggahaṃ karonte vesāliṃ upanissāya kūṭāgārasālāyaṃ viharante suddhodanamahārājā setacchattassa heṭṭhā arahattaṃ sacchikatvā parinibbāyi. Atha mahāpajāpatigotamī pabbajitukāmaṃ hutvā sathhāraṃ ekavāraṃ pabbajjaṃ yācamānā alabhivā dutiyavāraṃ kese chindāpetvā kāsāyāni acchādetvā **kalahavivādasuttanta**desanāpariyosāne (su. ni. 868 ādayo) nikkhamitvā pabbajitānaṃ pañcannaṃ sakyakumārasatānaṃ pādapariḱārikāhi saddhiṃ vesāliṃ gantvā ānandattheraṃ sathhāraṃ yācāpetvā aṭṭhahi garudhammehi (a. ni. 8.51; cūḷava. 403) pabbajjañca upasampadañca paṭilabhi. Itarā pana sabbāpi ekatoupasampannā ahesuṃ. Ayamettha saṅkhepo, vitthārato panetaṃ vatthu pāliyaṃ āgatameva.

Evam upasampannā pana mahāpajāpatigotamī satthāraṃ upasaṅkamitvā abhivādetvā ekamantaṃ atthāsi. Athassā satthā dhammaṃ desesi. Sā satthu santike kammaṭṭhānaṃ gahetvā bhāvanamanuyuñjantī na cirasseva abhiññāpaṭisambhidāparivāraṃ arahattaṃ pāpuṇi. Sesā pana pañcasatā bhikkhuniyo **nandakovādapariyosāne** (ma. ni. 3.398 ādayo) chaḷabhiññā ahesuṃ. Athekadivasam satthā jetavanamahāvihāre ariyagaṇamajjhe nisinno bhikkhuniyo ṭhānantare ṭhapento mahāpajāpatigotamiṃ rattaññūnaṃ bhikkhunīnaṃ aggaṭṭhāne ṭhapesi. Sā phalasukhena nibbānasukhena ca vītināmentī kataññūtāya ṭhatvā ekadivasam satthu guṇābhithavanapubbakaupākārakavibhāvanāmukhena aññaṃ byākarontī –

157. “Buddhavīra namo tyatthu, sabbasattānamuttama;
Yo maṃ dukkhā pamocesi, aññañca bahukaṃ janam.
158. “Sabbadukkham pariññātaṃ, hetutaṇhā visositā;
Bhāvito atthaṅgiko maggo, nirodho phusito mayā.
159. “Mātā putto pitā bhātā, ayyakā ca pure ahum;
Yathābhuccamajānantī, saṃsariṃham anibbisam.
160. “Diṭṭho hi me so bhagavā, antimoyaṃ samussayo;
Vikkhīṇo jātisamsāro, natthi dāni punabbhavo.
161. “Āraddhavīriye pahitatte, niccam daḷhaparakkame;
Samagge sāvake passe, esā buddhāna vandanā.
162. “Bahūnaṃ vata atthāya, māyā janayi gotamaṃ;
Byādhimaraṇatunnānaṃ, dukkhakkhandham byapānudī”ti. – imā gāthā abhāsi;

Tattha **buddhavīrāti** catusaccabuddhesu vīra, sabbabuddhā hi uttamavīriyehi catusaccabuddhehi vā catubbidhasammappadhānavīriyanipphattiyā vijitavijayattā vīrā nāma. Bhagavā pana vīriyapāramipāripūriyā caturaṅgasamannāgatavīriyādhiṭṭhānena sātisayacatubbidhasammappadhānakiccanipphattiyā tassā ca veneyyasantāne sammadeva patiṭṭhāpitattā visesato vīriyayuttatāya vīroti vattabbataṃ arahati. **Namo tyatthūti** namo namakkāro te hotu. **Sabbasattānamuttamāti** apadādibhedesu sattesu sīlādiguṇehi uttamo bhagavā. Tadekadesam satthupakāraguṇam dassetuṃ, “**yo maṃ dukkhā pamocesi, aññañca bahukaṃ jana**”nti vatvā attano dukkhā pamuttabhāvaṃ vibhāventī “**sabbadukkha**”nti gāthamāha.

Puna yato pamocesi, taṃ vaṭṭadukkham ekadesena dassentī “**mātā putto**”ti gāthamāha. Tattha **yathābhuccamajānantīti** pavattihetuādīṃ yathābhūtaṃ anavabujjhantī. **Saṃsariṃham anibbisanti** saṃsārasamudde patiṭṭham avindantī alabhantī bhavādīsu aparāparuppattivāsena saṃsariṃ ahantī kathentī āha “**mātā putto**”tiādi. Yasmiṃ bhavate etassa mātā ahoṣi, tato aññaṣmiṃ bhavate tasseeva putto, tato aññaṣmiṃ bhavate pitā bhātā ahūti attho.

“**Diṭṭho hi me**”ti gāthāyapi attano dukkhato pamuttabhāvameva vibhāveti. Tattha **diṭṭho hi me so bhagavāti** so bhagavā sammāsambuddho attanā diṭṭhalokuttaradhammadassanena ñāṇacakkhunā mayā paccakkhato diṭṭho. Yo hi dhammaṃ passati, so bhagavantaṃ passati nāma. Yathāha – “yo kho, vakkali, dhammaṃ passati, so maṃ passati”tiādi (saṃ. ni. 3.87).

Āraddhavīriyeti paggahitavīriye. **Pahitatteti** nibbānaṃ pesitacitte. **Niccam daḷhaparakkameti** apattassa pattiyā pattassa vepullatthāya sabbakālam thiraparakkame. **Samaggeti** sīladiṭṭhisīmaññaṇa saṃhatabhāvena samagge. Satthudesanāya savanante jātattā **sāvake**, “ime maggaṭṭhā ime phalaṭṭhā”ti yāthāvato passati. **Esā buddhāna vandanāti** yā satthu dhammasarīrabhūtassa ariyasāvakanam

ariyabhāvabhūta ca lokuttaradhammassa attapaccakkhakiyā, eṣā sammāsambuddhānaṃ sāvaka buddhānaṃ vandanā yāthāvato guṇaninnatā.

“**Bahūnaṃ vata atthāyā**”ti osānagāthāyapi satthu lokassa bahūpakāratameva vibhāveti. Yaṃ panettha atthato na vibhattaṃ, taṃ suviññeyyameva.

Athekadā mahāpajāpatigotamī satthari vesāliyaṃ viharante mahāvane kūṭāgārasālāyaṃ sayāṃ vesāliyaṃ bhikkhunupassaye viharantī pubbaṅhasamayaṃ vesāliyaṃ piṇḍāya caritvā bhattaṃ bhuñjivā attano divātthāne yathāparicchinnakālaṃ phalasaṃpattisukhena vītināmetvā phalasaṃpattito vuṭṭhāya attano paṭipattiṃ paccavekkhitvā somanassajātā attano āyusaṅkhāre āvajjentī tesāṃ khīṇabhāvaṃ ñatvā evaṃ cintesi – “yaṃnūnāhaṃ vihāraṃ gantvā bhagavantaṃ anujānāpetvā manobhāvanīye ca there sabbeva sabrahmacariye āpucchitvā idheva āgantvā parinibbāyeyya”nti. Yathā ca theriyā, evaṃ tassā parivārabhūtaṃ pañcannaṃ bhikkhunīsaṅgānaṃ parivattakko ahoṣi. Tena vuttaṃ **apadāne** (apa. therī 2.2.97-288) –

“Ekadā lokapajjoto, vesāliyaṃ mahāvane;
Kūṭāgāre kusālāyaṃ, vasate naraśārathī.

“Tadā jinassa mātucchā, mahāgotami bhikkhunī;
Tahiṃ kate pure ramme, vasī bhikkhunupassaye.

“Bhikkhunīhi vimuttāhi, satehi saha pañcahi;
Rahogāyā tassevaṃ, citassāsi vitakkiṃ.

“Buddhassa parinibbānaṃ, sāvakaggayugassa vā;
Rāhulānandanānaṃ, nāhaṃ lacchāmi passitū.

“Buddhassa parinibbānā, sāvakaggayugassa vā;
Mahākassapanandānaṃ, ānandarāhulāna ca.

“Paṭikaccāyusaṅkhāraṃ, osajjivāna nibbutiṃ;
Gaccheyyaṃ lokanāthena, anuññātā mahesinā.

“Tathā pañcasatānampi, bhikkhunīnaṃ vitakkiṃ;
Āsi khemādikānampi, etadeva vitakkiṃ.

“Bhūmicālo tadā asi, nādītā devadundubhī;
Upassayādhivatthāyo, devatā sokapīṭitā.

“Vilapantā sukaṇṇaṃ, tatthassūni pavattayū;
Mittā bhikkhuniyo tāhi, upagantvāna gotamiṃ.

“Nipacca sirasā pāde, idaṃ vacanamabravū;
Tattha toyalavāsittā, mayamayye rahogātā.

“Sā calā calitā bhūmi, nādītā devadundubhī;
Paridevā ca suyante, kimatthaṃ nūna gotamī.

“Tadā avoca sā sabbaṃ, yathāparivattakkiṃ;
Tāyopi sabbā āhaṃsu, yathāparivattakkiṃ.

“Yadi te rucitaṃ ayye, nibbānaṃ paramaṃ sivaṃ;
Nibbāyissāma sabbāpi, buddhānuññāya subbate.

“Mayaṃ sahāva nikkhantā, gharāpi ca bhavāpi ca;
Sahāyeva gamissāma, nibbānaṃ padamuttamaṃ.

“Nibbānāya vajantīnaṃ, kiṃ vakkhāmīti sā vadaṃ;
Saha sabbāhi niggañchi, bhikkhunīnilayā tadā.

“Upassaye yādhivatthā, devatā tā khamantu me;
Bhikkhunīnilayassedam, pacchimaṃ dassanaṃ mama.

“Na jarā maccu vā yattha, appiyehi samāgamo;
Piyehi na viyogotthi, taṃ vajissaṃ asaṅkhatam.

“Avītarāgā taṃ sutvā, vacanaṃ sugatorasā;
Sokaṭṭā parideviṃsu, aho no appapuññatā.

“Bhikkhunīnilayo suñño, bhūto tāhi vinā ayaṃ;
Pabhāte viya tārāyo, na dissanti jinorasā.

“Nibbānaṃ gotamī yāti, satehi saha pañcahi;
Nadīsatehiva saha, gaṅgā pañcahi sāgaraṃ.

“Rathiyāya vajantiyo, disvā saddhā upāsikā;
Gharā nikkhamma pādesu, nipacca idamabravum.

“Pasīdassu mahābhoge, anāthāyo vihāya no;
Tayā na yuttā nibbātum, icchaṭṭā vilapiṃsu tā.

“Tāsaṃ sokapahānattham, avoca madhuraṃ giram;
Rudītena alaṃ puttā, hāsakāloyamajja vo.

“Pariññātaṃ mayā dukkham, dukkhahetu vivaḷḷito;
Nirodho me sacchikato, maggo cāpi subhāvito.

“Pariciṅṅo mayā satthā, kataṃ buddhassa sāsanam;
Ohito garuko bhāro, bhavanetti samūhatā.

“Yassatthāya pabbajitā, agārasmānagāriyaṃ;
So me attho anupatto, sabbasaṃyojanakkhayo.

“Buddho tassa ca saddhammo, anūno yāva tiṭṭhati;
Nibbātum tāva kālo me, mā maṃ socatha puttikā.

“Koṇḍaññānandanandādī, tiṭṭhanti rāhulo jino;
Sukhito sahito saṅgho, hatadabbā ca titthiyā.

“Okkākaṃsaṃsassa yaso, ussito māramaddano;
Nanu sampati kālo me, nibbānatthāya puttikā.

“Cirappabhuti yaṃ mayhaṃ, patthitaṃ ajja sijjhate;
Ānandabherikāloyaṃ, kiṃ vo assūhi puttikā.

“Sace mayi dayā atthi, yadi catthi kataññutā;
Saddhammaṭṭhitiyā sabbā, karotha vīriyaṃ daḷhaṃ.

“Thīnaṃ adāsi pabbajjaṃ, sambuddho yācito mayā;
Tasmā yathāhaṃ nandissaṃ, tathā tamanutiṭṭhatha.

“Tā evamanusāsivā, bhikkhunīhi purakkhatā;
Upecca buddhaṃ vanditvā, idaṃ vacanamabravi.

“Ahaṃ sugata te mātā, tvañca vīra pitā mama;
Saddhammasukhada nātha, tayi jātāmi gotama.

“Saṃvaddhitoyaṃ sugata, rūpakāyo mayā tava;
Anindito dhammakāyo, mama saṃvaddhito tayā.

“Muhuttaṃ taṇhāsamaṇaṃ, khīraṃ tvaṃ pāyito mayā;
Tayāhaṃ santamaccantaṃ, dhammakhīrañhi pāyitā.

“Bandhanārakkhaṇe mayhaṃ, aṇaṇo tvaṃ mahāmune;
Puttakāmā thiyo yācaṃ, labhanti tādisaṃ suttaṃ.

“Mandhātādinarindānaṃ, yā mātā sā bhavaṇṇave;
Nimuggāhaṃ tayā putta, tārītā bhavasāgarā.

“Rañño mātā mahesīti, sulabhaṃ nāmamitthinaṃ;
Buddhamātāti yaṃ nāmaṃ, etaṃ paramadullabhaṃ.

“Tañca laddhaṃ mahāvīra, paṇidhānaṃ mamaṃ tayā;
Aṇukaṃ vā mahantaṃ vā, taṃ sabbhaṃ pūritaṃ mayā.

“Parinibbātumicchāmi, vihāyemaṃ kaḷevaraṃ;
Anujānāhi me vīra, dukkhantakara nāyaka.

“Cakkaṅkusadhajākiṇṇe, pāde kamalakomale;
Pasārehi paṇāmaṃ te, karissaṃ puttauttame.

“Suvaṇṇarāsisaṅkāsaṃ, sarīraṃ kuru pākaṭaṃ;
Kavā dehaṃ sudiṭṭhaṃ te, santiṃ gacchāmi nāyaka.

“Dvattiṃsalakkhaṇūpetā, supphālāṅkataṃ taṇuṃ;
Saṅjhāghanāva bālakkaṃ, mātucchaṃ dassayī jino.

“Phullāravindasaṃkāse, taruṇādiccasappabhe;
Cakkaṅkite pādātale, tato sā sirasā pati.

“Paṇamāmi narādicca, ādiccakulaketukaṃ;
Pacchime maraṇe mayhaṃ, na taṃ ikkhāmaṃ puno.

“Itthiyo nāma lokagga, sabbadosākarā matā;
Yadi ko catthi doso me, khamassu karuṇākara.

“Itthikānañca pabbajjaṃ, haṃ taṃ yāciṃ punappaṇaṃ;
Tattha ce atthi doso me, taṃ khamassu narāsabha.

“Mayā bhikkhuniyo vīra, tavānuññāya sāsītā;
Tatra ce atthi dunnītaṃ, taṃ khamassu khamādhipa.

“Akkhante nāma khantabbaṃ, kiṃ bhava guṇabhūsane;
Kimuttaraṃ te vatthāmi, nibbānāya vajantiyā.

“Suddhe anūne mama bhikkhusaṅghe, lokā ito nissarituṃ khamante;
Pabhātakāle byasanaṅgatānaṃ, disvāna niyyātiva candalekhā.

“Tadetarā bhikkhuniyo jinaggaṃ, tārāva candānugatā sumeruṃ;
Padakkhiṇaṃ kacca nipacca pāde, t̥hitā mukhantaṃ samudikkhamānā.

“Na tittipubbaṃ tava dassanena, cakkhuṃ na sotaṃ tava bhāsitena;
Cittaṃ mamaṃ kevalamekameva, pappuyya taṃ dhammarasena titti.

“Nadato parisāyaṃ te, vāditabbapahārino;
Ye te dakkhanti vadanaṃ, dhaññā te narapuṅgava.

“Dīghaṅgulī tambanakhe, subhe āyatapaṇhike;
Ye pāde paṇamissanti, tepi dhaññā guṇandhara.

“Madhurāni pahaṭṭhāni, dosagghāni hitāni ca;
Ye te vākyāni suyanti, tepi dhaññā naruttama.

“Dhaññāhaṃ te mahāvīra, pādapūjanatapparā;
Tiṇṇasaṃsarakantārā, suvākyena sirīmato.

“Tato sā anusāvetvā, bhikkhusaṅghampi subbatā;
Rāhulānandanande ca, vanditvā idamabravi.

“Āsīvisālayasame, rogāvāse kaḷevare;
Nibbindā dukkhasaṅghāṭe, jarāmarañagocare.

“Nānākalimalākiṇṇe, parāyatte nirīhake;
Tena nibbātumicchāmi, anumaññatha puttakā.

“Nando rāhulabhaddo ca, vītasokā nirāsavā;
T̥hitācalaṭṭhiti thirā, dhammatamanucintayaṃ.

“Dhiratthu saṅkhatam lolaṃ, asāraṃ kadalūpamaṃ;
Māyāmarīcisadisam, ittaraṃ anavaṭṭhitam.

“Yattha nāma jinassāyaṃ, mātucchā buddhaposikā;
Gotamī nidhanaṃ yāti, aniccaṃ sabbasaṅkhatam.

“Ānando ca tadā sekho, sokaṭṭo jinavacchalo;
Tatthassūni karonto so, karuṇaṃ paridevati.

“Hā santiṃ gotamī yāti, nūna buddhopi nibbutiṃ;
Gacchati na cireneva, aggiriva nirindhano.

“Evaṃ vilāpamānaṃ taṃ, ānandaṃ āha gotamī;
Sutasāgaragambhīra, buddhopaṭṭhāna tappara.

“Na yuttaṃ socituṃ putta, hāsakāle upaṭṭhite;
Tayā me saraṇaṃ putta, nibbānaṃ tamupāgataṃ.

“Tayā tāta samajjhittṭho, pabbajjaṃ anujāni no;
Mā putta vimano hohi, saphalo te parissamo.

“Yaṃ na diṭṭhaṃ purāṇehi, tittikācariyehipi;
Taṃ padaṃ sukumārīhi, sattavassāhi veditaṃ.

“Buddhasāsanapāleta, pacchimaṃ dassanaṃ tava;
Tattha gacchāmaṃ putta, gato yattha na dissate.

“Kadāci dhammaṃ desento, khīpī lokaggaṇāyako;
Tadāhaṃ āsīsavācaṃ, avocaṃ anukampikā.

“Ciraṃ jīva mahāvīra, kappāṃ tiṭṭha mahāmune;
Sabbalokassa atthāya, bhavassu ajarāmaro.

“Taṃ tathāvādinīṃ buddho, mamaṃ so etadabravi;
Na hevaṃ vandiyā buddhā, yathā vandasi gotamī.

“Kathaṃ carahi sabbaññū, vanditabbā tathāgatā;
Kathaṃ avandiyā buddhā, taṃ me akkhāhi pucchito.

“Āraddhavīriye pahitatte, niccaṃ daḥaparakkame;
Samagge sāvake passa, etaṃ buddhānavandanaṃ.

“Tato upassayaṃ gantvā, ekikāhaṃ vicintayim;
Samaggapariṣaṃ nātho, rodhesi tibhavantago.

“Handāhaṃ parinibbissaṃ, mā vipattitamaddasaṃ;
Evāhaṃ cintayitvāna, disvāna isisattamaṃ.

“Parinibbānakālaṃ me, ārocesim vināyakaṃ;
Tato so samanūññāsi, kālaṃ jānāhi gotamī.

“Kilesā jhāpitā mayhaṃ, bhavā sabbe samūhatā;
Nāgoṇa bandhanaṃ chetvā, viharāmi anāsavā.

“Svāgataṃ vata me āsi, mama buddhassa santike;
Tisso vijjā anuppattā, kataṃ buddhassa sāsanam.

“Paṭisambhidā catasso, vimokkhāpi ca aṭṭhime;
Chalābhiññā sacchikatā, katam buddhassa sāsanaṃ.

“Thīnaṃ dhammābhisamaye, ye bālā vimatiṃ gatā;
Tesaṃ diṭṭhippahānatthaṃ, iddhiṃ dassahi gotamī.

“Tadā nipacca sambuddhaṃ, uppativāna ambaraṃ;
Iddhī anekā dassesi, buddhānuññāya gotamī.

“Ekikā bahudhā āsi, bahudhā cekikā tathā;
Āvibhāvaṃ tirobhāvaṃ, tirokuṭṭaṃ tironagaṃ.

“Asajjamānā agamā, bhūmiyampi nimujjatha;
Abhijjamāne uduke, agañchi mahiyā yathā.

“Sakuṇīva tathākāse, pallaṅkena kamī tadā;
Vasaṃ vattesi kāyena, yāva brahmanivesanaṃ.

“Sineruṃ daṇḍaṃ katvāna, chattaṃ katvā mahāmahiṃ;
Samūlaṃ parivattetvā, dhārayaṃ caṅkamī nabhe.

“Chassūrodayakāleva, lokañcākāsi dhūmikaṃ;
Yugante viya lokaṃ sā, jālāmālākulaṃ akā.

“Mucalindaṃ mahāselam, merumūlanadantare;
Sāsapāriva sabbāni, ekenaggahi muṭṭhinā.

“Aṅgulaggena chādesi, bhākaraṃ sanisākaraṃ;
Candasūrasahassāni, āveḷamiva dhārayi.

“Catusāgaratoyāni, dhārayī ekapāṇinā;
Yugantajaladākāraṃ, mahāvassaṃ pavassatha.

“Cakkavattiṃ sapaṇisaṃ, māpayī sā nabhattale;
Garulaṃ dviradaṃ sīhaṃ, vinadantaṃ padassayi.

“Ekikā abhinimmitvā, appameyyaṃ bhikkhunīgaṇaṃ;
Puna antaradhāpetvā, ekikā munimabravi.

“Mātucchā te mahāvīra, tava sāsanaṅkārīkā;
Anupattā sakaṃ atthaṃ, pāde vandāmi cakkhuma.

“Dassetvā vividhā iddhī, orohitvā nabhattalā;
Vanditvā lokapajjotaṃ, ekamantaṃ nisīdi sā.

“Sā vīsavassasatikā, jātiyāhaṃ mahāmune;
Alamettāvata vīra, nibbāyissāmi nāyaka.

“Tadātivimhitā sabbā, parisā sā katañjalī;
Avocayye kathaṃ āsi, atuliddhiparakkamā.

“Padumuttaro nāma jīno, sabbadhammesu cakkhumā;
Ito satahassamhi, kappe uppajji nāyako.

“Tadāhaṃ haṃsavatiyaṃ, jātāmaccakule ahuṃ;
Sabbopakārasampanne, iddhe phīte mahaddhane.

“Kadāci pitunā saddhiṃ, dāsīgaṇapurakkhatā;
Mahatā parivārena, taṃ upecca narāsabhaṃ.

“Vāsavaṃ viya vassantaṃ, dhammameghaṃ anāsavaṃ;
Saradādiccasadisam, raṃsijālasamujjalaṃ.

“Disvā cittaṃ pasādetvā, sutvā cassa subhāsitaṃ;
Mātucchaṃ bhikkhuṃ agge, ṭhapentaṃ naranāyakaṃ.

“Sutvā datvā mahādānaṃ, sattāhaṃ tassa tādino;
Sasaṅghassa naraggassa, paccayāni bahūni ca.

“Nipacca pādāmūlamhi, taṃ ṭhānamabhipatthayaṃ;
Tato mahāparisatiṃ, avoca isisattamo.

“Yā sasaṅghaṃ abhojesi, sattāhaṃ lokanāyakaṃ;
Tamaṃ kittayissāmi, suṇātha mama bhāsato.

“Satahassito kappe, okkākakulasambhavo;
Gotamo nāma gottena, satthā loke bhavissati.

Tassa dhammesu dāyādā, orasā dhammanimmitā;
Gotamī nāma nāmena, hessati satthu sāvikā.

“Tassa buddhassa mātucchā, jīvitāpādikā ayaṃ;
Rattaññūnañca aggattaṃ, bhikkhunīnaṃ labhissati.

“Taṃ sutvāna pamoditvā, yāvajīvaṃ tadā jinaṃ;
Paccayehi upaṭṭhitvā, tato kālaṅkatā ahaṃ.

“Tāvatiṃsesu devesu, sabbakāmasamiddhisu;
Nibbattā dasahaṅgehi, aññe abhibhaviṃ ahaṃ.

“Rūpasaddehi gandhehi, rasehi phusanehi ca;
Āyunāpi ca vaṇṇena, sukhena yasaṣāpi ca.

“Tathevādhipateyyena, adhigayha virocahaṃ;
Ahoṣiṃ amarindassa, mahesī dayitā tahiṃ.

“Saṃsāre saṃsarantīhaṃ, kammavāyusameritā;
Kāsissa rañño visaye, ajāyimaṃ dāsagāmake.

“Pañcadāsasatānūnā, nivasanti tahiṃ tadā;
Sabbesaṃ tattha yo jeṭṭho, tassa jāyā ahasahaṃ.

“Sayambhuno pañcasatā, gāmaṃ piṇḍāya pāvisuṃ;
Te disvāna ahaṃ tuṭṭhā, saha sabbāhi itthibhi.

“Pūgā hutvāva sabbāyo, catumāse upaṭṭhahuṃ;
Ticīvarāni datvāna, saṃsarimha sasāmikā.

“Tato cutā sabbāpi tā, tāvatimsagatā mayaṃ;
Pacchime ca bhava dāni, jātā devadahe pure.

“Pitā añjanasakko me, mātā mama sulakkhaṇā;
Tato kapilavatthusmiṃ, suddhodanagharaṃ gatā.

“Sesā sakyakule jātā, sakyānaṃ gharamāgamuṃ;
Ahaṃ visiṭṭhā sabbāsaṃ, jinassāpādikā ahuṃ.

“Mama puttobhinikkhamma, buddho āsi vināyako;
Pacchāhaṃ pabbajitvāna, satehi saha pañcahi.

“Sākiyānīhi dhīrāhi, saha santisukhaṃ phusiṃ;
Ye tadā pubbajātiyaṃ, amhākaṃ āsu sāmīno.

“Sahapuññassa kattāro, mahāsamayakārakā;
Phusiṃsu arahattaṃ te, sugatenānukampitā.

“Tadetarā bhikkhuniyo, āruhiṃsu nabhattalaṃ;
Saṃgatā viya tārāyo, virociṃsu mahiddhikā.

“Iddhī anekā dassesuṃ, piḷandhavikatiṃ yathā;
Kammāro kanakasseva, kammaññassa susikkhito.

“Dassetvā pāṭihīrāni, vicittāni bahūni ca;
Tosetvā vādipavaraṃ, muniṃ sapaṇisaṃ tadā.

“Orohitvāna gaganā, vanditvā isisattamaṃ;
Anuññātā naraggena, yathāṭṭhāne nisīdisuṃ.

“Ahonukampikā amhaṃ, sabbāsaṃ cira gotamī;
Vāsītā tava puññehi, pattā no āsavakkhayaṃ.

“Kilesā jhāpitā amhaṃ, bhavā sabbe samūhatā;
Nāgīva bandhanaṃ chetvā, viharāma anāsavā.

“Svāgataṃ vata no āsi, buddhaseṭṭhassa santike;
Tisso vijjā anuppattā, kataṃ buddhassa sāsanaṃ.

“Paṭisambhidā catasso, vimokkhāpi ca aṭṭhime;
Chalābhiññā sacchikatā, kataṃ buddhassa sāsanaṃ.

“Iddhīsu ca vasī homa, dibbāya sotadhātuyā;
Cetopariyaññaṃ, vasī homa mahāmune.

“Pubbenivāsaṃ jānāma, dibbacakkhu visodhitam;
Sabbāsavaparikkhīṇā, natthi dāni punabbhavā.

“Atthe dhamme ca nerutte, paṭibhāne ca vijjati;
Ñāṇaṃ amhaṃ mahāvīra, uppannaṃ tava santike.

“Asmābhi pariciṇṇosi, mettacittā hi nāyaka;
Anujānāhi sabbāsaṃ, nibbānāya mahāmune.

“Nibbāyissāma iccevaṃ, kiṃ vakkhāmi vadantiyo;
Yassa dāni ca vo kālaṃ, maññathāti jinobravi.

“Gotamādikā tāyo, tadā bhikkhuniyo jinaṃ;
Vanditvā āsanā tamhā, vuṭṭhāya āgamiṃsu tā.

“Mahatā janakāyena, saha lokagganāyako;
Anusaṃyāyī so vīro, mātucchaṃ yāvakoṭṭhakaṃ.

“Tadā nipati pādesu, gotamī lokabandhuno;
Saheva tāhi sabbāhi, pacchimaṃ pādavandaṇaṃ.

“Idaṃ pacchimakam mayhaṃ, lokanāthassa dassanaṃ;
Na puno amatākāraṃ, passissāmi mukhaṃ tava.

“Na ca me vandaṇaṃ vīra, tava pāde sukomale;
Samphusissati lokagga, ajja gacchāmi nibbutiṃ.

“Rūpena kiṃ tavānena, diṭṭhe dhamme yathāthate;
Sabbam saṅkhatamevetam, anassāsikamittaraṃ.

“Sā saha tāhi gantvāna, bhikkhunupassayaṃ sakaṃ;
Aḍḍhapallaṅkamābhujja, nisīdi paramāsane.

“Tadā upāsikā tattha, buddhasāsanavacchalā;
Tassā pavattiṃ sutvāna, upesuṃ pādavandikā.

“Karehi uraṃ pahantā, chinnamūlā yathā latā;
Rodantā karuṇaṃ ravaṃ, sokaṭṭā bhūmipātītā.

“Mā no saraṇade nāthe, vihāya gami nibbutiṃ;
Nipatitvāna yācāma, sabbāyo sirasā mayaṃ.

“Yā padhānatamā tāsam, saddhā paññā upāsikā;
Tassā sīsaṃ pamajjantī, idaṃ vacanamabravi.

“Alaṃ puttā visādena, mārapāsānuvattinā;
Aniccaṃ saṅkhatam sabbam, viyogantaṃ calācalaṃ.

“Tato sā tā visajjitvā, paṭhamaṃ jhānamuttamaṃ;
Dutiyañca tatiyañca, samāpajji catutthakaṃ.

“Ākāsāyatanañceva, viññāṇāyatanaṃ tathā;
Ākiñcaṃ nevasaññañca, samāpajji yathākkamaṃ.

“Paṭilomena jhānāni, samāpajjittha gotamī;
Yāvata paṭhamam jhānam, tato yāvacatutthakam.

“Tato vuṭṭhāya nibbāyi, dīpaccīva nirāsavā;
Bhūmicālo mahā āsi, nabhasā vijjutā pati.

“Panādītā dundubhiyo, parideviṃsu devatā;
Pupphavuṭṭhī ca gaganā, abhivassatha medaniṃ.

“Kampito merurājāpi, raṅgamajjhe yathā naṭo;
Sokena cātīdīnova, viravo āsi sāgaro.

“Devā nāgāsura brahmā, saṃviggāhiṃsu taṅkhaṇe;
Aniccā vata saṅkhārā, yathāyaṃ vilayaṃ gatā.

“Yā ce maṃ parivāriṃsu, satthu sāsana-kārikā;
Tayopi anupādānā, dīpacci viya nibbutā.

“Hā yogā vippayogantā, hāniccaṃ sabbasaṅkhatam;
Hā jīvitam vināsantam, iccāsi paridevanā.

“Tato devā ca brahmā ca, lokadhammānūvattanam;
Kālānurūpaṃ kubbanti, upetvā isisattamam.

“Tadā āmantayī sathā, ānandam sutasāgaram;
Gacchānanda nivedehi, bhikkhūnam mātu nibbutim.

“Tadānando nirānando, assunā puṇṇalocano;
Gaggarena sarenāha, samāgacchantu bhikkhavo.

“Pubbadakkhiṇapacchāsu, uttarāya ca santike;
Suṇantu bhāsitam mayham, bhikkhavo sugatorasā.

“Yā vaḍḍhayi payattena, sarīram pacchimaṃ mune;
Sā gotamī gatā santim, tārāva sūriyodaye.

“Buddhamātāpi paññattim, ṭhapayitvā gatāsamam;
Na yattha pañcanettopi, gatiṃ dakkhati nāyako.

“Yassatthi sugate saddhā, yo ca piyo mahāmune;
Buddhamātussa sakkāram, karotu sugatoraso.

“Sudūraṭṭhāpi tam sutvā, sīghamāgacchu bhikkhavo;
Keci buddhānubhāvena, keci iddhīsu kovidā.

“Kūṭāgāravare ramme, sabbasoṇṇamaye subhe;
Mañcakaṃ samāropesum, yattha suttāsi gotamī.

“Cattāro lokapālā te, aṃsehi samadhārayuṃ;
Sesā sakkādikā devā, kūṭāgāre samaggahuṃ.

“Kūṭāgārāni sabbāni, āsuṃ pañcasatānipi;
Saradādiccavaṇṇāni, vissakammakatāni hi.

“Sabbā tāpi bhikkhuniyo, āsuṃ mañcesu sāyitā;
Devānaṃ khandhamāruḷhā, niyyanti anupubbaso.

“Sabbaso chāditaṃ āsi, vitānena nabhattalaṃ;
Satārā candasūrā ca, lañchitā kanakāmāyā.

“Paṭākā ussitānekā, vitatā pupphakañcukā;
Ogatākāsapadumā, mahiyā pupphamuggataṃ.

“Dissanti candasūriyā, pajjalanti ca tārakā;
Majjhaṃ gatopi cādicco, na tāpesi sasī yathā.

“Devā dibbehi gandhehi, mālehi surabhīhi ca;
Vāditehi ca naccehi, saṅgītīhi ca pūjayuṃ.

“Nāgāsūrā ca brahmāno, yathāsatti yathābalaṃ;
Pūjayiṃsu ca niyyantiṃ, nibbutaṃ buddhamātaraṃ.

“Sabbāyo purato nītā, nibbutā sugatorasā;
Gotamī niyyate pacchā, sakkatā buddhaposikā.

“Purato devamanujā, sanāgāsura brahmakā;
Pacchā sasāvako buddho, pūjatthaṃ yāti mātuyā.

“Buddhassa parinibbānaṃ, nedisaṃ āsi yādisaṃ;
Gotamīparinibbānaṃ, atevacchariyaṃ ahu.

“Buddho buddhassa nibbāne, nopāṭiyādi bhikkhavo;
Buddho gotaminibbāne, sārīputtādikā tathā.

“Citakāni karitvāna, sabbagandhamayāni te;
Gandhacuṇṇapakiṇṇāni, jhāpayiṃsu ca tā tahiṃ.

“Sesabhāgāni ḍayhiṃsu, aṭṭhī sesāni sabbaso;
Ānando ca tadāvoca, saṃvegajanakaṃ vaco.

“Gotamī nidhanaṃ yātā, ḍayhañcassa sarīraṃ;
Saṅketaṃ buddhanibbānaṃ, na cirena bhavissati.

“Tato gotamidhātūni, tassā pattagatāni so;
Upanāmesi nāthassa, ānando buddhacodito.

“Pāṇinā tāni paggayha, avoca isisattamo;
Mahato sāravantassa, yathā rukkhassa tiṭṭhato.

“Yo so mahattaro khandho, palujjeyya aniccatā;
Tathā bhikkhunisaṅghassa, gotamī parinibbutā.

“Aho acchariyaṃ mayhaṃ, nibbutāyapi mātuyā;
Sārīramattasesāya, natthi sokapariddavo.

“Na sociyā paresaṃ sā, tiṇṇasaṃsārasāgarā;
Parivajjitasantāpā, sītībhūtā sunibbutā.

“Paṇḍitāsi mahāpaññā, puthupaññā tatheva ca;
Rattaññū bhikkhunīnaṃ sā, evaṃ dhāretha bhikkhavo.

“Iddhīsu ca vasī āsi, dibbāya sotadhātuyā;
Cetopariyaññaṃ, vasī āsi ca gotamī.

“Pubbenivāsamaññāsi, dibbacakkhu visodhitaṃ;
Sabbāsavaparikkhīṇā, natthi tassā punabbhavo.

“Atthadhammaniruttīsu, paṭībhāne tatheva ca;
Parisuddhaṃ ahu ñāṇaṃ, tasmā socaniyā na sā.

“Ayoghanahatasseva, jalato jātavedassa;
Anupubbūpasantassa, yathā na ñāyate gati.

“Evaṃ sammā vimuttānaṃ, kāmabandhoghatāriṇaṃ;
Paññāpetuṃ gati natthi, pattānaṃ acalaṃ sukhaṃ.

“Attadīpā tato hotha, satipaṭṭhānagocarā;
Bhāvetvā sattabojjhaṅge, dukkhassantaṃ karissathā”ti. (apa. therī 2.2.97-288);

Mahāpajāpatigotamītherīgāthāvaṇṇanā niṭṭhitā.

7. Guttātherīgāthāvaṇṇanā

Gutte yadatthaṃ pabbajjātiādikā guttāya theriyā gāthā. Ayampi purimabuddhesu katādhikārā tattha tattha bhave vivaṭṭūpanissayaṃ kusalaṃ upacinantī anukkamena sambhatavimokkhasambhārā hutvā, paripakkakusalamūlā sugatīsuveva saṃsarantī imasmiṃ buddhuppāde sāvatthiyaṃ brāhmaṇakule nibbattā, **guttā**tissā nāmaṃ ahosi. Sā viññutaṃ patvā upanissayasampattiyā codiyamānā gharāvāsaṃ jigucchantī mātāpitaro anujānāpetvā mahāpajāpatigotamiyā santike pabbajī. Pabbajitvā ca vipassanaṃ paṭṭhapetvā bhāvanaṃ anuyuñjantiyā tassā cittaṃ cirakālaparicayena bahiddhārammaṇe vidhāvati, ekaggaṃ nāhosi. Sathā disvā taṃ anuggaṇhanto, gandhakuṭiyaṃ yathānisinnova obhāsaṃ pharitvā tassā āsanne ākāse nisinnaṃ viya attānaṃ dassetvā oवादanto –

163. “Gutte yadatthaṃ pabbajjā, hitvā puttaṃ vasaṃ piyaṃ;
Tameva anubrūhehi, mā cittassa vasaṃ gami.

164. “Cittena vañcitā sattā, mārassa visaye ratā;
Anekajātisaṃsāraṃ, sandhāvanti aviddasū.

165. “Kāmācchandaṅca byāpādaṃ, sakkāyadiṭṭhimeva ca;
Sīlabbataparāmāsaṃ, vicikicchaṃ ca pañcamaṃ.

166. “Saṃyojanāni etāni, pajahitvāna bhikkhunī;
Orambhāgamanīyāni, nayidaṃ punarehisi.
167. “Rāgaṃ mānaṃ avijjañca, uddhaccañca vivajjiya;
Saṃyojanāni chetvāna, dukkhassantaṃ karissasi.
168. “Khepetvā jātisaṃsāraṃ, pariññāya punabbhavaṃ;
Diṭṭheva dhamme nicchātā, upasantā carissasī’ ti. – imā gāthā ābhāsi;

Tattha **tameva anubrūhehīti yadatthaṃ** yassa kilesaparinibbānassa khandhapariniibbānassa ca atthāya. **Hitvā puttaṃ vasuṃ piyanti** piyāyitabbaṃ ñātiparivaṭṭaṃ bhogakkhandhañca hitvā mama sāsane **pabbajjā** brahmacariyavāso icchito, tameva vaḍḍheyyāsī sampādeyyāsī. **Mā cittassa vasaṃ gamīti** dīgharattaṃ rūpādīarammaṇavasena vaḍḍhitassa kūṭacittassa vasaṃ mā gacchi.

Yasmā cittaṃ nāmetaṃ māyūpamaṃ, yena vañcitā andhaputhujjanā māravasānugā saṃsāraṃ nātivattanti. Tena vuttaṃ “**cittena vañcitā**” tiādi.

Saṃyojanāni etānīti etāni “**kāmacchandañca byāpāda**” ntiādinā yathāvuttāni pañca bandhanaṭṭhena saṃyojanāni. **Pajahitvānāti** anāgāmmimaggena samucchinditvā. **Bhikkhunīti** tassā ālapanam. **Orambhāgamanīyānīti** rūpārūpadhātuto heṭṭhābhāge kāmādhātuyam manussajīvassa hitāni upakārāni tattha paṭisandhiyā paccayabhāvato. Ma-kāro padasandhikaro. “Oramāgamanīyāni” ti pāli, so evattho. **Nayidaṃ punarehisi**ti orambhāgiyānaṃ saṃyojanānaṃ pahānena idaṃ kāmāṭṭhānaṃ kāmabhavaṃ paṭisandhivasena puna nāgamissasi. Ra-kāro padasandhikaro. “Ittha” nti vā pāli, itthattaṃ kāmabhavamicceva attho.

Rāganti rūparāgañca arūparāgañca. **Mānanti** aggamaggavajjhaṃ mānaṃ. **Avijjañca uddhaccañcāti** etthāpi eseva nayo. **Vivajjiyāti** vipassanāya vikkhambhetvā. **Saṃyojanāni chetvānāti** etāni rūparāgādāni pañcuddhambhāgiyāni saṃyojanāni arahattamaggena samucchinditvā. **Dukkhassantaṃ karissasīti** sabbassāpi vaṭṭadukkhassa pariyantaṃ pariyosānaṃ pāpuṇissasi.

Khepetvā jātisaṃsāranti jāti samūlikasaṃsārapavattiṃ pariyosāpetvā. **Nicchātāti** nittaṇhā. **Upasantāti** sabbaso kilesānaṃ vūpasamena upasantā. Sesam vuttanayameva.

Evam satthārā imāsu gāthāsu bhāsītāsu gāthāpariyosāne therī saha paṭisambhidāhi arahattaṃ patvā udānavasena bhagavatā bhāsitanīyāmeneva imā gāthā abhāsi. Teneva tā theriyā gāthā nāma jātā.

Guttātherīgāthāvaṇṇanā niṭṭhitā.

8. Vijayātherīgāthāvaṇṇanā

Catukkhattuntīdikā vijayāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī, anukkamena paribrūhitakusalamūlā devamanussesu saṃsarantī, imasmim buddhuppāde rājagahe aññatarasmim kulagehe nibbattitvā viññutaṃ patvā khemāya theriyā gihikāle sahāyikā ahoṣi. Sā tassā pabbajitabhāvaṃ sutvā “sāpi nāma rājamahesī pabbajissati kimaṅgaṃ panāha” nti pabbajitukāmāyeva hutvā khemātheriyā santikaṃ upasaṅkami. Therī tassā ajjhāsayaṃ ñatvā tathā dhammaṃ desesi, yathā saṃsāre saṃviggamānasā sāsane sā abhippasannā bhavissati. Sā taṃ dhammaṃ sutvā saṃvegajātā paṭiladdhasaddhā ca hutvā pabbajjaṃ yāci. Therī taṃ pabbājesi. Sā pabbajitvā katapubbakiccā vipassanaṃ paṭṭhapetvā hetusampannaṭṭāya, na cirasseva saha paṭisambhidāhi arahattaṃ patvā attano paṭipattiṃ paccavekkhitvā udānavasena –

169. “Catukkhattuṃ pañcakkhattuṃ, vihārā upanikkhamim;

Aladdhā cetaso santim, citte avasavattinī.

170. “Bhikkhunim upasaṅkamma, sakkaccaṃ paripucchahaṃ;
Sā me dhammadesesi, dhātuāyatanāni ca.
171. “Cattāri ariyasaccāni, indriyāni balāni ca;
Bojjhaṅgaṭṭhaṅgikaṃ maggaṃ, uttamatthassa pattiya.
172. “Tassāhaṃ vacanaṃ sutvā, karontī anusāsanim;
Rattiyā purime yāme, pubbajātīmanussarim.
173. “Rattiyā majjhime yāme, dibbacakkhuṃ visodhayim;
Rattiyā pacchime yāme, tamokhandhaṃ padālayim.
174. “Pītisukhena ca kāyaṃ, pharivā viharim tadā;
Sattamiyā pāde pasāresim, tamokhandhaṃ padāliya”ti. –

Imā gāthā abhāsi.

Tattha **bhikkhuninti** khemātherim sandhāya vadati.

Bojjhaṅgaṭṭhaṅgikaṃ magganti sattabojjhaṅgaṅca aṭṭhaṅgikaṅca ariyamaggaṃ. **Uttamatthassa pattiya**ti arahattassa nibbānasseva vā pattiya adhiḡamaṃya.

Pītisukhenāti phalasaṃpattipariyāpannāya pītiyā sukhena ca. **Kāyanti** taṃsampaṃyuttaṃ nāmakāyaṃ tadanusārena rūpakāyaṅca. **Pharivā**ti phusitvā byāpetvā vā. **Sattamiyā pāde pasāresinti** vipassanāya āradhadivasato sattamiyaṃ pallaṅkaṃ bhinditvā pāde pasāresim. Kathaṃ?
Tamokhandhaṃ padāliya, appadālitapubbaṃ mohakkhandhaṃ aggamaḡgañāṅasina padāletvā. Sesam heṭṭhā vuttanayameva.

Vijayātheriḡgāthāvaṅṅanā niṭṭhitā.

Chakkanipātavaṅṅanā niṭṭhitā.

7. Sattakanipāto

1. Uttarātheriḡgāthāvaṅṅanā

Sattakanipāte **musalāni gahetvānā**ti uttarāya theriyā gāthā. Ayampi purimabuddhesu katādhikārā tattha tattha bhava vivaṭṭupaniṣsayam kusalam upacinantī, anukkamena sambhāvitakusalamūlā samupacitavimokkhasambhārā paripakkavimuttipariṣāṅyadhammā hutvā, imasmiṃ buddhuppāde sāvatthiyaṃ aññatarasmiṃ kulagehe nibbattitvā **uttarā**ti laddhanāmā anukkamena viññutaṃ patvā paṭācārāya theriyā santikaṃ upasaṅkami. Therī tassā dhammaṃ kathesi. Sā dhammaṃ sutvā saṃsāre jātasamvegā sāsane abhippasannā hutvā pabbaji. Pabbajitvā ca katapubbakiccā paṭācārāya theriyā santike vipassanaṃ paṭṭhapetvā bhāvanamanuyuñjantī upaniṣsayasampannatāya indriyānaṃ paripākaṃ gatattā ca na cirasseva vipassanaṃ ussukkāpetvā saha paṭisambhidāhi arahattaṃ pāpuṇi. Arahattaṃ pana patvā attano paṭipattiṃ paccavekkhitvā udānavasena –

175. “Musalāni gahetvāna, dhaññaṃ koṭṭenti māṅavā;
Puttadārāni posentā, dhanam vindanti māṅavā.

176. “Ghaṭetha buddhasāsane, yaṃ katvā nānutappati;
Khippaṃ pādāni dhovivā, ekamantaṃ nisīdatha.
177. “Cittaṃ upaṭṭhapetvāna, ekaggaṃ susamāhitaṃ;
Paccavekkhatha saṅkhāre, parato no ca attato.
178. “Tassāhaṃ vacanaṃ sutvā, paṭācārānusāsaniṃ;
Pāde pakkhālayitvāna, ekamante upāvisiṃ.
179. “Rattiyā purime yāme, pubbaḷāṭṭhimanussariṃ;
Rattiyā majjhime yāme, dibbacakkhuṃ visodhayiṃ.
180. “Rattiyā pacchime yāme, tamokkhandhaṃ padālayiṃ;
Tevijjā atha vuṭṭhāsiṃ, katā te anusāsani.
181. “Sakkaṃva devā tidaṣā, saṅgāme aparājitaṃ;
Purakkhatvā vihassāmi, tevijjāmi anāsava”ti. —

Imā gāthā abhāsi.

Tattha **cittaṃ upaṭṭhapetvānā**ti bhāvanācittaṃ kammaṭṭhāne upaṭṭhapetvā. Kathaṃ? **Ekaggaṃ susamāhitaṃ paccavekkhathā**ti paṭipattiṃ avekkhatha, saṅkhāre aniccātipi, dukkhātipi, anattātipi lakkhaṇattayaṃ vipassathāti attho. Idaṅca ovādakāle attano aññesaṅca bhikkhunīnaṃ theriyādīnaṃ ovādassa anuvādasena vuttaṃ. **Paṭācārānusāsani**ti paṭācārāya theriyā anusīṭṭhiṃ. “Paṭācārāya sāsana”ntipi vā pāṭho.

Atha vuṭṭhāsiti tevijjābhāvappattito pacchā āsanato vuṭṭhāsiṃ. Ayampi therī ekadivasaṃ paṭācārāya theriyā santike kammaṭṭhānaṃ sodhetvā attano vasanaṭṭhānaṃ pavisitvā pallaṅkaṃ ābhujitvā nisīdi. “Na tāvimaṃ pallaṅkaṃ bhindissāmi, yāva me na anupādāya āsavehi cittaṃ vimuccatī”ti nicchayaṃ katvā sammasanaṃ ārabhitvā, anukkamena vipassanaṃ ussukkāpetvā maggapaṭipāṭiyā abhiññāpaṭisambhidāparivāraṃ arahattaṃ patvā ekūnavīsatiyā paccavekkhaṇāññāyā pavattāya “idānimhi katakicā”ti somanassajātā imā gāthā udānetvā pāde pasāresi aruṇuggamaṇavelāyaṃ. Tato sammadeva vibhātāya rattiyā theriyā santikaṃ upagantvā imā gāthā paccudāhāsi. Tena vuttaṃ “katā te anusāsani”tiādi. Sesā sabbā heṭṭhā vuttanayameva.

Uttarātherīgāthāvaṇṇanā niṭṭhitā.

2. Cālātherīgāthāvaṇṇanā

Satiṃ upaṭṭhapetvānātiādikā cālāya theriyā gāthā. Ayampi purimabuddhesu katādhikārā tattha tattha bhava vivaṭṭupanissayaṃ kusalaṃ upacinitvā imasmim buddhuppāde magadhesu nālakagāme rūpasārībrāhmaṇiyā kucchimhi nibbatti. Tassā nāmaggaṇādivase **cālā**ti nāmaṃ akaṃsu, tassā kaniṭṭhāya **upacālā**ti, atha tassā kaniṭṭhāya **sīsūpacālā**ti. Imā tissopi dhammasenāpatissa kaniṭṭhabhaginiyo, imāsaṃ puttānampi tiṇṇaṃ idameva nāmaṃ. Ye sandhāya theragāthāya “cāle upacāle sīsūpacāle”ti (theragā. 42) āgataṃ.

Imā pana tissopi bhaginiyo “dhammasenāpati pabbajī”ti sutvā “na hi nūna so orako dhammavinayo, na sā orikā pabbajjā, yattha amhākaṃ ayyo pabbajito”ti ussāhajātā tibbacchandaṃ assumukhaṃ rudamaṇaṃ nātiparijanaṃ pahāya pabbajimsu. Pabbajitvā ca ghaṭentiyo vāyamantiyo nacirasseva arahattaṃ pāpuṇimsu. Arahattaṃ pana patvā nibbānasukhena phalasukhena viharanti.

Tāsu cālā bhikkhunī ekadivasam pacchābhattam piṇḍapātaṭṭikkantā andhavanam pavisitvā divāvihāram nisīdi. Atha nam māro upasaṅkamtivā kāmehi upanesi. Yam sandhāya sutte vuttam –

“Atha kho cālā bhikkhunī pubbaṅhasamayam nivāsetvā pattaṭṭivaram ādāya sāvattim piṇḍāya pāvisi. Sāvattiyam piṇḍāya caritvā pacchābhattam piṇḍapātaṭṭikkantā yena andhavanam, tenupasaṅkami divāvihārāya. Andhavanam ajjhogāhetvā aññatarasmim rukkhamūle divāvihāram nisīdi. Atha kho māro pāpimā yena cālā bhikkhunī, tenupasaṅkami, upasaṅkamtivā cālam bhikkhunim etadavocā”ti (sam. ni. 1.167).

Andhavanamhi divāvihāram nisinnam māro upasaṅkamtivā brahmacariyavāsato vicchinditukāmo “kam nu uddissa muṇḍāsī”tiādim pucchi. Athassa satthu guṇe dhammassa ca niyyānikabhāvam pakāsetvā attano katakiccabhāvavibhāvanena tassa visayātikkamam pavedesi. Tam sutvā māro dukkhī dummano tatthevantaradhāyī. Atha sā attanā mārena ca bhāsītā gāthā udānavasena kathentī –

182. “Satim upaṭṭhapetvāna, bhikkhunī bhāvitindriyā;
Paṭivijjhi padaṃ santam, saṅkhārūpasamam sukham.
183. “Kam nu uddissa muṇḍāsī, samaṇī viya dissati;
Na ca rocesi pāsaṇḍe, kimidaṃ carasi momuhā.
184. “Ito bahiddhā pāsaṇḍā, diṭṭhiyo upanissitā;
Na te dhammam vijānanti, na te dhammassa kovidā.
185. “Atthi sakyakule jāto, buddho appaṭipuggalo;
So me dhammadesesi, diṭṭhīnam samatikkamam.
186. “Dukkham dukkhasamuppādam, dukkhassa ca atikkamam;
Ariyam caṭṭhaṅgikam maggam, dukkhūpasamagāminam.
187. “Tassāham vacanam sutvā, vihariṃ sāsane ratā;
Tisso vijjā anuppattā, kataṃ buddhassa sasanam.
188. “Sabbattha vihatā nandī, tamokkhandho padālito;
Evam jānāhi pāpima, nihato tvamasi antakā”ti. –

Imā gāthā abhāsi.

Tattha **satim upaṭṭhapetvānā**ti satipaṭṭhānabhāvanāvasena kāyādīsū aśubhadukkhāniccānavasena satim suṭṭhu upaṭṭhitam katvā. **Bhikkhunī**ti attānam sandhāya vadati. **Bhāvitindriyā**ti ariyamaggabhāvanāya bhāvitasaddhādipaṅcīndriyā. **Paṭivijjhi padaṃ santam** santi santam padaṃ nibbānam sacchikiriyāpaṭivedhena paṭivijjhi sacchākāsi. **Saṅkhārūpasamanti** sabbasaṅkhārānam upasamahetubhūtam. **Sukhanti** accantasukham.

“**Kam nu uddissā**”ti gāthā mārena vuttā. Tatrāyam saṅkhepattho – imasmim loke bahū samayā tesaṅca desetāro bahū eva titthakarā, tesu kam nu kho tvaṃ uddissa **muṇḍāsī** muṇḍitakesā asi. Na kevalam muṇḍāva, atha kho kāsāvadhāraṇena ca samaṇī viya dissati. **Na ca rocesi pāsaṇḍeti** tāpasaparibbājakādīnam ādāsabhūte pāsaṇḍe te te samayantare neva rocesi. **Kimidaṃ carasi momuhā**ti kim nāmidam, yam pāsaṇḍavhitam ujum nibbānamaggam pahāya ajja kālikam kumaggam paṭipajjantī ativiya mūlhā carasi paribbhamasīti.

Tam sutvā therī paṭivacanadānamukhena tam tājentī “**ito bahiddhā**”tiādimāha. Tattha ito

bahiddhā pāsaṅḍā nāma **ito** sammāsambuddhassa sāsanaṭo **bahiddhā** kuṭṭisakabahukārādikā. Te hi sattānaṃ taṅhāpāsaṃ diṭṭhipāsaṅca ḍenti oḍḍenti **pāsaṅḍāti** vuccati. Tenāha – “**diṭṭhiyo upanissitā**”ti sassatadiṭṭhigatāni upecca nissitā, diṭṭhigatāni ādiyimsūti attho. Yadaggena ca diṭṭhisannissitā, tadaggena pāsaṅḍasannissitā. **Na te dhammaṃ vijānantī** ye pāsaṅḍino sassatadiṭṭhigatasannissitā “ayaṃ pavatti evaṃ pavattatī”ti pavattidhammampi yathābhūtaṃ na vijānanti. **Na te dhammassa kovidāti** “ayaṃ nivatti evaṃ nivattatī”ti nivattidhammassāpi akusalā, pavattidhammaggepi hi te saṃmūḷhā, kimaṅgaṃ pana nivattidhammeti.

Evaṃ pāsaṅḍavādānaṃ aniyyānikataṃ dassetvā idāni kaṃ nu uddissa muṅḍāsīti pañhaṃ vissajjetuṃ “**atthi sakyakule jāto**”tiādi vuttaṃ. Tattha **diṭṭhīnaṃ samatikkamanti** sabbāsaṃ diṭṭhīnaṃ samatikkamanupāyaṃ diṭṭhijālaviniveṭhanaṃ. Sesāṃ vuttanayameva.

Cālātherīgāthāvaṇṇanā niṭṭhitā.

3. Upacālātherīgāthāvaṇṇanā

Satimatītiādikā upacālāya theriyā gāthā. Tassā vatthu cālāya theriyā vatthumhi vuttameva. Ayampi hi cālā viya pabbajitvā vipassanaṃ paṭṭhapetvā arahattaṃ patvā udānenti –

189. “Satimatī cakkhumatī, bhikkhunī bhāvitindriyā;
Paṭivijjhi padaṃ santaṃ, akāpurisasevita”nti. –

Imaṃ gāthaṃ abhāsi.

Tattha **satimatī**ti satisampannā, pubbhāge paramena satinepakkena samannāgatā hutvā pacchā ariyamaggassa bhāvitattā sativepullappattiyā uttamāya satiyā samannāgatāti attho. **Cakkhumatī** paññācakkhunā samannāgatā, ādito udayatthagāminiyā paññāya ariyāya nibbedhikāya samannāgatā hutvā paññāvepullappattiyā paramena paññācakkhunā samannāgatāti vuttaṃ hoti. **Akāpurisasevanti** alāmakapurisehi uttamapurisehi ariyehi buddhādīhi sevitaṃ.

“Kinu jātiṃ na rocesi”ti gāthā therim kāmesu upahāretukāmena mārena vuttā. “Kiṃ nu tvaṃ bhikkhuni na rocesi”ti (saṃ. ni. 1.167) hi mārena puṭṭhā therī āha – “jātiṃ khvāhaṃ, āvuso, na rocemī”ti. Atha naṃ māro jātassa kāmā paribhogā, tasmā jātipi icchitabbā, kāmāpi paribhuñjitabbāti dassento –

190. “Kinu jātiṃ na rocesi, jāto kāmāni bhuñjati;
Bhuñjāhi kāmāriyo, māhu pacchānutāpinī”ti. –

Gāthamāha.

Tassattho – kiṃ nu taṃ kāraṇaṃ, yena tvaṃ upacāle jātiṃ **na rocesi** na roceyyāsi, na taṃ kāraṇaṃ atthi. Yasmā **jāto kāmāni bhuñjati** idha jāto kāmāguṇasaṃhitāni rūpādīni paṭisevanto kāmasukhaṃ paribhuñjati. Na hi ajātassa taṃ atthi, tasmā **bhuñjāhi kāmāriyo** kāmākhidḍāriyo anubhava. **Māhu pacchānutāpinī** “yobbaññe sati vijjāmaṇesu bhogesu na mayā kāmasukhamanubhūta”nti pacchānutāpinī mā ahoṣi. Imasmiṃ loke dhammā nāma yāvadeva atthādhigamatto attho ca kāmasukhatthoti pākāṭoyamatthoti adhippāyo.

Taṃ sutvā therī jātiyā dukkhanimittataṃ attano ca tassa visayātikkamaṃ vibhāvetvā tajjentī –

191. “Jātassa maraṇaṃ hoti, hatthapādāna chedanāṃ;
Vadhabandhapariklesaṃ, jāto dukkhaṃ nigacchati.

192. “Atthi sakyakule jāto, sambuddho aparājito;
So me dhammadesesi, jātiyā samatikkamaṃ.
193. “Dukkhaṃ dukkhasamuppādaṃ, dukkhassa ca atikkamaṃ;
Ariyaṃ caṭṭhaṅgikaṃ maggaṃ, dukkhūpasamagāmiṃ.
194. “Tassāhaṃ vacanaṃ sutvā, viharim sāsane ratā;
Tisso vijjā anuppattā, kataṃ buddhassa sāsanaṃ.
195. “Sabbattha vihatā nandī, tamokkhandho padālito;
Evaṃ jānāhi pāpima, nihato tvamasi antakā”ti. –

Imā gāthā abhāsi.

Tattha **jātassa maraṇaṃ hotīti** yasmā jātassa sattassa maraṇaṃ hoti, na ajātassa. Na kevalaṃ maraṇameva, atha kho jarārogādayo yattakānatthā, sabbepi te jātassa honti jātihetukā. Tenāha bhagavā – “jātipaccayā jarāmarāṇaṃ sokaparidevadukkhadomanassupāyāsā sambhavanti”ti (mahāva. 1; vibha. 225; udā. 1). Tenevāha – “**hatthapādāna chedana**”nti hatthapādānaṃ chedanaṃ jātasseva hoti, na ajātassa. Hatthapādachedanāpadesena cettha bāttiṃsa kammakāraṇāpi dassitā evāti daṭṭhabbaṃ. Tenevāha – “**vadhabandhapariklesaṃ, jāto dukkhaṃ nigacchati**”ti. Jīvitaviyojanamuṭṭhippahārādīsāṅkhātaṃ vadhapariklesaṃ andubandhanādīsāṅkhātaṃ bandhapariklesaṃ aññaṅca yaṃkiñci dukkhaṃ nāma taṃ sabbaṃ jāto eva nigacchati, na ajāto, tasmā jātiṃ na rocemīti.

Idāni jātiyā kāmānaṅca accantameva attanā samatikkantabhāvaṃ mūlato paṭṭhāya dassenti – “**atthi sakyakule jāto**”tiādīmāha. Tattha **aparājitoti** kilesamārādīnā kenaci na parājito. Satthā hi sabbābhībhū sadevakaṃ lokaṃ aññadatthu abhibhavitvā ṭhito, tasmā aparājito. Sesāṃ vuttanayattā uttānameva.

Upacālātherīgāthāvaṇṇanā niṭṭhitā.

Sattakanipātavaṇṇanā niṭṭhitā.

8. Aṭṭhakanipāto

1. Sīsūpacālātherīgāthāvaṇṇanā

Aṭṭhakanipāte **bhikkhunī sīlasampannā**tiādīkā sīsūpacālāya theriyā gāthā. Imissāpi vatthu cālāya theriyā vatthumhi vuttanayameva. Ayampi hi āyasmato dhammasenāpatissa pabbajitabhāvaṃ sutvā sayampi ussāhajātā pabbajitvā katapubbakiccā vipassanaṃ paṭṭhapetvā, ghaṭenti vāyamaṇṭī nacirasseva arahattaṃ pāpuṇi. Arahattaṃ patvā phalasaṃpattisukhena viharanti ekadivasaṃ attano paṭipattiṃ paccavekkhitvā katakiccāti somanassajātā udānavasena –

196. “Bhikkhunī sīlasampannā, indriyesu saṃvutā;
Adhigacche padaṃ santaṃ, asecanakamojava”nti. – gāthamāha;

Tattha **sīlasampannā**ti parisuddhena bhikkhunīsīlena samannāgatā paripuṇṇā. **Indriyesu saṃvutā**ti manacchaṭṭhesu indriyesu suṭṭhu saṃvutā, rūpādīraṃmaṇe iṭṭhe rāgaṃ, aniṭṭhe dosaṃ, asaṃvekkhane mohaṅca pahāya suṭṭhu pihitindriyā. **Asecanakamojavanti** kenaci anāsittakaṃ ojavantaṃ sabhāvamadhuraṃ sabbassāpi kilesarogassa vūpasamanosadhabhūtaṃ ariyamaggaṃ, nibbānameva vā. Ariyamaggampi hi nibbānatthikehi paṭipajjitabbato kilesapariṭṭhābhāvato ca padaṃ

santanti vattum vaṭṭati.

197. “Tāvatiṃsā ca yāmā ca, tusitā cāpi devatā;
Nimmānaratino devā, ye devā vasavattino;
Tattha cittaṃ paṇīdhehi, yattha te vusitaṃ pure”ti. –

Ayaṃ gāthā kāmasaggesu nikantiṃ uppādehīti tattha uyyojanavasena theriṃ samāpattiyā cāvetukāmena mārena vuttā.

Tattha sahapuññakārino tettiṃsa janā yattha upapannā, taṃ thānaṃ tāvatiṃsanti. Tattha nibbattā sabbepe devaputtā **tāvatiṃsā**. Keci pana “tāvatiṃsāti tesam devānaṃ nāmamevā”ti vadanti. Dvīhi devalokehi visiṭṭhaṃ dibbaṃ sukhaṃ yātā upayātā sampannāti **yāmā**. Dibbāya sampattiyā tuṭṭhā pahaṭṭhāti **tusitā**. Pakatipaṭiyattārammaṇato atirekena ramitukāmatākāle yathārucite bhoge nimminivā ramantīti **nimmānaratino**. Cittaruciṃ ñatvā parehi nimmitesu bhogesu vasaṃ vattenti **vasavattino**. **Tattha cittaṃ paṇīdhehīti** tasmim tāvatiṃsādike devanikāye tava cittaṃ thapehi, upapajjanāya nikantiṃ karohi. Cātumahārājikānaṃ bhogā itarehi nihīnāti adhippāyena tāvatiṃsādayova vuttā. **Yattha te vusitaṃ pureti** yesu devanikāyesu tayā pubbe vutthaṃ. Ayaṃ kira pubbe devesu uppajjantī, tāvatiṃsato paṭṭhāya pañcakāmasagge sodhetvā puna heṭṭhato otarantī, tusitesu thatvā tato cavitvā idāni manussesu nibbattā.

Taṃ sutvā therī – “tiṭṭhatu, māra, tayā vuttakāmaloko. Aññopi sabbo loko rāgaggiādīhi āditto sampajjalito. Na tattha viññūnaṃ cittaṃ ramatī”ti kāmato ca lokato ca attano vinivattitamānasataṃ dassetvā māraṃ tajjentī –

198. Yāmā ca “tāvatiṃsā ca yāmā ca, tusitā cāpi devatā;
Nimmānaratino devā, ye devā vasavattino.
199. “Kālaṃ kālaṃ bhavā bhavaṃ, sakkāyasmim purakkhatā;
Avītivattā sakkāyaṃ, jātimaraṇasārino.
200. “Sabbo ādīpito loko, sabbo loko padīpito;
Sabbo pajjalito loko, sabbo loko pakampito.
201. “Akampiyaṃ atuliyāṃ, aputhujjanasevitaṃ;
Buddho dhammadesesi, tattha me nirato mano.
202. “Tassāhaṃ vacanaṃ sutvā, vihariṃ sāsane ratā;
Tisso vijjā anuppattā, kataṃ buddhassa sāsanaṃ.
203. “Sabbattha vihatā nandī, tamokkhandho padālito;
Evaṃ jānāhi pāpima, nihato tvamasi antakā”ti. –

Imā gāthā abhāsi.

Tattha **kālaṃ kālanti** taṃ taṃ kālaṃ. **Bhavā bhavanti** bhavato bhavaṃ. **Sakkāyasminti** khandhapañcake. **Purakkhatāti** purakkhārakārino. Idaṃ vuttaṃ hoti – māra, tayā vuttā tāvatiṃsādayo devā bhavato bhavaṃ upagacchantā aniccatādiānekādīnavākule sakkāye paṭiṭṭhitā, tasmā tasmim bhave uppattikāle, vemajjhakāle, pariyośanakāleti tasmim tasmim kāle sakkāyameva purakkhatvā thitā. Tato eva avītivattā sakkāyaṃ nissaraṇābhimukhā ahutvā sakkāyatīrameva anuparidhāvantaṃ jātimaraṇasārino rāgādīhi anugatattā punappunaṃ jātimaraṇameva anussaranti, tato na vimuccantīti.

Sabbo ādīpito lokoti, māra, na kevalaṃ tayā vuttakāmalokoyeva dhātuttayasaññito, sabbopi loko rāgaggiādīhi ekādasahi āditto. Tehiyeva punappunaṃ ādīpitātāya **padīpito**. Nirantaraṃ ekajālībhūtātāya **pajjalīto**. Taṇhāya sabbakilesehi ca ito cito ca kampaṭātāya calitātāya **pakampito**.

Evaṃ āditte pajjalite pakampite ca loke kenacipi kampaṭaṃ cāletuṃ asakkuṇeyyatāya **akampiyaṃ**, guṇato “ettako”ti tuletūṃ asakkuṇeyyatāya attanā sadisassa abhāvato ca **atulyiyaṃ**. Buddhādīhi ariyehi eva gocarabhāvanābhigamato sevitattā **aputhujjanasevitaṃ**. **Buddho** bhagavā maggaphalanibbānappabhedāṃ navavidhaṃ lokuttaradhammaṃ mahākaruṇāya sañcoditamānaso **adesesi** sadevakassa lokassa kathesi pavedesi. **Tattha** tasmaṃ ariyadhamme mayhaṃ mano **nirato** abhirato, na tato vinivattatīti attho. Sesāṃ heṭṭhā vuttanayameva.

Sīsūpacālātherīgāthāvaṇṇanā niṭṭhitā.

Aṭṭhakanipātavaṇṇanā niṭṭhitā.

9. Navakanipāto

1. Vaḍḍhamātutherīgāthāvaṇṇanā

Navakanipāte **mā su te vaḍḍha lokamhī**tiādikā vaḍḍhamātāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī, anukkamena sambhatavimokkhasambhārā hutvā imasmiṃ buddhuppāde bhārukacchakanagare kulagehe nibbattivā vayappattā patikulaṃ gatā ekaṃ puttaṃ vijāyī. Tassa **vaḍḍhoti** nāmaṃ ahoṣi. Tato paṭṭhāya sā **vaḍḍhamātā**ti voharīyittha. Sā bhikkhūnaṃ santike dhammaṃ sutvā paṭiladdhasaddhā puttaṃ ñātīnaṃ niyyādetvā bhikkhunupassayaṃ gantvā pabbajī. Ito paraṃ yaṃ vattabbaṃ, taṃ vaḍḍhattherassa vatthumhi (theragā. aṭṭha. 2.vaḍḍhattheragāthāvaṇṇanā) āgatameva. Vaḍḍhattheraṅhi attano puttaṃ santaruttaraṃ ekakaṃ bhikkhunupassaye attano dassanattāya upagataṃ ayaṃ therī “kasmā tvam ekako santaruttarova idhāgato”ti codetvā ovaḍantī –

204. “Mā su te vaḍḍha lokamhi, vanatho ahu kudācanaṃ;
Mā puttaka punappunaṃ, ahu dukkhassa bhāgimā.

205. “Sukhaṅhi vaḍḍha munayo, anejā chinnasaṃsayā;
Sītībhūtā damappattā, viharanti anāsavā.

206. “Tehānucinnaṃ isīhi, maggaṃ dassanapattiyā;
Dukkhassantakiriyāya, tvam vaḍḍha anubrūhayā”ti. –

Imā tisso gāthā abhāsi.

Tattha **mā su te vaḍḍha lokamhi, vanatho ahu kudācananti sūti** nipātamattaṃ. Vaḍḍha, puttaka, sabbasmimpi sattaloke, saṅkhāraloke ca kilesavanatho tuyhaṃ kadācīpi mā ahu mā ahoṣi. Tattha kāraṇamāha – “**mā, puttaka, punappunaṃ, ahu dukkhassa bhāgimā**”ti vanathaṃ anucchindanto taṃ nimittassa punappunaṃ aparāparaṃ jātiādidukkhassa bhāgī mā ahoṣi.

Evaṃ vanathassa asamucchede ādīnavaṃ dassetvā idāni samucchede ānisaṃsaṃ dassentī “**sukhaṅhi vaḍḍhā**”tiādīmāha. Tassattho – puttaka, **vaḍḍha** moneyyadhammasamannāgatena **munayo**, ejāsaṅkhātāya taṇhāya abhāvena **anejā**, dassanamaggeneva pahīnavicikicchātāya **chinnasaṃsayā**, sabbakilesaparīlābhābhāvena **sītībhūtā**, uttamassa damathassa adhigatattā **damappattā anāsavā** khīṇāsavā sukhaṃ viharanti, na tesāṃ etarāhi cetodukkaṃ atthi, āyatim paṇa sabbampi dukkaṃ na

bhavissateva.

Yasmā cetevaṃ, tasmā **tehānuciṇṇaṃ isihi...pe... anubrūhayāti** tehi khīṇāsavehi isihi anuciṇṇaṃ paṭipannaṃ samathavipassanāmaggaṃ ñāṇadassanassa adhigamāya sakalassāpi vaṭṭadukkhassa antakiriyaṃ vaḍḍha, tvaṃ anubrūhaya vaḍḍheyyāsīti.

Taṃ sutvā vaḍḍhatthero “addhā mama mātā arahatte paṭiṭṭhitā” ti cintetvā tamatthaṃ pavedento –

207. “Visāradāva bhaṇasi, etamatthaṃ janetti me;
Maññāmi nūna māmike, vanatho te na vijjatī” ti. – gāthamāha;

Tattha **visāradāva bhaṇasi, etamatthaṃ janetti meti** “mā su te vaḍḍha lokamhi, vanatho ahu kudācana” nti etamatthaṃ etaṃ ovādaṃ, amma, vigatasārajjā katthaci alaggā anallīnāva hutvā mayhaṃ vadasi. Tasmā **maññāmi nūna māmike, vanatho te na vijjatīti**, nūna **māmike** mayhaṃ, amma, gehasitapemamattopi **vanatho** tuyhaṃ mayi na vijjatīti maññāmi, na māmikāti attho.

Taṃ sutvā therī “aṇumattopi kilesa katthacipi visaye mama na vijjatī” ti vatvā attano katakiccatāṃ pakāsentī –

208. “Ye keci vaḍḍha saṅkhārā, hīnā ukkaṭṭhamajjhimā;
Aṇūpi aṇumattopi, vanatho me na vijjati.

209. “Sabbe me āsavā khīṇā, appamattassa jhāyato;
Tisso vijjā anuppattā, kataṃ buddhassa sāsana” nti. –

Imaṃ gāthādvayamāha.

Tattha **ye kecīti** aniyamavacanaṃ. **Saṅkhārāti** saṅkhatadhammā. **Hīnāti** lāmakā patikuṭṭhā. **Ukkaṭṭhamajjhimāti** paṇītā ceva majjhimā ca. Tesu vā asaṅkhatā hīnā jātisāṅkhatā ukkaṭṭhā, ubhayavimissitā majjhimā. Hīnehi vā chandādīhi nibbattitā hīnā, majjhimehi majjhimā, paṇītehi ukkaṭṭhā. Akusalā dhammā vā hīnā, lokuttarā dhammā ukkaṭṭhā, itarā majjhimā. **Aṇūpi aṇumattopīti** na kevalaṃ tayi eva, atha kho ye keci hīnādibhedabhinnā saṅkhārā. Tesu sabbesu aṇūpi aṇumattopi atiparittakopi vanatho mayhaṃ na vijjati.

Tattha kāraṇamāha – “**sabbe me āsavā khīṇā, appamattassa jhāyato**” ti. Tattha **appamattassa jhāyatoti** appamattāya jhāyantiyā, līngavipallāsena hetuṃ vuttaṃ. Ettha ca yasmā tisso vijjā anuppattā, tasmā kataṃ buddhassa sāsanaṃ. Yasmā appamattā jhāyini, tasmā sabbe me āsavā khīṇā, aṇūpi aṇumattopi vanatho me na vijjatīti yojanā.

Evaṃ vuttaovādaṃ aṅkusaṃ katvā sañjātasamvego thero vihāraṃ gantvā divāṭṭhāne nisinnō vipassanaṃ vaḍḍhetvā arahattaṃ patvā attano paṭipattiṃ paccavekkhitvā sañjātasomanasso mātu santikaṃ gantvā aññaṃ byākaronto –

210. “Uḷāraṃ vata me mātā, patodaṃ samavassari;
Paramatthasañhitā gāthā, yathāpi anukampikā.

211. “Tassāhaṃ vacanaṃ sutvā, anusitṭhiṃ janettiyā;
Dhammasamvegamaṇḍapādiṃ, yogakkhemassa pattiyā.

212. “Sohaṃ padhānapahitatto, rattindivamatandito;
Mātarā codito sante, aphaṣiṃ santimuttama” nti. –

Imā tisso gāthā abhāsi.

Atha therī attano vacanaṃ aṅkusaṃ katvā puttassa arahattappattiyā ārādhitacittā tena bhāsitagāthā sayamaṃ paccanubhāsi. Evaṃ tāpi theriyā gāthā nāma jātā.

Tattha **uḷāranti** vipulaṃ mahantaṃ. **Patodanti** ovādapatodaṃ. **Samavassarīti** sammā pavattesi vatāti yojanā. Ko pana so patodoti āha “**paramatthasañhitā gāthā**”ti. Taṃ “mā su te, vaḍḍha, lokamhī”tiādikā gāthā sandhāya vadati. **Yathāpi anukampikāti** yathā aññāpi anuggāhikā, evaṃ mayhaṃ mātā pavattinivattivibhāvanagāthāsāṅkhātaṃ uḷāraṃ patodaṃ pājanadaṇḍakaṃ mama ñāṇavegasamuttejaṃ pavattesīti attho.

Dhammasaṃvegamāpādinti ñāṇabhayāvahattā ativiya mahantaṃ bhimsanaṃ saṃvegaṃ āpajjīṃ.

Padhānapahitattoti catubbidhasammappadhānayogena dībbaṃ paṭipesitacitto. **Aphusiṃ santimuttamanti** anuttaraṃ santiṃ nibbānaṃ phusiṃ adhigacchinti attho.

Vaḍḍhamātutherīgāthāvaṇṇanā niṭṭhitā.

Navakanipātavaṇṇanā niṭṭhitā.

10. Ekādasakanipāto

1. Kisāgotamītherīgāthāvaṇṇanā

Ekādasakanipāte **kalyāṇamittatāti**ādikā kisāgotamiyā theriyā gāthā. Ayaṃ kira padumuttarassa bhagavato kāle haṃsavatīnagare kulagehe nibbattitvā viññutaṃ patvā ekadivasaṃ satthu santike dhammaṃ suṇantī satthāraṃ ekaṃ bhikkhuniṃ lūkhacīvaradhārīnaṃ aggaṭṭhāne ṭhapentaṃ disvā adhiḅkārakammaṃ katvā taṃ ṭhānantaraṃ patthesi. Sā kappasatasahassaṃ devamanussesu saṃsarantī imasmiṃ buddhuppāde sāvattiyaṃ duggatakule nibbatti. **Gotamī**tissā nāmaṃ ahosi. Kisasarīratāya pana “kisāgotamī”ti voharīyittha. Taṃ patikulaṃ gataṃ duggatakulassa dhītāti paribhaviṃsu. Sā ekaṃ puttaṃ vijāyi. Puttalābhena cassā sammānaṃ akaṃsu. So panassā putto ādhāvitvā paridhāvitvā kiḷānakāle kālamakāsi. Tenassā sokummādo uppajji.

Sā “ahaṃ pubbe paribhavapattā hutvā puttassa jātakā lato paṭṭhāya sakkāraṃ pāpuṇiṃ, ime mayhaṃ puttaṃ bahi chaḍḍetumpi vāyamanti”ti sokummādavaseṇa matakāḷevaraṃ ankenādāya “puttassa me bhesajjaṃ dethā”ti gehadvārapaṭipāṭiyā nagare vicarati. Manussā “bhesajjaṃ kuto”ti paribhāsanti. Sā tesamaṃ kathaṃ na gaṇhāti. Atha naṃ eko paṇḍitapuriso “ayaṃ puttasaḅkena cittavikkhepaṃ pattā, etissā bhesajjaṃ dasabaloyeva jānissatī”ti cintetvā, “amma, tava puttassa bhesajjaṃ sammāsambuddhaṃ upasaṅkamitvā pucchā”ti āha. Sā satthu dhammadesanāvelāyaṃ vihāraṃ gantvā “puttassa me bhesajjaṃ detha bhagavā”ti āha. Satthā tassā upanissayaṃ disvā “gaccha nagaraṃ pavisitvā yasmiṃ gehe koci matapubbo natthi, tato siddhatthakaṃ āharā”ti āha. Sā “sādhu, bhante”ti tuṭṭhamānasā nagaraṃ pavisitvā paṭṭhamegeheyaṃ “satthā mama puttassa bhesajjathāya siddhatthakaṃ āharāpeti. Sace etasmiṃ gehe koci matapubbo natthi, siddhatthakaṃ me dethā”ti āha. Ko idha mate gaṇetuṃ sakkotīti. Kiṃ tena hi alaṃ siddhatthakehīti dutiyaṃ tatiyaṃ gharaṃ gantvā buddhānubhāvena vigatumādaṃ pakaticitte ṭhitā cintesi – “sakalanagare ayameva niyamo bhavissati, idaṃ hitānukampinā bhagavatā diṭṭhaṃ bhavissati”ti saṃvegaṃ labhitvā tatova bahi nikkhamitvā puttaṃ āmakasūṇe chaḍḍetvā imaṃ gāthamāha –

“Na gāmadhammo nigamassa dhammo, na cāpiyaṃ ekakulassa dhammo;
Sabbassa lokassa sadevakassa, eseṇa dhammo yadidaṃ aniccatā”ti. (apa. therī 2.3.82);

Evañca pana vatvā satthu santikaṃ agamāsi. Atha naṃ satthā “laddho te, gotami, siddhatthako”’ti āha. “Nīṭṭhitam, bhante, siddhatthakena kammaṃ, patiṭṭhā pana me hothā”’ti āha. Athassā satthā –

“Taṃ puttapasusammattaṃ, byāsattamanasaṃ naraṃ;
Suttaṃ gāmaṃ mahoghova, maccu ādāya gacchatī”’ti. (dha. pa. 287) –

Gāthamāha.

Gāthāpariyosāne yathāṭṭhitāva sotāpattiphale patiṭṭhāya satthāraṃ pabbajjaṃ yāci. Satthā pabbajjaṃ anujāni. Sā satthāraṃ tikkhattuṃ padakkhiṇaṃ katvā vanditvā bhikkhunupassayaṃ gantvā pabbajitvā upasampadaṃ labhitvā nacirasseva yonisomanasikārena kammaṃ karontī vipassanaṃ vaḍḍhesi. Athassā satthā –

“Yo ca vassasataṃ jīve, apassaṃ amataṃ padaṃ;
Ekāhaṃ jīvitaṃ seyyo, passato amataṃ pada”’nti. (dha. pa. 114) –

Imaṃ obhāsagāthamāha.

Sā gāthāpariyosāne arahattaṃ pāpuṇitvā parikkhāvalaṅṅe paramukkaṭṭhā hutvā tīhi lūkhehi samannāgataṃ cīvaraṃ pārupitvā vicari. Atha naṃ satthā jetavane nisinno bhikkhuniyo paṭipāṭiyā ṭhānantare ṭhapento lūkhacīvaradhārīnaṃ aggaṭṭhāne ṭhapesi. Sā attano paṭipattiṃ paccavekkhitvā “satthāraṃ nissāya mayā ayaṃ viseso laddho”’ti kalyāṇamittatāya pasamsā mukhena imā gāthā abhāsi –

213. “Kalyāṇamittatā muninā, lokaṃ ādissa vaṇṇitā;
Kalyāṇamitte bhajamāno, api bālo paṇḍito assa.
214. “Bhajitabbā sappurisā, paññā tathā vaḍḍhati bhajantānaṃ;
Bhajamāno sappurise, sabbehipi dukkhehi pamucceyya.
215. “Dukkhañca vijāneyya, dukkhassa ca samudayaṃ nirodhaṃ;
Aṭṭhaṅgikañca maggaṃ, cattāripi ariyasaccāni.
216. “Dukkho itthibhāvo, akkhāto purisadammasārathinā;
Sapattikampi hi dukkhaṃ, appekaccā sakiṃ vijātāyo.
217. “Galake api kantanti, sukhumāliniyo visāni khādanti;
Janamārakamajjhagatā, ubhopi byasanāni anubhonti.
218. “Upavijaññā gacchantī, addasāhaṃ patiṃ mataṃ;
Panthamhi vijāyitvāna, appattāva sakaṃ gharaṃ.
219. “Dve puttā kālakatā, patī ca panthe mato kapaṇikāya;
Mātā pitā ca bhātā, ḍayhanti ca ekacitakāyaṃ.
220. “Khīṇakulīne kapaṇe, anubhūtaṃ te dukhaṃ aparimāṇaṃ;
Assū ca te pavattaṃ, bahūni ca jātisahassāni.
221. “Vasitā susānamajjhe, athopi khādītāni puttamaṃsāni;
Hatakulikā sabbagarahitā, matapatikā amatamadhigacchiṃ.
222. “Bhāvito me maggo, ariyo aṭṭhaṅgiko amatagāmī;

Nibbānaṃ sacchikataṃ, dhammādāsaṃ avekkhiṃhaṃ.

223. “Ahamamhi kantasallā, ohitabhārā katañhi karaṇīyaṃ;
Kisāgotamī therī, vimuttacittā imaṃ bhaṇī”ti.

Tattha **kalyāṇamittatā**ti kalyāṇo bhaddo sundaro mitto etassāti kalyāṇamitto. Yo yassa sīlādiḡuṇasamādapetā, aghassa ghātā, hitassa vidhātā, evaṃ sabbākārena upakāro mitto hoti, so puggalo kalyāṇamitto, tassa bhāvo kalyāṇamittatā, kalyāṇamittavantatā. **Muninā**ti sathhārā. **Lokaṃ ādissa vaṇṇitā**ti kalyāṇamitte anugantabbanti sattalokaṃ uddissa –

“Sakalamevidaṃ, ānanda, brahmacariyaṃ yadidaṃ kalyāṇamittatā kalyāṇasahāyatā kalyāṇasampavaṅkatā” (saṃ. ni. 5.2). “Kalyāṇamittassetam, meghiya, bhikkhuno pāṭikaṅkhaṃ kalyāṇasahāyassa kalyāṇasampavaṅkassa yaṃ sīlavā bhavissati pātimokkhasaṃvarasaṃvuto viharissati”ti (udā. 31) ca evamādinā pasasṃsitā.

Kalyāṇamitte bhajamānotiādi kalyāṇamittatāya ānisaṃsadassanaṃ. Tattha **api bālo paṇḍito assā**ti kalyāṇamitte bhajamāno puggalo pubbe sutādivirahena bālopi samāno assutasavanādinā paṇḍito bhaveyya.

Bhajitabbā sappurisāti bālassāpi paṇḍitabhāvahetuto buddhādayo sappurisā kālena kālaṃ upasaṅkamanādinā sevītabbā. **Paññā tathā pavaḍḍhati bhajantā**nanti kalyāṇamitte bhajantānaṃ tathā paññā vaḍḍhati brūhati pāripūriṃ gacchati. Yathā tesu yo koci khattiyādiko bhajamāno sappurise sabbehipi jātiādidukkhehi pamucceyyāti yojanā.

Muccanavidhiṃ pana kalyāṇamittavidhinā dassetuṃ “**dukkhaṅca vijāneyyā**”tiādi vuttaṃ. Tattha **cattāri ariyasaccānī**ti dukkhaṅca dukkhasamudayaṅca nirodhaṅca aṭṭhaṅgikaṃ maggaṅcāti imāni cattāri ariyasaccāni **vijāneyya** paṭivijjheyāti yojanā.

“**Dukkho itthibhāvo**”tiādikā dve gāthā aññatarāya yakkhiniyā itthibhāvaṃ garahantiyā bhāsītā. Tattha **dukkho itthibhāvo akkhātō**ti capalatā, gabbhadhāraṇaṃ, sabbakālaṃ parapaṭibaddhavuttitāti evamādihi ādinavehi itthibhāvo dukkhoti, **purisadammasārathinā** bhagavatā kathito. **Sapattikampi dukkhanti** sapattavāso sapattiyā saddhiṃ saṃvāsopi dukkho, ayampi itthibhāve ādinavoti adhippāyo. **Appekaccā sakim vijātāyoti** ekaccā itthiyo ekavārameva vijātā, paṭhamagabbhe vijāyanadukkhāṃ asahantiyo. **Galake api kantantī**ti attano gīvampi chindanti. **Sukhumāliniyo visāni khānantī**ti sukhumālasarīrā attano sukhumālabhāvena khedaṃ avisahantiyo visānīpi khānantī. **Janamārakamajjhagatā**ti janamārako vuccati mūḷhagabbho. Mātugāmajanassa mārako, majjhagatā janamārakā kucchigatā, mūḷhagabbhāti attho. **Ubhopi byasanāni anubhontī**ti gabbho gabbhinī cāti dvepi janā maraṇāṅca mārānantikabyasanāni ca pāpuṇanti. Apare pana bhaṇanti “janamārakā nāma kilesā, tesāṃ majjhagatā kilesasantānapatitā ubhopi jāyāpatikā idha kilesapariḷāhavasena, āyatim duggatiparikkilesavasena byasanāni pāpuṇanti”ti. Imā kira dve gāthā sā yakkhini purimattabhāve attano anubhūtaḍḍakhaṃ anussarivā āha. Therī pana itthibhāve ādinavavibhāvanāya paccanubhāsanti avoca.

“**Upavijaññā gacchantī**”tiādikā dve gāthā paṭācārāya theriyā pavattim ārabba bhāsītā. Tattha **upavijaññā gacchantī**ti upagatavijāyanakālā maggaṃ gacchantī, apattāva sakaṃ gehaṃ panthe vijāyitvāna patim matam addasaṃ ahanti yojanā.

Kapaṇikāyāti varākāya. Imā kira dve gāthā paṭācārāya tadā sokummādapattāya vuttākārassa anukaraṇavasena itthibhāve ādinavavibhāvanatthameva theriyā vuttā.

Ubhayampetaṃ udāharaṇabhāvena ānetvā idāni attano anubhūtaṃ dukkhaṃ vibhāventī “**khīṇakuline**”tiādimāha. Tattha **khīṇakulineti** bhogādīhi pārijuñṇapattakulike. **Kapaṇeti**

paramaavaññātaṃ patte. Ubhayañcetaṃ attano eva āmantanavacanaṃ. **Anubhūtaṃ te dukhaṃ aparimāṇanti** imasmiṃ attabhāve, ito purimattabhāvesu vā anappakaṃ dukkhaṃ tayā anubhavitaṃ. Idāni taṃ dukkhaṃ ekadesena vibhajitvā dassetaṃ “**assū ca te pavatta**”**ntiādi vuttaṃ**. Tassattho – imasmiṃ anamatagge saṃsāre paribbhamantiyā bahukāni jātisahassāni sokābhībhūtāya assu ca pavattaṃ, avisesitaṃ katvā vuttañcetaṃ, mahāsamuddassa udakatopi bahukameva siyā.

Vasitā susānamajjheti manussamaṃsakhādikā sunakhī siṅgālī ca hutvā susānamajjhe vusitā. **Khāditāni puttamaṃsānīti** byagghadīpibīlārādikāle puttamaṃsāni khāditāni. **Hatakulikāti** vinaṭṭhakulavaṃsā. **Sabbagarahitāti** sabbehi gharavāsīhi garahitā garahappattā. **Matapatikāti** vidhavā. Ime pana tayo pakāre purimattabhāve attano anuppatte gahetvā vadati. Evaṃbhūtāpi hutvā adhicca laddhāya kalyāṇamittasevāya **amatamadhigacchi**, nibbānaṃ anuppattā.

Idāni tameva amatādhigamaṃ pākaṇaṃ katvā dassetaṃ “**bhāvito**”**tiādi vuttaṃ**. Tattha **bhāvito** vibhāvito uppādito vaḍḍhito bhāvanābhisamayavasena paṭividdho. **Dhammādāsaṃ avekkhīhanti** dhammamayaṃ ādāsaṃ addakkhiṃ apassiṃ ahaṃ.

Ahamamhi kantasallāti ariyamaggena samucchinnagārādisallā ahaṃ amhi. **Ohitabhārāti** oropitakāmakhandhakilesābhisankhārābhārā. **Katañhi karaṇīyanti** pariññādībhedaṃ soḷasavidhampi kiccaṃ kataṃ pariyoṣitaṃ. **Suvimuttacittā imaṃ bhaṇīti** sabbaso vimuttacittā kisāgotamī therī imamatthaṃ “kalyāṇamittatā”**tiādinā gāthābandhavasena abhaṇīti attānaṃ paraṃ viya therī vadati**. Tatridaṃ imissā theriyā **apadānaṃ** (apa. therī 2.3.55-94) –

“Padumuttaro nāma jino, sabbadhammāna pārāgū;
Ito satasahassamhi, kappe uppajji nāyako.

“Tadāhaṃ haṃsavatiyaṃ, jātā aññatare kule;
Upetvā taṃ naravaraṃ, saraṇaṃ samupāgamiṃ.

“Dhammañca tassa assosiṃ, catusaccūpasañhitāṃ;
Madhuraṃ paramassādaṃ, vaṭṭasantisukhāvahaṃ.

“Tadā ca bhikkhuniṃ vīro, lūkhacīvaradhāriniṃ;
Ṭhapento etadaggamhi, vaṇṇayī purisuttamo.

“Janetvānappakaṃ pītiṃ, sutvā bhikkhuniyā guṇe;
Kāraṃ katvāna buddhassa, yathāsatti yathābalaṃ.

“Nipacca munivaraṃ taṃ, taṃ ṭhānamabhipatthayim;
Tadānumodi sambuddho, ṭhānalābhāya nāyako.

“Satasahassito kappe, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādā, orasā dhammanimmitā;
Kisāgotamī nāmena, hessasi satthu sāvikā.

“Taṃ sutvā muditā hutvā, yāvajīvaṃ tadā jinam;
Mettacittā paricarim, paccayehi vināyakaṃ.

“Tena kammena sukatenā, cetanāpaṇidhīhi ca;

Jahitvā mānusaṃ dehaṃ, tāvatimsamagacchahaṃ.

“Imamhi bhaddake kappe, brahmabandhu mahāyaso;
Kassapo nāma gottena, uppajji vadataṃ varo.

“Upaṭṭhāko mahesissa, tadā āsi narissaro;
Kāsirājā kikī nāma, bārāṇasipuruttame.

“Pañcamī tassa dhītāsiṃ, dhammā nāmena vissutā;
Dhammaṃ sutvā jinaggassa, pabbajjaṃ samarocayaṃ.

“Anujāni na no tāto, agāreva tadā mayaṃ;
Vīsavassasahassāni, vicarimha atanditā.

“Komāribrahmacariyaṃ, rājakaññā sukhedhitā;
Buddhopaṭṭhānaniratā, muditā satta dhītarō.

“Samaṇī samaṇaguttā ca, bhikkhunī bhikkhudāyikā;
Dhammā ceva sudhammā ca, sattamī saṅghadāyikā.

“Khemā uppalavaṇṇā ca, paṭācārā ca kuṇḍalā;
Ahañca dhammadinnā ca, visākhā hoti sattamī.

“Tehi kammehi sukatehi, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Pacchime ca bhava dāni, jātā seṭṭhikule ahaṃ;
Duggate adhane naṭṭhe, gatā ca sadhanaṃ kulaṃ.

“Patim ṭhapetvā sesā me, dessanti adhanā iti;
Yadā ca passūtā āsiṃ, sabbesaṃ dayitā tadā.

“Yadā so taruṇo bhaddo, komalako sukhedhito;
Sapāṇamiva kanto me, tadā yamavaṣaṃ gato.

“Sokaṭṭādīnavadanā, assunettā rudammukhā;
Mataṃ kuṇapamādāya, vilapantī gamāmahaṃ.

“Tadā ekena sandiṭṭhā, upetvābhisakkuttamaṃ;
Avocaṃ dehi bhesajjaṃ, puttasañjīvananti bho.

“Na vijjante matā yasmiṃ, gehe siddhatthakaṃ tato;
Āharāti jino āha, vinayopāyakovido.

“Tadā gamitvā sāvatthim, na labhim tādisaṃ gharaṃ;
Kuto siddhatthakaṃ tasmā, tato laddhā satim ahaṃ.

“Kuṇapaṃ chaḍḍayitvāna, upesiṃ lokanāyakaṃ;
Dūratova mamaṃ disvā, avoca madhurassaro.

“Yo ca vassasataṃ jīve, apassaṃ udayabbayaṃ;
Ekāhaṃ jīvitaṃ seyyo, passato udayabbayaṃ.

“Na gāmadhammo nigamassa dhammo, na cāpiyaṃ ekakulassa dhammo;
Sabbassa lokassa sadevakassa, eseva dhammo yadidaṃ aniccatā.

“Sāhaṃ sutvānimā gāthā, dhammacakkhuṃ visodhayiṃ;
Tato viññātasaddhammā, pabbajiṃ anagāriyaṃ.

“Tathā pabbajitā santī, yuñjantī jinasāsane;
Na cireneva kālena, arahattamaṃ pāpuṇiṃ.

“Iddhīsu ca vasī homi, dibbāya sotadhātuyā;
Paracittāni jānāmi, satthusāsanakārikā.

“Pubbenivāsaṃ jānāmi, dibbacakkhu visodhitāṃ;
Khepetvā āsave sabbe, visuddhāsiṃ sunimmaḷā.

“Paricīṇṇo mayā satthā, kataṃ buddhassa sāsanaṃ;
Ohito garuko bhāro, bhavanetti samūhatā.

“Yassatthāya pabbajitā, agārasmānagāriyaṃ;
So me attho anupatto, sabbasaṃyojanakkhayo.

“Atthadhammaniruttīsu, paṭibhāne tatheva ca;
Ñāṇaṃ me vimalaṃ suddhaṃ, buddhaseṭṭhassa vāhasā.

“Saṅkarakūṭā āhitvā, susānā rathiyāpi ca;
Tato saṅghāṭikaṃ katvā, lūkhaṃ dhāremi cīvaram.

“Jino tasmaṃ guṇe tuṭṭho, lūkhacīvaradhāraṇe;
Ṭhapesi etadaggamhi, parisāsu vināyako.

“Kilesā jhāpitā mayhaṃ...pe... kataṃ buddhassa sāsana’nti.

Kisāgotamītherīgāthāvaṇṇanā niṭṭhitā.

Ekādasanipātavaṇṇanā niṭṭhitā.

11. Dvādasakanipāto

1. Uppalavaṇṇātherīgāthāvaṇṇanā

Dvādasakanipāte **ubho mātā ca dhītā cāti**ādikā uppalavaṇṇāya theriyā gāthā. Ayampi padumuttarassa bhagavato kāle haṃsavatīnagare kulagehe nibbattitvā viññutaṃ patvā, mahājanena saddhiṃ satthu santikaṃ gantvā, dhammaṃ suṇantī satthāraṃ ekaṃ bhikkhuniṃ iddhimantānaṃ aggaṭṭhāne ṭhapentaṃ disvā sattāhaṃ buddhappamukhassa bhikkhusaṅghassa mahādānaṃ datvā taṃ ṭhānantaraṃ patthesi. Sā yāvajīvaṃ kusalaṃ katvā devamanussesuṃ saṃsantī kassapabuddhakāle bārāṇasinagare kikissa kāsirañño gehe paṭisandhiṃ gahetvā sattannaṃ bhaginīnaṃ abbhantarā hutvā vīsativassasahassāni brahmacariyaṃ caritvā bhikkhusaṅghassa pariveṇaṃ katvā devaloke nibbattā.

Tato cavitvā puna manussalokaṃ āgacchantī ekasmiṃ gāmake sahatthā kammaṃ katvā jīvanakatthāne nibbattā. Sā ekadivasam khettauṃ gacchantī antarāmagge ekasmiṃ sare pātova pupphitaṃ padumapupphaṃ disvā taṃ saram oruha tañceva pupphaṃ lājapakkipanattāya paduminipattañca gahetvā kedāre sālisīsāni chinditvā kuṭikāya nisinnā lāje bhajjivā pañca lājasatāni katvā ṭhapesi. Tasmim khāne gandhamādanapabbate nirodhasamāpattito vuṭṭhito eko paccekabuddho āgantvā tassā avidūre ṭhāne aṭṭhāsi. Sā paccekabuddham disvā lājehi saddhim padumapupphaṃ gahetvā, kuṭito oruha lāje paccekabuddhassa patte pakkhipitvā padumapupphena pattam pidhāya adāsi. Athassā paccekabuddhe thokaṃ gate etadahosi – “pabbajitā nāma pupphena anattikā, aham pupphaṃ gahetvā piḷandhissāmī”ti gantvā paccekabuddhassa hatthato pupphaṃ gahetvā puna cintesi – “sace, ayyo, pupphena anattiko abhavissā, pattamatthake ṭhapetuṃ nādassa, addhā ayyassa attho bhavissatī”ti puna gantvā pattamatthake ṭhapetvā paccekabuddham khamāpetvā, “bhante, imesam me lājānam nissandena lājaganāyā puttā assu, padumapupphassa nissandena nibbattanibbattaṭṭhāne pade pade padumapupphaṃ uṭṭhahatū”ti patthanam akāsi. Paccekabuddho tassā passantiyāva ākāsenā gandhamādanapabbataṃ gantvā taṃ padumam nandamūlakapabbhāre paccekabuddhānam akkamanasopānasamīpe pādapuñchanam katvā ṭhapesi.

Sāpi tassa kamma nissandena devaloke paṭisandhim gaṇhi. Nibbattakālato paṭṭhāya cassā pade pade mahāpadumapupphaṃ uṭṭhāsi. Sā tato cavitvā pabbatapāde ekasmiṃ padumasare padumagabbhe nibbatti. Taṃ nissāya eko tāpaso vasati. So pātova mukhadhovanattāya saram gantvā taṃ pupphaṃ disvā cintesi – “idaṃ pupphaṃ sesehi mahantataram, sesāni ca pupphitāni idaṃ makulitameva, bhavitabbamettha kāraṇenā”ti udakam otarivā taṃ pupphaṃ gaṇhi. Taṃ tena gahitamattameva pupphitaṃ. Tāpaso antopadumagabbhe nipannadārikam addasa. Diṭṭhakālato paṭṭhāya ca dhītusineham labhitvā padumeneva saddhim paṇṇasālam netvā mañcake nipajjāpesi. Athassā puññānubhāvena aṅguṭṭhake khīram nibbatti. So tasmim pupphe milāte aññam navam pupphaṃ āharitvā taṃ nipajjāpesi. Athassā ādhāvanavidhāvanena kīlītuṃ samattakālato paṭṭhāya padavāre padavāre padumapupphaṃ uṭṭhāti, kuṅkumarāsissa viya assā sarīraṇṇo hoti. Sā apattā devavaṇṇam, atikkantā mānusavaṇṇam ahoṣi. Sā pitari phalāphalattāya gate paṇṇasālāyam ohiyati.

Athekadivasam tassā vayappattakāle pitari phalāphalattāya gate eko vanacarako taṃ disvā cintesi – “manussānam nāma evaṃvidham rūpaṃ natthi, vīmaṃsissāmi na”nti tāpasassa āgamanam udikkhanto nisīdi. Sā pitari āgacchante paṭipatham gantvā tassa hatthato kājakamaṇḍalum aggahesi, āgantvā nisinnassa cassa attano karaṇavattam dassesi. Tadā so vanacarako manussabhāvam ṇitvā tāpasam abhivādetvā nisīdi. Tāpaso taṃ vanacarakam vanamūlaphalehi ca pānīyena ca nimantetvā, “bho purisa, imasmimyeva ṭhāne vasissasi, udāhu gamissasī”ti pucchi. “Gamissāmi, bhante, idha kiṃ karissāmī”ti? “Idam tayā diṭṭhakarāṇam etto gantvā akathetuṃ sakkhissasī”ti? “Sace, ayyo, na icchati, kiṃkāraṇā kathessāmī”ti tāpasam vanditvā puna āgamanakāle maggasañjānanattam sākhasaññañca rukkhasaññañca karonto pakkāmi.

So bārānasim gantvā rājānam addasa. Rājā “kasmā āgatosī”ti pucchi. “Aham, deva, tumhākam vanacarako pabbatapāde acchariyam itthiratanam disvā āgatomhī”ti sabbam pavattim kathesi. So tassa vacanam sutvā vegena pabbatapādam gantvā avidūre ṭhāne khandhāvāram nivāsetvā vanacarakena ceva aññehi ca purisehi saddhim tāpasassa bhattakiccam katvā nisinnavelāya tattha gantvā abhivādetvā paṭisanthāram katvā ekamantam nisīdi. Rājā tāpasassa pabbajitaparikkhārabhaṇḍam pādāmūle ṭhapetvā, “bhante, imasmim ṭhāne kiṃ karoma, gamissāmā”ti āha. “Gaccha, mahārājā”ti. “Āma, gacchāmi, bhante, ayyassa pana samīpe visabhāgaparīsā atthī”ti assumhā, asārūppā esā pabbajitānam, mayā saddhim gacchatu, bhanteti. Manussānam nāma cittam duttosayam, katham bahūnam majjhe vasissatīti? Amhākam rucitakālato paṭṭhāya sesānam jetthakatthāne ṭhapetvā paṭijaggissāma, bhanteti.

So rañño katham sutvā daharakāle gahitanāmaseneva, “amma, padumavatī”ti dhītaram pakkosi. Sā ekavacaneneva paṇṇasālato nikkhamitvā pitaram abhivādetvā aṭṭhāsi. Atha nam pitā āha – “tvam, amma, vayappattā, imasmim ṭhāne rañña diṭṭhakālato paṭṭhāya vasitum ayuttā, rañña saddhim gaccha,

ammā”ti. Sā “sādhu, tātā”ti pitu vacanaṃ sampañcchitvā abhivādetvā rodamānā aṭṭhāsi. Rājā “imissā pitu cittaṃ gaṇhissāmī”ti tasmimyeva ṭhāne kahāpaṇārāsīmhi ṭhapetvā abhisekaṃ akāsi. Atha naṃ gahetvā attano nagaraṃ ānetvā āgatakālato paṭṭhāya sesitthiyo anoloketvā tāya saddhimyeva ramati. Tā itthiyo issāpakatā taṃ rañño antare paribhīnditukāmā evamāhaṃsu – “nāyaṃ, mahārāja, manussajātikā, kahaṃ nāma tumhehi manussānaṃ vicaraṇaṭṭhāne padumāni uṭṭhahantāni diṭṭhapubbāni, addhā ayaṃ yakkhinī, nīharatha naṃ, mahārājā”ti. Rājā tāsāṃ kathaṃ sutvā tuṅhī ahoṣi.

Athassāparena samayena paccanto kupito. So “garugabbhā padumavatī”ti nagare ṭhapetvā paccantaṃ agamāsi. Atha tā itthiyo tassā upaṭṭhāyikāya lañjaṃ datvā “imissā dāraṃ jātamaṃ apanetvā ekaṃ dāruhaṭṭhikaṃ lohiteṇa makkhitvā santike ṭhāpehī”ti āhaṃsu. Padumavatiyāpi nacirasseva gabbhavuṭṭhānaṃ ahoṣi. Mahāpadumakumāro ekakova kucchiyaṃ paṭisandhiṃ gaṇhi. Avasesā ekūnapañcasatā dārakā mahāpadumakumārassa mātukucchito nikkhamitvā nipannaṃ saṃsedajā hutvā nibbattiṃsu. Athassā “na tāva ayaṃ satim paṭilabhati”ti ṇatvā sā upaṭṭhāyikā ekaṃ dāruhaṭṭhikaṃ lohiteṇa makkhitvā samīpe ṭhapetvā tāsāṃ itthinaṃ saññaṃ adāsi. Tāpi pañcasatā itthiyo ekekaṃ ekekaṃ dāraṃ gahetvā cundakārakānaṃ santikaṃ pesetvā karaṇḍake āharāpetvā attanā attanā gahitadārake tattha nipajjāpetvā bahi lañchanaṃ katvā ṭhapayimṃsu.

Padumavatiṃpi kho saññaṃ labhitvā taṃ upaṭṭhāyikaṃ “kiṃ vijātamhi, ammā”ti pucchi. Sā taṃ santajjētva “kuto tvaṃ dāraṃ labhissasi”ti vatvā “ayaṃ tava kucchito nikkhantadārako”ti lohitaṃ makkhitaṃ dāruhaṭṭhikaṃ purato ṭhāpesi. Sā taṃ disvā dāraṃ paṭṭhāpattā “sīghaṃ taṃ phāletvā apanehi, sace koci passeyya, lajjitabbaṃ bhavyeyyā”ti āha. Sā tassā kathaṃ sutvā atthakāmā viya dāruhaṭṭhikaṃ phāletvā uddhane pakkhipi.

Rājāpi paccantato āgantvā nakkhattaṃ paṭimānento bahinagare khandhāvāraṃ bandhitvā nisīdi. Atha tā pañcasatā itthiyo rañño paccuggamaṃ āgantvā āhaṃsu – “tvaṃ, mahārāja, na ambhākaṃ saddahasi, amhehi vuttaṃ akāraṇaṃ viya hoti, tvaṃ mahesiyā upaṭṭhāyikaṃ pakkosāpetvā paṭipuccha, dāruhaṭṭhikaṃ te devī vijātā”ti. Rājā taṃ kāraṇaṃ anupaparikkhitvā “amanussajātikā bhavissati”ti taṃ gehato nikkadḍhi. Tassā rājagehato saha nikkhamaṇeṇa padumapupphāni antaradhāyimṃsu, sarīracchavīpi vivaṇṇā ahoṣi. Sā ekikāva antaravīthiyā pāyāsi. Atha naṃ ekā vayappattā mahallikā itthi disvā dhītusinehaṃ uppādetvā “kahaṃ gacchasi, ammā”ti āha. “Āgantukamhi, vasaṇaṭṭhānaṃ oloketvā vicarāmi”ti. “Idhāgaccha, ammā”ti vasaṇaṭṭhānaṃ datvā bhojanaṃ paṭiyādesi.

Tassā imināva niyāmena tattha vasamānāya tā pañcasatā itthiyo ekacittā hutvā rājānaṃ āhaṃsu – “mahārāja, tumhesu yuddhaṃ gatesu amhehi gaṅgādevatāya ‘ambhākaṃ deve vijitasāṅgāme āgate balikammaṃ katvā udakakīlaṃ karissāmā”ti patthitaṃ atthi, etamatthaṃ, deva, jānāpema”ti. Rājā tāsāṃ vacanena tuṭṭho gaṅgāya udakakīlaṃ kātuṃ agamāsi. Tāpi attanā attanā gahitakaraṇḍakaṃ paṭicchannaṃ katvā ādāya nadim gantvā tesāṃ karaṇḍakānaṃ paṭicchādanatthaṃ pārupitvā pārupitvā udake patitvā karaṇḍake vissajjesuṃ. Tepi kho karaṇḍakā sabbe saha gantvā heṭṭhāsote pasāritajālamhi laggimṃsu. Tato udakakīlaṃ kīlitvā rañño uttiṇṇakāle jālaṃ ukkhipantā te karaṇḍake disvā rañño santikaṃ ānayimṃsu.

Rājā karaṇḍake oloketvā “kiṃ, tātā, karaṇḍakesū”ti āha. “Na jānāma, devā”ti. So te karaṇḍake vivarāpetvā oloketvā paṭhamāṃ mahāpadumakumārassa karaṇḍakaṃ vivarāpesi. Tesāṃ pana sabbesampi karaṇḍakesu nipajjāpitadivasesuyeva puññiddhiyā aṅguṭṭhato khīraṃ nibbatti. Sakko devarājā tassa rañño nikkāṅkhabhāvattaṃ antokaraṇḍake akkharāni likhāpesi – “ime kumārā padumavatiyā kucchimhi nibbattā bārāṇasirañño puttā, atha ne padumavatiyā sapattiyo pañcasatā itthiyo karaṇḍakesu pakkhipitvā udake khipimṃsu, rājā imaṃ kāraṇaṃ jānātū”ti. Karaṇḍake vivaṭamatte rājā akkharāni vācētva dārake disvā mahāpadumakumāraṃ ukkhipitvā vegena rathe yojetvā “asse kappetha, ahaṃ ajja antonagaraṃ pavisitvā ekaccānaṃ mātugāmānaṃ piyaṃ karissāmī”ti pāsādavaraṃ āruya hatthigīvāya sahasabhaṇḍikaṃ ṭhapetvā nagare bherim carāpesi – “yo padumavatiṃ passati, so imaṃ sahasaṃ gaṇhātū”ti.

Taṃ katham sutvā padumavatī mātu saññaṃ adāsi – “hatthigīvato sahaṃsaṃ gaṇha, amma”ti. “Nāhaṃ evarūpaṃ gaṇhituṃ visahāmi”ti āha. Sā dutiyampi tatiyampi vutte “kiṃ vatvā gaṇhāmi, amma”ti āha. “Mama dhītā padumavatiṃ devim passatī”ti vatvā gaṇhāhi”ti. Sā “yaṃ vā taṃ vā hotū”ti gantvā sahaṃsacaṅkoṭakaṃ gaṇhi. Atha naṃ manussā pucchimsu – “padumavatiṃ devim passasi, amma”ti? “Ahaṃ na passāmi, dhītā kira me passatī”ti āha. Te “kahaṃ pana sā, amma”ti vatvā tāya saddhim gantvā padumavatiṃ sañjānitvā pādesu nipatimsu. Tasmim kāle sā “padumavati devī aya”nti ñatvā “bhāriyaṃ vata itthiyā kammaṃ kataṃ, yā evaṃvidhassa rañño mahesī samānā evarūpe ṭhāne nirāraṅkhā vasi”ti āha.

Tepi rājapurisā padumavatiyā nivesanaṃ setasaññi parikkhipāpetvā dvāre āraṅkhaṃ ṭhapetvā gantvā rañño ārocesuṃ. Rājā suvaṇṇasivikaṃ pesesi. Sā “ahaṃ evaṃ na gamissāmi, mama vasanaṭṭhānato paṭṭhāya yāva rājagehaṃ etthantare varapotthakacittattharaṇe attharāpetvā upari suvaṇṇatārakavācittam celavitānaṃ bandhāpetvā pasādhanatthāya sabbālaṅkāresu pahitesu padasāva gamissāmi, evaṃ me nāgarā sampattiṃ passissanti”ti āha. Rājā “padumavatiyā yathārucciṃ karothā”ti āha. Tato padumavati sabbapasādhanam pasādhetvā “rājagehaṃ gamissāmi”ti maggaṃ paṭipajji. Athassā akkantaakkantaṭṭhāne varapotthakacittattharaṇāni bhinditvā padumapupphāni utṭhahimsu. Sā mahājanassa attano sampattiṃ dassetvā rājanivesanaṃ āruya sabbepi te celacittattharaṇe tassā mahallikāya posāvanikamūlaṃ katvā dāpesi.

Rājāpi kho tā pañcasatā itthiyo pakkosāpetvā “imāyo te, devī, dāsiyo katvā demī”ti āha. “Sādhu, mahārāja, etāsaṃ mayhaṃ dinnabhāvaṃ sakalanagare jānāpehi”ti. Rājā nagare bherim carāpesi “padumavatiyā dubbhikā pañcasatā itthiyo etissāva dāsiyo katvā dinnā”ti. Sā “tāsaṃ sakalanāgarena dāsibhāvo sallakkhito”ti ñatvā “ahaṃ mama dāsiyo bhujissā kātuṃ labhāmi, devā”ti rājānaṃ pucchi. “Tava icchā, devī”ti. “Evaṃ sante tameva bhericārikaṃ pakkosāpetvā – ‘padumavati deviyā attano dāsiyo katvā dinnā pañcasatā itthiyo sabbāva bhujissā katā’ti puna bherim carāpethā”ti āha. Sā tāsaṃ bhujissabhāve kate ekūnāni pañcaputtasatāni tāsaṃyeva hatthe posanatthāya datvā sayam mahāpadumakumāraṃyeva gaṇhi.

Athāparabhāge tesam kumārānaṃ kīḷanavaye sampatte rājā uyyāne nānāvidham kīḷanaṭṭhānaṃ kāresi. Te attano soḷasavassuddesikakāle sabbeva ekato hutvā uyyāne padumasañchannāya maṅgalapokkharāṇiyā kīḷantā navapadumāni pupphitāni purāṇapadumāni ca vaṇṇato patantāni disvā “imassa tāva anupādinnaṃ evarūpā jarā pāpuṇāti, kimaṅgaṃ pana amhākaṃ sarīrassa. Idampi hi evaṃgatikameva bhavissati”ti ārammaṇaṃ gahetvā sabbeva paccekabodhiññaṃ nibbattetvā utṭhāyutṭhāya padumakaṇṇikāsu pallaṅkena nisīdimsu.

Atha tehi saddhim gatarājapurisā bahugataṃ divasaṃ ñatvā “ayyaputtā, tumhākaṃ velaṃ jānāthā”ti āhaṃsu. Te tuṅhī ahesuṃ. Purisā gantvā rañño ārocesuṃ – “kumārā, deva, padumakaṇṇikāsu nisinnā, amhesu kathentesupi vacibhedam na karontī”ti. “Yathārucciyā nesaṃ nisīdituṃ dethā”ti. Te sabbarattiṃ gahitārakkhā padumakaṇṇikāsu nisinnaniyāmeneva aruṇaṃ utṭhāpesuṃ. Purisā punadvise upasaṅkamitvā “devā, velaṃ jānāthā”ti āhaṃsu. “Na mayam devā, paccekabuddhā nāma mayam amhā”ti. “Ayyā, tumhe bhāriyaṃ katham kathetha, paccekabuddhā nāma tumhādisā na honti, dvaṅgulakesamassudharā kāye paṭimukkaṭṭhaparikkhārā honti”ti. Te dakkhiṇahatthena sīsaṃ parāmasimsu, tāvadeva gihilingaṃ antaradhāyī. Aṭṭha parikkhārā kāye paṭimukkā ca ahesuṃ. Tato passantasseva mahājanassa ākāseṇa nandamūlakapabbhāraṃ agamaṃsu.

Sāpi kho padumavati devī “ahaṃ bahuputtā hutvā niputtā jātā”ti hadayasokaṃ patvā teneva sokena kālaṅkatvā rājagahanagare dvāragāmake sahatthena kammaṃ katvā jīvanaṭṭhāne nibbatti. Athāparabhāge kulagharaṃ gatā ekadivasaṃ sāmikassa khettaṃ yāguṃ haramānā tesam attano puttānaṃ antare aṭṭha paccekabuddhe bhikkhācārelāya ākāseṇa gacchante disvā sīghaṃ sīghaṃ gantvā sāmikassa ārocesi – “passa, ayya, paccekabuddhe, ete nimantetvā bhojessāma”ti. So āha – “samaṇasakuṇā nāmete aññatthāpi evaṃ caranti, na ete paccekabuddhā”ti te tesam kathentānaṃyeva

avidūre ṭhāne otariṃsu. Sā itthī taṃ divasaṃ attano bhattakhajjabhojanaṃ tesam datvā “svepi aṭṭha janā mayhaṃ bhikkhaṃ gaṇhathā”ti āha. “Sādhu, upāsike, tava sakkāro ettakova hotu, āsanāni ca aṭṭheva hontu, aññepi bahū paccekabuddhe disvā tava cittaṃ pasīdeyyāsī”ti. Sā punadivase aṭṭha āsanāni paññāpetvā aṭṭhannaṃ sakkārasammānaṃ paṭiyādetvā nisīdi.

Nimantitapaccekabuddhā sesānaṃ saññaṃ adamsu – “mārisā ajja aññattha agantvā sabbeva tumhākaṃ mātu saṅgahaṃ karothā”ti. Te tesam vacanaṃ sutvā sabbeva ekato ākāsenā āgantvā mātugharadvāre pāturaheṣuṃ. Sāpi paṭhamaṃ laddhasaññaṭāya bahūpi disvā na kampittha. Sabbepe te gehaṃ pavesetvā āsanesu nisīdāpesi. Tesu paṭipāṭiyā nisīdantesu navamo aññāni aṭṭha āsanāni māpetvā sayam dhurāsane nisīdati, yāva āsanāni vaḍḍhanti, tāva gehaṃ vaḍḍhati. Evaṃ tesu sabbesupi nisīnesu sā itthī aṭṭhannaṃ paccekabuddhānaṃ paṭiyāditaṃ sakkāraṃ pañcasatānampi yāvadattham datvā aṭṭha nīluppalahatthake āharitvā nimantitapaccekabuddhānaṃyeva pādamaṃle ṭhapetvā āha – “mayhaṃ, bhante, nibbattanibbattaṭṭhāne sarīravaṇṇo imesaṃ nīluppalaṇaṃ antogabbhavaṇṇo viya hotū”ti patthanaṃ akāsi. Paccekabuddhā mātu anumodanaṃ katvā gandhamādanaṃyeva agamaṃsu.

Sāpi yāvajīvaṃ kusalaṃ katvā tato cutā devaloke nibbattitvā imasmiṃ buddhuppāde sāvattiyam seṭṭhikule paṭisandhiṃ gaṇhi. Nīluppalagabbhasamānavaṇṇatāya cassā **uppalavaṇṇā**teva nāmaṃ akaṃsu. Athassā vayappattakāle sakalajambudīpe rājāno ca seṭṭhino ca seṭṭhissa santikaṃ dūtaṃ paṇiṃsu “dhītaraṃ amhākaṃ detū”ti. Apaṇiṃto nāma nāhosi. Tato seṭṭhi cintesi – “ahaṃ sabbesam manam gahetuṃ na sakkhissāmi, upāyaṃ panekaṃ karissāmi”ti dhītaraṃ pakkosāpetvā “pabbajituṃ, amma, sakkhissāsī”ti āha. Tassā pacchimabhavikattā pitu vacanaṃ sīse āsittasatapakatelaṃ viya ahosi. Tasmā pitaraṃ “pabbajissāmi, tātā”ti āha. So tassā sakkāraṃ katvā bhikkhunupassayaṃ netvā pabbājesi. Tassā acirapabbajitāya eva uposathāgāre kālavāro pāpuṇi. Sā padīpaṃ jāletvā uposathāgāraṃ sammajjitvā dīpasikhāya nimittaṃ gaṇhitvā ṭhitāva punappunaṃ olokayamānā tejokasiṇārammaṇam jhānaṃ nibbattetvā tadeva pādakaṃ katvā arahattaṃ pāpuṇi. Arahattaphalena saddhiṃyeva ca abhiññāpaṭisambhidāpi ijjhiṃsu. Visesto pana iddhivikubbane ciṇṇavasī ahosi. Tena vuttaṃ **apadāne** (apa. therī 2.2.uppalavaṇṇātherīapadāna, aññaṃaññaṃvisadisam) –

“Padumuttaro nāma jino, sabbadhammāna pāragū;
Ito satasahassamhi, kappe uppajji nāyako.

“Tadāhaṃ haṃsavatiyaṃ, jātā seṭṭhikule ahuṃ;
Nānāratanaṃpajjote, mahāsukhasamappitā.

“Upetvā taṃ mahāvīraṃ, assosiṃ dhammadesanaṃ;
Tato jātappasādāhaṃ, upemi saraṇaṃ jinaṃ.

“Bhagavā iddhimantīnaṃ, aggaṃ vaṇṇesi nāyako;
Bhikkhuniṃ lajjiniṃ tādimaṃ, samādhijhānakovidam.

“Tadā muditacittāhaṃ, taṃ ṭhānaṃ abhikaṅkhinī;
Nimantitvā dasabalaṃ, sasaṅghaṃ lokanāyakaṃ.

“Bhojayitvāna sattāhaṃ, datvāna ca ticīvaraṃ;
Sattamālaṃ gahetvāna, uppalādevagandhikaṃ.

“Satthu pāde ṭhapetvāna, ñāṇamhi abhipūjayiṃ;
Nipacca sirasā pāde, idaṃ vacanamabravim.

“Yādisā vaṇṇitā vīra, ito aṭṭhamake muni;
Tādisāhaṃ bhavissāmi, yadi sijjhati nāyaka.

“Tadā avoca maṃ satthā, vissatṭhā hoti dārike;
Anāgatamhi addhāne, lacchase taṃ manoratham.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādā, orasā dhammanimmitā;
Nāmenuppalavaṇṇāti, rūpena ca yasassinī.

“Abhiññāsu vasippattā, satthusāsanakārikā;
Sabbāsavaparikkhīṇā, hessasī satthu sāvikā.

“Tadāhaṃ muditā hutvā, yāvajīvaṃ tadā jinam;
Mettacittā paricarim, sasaṅghaṃ lokanāyakaṃ.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Tato cutāhaṃ manuje, upapannā sayambhuno;
Uppalehi paṭicchannaṃ, piṇḍapātamadāsahaṃ.

“Ekanavutito kappe, vipassī nāma nāyako;
Uppajji cārudassano, sabbadhammesu cakkhumā.

“Setṭhidhītā tadā hutvā, bārāṇasipuruttame;
Nimantetvāna sambuddhaṃ, sasaṅghaṃ lokanāyakaṃ.

“Mahādānaṃ daditvāna, uppalehi vināyakaṃ;
Pūjayitvā cetasāva, vaṇṇasobhaṃ apatthayim.

“Imamhi bhaddake kappe, brahmabandhu mahāyaso;
Kassapo nāma gottena, uppajji vadataṃ varo.

“Upaṭṭhāko mahesissa, tadā āsi narissaro;
Kāsirājā kikī nāma, bārāṇasipuruttame.

“Tassāsiṃ dutiyā dhītā, samaṇaguttasavhayā;
Dhammaṃ sutvā jinaggassa, pabbajjaṃ samarocayim.

“Anujāni na no tāto, agāreva tadā mayam;
Vīsavassasahassāni, vicarimha atanditā.

“Komāribrahmacariyaṃ, rājakaññā sukhedhitā;
Buddhopaṭṭhānaniratā, muditā sattadhītarō.

“Samaṇī samaṇaguttā ca, bhikkhunī bhikkhudāyikā;
Dhammā ceva sudhammā ca, sattamī saṅghadāyikā.

“Ahaṃ khemā ca sappaññā, paṭācārā ca kuṇḍalā;
Kisāgotamī dhammadinnā, visākhā hoti sattamī.

“Tehi kammehi sukatehi, cetanāpaṇidhīhi ca;
Jahitvā mānuṣaṃ dehaṃ, tāvatimsamagacchahaṃ.

“Tato cutā manussesu, upapannā mahākule;
Pītaṃ maṭṭhaṃ vamaṃ dussaṃ, adamaṃ arahato ahaṃ.

“Tato cutāriṭṭhapure, jātā vippakule ahaṃ;
Dhītā tiriṭṭivacchassa, ummādanṭī manoharā.

“Tato cutā janapade, kule aññatare ahaṃ;
Pasūtā nātiphītamhi, sālīṃ gopemahaṃ tadā.

“Disvā paccekasambuddhaṃ, pañcalājasatānihaṃ;
Datvā padumacchannāni, pañca puttasaṭānihaṃ.

“Patthayiṃ tepi patthesuṃ, madhuṃ datvā sayambhuno;
Tato cutā araññehaṃ, ajāyiṃ padumodare.

“Kāsirañño mahesīhaṃ, hutvā sakkatapūjītā;
Ajaniṃ rājaputtānaṃ, anūnaṃ satapañcakaṃ.

“Yadā te yobbanappattā, kīḷantā jalakīḷitaṃ;
Disvā opattapadumaṃ, āsuṃ paccekanāyakā.

“Sāhaṃ tehi vinābhūtā, sutavīrehi sokinī;
Cutā isigilipasse, gāmakamhi ajāyihaṃ.

“Yadā buddho sutamatī, sutānaṃ bhattunopi ca;
Yāguṃ ādāya gacchantī, aṭṭha paccekanāyake.

“Bhikkhāya gāmaṃ gacchante, disvā putte anussariṃ;
Khīradhārā viniggacchi, tadā me puttapemasā.

“Tato tesamaṃ adamaṃ yāguṃ, pasannā sehi pāṇibhi;
Tato cutāhaṃ tidasaṃ, nandanaṃ upapajjahaṃ.

“Anubhotvā sukhaṃ dukkhaṃ, saṃsaritvā bhavābhava;
Tavatthāya mahāvīra, pariccattañca jīvitaṃ.

“Dhītā tuyhaṃ mahāvīra, paññavanta jutindhara;
Bahuñca dukkaraṃ kammaṃ, kataṃ me atidukkaraṃ.

“Rāhulo ca ahañceva, nekajātisate bahū;
Ekasmiṃ sambhave jātā, samānacchandamānasā.

“Nibbatti ekato hoti, jātiyāpi ca ekato;
Pacchime bhava sampatte, ubhopi nānāsambhavā.

“Purimānaṃ jinaggānaṃ, saṅgamaṃ te nidassitaṃ;
Adhikāraṃ bahuṃ mayhaṃ, tuyhatthāya mahāmuni.

“Yaṃ mayā pūritaṃ kammaṃ, kusalaṃ sara me muni;
Tavatthāya mahāvīra, puññaṃ upacitaṃ mayā.

“Abhabbaṭṭhāne vajjetvā, vārayanti anācāraṃ;
Tavatthāya mahāvīra, cattaṃ me jīvitaṃ bahuṃ.

“Evaṃ bahuviddhaṃ dukkhaṃ, sampatti ca bahubbidhā;
Pacchime bhave sampatte, jātā sāvattthiyaṃ pure.

“Mahādhanasetṭhikule, sukhite sajjite tathā;
Nānāratanaṃ pājote, sabbakāmasamiddhine.

“Sakkatā pūjitā ceva, mānitāpacitā tathā;
Rūpasīrimanuppattā, kulesu abhisakkatā.

“Atīva patthitā cāsīṃ, rūpasobhasirīhi ca;
Patthitā seṭṭhiputtehi, anekehi satehipi.

“Agāraṃ pajahitvāna, pabbajīṃ anagāriyaṃ;
Aḍḍhamāse asampatte, catusaccamaṃ pūṇiṃ.

“Iddhiyā abhinimmitvā, caturassaṃ rathaṃ ahaṃ;
Buddhassa pāde vandissaṃ, lokanāthassa tādino.

“Iddhīsu ca vasī homi, dibbāya sotadhātuyā;
Cetopariyaññaṃ, vasī homi mahāmune.

“Pubbenivāsaṃ jānāmi, dibbacakkhu visodhitāṃ;
Sabbāsavaṃ parikkhīṇā, natthi dāni punabbhavo.

“Atthadhammaniruttīsu, paṭibhāne tatheva ca;
Ñāṇaṃ me vimalaṃ suddhaṃ, pabhāvena mahesino.

“Cīvaraṃ piṇḍapātañca, paccayaṃ sayanāsaṃ;
Khaṇena upanāmenti, saḥassāni samantato.

“Jino tamhi guṇe tuṭṭho, etadagge ṭhapesi maṃ;
Aggā iddhimatīnanti, parisāsu vināyako.

“Pariciṇṇo mayā satthā, kataṃ buddhassa sāsanaṃ;
Ohito garuko bhāro, bhavanettisamūhatā.

“Yassatthāya pabbajitā, agārasmānagāriyaṃ;
So me attho anupatto, sabbasaṃyojanakkhayo.

“Kilesā jhāpitā mayhaṃ...pe... kataṃ buddhassa sāsana’nti.

Ayaṃ pana therī yadā bhagavā sāvattthinagaradvāre yamakapāṭihāriyaṃ kātuṃ
kaṇḍambarukkhamaṃ upagañchi, tadā satthāraṃ upasaṅkamitvā vanditvā evamāha – “ahaṃ, bhante,
pāṭihāriyaṃ karissāmi, yadi bhagavā anujānātī”ti sīhanādaṃ nadi. Satthā idaṃ kāraṇaṃ atṭhuppattiṃ
katvā jetavanamahāvihāre ariyagaṇamaṃjhe nisinna paṭipāṭiyā bhikkhuniyo ṭhānantare ṭhapento imaṃ

theriṃ iddhimantīnaṃ aggaṭṭhāne ṭhapesi. Sā jhānasukhena phalasukhena nibbānasukhena ca vītināmentī ekadivasam kāmānaṃ ādīnavaṃ okāraṃ saṃkilesaṃca paccavekkhamānā gaṅgātīriyattherassa mātuyā dhītāya saddhiṃ sapattivāsaṃ uddissa saṃvegajātāya vuttagāthā paccanubhāsanti –

224. “Ubho mātā ca dhītā ca, mayam āsum sapattiyo;
Tassā me ahu saṃvego, abbhuto lomahaṃsano.
225. “Dhiratthu kāmā asucī, duggandhā bahukaṇṭakā;
Yattha mātā ca dhītā ca, sabharyā mayam ahuṃ.
226. “Kāmesvādīnavaṃ disvā, nekkhammaṃ daṭṭhu khemato;
Sā pabbajim rājagahe, agārasmānagāriya”nti. –

Imā tisso gāthā abhāsi.

Tattha **ubho mātā ca dhītā ca, mayam āsum sapattiyoti** mātā ca dhītā cāti ubho mayam aññamaññaṃ sapattiyo ahumha.

Sāvattiyam kira aññatarassa vāñijassa bhariyāya paccūsavēlayam kucchiyam gabbho saṅghāsi, sā taṃ na aññāsi. Vāñijo vibhātāya rattiyā sakaṭesu bhaṇḍam āropetvā rājagahaṃ uddissa gato. Tassā gacchante kāle gabbho vaḍḍhetvā paripākaṃ agamāsi. Atha naṃ sassu evamāha – “mama putto cirappavuttho tvaṅca gabbhinī, pāpakaṃ tayā kata”nti. Sā “tava puttato aññaṃ purisaṃ na jānāmī”ti āha. Taṃ sutvāpi sassu asaddahantī taṃ gharato nikkadḍhi. Sā sāmikaṃ gavesanti anukkamena rājagahaṃ sampattā. Tāvadeva cassā kammajavātesu calantesu maggasamīpe aññataram sālāṃ pavitṭhāya gabbhavuṭṭhānaṃ ahosi. Sā suvaṇṇabimbasaḍisaṃ puttaṃ vijāyitvā anāthasālāyaṃ sayāpetvā udakakiccattam bahi nikkhantā. Athaññataro aputtako sathavāho tena maggena gacchanto “assāmikāya dārako, mama putto bhavissati”ti taṃ dhātiyā hatthe adāsi. Athassa mātā udakakiccaṃ katvā udakaṃ gahetvā paṭinivattitvā puttaṃ apassanti sokābhībūtā paridevitvā rājagahaṃ appavisitvāva maggaṃ paṭipajji. Taṃ aññataro coraṇṭhako antarāmagge disvā paṭibaddhacitto attano pajāpatiṃ akāsi. Sā tassa gehe vasanti ekaṃ dhītaram vijāyi. Atha sā ekadivasam dhītaram gahetvā ṭhitā sāmikena bhaṇḍitvā dhītaram maṅcake khipi. Dārikāya sīsam thokaṃ bhindi. Tato sāpi sāmikaṃ bhāyitvā rājagahameva paccāgantvā serivicārena vicarati. Tassā putto paṭhamayobbane ṭhito “mātā”ti ajānanto attano pajāpatiṃ akāsi. Aparabhāge taṃ coraṇṭhakadhītaram bhaginibhāvaṃ ajānanto vivāhaṃ katvā attano gehaṃ ānesi. Evaṃ so attano mātaram bhaginiṅca pajāpatī katvā vāsesi. Tena tā ubhopi sapattivāsaṃ vasimsu. Atheadivasam mātā dhītu kesavaṭṭim mocetvā ūkaṃ oloketi sīse vaṇaṃ disvā “appevanāmāyaṃ mama dhītā bhavēyyā”ti pucchitvā saṃvegajātā hutvā rājagahe bhikkhunupassayaṃ gantvā pabbajitvā katapubbakiccā vivekavāsaṃ vasanti attano ca pubbapaṭipattiṃ paccavekkhitvā “ubho mātā”tiādikā gāthā abhāsi. Tā pana tāya vuttagāthāva kāmesu ādīnavadassanavasena paccanubhāsanti ayaṃ therī “**ubho mātā ca dhītā cā**”tiādimāha. Tena vuttaṃ – “sā jhānasukhena phalasukhena nibbānasukhena ca vītināmentī imā tisso gāthā abhāsi”ti.

Tattha **asucī**ti kilesāsucipaggharaṇena asucī. **Duggandhā**ti visagandhavāyanena pūtigandhā. **Bahukaṇṭakā**ti visūyikappavattiyā sucaritavinivijjanaṭṭhena bahuvidhakilesakaṇṭakā. Tathā hi te **sattisūlūpamā kāmā**ti vuttā. **Yatthā**ti yesu kāmesu paribhuñjitabbesu. **Sabhariyā**ti samānabhariyā, sapattiyoti attho.

227. “Pubbenivāsaṃ jānāmi, dibbacakkhuṃ visodhitam;
Cetopariccañāṇaṃ, sotadhātu visodhitā.
228. “Iddhīpi me sacchikatā, patto me āsavakkhayo;

Chaḷabhiñṇā sacchikatā, kataṃ buddhassa sāsanaṃ”.

“**Pubbenivāsa**”ntiādikā dve gāthā attano adhigatavisesaṃ paccavekkhitvā pītisomanassajātāya theriyā vuttā. Tattha **cetopariccañāṇanti** cetopariyañāṇaṃ, sacchikatāṃ, pattanti vā sambandho.

229. “Iddhiyā abhinimmitvā, caturassaṃ rathaṃ ahaṃ;
Buddhassa pāde vanditvā, lokanāthassa tādino”ti. –

Ayaṃ gāthā yadā bhagavā yamakapāṭihāriyaṃ kātuṃ kaṇḍambarukkhamūlaṃ upasaṅkami, tadā ayaṃ therī evarūpaṃ rathaṃ nimminivā tena saddhiṃ satthu santikaṃ gantvā bhagavā “ahaṃ pāṭihāriyaṃ karissāmi tithiyamadanimmathanāya, anujānāthā”ti vatvā satthu santike aṭṭhāsi, taṃ saddhāya vuttā. Tattha **iddhiyā abhinimmitvā, caturassaṃ rathaṃ ahanti** catūhi assehi yojitaṃ rathaṃ iddhiyā abhinimminivā **buddhassa** bhagavato pāde vanditvā ekamantaṃ aṭṭhāsinti adhippāyo.

230. “Supupphitaggaṃ upagamma pādapaṃ, ekā tuvaṃ tiṭṭhasi sālāmūle;
Na cāpi te dutiyo atthi koci, bāle na tvam bhāyasi dhuttakānaṃ”.

Tattha **supupphitaggaṃ** suṭṭhu pupphitaaggam, aggato paṭṭhāya sabbaphālipullantī attho. **Pādapanti** rukkhāṃ, idha pana sālārukkho adhippeto. **Ekā tuvanti** ekikā tvam idha tiṭṭhasi. **Na cāpi te dutiyo atthi koci**ti tava sahāyabhūto ārakkhako kocipi natthi, rūpasampattiyā vā tuyhaṃ dutiyo kocipi natthi, asadisarūpā ekikāva imasmim janavivitte ṭhāne tiṭṭhasi. **Bāle na tvam bhāyasi dhuttakānanti** taruṇike tvam dhuttapurisānaṃ kathaṃ na bhāyasi, sakiñcanakārino dhuttāti adhippāyo. Imaṃ kira gātham māro ekadivasaṃ therim supupphite sālavane divāvihāraṃ nisinnaṃ disvā upasaṅkamitvā vivekato vicchinditukāmo vīmaṃsanto āha. Atha naṃ therī santajjentī attano ānubhāvavasena –

231. “Sataṃ sahasānīpi dhuttakānaṃ, samāgatā edisakā bhaveyyuṃ;
Lomaṃ na iñje napi sampavedhe, kiṃ me tuvaṃ māra karissaseko.

232. “Esā antaradhāyāmi, kucchiṃ vā pavisāmi te;
Bhamukantare tiṭṭhāmi, tiṭṭhantiṃ maṃ na dakkhasi.

233. “Cittamhi vasībhūtāhaṃ, iddhipādā subhāvitā;
Chaḷabhiñṇā sacchikatā, kataṃ buddhassa sāsanaṃ.

234. “Sattisūlūpamā kāmā, khandhāsaṃ adhikuṭṭanā;
Yaṃ tvam kāmaratiṃ brūsi, aratī dāni sā mama.

235. “Sabbattha vihatā nandī, tamokhandho padālito;
Evaṃ jānāhi pāpima, nihato tvamasi antakā”ti. –

Imā gāthā abhāsi.

Tattha **sataṃ sahasānīpi dhuttakānaṃ, samāgatā edisakā bhaveyyunti** yādisako tvam edisakā evarūpā anekasatasahasamattāpi dhuttakā samāgatā yadi bhaveyyuṃ. **Lomaṃ na iñje napi sampavedheti** lomamattampi na iñjeyya na sampavedheyya. **Kiṃ me tuvaṃ māra karissasekoti** māra, tvam ekakova mayhaṃ kiṃ karissasi?

Idāni mārassa attano kiñcīpi kātuṃ asamattathatanyeva vibhāventī “**esā antaradhāyāmi**”ti gāthamāha. Tassattho – māra, esāhaṃ tava purato ṭhitāva antaradhāyāmi adassanaṃ gacchāmi, ajānantasseva te kucchiṃ vā pavisāmi, bhamukantare vā tiṭṭhāmi, evaṃ tiṭṭhantiñca maṃ tvam na passasi.

Kasmāti ce? **Cittamhi vasībhūtāhaṃ, iddhipādā subhāvitā**, ahaṃ camhi māra, mayhaṃ cittaṃ vasībhāvappattaṃ, cattāropi iddhipādā mayā suṭṭhu bhāvitā bahulikatā, tasmā ahaṃ yathāvuttāya iddhivisayatāya pahomīti. Sesam sabbam heṭṭhā vuttanayattā uttānameva.

Uppalavaṇṇātherīgāthāvaṇṇanā niṭṭhitā.

Dvādasanipātavaṇṇanā niṭṭhitā.

12. Soḷasanipāto

1. Puṇṇātherīgāthāvaṇṇanā

Soḷasanipāte **udahārī ahaṃ sīte**tiādikā puṇṇāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī vipassissa bhagavato kāle kulagehe nibbattivā viññutaṃ patvā hetusampannatāya sañjātasamvegā bhikkhunīnaṃ santikaṃ gantvā dhammaṃ sutvā laddhappasādā pabbajitvā parisuddhasīlā tūṇi piṭakāni uggahetvā bahussutā dhammadharā dhammakathikā ca ahosi. Yathā ca vipassissa bhagavato sāsane, evaṃ sikhissa vessabhussa kakusandhassa koṇāgamanassa kassapassa ca bhagavato sāsane pabbajitvā silasampannā bahussutā dhammadharā dhammakathikā ca ahosi. Mānadhātukattā pana kilese samucchindituṃ nāsakkhi. Mānopanissayavasena kammaṃ katattā imasmim buddhuppāde anāthapiṇḍikassa seṭṭhino gharadāsiyā kucchimhi nibbatti, **puṇṇā**tissā nāmaṃ ahosi. Sā **sīhanādasuttantadesanāya** (ma. ni. 1.146 ādayo) sotāpannā hutvā pacchā udakasuddhikaṃ brāhmaṇaṃ dametvā seṭṭhinā sambhāvitā hutvā tena bhujissabhāvaṃ pāpitā taṃ pabbajjaṃ anujānāpetvā pabbajitvā vipassanāya kammaṃ karontī na cirasseva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.4.184-203) –

“Vipassino bhagavato, sikhino vessabhussa ca;
Kakusandhassa munino, koṇāgamanatādino.

“Kassapassa ca buddhassa, pabbajitvāna sāsane;
Bhikkhunī silasampannā, nipakā samvutindriyā.

“Bahussutā dhammadharā, dhammatthapaṭipucchikā;
Uggahetā ca dhammānaṃ, sotā payirupāsītā.

“Desentī janamajjhehaṃ, ahosiṃ jinasāsane;
Bāhusaccena tenāhaṃ, pesalā abhimaññisaṃ.

“Pacchime ca bhava dāni, sāvattiyaṃ puruttame;
Anāthapiṇḍino gehe, jātāhaṃ kumbhadāsiyā.

“Gatā udakahāriyaṃ, sotthiyaṃ dijamaddasaṃ;
Sītaṭṭaṃ toyamajjhamhi, taṃ disvā idamabraviṃ.

“Udahārī ahaṃ sīte, sadā udakamotarim;
Ayyānaṃ daṇḍabhayaabhītā, vācādosabhayaṭṭitā.

“Kassa brāhmaṇa tvam bhīto, sadā udakamotari;
Vedhamānehi gattehi, sītaṃ vedayase bhusaṃ.

“Jānantī vata maṃ bhoti, puṇṇike paripucchasi;

Karontaṃ kusalaṃ kammaṃ, rundhantaṃ katapāpakaṃ.

“Yo ca vuḍḍho daharo vā, pāpakammaṃ pakubbati;
Dakābhisecanā sopi, pāpakammā pamuccati.

“Uttarantassa akkhāsiṃ, dhammatthasaṃhitaṃ padaṃ;
Taṅca sutvā sa saṃviggo, pabbajitvārahā ahu.

“Pūrentī ūnakaṣaṭṭhaṃ, jātā dāsikule yato;
Tato puṇṇāti nāmaṃ me, bhujissaṃ maṃ akaṃsu te.

“Setṭhiṃ tatonujānetvā, pabbajimā anagāriyaṃ;
Na cireneva kālena, arahattamaṃpāpuṇimā.

“Iddhīsu ca vasī homi, dibbāya sotadhātuyā;
Cetopariyaññaṃ, vasī homi mahāmune.

“Pubbenivāsaṃ jānāmi, dibbacakkhu visodhitaṃ;
Sabbāsavaparikkhīṇā, natthi dāni punabbhavo.

“Atthadhammaniruttīsu, paṭibhāne tatheva ca;
Ñāṇaṃ me vimalaṃ suddhaṃ, buddhaseṭṭhassa vāhasā.

“Bhāvanāya mahāpaññaṃ, suteneva sutāvinī;
Mānena nīcakulajā, na hi kammaṃ vinassati.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā attano paṭipattiṃ paccavekkhitvā udānavasena –

236. “Udahārī ahaṃ sīte, sadā udakamotarimā;
Ayyānaṃ daṇḍabhayaḥhīṭā, vācādosabhayaṭṭhitā.

237. “Kassa brāhmaṇa tvaṃ bhīto, sadā udakamotari;
Vedhamānehi gattehi, sītaṃ vedayase bhusaṃ.

238. “Jānantī vata maṃ bhoti, puṇṇike paripucchasi;
Karontaṃ kusalaṃ kammaṃ, rundhantaṃ katapāpakaṃ.

239. “Yo ca vuḍḍho daharo vā, pāpakammaṃ pakubbati;
Dakābhisecanā sopi, pāpakammā pamuccati.

240. “Ko nu te idamakkhāsi, ajānantassa ajānako;
‘Dakābhisecanā nāma, pāpakammā pamuccati’.

241. “Saggaṃ nūna gamissanti, sabbe maṇḍūkakacchapā;
Nāgā ca susumārā ca, ye caññe udaye carā.

242. “Orabbhikā sūkarikā, macchikā migabandhakā;
Corā ca vajjhaghātā ca, ye caññe pāpakammīno;
Dakābhisecanā tepī, pāpakammā pamuccare.

243. “Sace imā nadiyo te, pāpaṃ pubbe kataṃ vahaṃ;
Puññampi mā vaheyyuṃ te, tena tvaṃ paribāhiro.
244. “Yassa brāhmaṇa tvaṃ bhīto, sadā udakamotari;
Tameva brahme mākāsi, mā te sītaṃ chaviṃ hane.
245. “Kummaggapaṭipannaṃ maṃ, ariyamaggaṃ samānaya;
Dakābhisecanā bhoti, imaṃ sātaṃ dadāmi te.
246. “Tuyheva sātaḥ hotu, nāhamicchāmi sātaḥ;
Sace bhāyasi dukkhassa, sace te dukkhamappiyaṃ.
247. “Mākāsi pāpakaṃ kammaṃ, āvi vā yadi vā raho;
Sace ca pāpakaṃ kammaṃ, karissasi karosi vā.
248. “Na te dukkhā pamutyatthi, upeccāpi palāyato;
Sace bhāyasi dukkhassa, sace te dukkhamappiyaṃ.
249. “Upehi saraṇaṃ buddhaṃ, dhammaṃ saṅghaṇca tādinaṃ;
Samādiyāhi sīlāni, taṃ te atthāya hehiti.
250. “Upemi saraṇaṃ buddhaṃ, dhammaṃ saṅghaṇca tādinaṃ;
Samādiyāmi sīlāni, taṃ me atthāya hehiti.
251. “Brahmabandhu pure āsiṃ, ajjamhi saccabrāhmaṇo;
Tevijjo vedasampanno, sottiyo camhi nhātako”’ti. –

Imā gāthā abhāsi.

Tattha **udahārīti** ghaṭena udakaṃ vāhikā. **Sīte tadā udakamotarinti** sītakālepi sabbadā rattindivaṃ udakaṃ otariṃ. Yadā yadā ayyakānaṃ udakena attho, tadā tadā udakaṃ pāvisiṃ, udakamotaritvā udakaṃ upanesinti adhippāyo. **Ayyānaṃ daṇḍabhayaabhītāti** ayyakānaṃ daṇḍabhayena bhītā. **Vācādosabhayaṭṭitāti** vacīdaṇḍabhayena ceva dosabhayena ca ṭṭitā pīlītā, sītepi udakamotarinti vōjanā.

Athekadivasaṃ puñṇā dāsī ghaṭena udakaṃ ānetuṃ udakatitthaṃ gatā. Tattha addasa aññataraṃ brāhmaṇaṃ udakasuddhikaṃ himapātasamaye mahati sīte vattamāne pātova udakaṃ otarivā sasīsaṃ nimujjitvā mante jappitvā udakato utthahitvā allavatthaṃ allakesaṃ pavedhantaṃ dantavīṇaṃ vādayamānaṃ. Taṃ disvā karuṇāya saṅcoditamānasā tato naṃ diṭṭhigatā vivecetukāmā “**kassa, brāhmaṇa, tvaṃ bhīto**”’ti gāthamāha. Tattha kassa, brāhmaṇa, tvaṃ kuto ca nāma bhayahetuto bhīto hutvā **sadā udakamotari** sabbakālaṃ sāyaṃ pātaṃ udakaṃ otari. Otaritvā ca **vedhamānehi** kampamānehi **gattehi** sarīrāvayavehi **sītaṃ vedayase bhusaṃ** sītadukkhaṃ ativiya dussahaṃ paṭisaṃvedayasi paccanubhvasi.

Jānantī vata maṃ bhotīti, bhoti puñṇike, tvaṃ taṃ upacitaṃ pāpakammaṃ **rundhantaṃ** nivāraṇasamatthaṃ kusalaṃ kammaṃ iminā udakorohanena **karontaṃ** maṃ jānantī vata paripucchasi.

Nanu ayamatto loka pākāto eva. Kathāpi mayaṃ tuyhaṃ vadāmāti dassento “**yo ca vuḍḍho**”’ti gāthamāha. Tassatto – vuḍḍho vā daharo vā majjhimo vā yo koci hiṃsādibhedāṃ **pāpakammaṃ pakubbati** ativiya karoti, sopi bhusaṃ pāpakammanirato **dakābhisecanā** sinānena tato pāpakammā **pamuccati** accantameva vimuccatīti.

Taṃ sutvā puṇṇikā tassa paṭivacanam dentī “**ko nu te**”tiādimāha. Tattha **ko nu te idamakkhāsi, ajānantassa ajānakoti** kammavipākam ajānantassa te sabbena sabbam kammavipākam ajānato ajānako aviddasu bālo udakābhiseceanahetu pāpakammato pamuccatīti, **idam** atthajātam ko nu nāma akkhāsi, na so saddheyyavacano, nāpi cetam yuttanti adhippāyo.

Idānissa tameva yuttiabhāvam vibhāventī “**saggaṃ nūna gamissantī**”tiādimāha. Tattha **nāgāti vijjhasā. Susumārāti kumbhīlā. Ye caññe udake carāti** ye caññepi vārigocarā macchamakaranandiyāvattādayo ca, tepi **saggaṃ nūna gamissantī** devalokam upapajjissanti maññe, udakābhisecanā pāpakammato mutti hoti ceti attho.

Orabbhikāti urabbhaghātakā. **Sūkarikāti** sūkaraghātakā. **Macchikāti** kevaṭṭā. **Migabandhakāti** māgavikā. **Vajjhaghātāti** vajjhaghātakamme niyuttā.

Puññampi mā vaheyyunti imā aciravatiādayo nadiyo yathā tayā pubbe kataṃ pāpaṃ tattha udakābhisecanena sace vahuṃ nīhareyyuṃ, tathā tayā kataṃ puññampi imā nadiyo vaheyyuṃ pavāheyyuṃ. **Tena tvam paribāhiro assa** tathā sati tena puññakammena tvam paribāhiro virahitova bhaveyyāti na cetam yuttanti adhippāyo. Yathā vā udakena udakorohakassa puññapavāhanam na hoti, evam pāpapavāhanampi na hoti eva. Kasmā? Nhānassa pāpahetūnam appaṭipakkhabhāvato. Yo yaṃ vināseti, so tassa paṭipakkho. Yathā āloko andhakārassa, vijjā ca avijjāya, na evam nhānam pāpassa. Tasmā niṭṭhamettha gantabbam “na udakābhisecanā pāpato parimuttī”ti. Tenāha bhagavā –

“Na udakena sucī hoti, bahvettha nhāyatī jano;
Yamhi saccañca dhammo ca, so sucī so ca brāhmaṇo”ti. (udā. 9; netti. 104);

Idāni yadi pāpaṃ pavāhetukāmosi, sabbena sabbam pāpaṃ mā karohīti dassetuṃ “**yassa, brāhmaṇā**”ti gāthamāha. Tattha **tameva brahme mākāsīti** yato pāpato tvam bhīto, tameva pāpaṃ brahme, brāhmaṇa, tvam mā akāsī. Udakorohanam pana īdise sītakāle kevalam sarīrameva bādhati. Tenāha – “**mā te sītam chaviṃ hane**”ti, īdise sītakāle udakābhisecanena jātasītam tava sarīracchaviṃ mā haneyya mā bādhesīti attho.

Kummaggapaṭipannaṃ manti “udakābhisecanena suddhi hotī”ti imaṃ kummaggaṃ micchāgāhaṃ paṭipannaṃ paggayha ṭhitam maṃ. **Ariyamaggaṃ samānāyīti** “sabbapāpassa akaraṇam, kusalassa upasampadā”ti (dī. ni. 2.90; dha. pa. 183; netti. 30, 116, 124; peṭako. 29) imaṃ buddhādīhi ariyehi gatamaggaṃ samānāyī, sammadeva upanesi, tasmā bhoti imaṃ sātakaṃ tuṭṭhidānam ācariyabhāgaṃ tuyham dadāmi, taṃ paṭiggaṇhāti attho.

Sā taṃ paṭikkhipitvā dhammaṃ kathetvā saraṇesu sīlesu ca patiṭṭhāpetuṃ “**tuyheva sātako hotu, nāhamicchāmi sātaka**”nti vatvā “**sace bhāyasi dukkhassā**”tiādimāha. Tassattho – yadi tuvaṃ sakalāpāyike sugatiyañca aphāsukatādobbhaggatādibhedā dukkhā bhāyasi. Yadi te taṃ appiyaṃ na iṭṭham. **Āvi vā** paresam pākātabhāvena appaṭicchannaṃ katvā kāyena vācāya pāṇātipātādivasena vā **yadi vā raho** apākātabhāvena paṭicchannaṃ katvā manodvāreyeva abhiṭṭhādivasena vā aṇumattampi **pāpakam** lāmakam kammaṃ **mākāsī** mā kari. Atha pana taṃ pāpakammaṃ āyatim karissasi, etarahi karosi vā, “nirayādīsu catūsū apāyesu manussesu ca tassa phalabhūtam dukkham ito etto vā palāyante mayi nānubandhissatī”ti adhippāyena **upecca** sañcicca palāyatopi te tato pāpato mutti mokkhā natthi, gatikālādipaccayantaravāyāye sati vipaccate evāti attho. “Uppaccā”ti vā pāṭho, uppatitvāti attho. Evam pāpassa akaraṇena dukkhābhāvam dassetvā idāni puññassa karaṇenapi taṃ dassetuṃ “**sace bhāyasi**”tiādi vuttam. Tattha **tādinanti** diṭṭhādīsu tādibhāvappattam. Yathā vā purimakā sammāsambuddhā passitabbā, tathā passitabbato tādi, taṃ buddham saraṇam upehīti yojanā. Dhammasaṅghesupi eseva nayo. Tādīnam varabuddhānam dhammaṃ, aṭṭhannaṃ ariyapuggalānam saṅgham samūhanti yojanā. **Tanti** saraṇagamaṇam silānam samādānañca. **Hehīti** bhavissati.

So brāhmaṇo saraṇesu sīlesu ca paṭiṭṭhāya aparabhāge satthu santike dhammaṃ sutvā paṭiladdhasaddho pabbajitvā ghaṭento vāyamanto na cirasseva tevijjo hutvā attano paṭipattim paccavekkhitvā udānento “**brahmabandhū**”ti gāthamāha.

Tassattho – ahaṃ pubbe brāhmaṇakule uppattimattena brahmabandhu nāmāsiṃ. Tathā irubbedādīnaṃ ajjhenādīmattena tevijjo vedasampanno sottiyo nhātako ca nāmāsiṃ. Idāni sabbaso bāhitapāpatāya **saccabrāhmaṇo** paramatthabrāhmaṇo, vijjattayādhigamena **tevijjo**, maggañāṇasaṅkhātena vedena samannāgatattā **vedasampanno**, nittharasabbapāpatāya **nhātako** ca amhīti. Ettha ca brāhmaṇena vuttagāthāpi attanā vuttagāthāpi pacchā theriyā paccemaṃ bhāsītāti sabbā theriyā gāthā eva jātāti.

Puṇṇātherīgāthāvaṇṇanā niṭṭhitā.

Soḷasanipātavaṇṇanā niṭṭhitā.

13. Vīsatinipāto

1. Ambapālītherīgāthāvaṇṇanā

Vīsatinipāte **kālakā bhamaravaṇṇasādisā**tiādikā ambapāliyā theriyā gāthā. Ayampi purimabuddhesu katādhikārā tattha tattha bhava vivatṭūpanissayaṃ kusalaṃ upacinantī sikhissa bhagavato sāsane pabbajitvā upasampannā hutvā bhikkhunīsikkhāpadaṃ samādāya viharantī, ekadivasam sambahulāhi bhikkhunīhi saddhiṃ cetiyaṃ vanditvā padakkhiṇaṃ karontī puretaraṃ gacchantiyā khīṇāsavatttheriyā khipantiyā sahasā kheḷapiṇḍaṃ cetiyaṅgaṇe patitaṃ, khīṇāsavatttheriyā apassitvā gatāya ayaṃ pacchato gacchantī taṃ kheḷapiṇḍaṃ disvā “kā nāma gaṇikā imasmiṃ ṭhāne kheḷapiṇḍaṃ pātesī”ti akkosi. Sā bhikkhunīkāle sīlaṃ rakkhantī gabbhavāsaṃ jigucchitvā opapātikattabhāve cittaṃ ṭhapesi. Tena carimattabhāve vesāliyaṃ rājuyyāne ambarukkhamūle opapātikā hutvā nibbatti. Taṃ disvā uyyānapālo nagaraṃ upanesi. Ambarukkhamūle nibbattatāya sā **ambapālī**veva voharīyittha. Atha naṃ abhirūpaṃ dassanīyaṃ pāsādikaṃ vilāsakantatādiguṇavisesasamuditam disvā sambahulā rājakumārā attano attano pariggahaṃ kātukāmā aññamaññaṃ kalahaṃ akaṃsu. Tesam kalahavūpasamattham tassā kammasañcoditā vohārikā “sabbesaṃ hotū”ti gaṇikāṭṭhāne ṭhapesuṃ. Sā satthari paṭiladdhasaddhā attano uyyāne vihāraṃ katvā buddhappamukhassa bhikkhusaṅghassa niyyādetvā pacchā attano puttassa vimalakoṇḍaññattherassa santike dhammaṃ sutvā pabbajitvā vipassanāya kammaṃ karontī attano sarīrassa jarājiṇṇabhāvam nissāya saṃvegajātā saṅkhārānaṃ aniccatam vibhāventī –

252. “Kālakā bhamaravaṇṇasādisā, vellitaggā mama muddhajā ahuṃ;
Te jarāya sāṇavākasādisā, saccavādivacanaṃ anaññathā.
253. “Vāsitova surabhī karaṇḍako, pupphapūra mama uttamaṅgajo;
Taṃ jarāyatha salomagandhikaṃ, saccavādivacanaṃ anaññathā.
254. “Kānanamva sahitaṃ suropitaṃ, kocchasūcivicitaggasobhitaṃ;
Taṃ jarāya viralaṃ tahiṃ tahiṃ, saccavādivacanaṃ anaññathā.
255. “Kaṇhakhandhakasuvaṇṇamaṇḍitaṃ, sobhate suveṇīhilaṅkataṃ;
Taṃ jarāya khalitaṃ siram kataṃ, saccavādivacanaṃ anaññathā.
256. “Cittakārasukatāva lekhikā, sobhare su bhamukā pure mama;
Tā jarāya valibhippalambitā, saccavādivacanaṃ anaññathā.

257. “Bhassarā surucirā yathā maṇī, nettahesumabhinīlamāyatā;
Te jarāyabhīhatā na sobhare, saccavādivacanaṃ anaññathā.
258. “Saṅhatuṅgasadisī ca nāsikā, sobhate su abhiyobbanam pati;
Sā jarāya upakūlitā viya, saccavādivacanaṃ anaññathā.
259. “Kaṅkaṇamva sukataṃ suniṭṭhitaṃ, sobhare su mama kaṅṅapāḷiyo;
Tā jarāya valibhippalambitā, saccavādivacanaṃ anaññathā.
260. “Pattalīmakulavaṇṇasādisā, sobhare su dantā pure mama;
Te jarāya khaṇḍitā cāsītā, saccavādivacanaṃ anaññathā.
261. “Kānanamhi vanasaṅḍacārinī, kokilāva madhuraṃ nikūjijhaṃ;
Taṃ jarāya khalitaṃ tahiṃ tahiṃ, saccavādivacanaṃ anaññathā.
262. “Saṅhakamburiva suppamajjitā, sobhate su gīvā pure mama;
Sā jarāya bhaggā vināmitā, saccavādivacanaṃ anaññathā.
263. “Vaṭṭapalighasadisopamā ubho, sobhare su bāhā pure mama;
Tā jarāya yathā pāṭalibbalitā, saccavādivacanaṃ anaññathā.
264. “Saṅhamuddikasuvaṇṇamaṇḍitā, sobhare su hatthā pure mama;
Te jarāya yathā mūlamūlikā, saccavādivacanaṃ anaññathā.
265. “Pīnavattasahibhuggatā ubho, sobhare su thanakā pure mama;
Thevikīva lambantī nodakā, saccavādivacanaṃ anaññathā.
266. “Kañcanassa phalakaṃva sammaṭṭhaṃ, sobhate su kāyo pure mama;
So valīhi sukhumāhi otato, saccavādivacanaṃ anaññathā.
267. “Nāgabhogasadisopamā ubho, sobhare su ūrū pure mama;
Te jarāya yathā veḷunāḷiyo, saccavādivacanaṃ anaññathā.
268. “Saṅhanūpurasuvaṇṇamaṇḍitā, sobhare su jaṅghā pure mama;
Tā jarāya tiladaṅḍakāriva, saccavādivacanaṃ anaññathā.
269. “Tūlapuṇṇasadisopamā ubho, sobhare su pādā pure mama;
Te jarāya phuṭitā valīmatā, saccavādivacanaṃ anaññathā.
270. “Ediso ahu ayam samussayo, jajjaro bahudukhānamālayo;
Sopalepapatito jarāgharo, saccavādivacanaṃ anaññathā”’ti. —

Imā gāthāyo abhāsi.

Tattha **kāḷakā**ti kāḷakavaṇṇā. **Bhamaravaṇṇasādisā**ti kāḷakā hontāpi bhamarasadisavaṇṇā, siniddhanīlāti attho. **Vellitaggā**ti kuñcitaggā, mūlato paṭṭhāya yāva aggā kuñcitā vellitāti attho. **Muddhajāti** kesā. **Jarāyāti** jarāhetu jarāya upahatasobhā. **Sāṇavākasādisā**ti sāṇasadisā vākasadisā ca, sāṇavākasadisā ceva makacivākasadisā cātipi attho. **Saccavādivacanaṃ anaññathāti** saccavādino avitathavādino sammāsambuddhassa “sabbaṃ rūpaṃ aniccaṃ jarābhībhūta”’ntiādivacanaṃ anaññathā yathābhūtameva, na tattha vitathaṃ atthīti.

Vāsitova surabhī karaṇḍakoti pupphagandhavāsacuṇṇādīhi vāsito vāsaṃ gāhāpito pasādhanasamuggo viya sugandhi. **Pupphapūra mama uttamaṅgajoti** campakasumanamallikādīhi pupphehi pūrito pubbe mama kesakalāpo nimmaloti attho. **Tanti uttamaṅgajaṃ. Atha** pacchā etarahi **salomagandhikaṃ** pākatikalomagandhameva jātaṃ. Atha vā **salomagandhikanti** meṇḍakalomehi samānagandhaṃ. “Eḷakalomagandha”ntipi vadanti.

Kānanamva sahitaṃ suropitanti suṭṭhu ropitaṃ sahitaṃ ghanasannivesaṃ uddhameva uṭṭhitaṃ ujukadīghasākhaṃ upavanaṃ viya. **Kocchasūcivicitaggasobhitanti** pubbe kocchena suvaṇṇasūciyā ca kesajaṭāvijaṭanena vicitaggaṃ hutvā sobhitaṃ, ghanabhāvena vā kocchasadisāṃ hutvā paṇadantasūcihi vicitaggaṭāya sobhitaṃ. **Tanti uttamaṅgajaṃ. Viralaṃ tahiṃ tahinti** tattha tattha viralaṃ vilūnakesaṃ.

Kaṇhakhandhakasuvaṇṇamaṇḍitanti suvaṇṇavajirādīhi vibhūsitāṃ kaṇhakesapuñjakaṃ. Ye pana “saṇhakaṇḍakasuvaṇṇamaṇḍita”nti paṭhanti, tesāṃ saṇhāhi suvaṇṇasūcihi jaṭāvijaṭanena maṇḍitanti attho. **Sobhate suveṇīhilaṅkatanti** sundarehi rājarukkhamālā sadisehi kesaveṇīhi alaṅkatam hutvā pubbe virājate. **Taṃ jarāya khalitaṃ siram katanti** taṃ tathā sobhitaṃ siram idāni jarāya khalitaṃ khaṇḍitākhaṇḍitaṃ vilūnakesaṃ kataṃ.

Cittakārasukatāva lekhikāti cittakārena sippinā nīlāya vaṇṇadhātuyā suṭṭhu katā lekhā viya sobhate. **Su bhamukā pure mamāti** sundarā bhamukā pubbe mama sobhanaṃ gatā. **Valibhippalambitāti** nalāṭante uppanāhi valīhi palambantā ṭhitā.

Bhassarāti bhāsurā. **Surucirāti** suṭṭhu rucirā. **Yathā maṇḍitanti** maṇimuddikā viya. **Nettahesunti** sunettā ahesuṃ. **Abhinīlamāyatāti** abhinīlā hutvā āyatā. **Teti nettā. Jarāyabhihatāti** jarāya abhihatā.

Saṇhatuṅgasadisī cāti saṇhā tuṅgā sesamukhāvayavānaṃ anurūpā ca. **Sobhateti** vaṭṭetvā ṭhapitaharītālavaṭṭi viya mama nāsikā sobhate. **Su abhiyobbanam patīti** sundare abhinavayobbanakāle sā nāsikā idāni jarāya nivāritasobhatāya pariseditā viya varattā viya ca jātā.

Kaṅkaṇamva sukataṃ suniṭṭhitanti superikammakataṃ suvaṇṇakaṅkaṇam viya vaṭṭulabhāvaṃ sandhāya vadati. **Sobharetī** sobhante. “Sobhante”ti vā pāṭho. **Suiti** nipātamattaṃ. **Kaṅṇapāḷiyoti** kaṅṇagandhā. **Valibhippalambitāti** tahiṃ tahiṃ uppanavalīhi valitā hutvā vaṭṭaniyā paṇāmitavattakhandhā viya bhassantā olambanti.

Pattalīmakulavaṇṇasādisāti kadalimakulasadisavaṇṇasaṅṭhānā. **Khaṇḍitāti** bhedanapatanehi khaṇḍitā khaṇḍabhāvaṃ gatā. **Asitāti** vaṇṇabhedena asitabhāvaṃ gatā.

Kānanamhi vanasaṇḍacārīnī, kokilāva madhuraṃ nikūjihanti vanasaṇḍe gocaracaraṇena vanasaṇḍacārīnī kānane anusaṃgītanivāsīnī kokilā viya madhurālāpaṃ nikūjijaṃ. **Tanti** nikūjitaṃ ālāpaṃ. **Khalitaṃ tahiṃ tahinti** khaṇḍadantādibhāvena tattha tattha pakkhalitaṃ jātaṃ.

Saṇhakamburiva suppamajjitāti suṭṭhu pamajjitā saṇhā suvaṇṇasaṅkhā viya. **Bhaggā vināmitāti** maṃsaparikkhayena vibhūtasirājalātāya bhaggā hutvā vinatā.

Vaṭṭapalighasadisopamāti vaṭṭena palighadaṇḍena samasamā. **Tāti** tā ubhopi bāhāyo. **Yathā pāḷalibbalitāti** jajjarabhāvena palitapāḷalisākhāsadisā.

Saṇhamuddikasuvaṇṇamaṇḍitāti suvaṇṇamayāhi maṭṭhabhāsurāhi muddikāhi vibhūsitā. **Yathā mūlamūlikāti** mūlakakaṇḍasadisā.

Pīnavatṭasahituggatāti pīnā vaṭṭā aññamaññaṃ sahitāva hutvā uggatā uddhamukhā. **Sobhate su**

thanakā pure mamāti mama ubhopi thanā yathāvuttarūpā hutvā suvaṇṇakalasiyo viya sobhiṃsu. Puthutte hi idaṃ ekavacanam, atītatthe ca vattamānavacanam. **Thevikīva lambanti nodakāti** te ubhopi me thanā nodakā galitajalā veṇudaṇḍake ṭhapitaudakabhasmā viya lambanti.

Kaṅcanaphalakamva sammatṭhanti jātihiṅgulakena makkhitvā ciraparimajjitasovaṇṇaphalakam viya sobhate. **So valīhi sukhumāhi otatoti** so mama kāyo idāni sukhumāhi valīhi tahiṃ tahiṃ vitato valittacataṃ āpanno.

Nāgabhogasadisopamāti hatthināgassa hatthena samasamā. Hattho hi idha bhuñjati etenāti bhogoti vutto. **Teti ūruyo. Yathā veḷunāḷiyoti** idāni veḷupabbasadisā ahesuṃ.

Saṅhanūpurasuvaṇṇamaṇḍitāti siniddhamatṭhehi suvaṇṇanūpurehi vibhūsitā. **Jaṅghāti** aṭṭhijaṅghāyo. **Tāti tā jaṅghāyo. Tiladaṇḍakārīvāti** appamaṃsalohitattā kisabhāvena lūnāvasiṭṭhavisukkhatiladaṇḍakā viya ahesuṃ. Ra-kāro padasandhikaro.

Tūlapuṇṇasadisopamāti mudusiniddhabhāvena simbalitūlapuṇṇapaliguṇṭhitaupāhanasadisā. Te mama pādā idāni phuṭitā phalitā, **valīmatā** valimanto jātā.

Edisoti evarūpo. **Ahu** ahosi yathāvuttappakāro. **Ayaṃ samussayoti** ayaṃ mama kāyo. **Jajjaroti** sithilābandho. **Bahudukkhānamālayoti** jarādihetukānaṃ bahūnaṃ dukkhānaṃ ālayabhūto. **Sopalepapatitoti** so ayaṃ samussayo apalepapatito abhisāṅkhārāleppaparikkhayena patito pātābhimukhoti attho. Sopi alepapatitoti vā padavibhāgo, so evattho. **Jarāgharoti** jiṇṇagharasadisō. Jarāya vā gharabhūto ahosi. Tasmā **saccavādino** dhammānaṃ yathābhūtaṃ sabhāvaṃ sammadeva ñatvā kathanato avitathavādino sammāsambuddhassa mama sathuvacanam anaññathā.

Evam ayaṃ therī attano attabhāve aniccatāya sallakkhaṇamukhena sabbesupi tebhūmakadhammesu aniccatam upadhāretvā tadanusārena tattha dukkhalakkhaṇam anattalakkhaṇaṅca āropetvā vipassanam ussukkāpentī maggapaṭipāṭiyā arahattam pāpuṇi. Tena vuttam **apadāne** (apa. therī 2.4.204-219) –

“Yo raṃsiphusitāveḷo, phusso nāma mahāmuni;
Tassāham bhaginī āsim, ajāyim khattiye kule.

“Tassa dhammam suṇitvāham, vippasannena cetasā;
Mahādānam daditvāna, patthayim rūpasampadam.

“Ekatimse ito kappe, sikhī lokagganāyako;
Uppanno lokapajjoto, tilokasaraṇo jino.

“Tadāruṇapure ramme, brahmaññakulasambhavā;
Vimuttacittam kupitā, bhikkhunim abhisāpayim.

“Vesikāva anācārā, jinasāsanadūsikā;
Evam akkosayitvāna, tena pāpena kammunā.

“Dāruṇam nirayam gantvā, mahādukkhasamappitā;
Tato cutā manussesu, upapannā tapassinī.

“Dasajātisahassāni, gaṇikattamakārayim;
Tamhā pāpā na muccissam, bhutvā duṭṭhavisam yathā.

“Brahmacariyamasevissam, kassape jinasāsane;
Tena kammavipākena, ajāyim tidase pure.

“Pacchime bhava sampatte, ahosiṃ opapātikā;
Ambasākhantare jātā, ambapālīti tenaṃ.

“Parivutā pāṇakoṭṭhi, pabbajim jinasāsane;
Pattāhaṃ acalaṃ ṭhānaṃ, dhītā buddhassa orasā.

“Iddhīsu ca vasī homi, sotadhātuvisuddhiyā;
Cetopariyañāssa, vasī homi mahāmuni.

“Pubbenivāsam jānāmi, dibbacakkhu visodhitam;
Sabbāsavaparikkhīṇā, natthi dāni punabbhavo.

“Atthadhammaniruttīsu, paṭibhāne tatheva ca;
Ñāṇam me vimalaṃ suddham, buddhaseṭṭhassa vāhasā.

“Kilesā jhāpitā mayhaṃ, bhavā sabbe samūhatā;
Nāgīva bandhanaṃ chetvā, viharāmi anāsavā.

“Svāgataṃ vata me āsi, buddhaseṭṭhassa santike;
Tisso vijjā anuppattā, kataṃ buddhassa sāsanaṃ.

“Paṭisambhidā catasso, vimokkhāpi ca aṭṭhime;
Chalābhiññā sacchikatā, kataṃ buddhassa sāsana’nti.

Arahattaṃ pana patvā attano paṭipattim paccavekkhitvā udānavasena tā eva gāthā paccudāhāsīti.

Ambapālītherīgāthāvaṇṇanā niṭṭhitā.

2. Rohinītherīgāthāvaṇṇanā

Samaṇāti bhoti supītiādikā rohiniyā theriyā gāthā. Ayampi purimabuddhesu katādhikārā tattha tattha bhava vivaṭṭupanissayaṃ kusalaṃ upacinantī ito ekanavutikappe vipassissa bhagavato kāle kulagehe nibbattitvā viññutaṃ patvā, ekadivasam bandhumatīnagare bhagavantaṃ piṇḍāya carantaṃ disvā pattaṃ gahetvā pūvassa pūretvā bhagavato datvā pītisomanassajātā pañcapaṭiṭṭhitena vandi. Sā tena puññakammaena devamanussesu saṃsaranāni anukkamena upacitavimokkhasambhārā hutvā imasmiṃ buddhuppāde vesāliyaṃ mahāvibhavassa brāhmaṇassa gehe nibbattitvā **rohinīti** laddhanāmā viññutaṃ patvā, sathari vesāliyaṃ viharante viharāṃ gantvā dhammaṃ sutvā sotāpannā hutvā mātāpitūnaṃ dhammaṃ desetvā sāsane pasādaṃ uppādetvā te anujānāpetvā sayam pabbajitvā vipassanāya kammaṃ karontī na cirasseva saha paṭisambhidāhi arahattaṃ pāpuṇi. Tena vuttaṃ –

“Nagare bandhumatiyā, vipassissa mahesino;
Piṇḍāya vicarantassa, pūvedāsimaṃ tadā.

“Tena kammaena sukatena, cetanāpaṇidhīhi ca;
Tattha cittaṃ pasādetvā, tāvatimsamagacchamaṃ.

“Chattimsadevarājūnaṃ, mahesittamakārayim;

Paññāsacakkavattīnaṃ, mahesittamakārayiṃ.

“Manasā patthitā nāma, sabbā mayhaṃ samijjhatha;
Sampattiṃ anubhotvāna, devesu manujesu ca.

“Pacchime bhavasampatte, jāto vippakule ahaṃ;
Rohinī nāma nāmena, ñātakehi piyāyitā.

“Bhikkhūnaṃ santikaṃ gantvā, dhammaṃ sutvā yathātathaṃ;
Saṃviggamānasā hutvā, pabbajiṃ anagāriyaṃ.

“Yoniso padahantīnaṃ, arahattamaṃpāpuṇiṃ;
Ekanavutito kappe, yaṃ dānamadadiṃ tadā;
Duggatiṃ nābhijānāmi, pūvadānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā attano paṭipattiṃ paccavekkhitvā pubbe sotāpannakāle pitarā attanā ca vacanapaṭivacanavasena vuttagāthā udānavasena bhāsanti –

271. “Samaṇāti bhoti supi, samaṇāti pabujjhasi;
Samaṇāneva kittesi, samaṇī nūna bhavissasi.
272. “Vipulaṃ annaṅca pānaṅca, samaṇānaṃ pavecchasi;
Rohinī dāni pucchāmi, kena te samaṇā piyā.
273. “Akammakāmā alasā, paradattūpajīvino;
Āsaṃsukā sādūkāmā, kena te samaṇā piyā.
274. “Cīrassaṃ vata maṃ tāta, samaṇānaṃ paripucchasi;
Tesaṃ te kittayissāmi, paññāsīlaparakkamaṃ.
275. “Kammakāmā analasā, kammasetṭhassa kārakā;
Rāgaṃ dosaṃ pajahanti, tena me samaṇā piyā.
276. “Tīṇi pāpassa mūlāni, dhunanti sucikārino;
Sabbhaṃ pāpaṃ pahīnesaṃ, tena me samaṇā piyā.
277. “Kāyakammaṃ suci nesaṃ, vacīkammaṅca tādīsaṃ;
Manokammaṃ suci nesaṃ, tena me samaṇā piyā.
278. “Vimalā saṅkhamuttāva, suddhā santarabāhirā;
Puṇṇā sukkāna dhammānaṃ, tena me samaṇā piyā.
279. “Bahussutā dhammadharā, ariyā dhammajīvino;
Atthaṃ dhammaṅca desenti, tena me samaṇā piyā.
280. “Bahussutā dhammadharā, ariyā dhammajīvino;
Ekaggacittā satimanto, tena me samaṇā piyā.
281. “Dūraṅgamā satimanto, mantabhāṇī anuddhatā;
Dukkhasantaṃ pajānanti, tena me samaṇā piyā.

282. “Yasmā gāmā pakkamanti, na vilokenti kiñcanaṃ;
Anapekkhāva gacchanti, tena me samaṇā piyā.
283. “Na te saṃ koṭṭhe openti, na kumbhiṃ na khaḷopiyam;
Pariniṭṭhitamesānā, tena me samaṇā piyā.
284. “Na te hiraññaṃ gaṇhanti, na suvaṇṇaṃ na rūpiyaṃ;
Paccuppanna yāpenti, tena me samaṇā piyā.
285. “Nānākulā pabbajitā, nānājanapadehi ca;
Aññaṃaññaṃ pihayanti, tena me samaṇā piyā.
286. “Atthāya vata no bhoti, kule jātāsi rohinī;
Saddhā buddhe ca dhamme ca, saṅghe ca tibbagāravā.
287. “Tuvañhetam pajānāsi, puññaṃakhetam anuttaram;
Amhampi ete samaṇā, paṭiggaṇhanti dakkhiṇam.
288. “Patiṭṭhito hettha yañña, vipulo no bhavissati;
Sace bhāyasi dukkhassa, sace te dukkhamappiyaṃ.
289. “Upehi saraṇam buddham, dhammam saṅghaṇca tādinaṃ;
Samādiyāhi silāni, tam te atthāya hehiti.
290. “Upemi saraṇam buddham, dhammam saṅghaṇca tādinaṃ;
Samādiyāmi silāni, tam me atthāya hehiti.
291. “Brahmabandhu pure āsiṃ, so idānimhi brāhmaṇo;
Tevijjo sottiyo camhi, vedagū camhi nhātako”ti. –

Imā gāthā paccudāhāsi.

Tattha ādito tisso gāthā attano dhītu bhikkhūsu sammutiṃ anicchantena vuttā. Tattha **samaṇāti bhoti supīti** bhoti tvam supanakālepi “samaṇā samaṇā”ti kittentī samaṇapaṭibaddhamyeva katham kathentī supasi. **Samaṇāti pabujjhasīti** supanato utthahantīpi “samaṇā”iccevaṃ vatvā pabujjhasi niddāya vuṭṭhāsī. **Samaṇāneva kittesīti** sabbakālampi samaṇe eva samaṇānameva vā guṇe kittesi abhitthavasi. **Samaṇī nūna bhavissasīti** gihirūpena ṭhitāpi cittaena samaṇī eva mañña bhavissasi. Atha vā **samaṇī nūna bhavissasīti** idāni gihirūpena ṭhitāpi na cireneva samaṇī eva mañña bhavissasi samaṇesu eva ninnapoṇabhāvato.

Pavecchasīti desi. **Rohinī dāni pucchāmīti**, amma rohini, tam aham idāni pucchāmīti brāhmaṇo attano dhītaram pucchanto āha. **Kena te samaṇā piyāti**, amma rohini, tvam sayantīpi pabujjantīpi aññaḍāpi samaṇānameva guṇe kittayasi, kena nāma kāraṇena tuyham samaṇā piyāyitabbā jātāti attho.

Idāni brāhmaṇo samaṇesu dosaṃ dhītu ācikkhanto “**akammakāmā**”ti gāthamāha. Tattha **akammakāmāti** na kammakāmā, attano paresaṇca atthāvahaṃ kiñci kammaṃ na kātukāmā. **Alasāti** kusītā. **Paradattūpajvinoti** parehi dinneneva upajīvanasīlā. **Āsamsukāti** tato eva ghāsacchādanādīnaṃ āsīsanakā. **Sādukāmāti** sādum madhurameva āhāraṃ icchanakā. Sabbametam brāhmaṇo samaṇānaṃ guṇe ajānanto attanāva parikkappitam dosamāha.

Tam sutvā rohinī “laddho dāni me okāso ayyānaṃ guṇe kathetu”nti tuṭṭhamānasā bhikkhūnaṃ

guṇe kittetukāmā paṭhamam tava tesam kittane somanassam pavedentī “**cīrassam vata mam, tātā**”ti gāthamāha. Tattha **cīrassam vatāti** cirena vata. **Tātāti** pitaram ālapati. **Samaṇānanti** samaṇe samaṇānaṃ vā mayham piyāyitabbam paripucchasi. **Tesanti** samaṇānaṃ. **Paññāsīlaparakkamanti** paññañca sīlañca ussāhañca.

Kittayissāmīti kathayissāmi. Paṭijānetvā te kittentī “akammakāmā alasā”ti tena vuttam dosam tava nibbeḥetvā tappaṭipakkabhūtam guṇam dassetuṃ “**kammakāmā**”tiādimāha. Tattha **kammakāmāti** vattapaṭivattādibhedam kammaṃ samaṇakiccaṃ paripūraṇavasena kāmenti icchantīti kammakāmā. Tattha yuttappayuttā hutvā uṭṭhāya samuṭṭhāya vāyamanato na alasāti **analasā**. Tam pana kammaṃ seṭṭham uttamam nibbānāvahameva karontīti **kammaseṭṭhassa kārakā**. Karontā pana tam paṭipattiyā anavajjabhāvato **rāgam dosam pajahanti**, yathā rāgadosā pahīyanti, evaṃ samaṇā kammaṃ karonti. **Tena me samaṇā piyāti** tena yathāvuttena sammāpaṭipajjanena mayham samaṇā piyāyitabbāti attho.

Tīṇi pāpassa mūlānīti lobhadosamohasaṅkhātāni akusalassa tīṇi mūlāni. **Dhunantīti** nigghātentī, pajahantīti attho. **Sucikārinoti** anavajjakammakārino. **Sabbam pāpaṃ pahīnesanti** aggamaggādhigamena esaṃ sabbampi pāpaṃ pahīnaṃ.

Evaṃ “samaṇā sucikārino”ti saṅkhepato vuttamattham vibhajitvā dassetuṃ “**kāyakamma**”nti gāthamāha. Tam suviññeyyameva.

Vimalā saṅkhamuttāvāti sudhotasaṅkhā viya muttā viya ca vigatamalā rāgādimalarahitā. **Suddhā santarabāhirāti** santarañca bāhirañca santarabāhiraṃ. Tato santarabāhirato suddhā, suddhāsaya payogāti attho. **Puṇṇā sukkāna dhammānanti** ekantasukkehi anavajjadhammehi paripuṇṇā, asekehi sīlakkhandhādīhi samannāgatāti attho.

Suttageyyādibahuṃ sutam etesaṃ, sutena vā uppannāti **bahussutā**, pariyattibāhusaccena paṭivedhabāhusaccena ca samannāgatāti attho. Tameva duvidhampi dhammaṃ dhārentīti **dhammadharā**. Sattānaṃ ācārasamācārasikkhāpadena arīyantīti **ariyā**. Dhammena nāyena jīvantīti **dhammajīvino**. **Attham dhammañca desentīti** bhāsitatthañca desanādhammañca kathenti pakāsenti. Atha vā atthato anapetaṃ dhammato anapetañca desenti ācikkhanti.

Ekaggacittāti samāhitacittā. **Satimantoti** upaṭṭhitasatino.

Dūraṅgamāti araññagatā, manussūpacāraṃ muñcitvā dūraṃ gacchantā, iddhānubhāvena vā yathārucitaṃ dūraṃ ṭhānaṃ gacchantīti dūraṅgamā. Mantā vuccati paññā, taya bhaṇanasīlatāya **mantabhāṇī**. Na uddhatāti **anuddhatā**, uddhaccarahitā vūpasantacittā. **Dukkassantaṃ pajānantīti** vaṭṭadukkassa pariyantabhūtam nibbānaṃ paṭivijjhanti.

Na vilokenti kiñcananti yato gāmato pakkamanti, tasmim gāme kañci sattaṃ vā saṅkhāraṃ vā apekkhāvasena na olokenti, atha kho pana anapekkhāva gacchanti pakkamanti.

Na te sam koṭṭhe opentīti te samaṇā sam attano santakaṃ sāpateyyaṃ koṭṭhe na openti na paṭisāmetvā ṭhapenti tādissassa pariggahassa abhāvato. **Kumbhinti** kumbhiyaṃ. **Khaḷopiyaṃ** pacchiyaṃ. **Pariniṭṭhitamesānāti** parakulesu presam atthāya siddhameva ghāsam pariyesantā.

Hiraññanti kahāpaṇaṃ. **Rūpiyaṃ** rajataṃ. **Paccuppanna yāpentīti** atītam ananusocantā anāgatañca apaccāsītantā paccuppanna yāpenti attabhāvaṃ pavattenti.

Aññamaññaṃ pihayantīti aññamaññaṃ mettim karonti. “Pihāyanti”pi pāṭho, so eva attho.

Evam so brāhmaṇo dhītuyā santike bhikkhūnaṃ guṇe sutvā pasannamānaso dhītaraṃ pasamsanto “**atthāya vatā**”tiādimāha.

Amhampīti amhākampi. **Dakkhiṇanti** deyyadhammaṃ.

Etthāti etesu samaṇesu. **Yaññoti** dānadhammo. **Vipuloti** vipulaphalo. Sesam vuttanayameva.

Evam brāhmaṇo saraṇesu sīlesu ca patiṭṭhito aparabhāge sañjātasamvego pabbajitvā vipassanaṃ vaḍḍhetvā arahatte patiṭṭhāya attano paṭipattiṃ paccavekkhitvā udānento “**brahmabandhū**”ti gāthamāha. Tassattho heṭṭhā vuttoyeva.

Rohinītherīgāthāvaṇṇanā niṭṭhitā.

3. Cāpātherīgāthāvaṇṇanā

Laṭṭhihattho pure āsītiādikā cāpāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī, anukkamena upacitakusalamūlā sambhatavimokkhasambhārā hutvā imasmiṃ buddhuppāde vaṅgahārajanapade aññatarasmiṃ migaluddakagāme jeṭṭhakamigaluddakassa dhītā hutvā nibbatti, **cāpā**tissā nāmaṃ ahosi. Tena ca samayena upako ājīvako bodhimaṇḍato dhammacakkaṃ pavattetuṃ bārāṇasiṃ uddissa gacchantena sathhārā samāgato “vipassannāni kho te, āvuso, indriyāni, parisuddho chavivaṇṇo pariyaḍāto, kaṃsi tvam, āvuso, uddissa pabbajito, ko vā te sathhā, kassa vā tvam dhammaṃ rocesi”ti (mahāva. 11; ma. ni. 1.285) pucchitvā –

“Sabbābhībhū sabbavidūhamasmi, sabbesu dhammesu anūpalitto;
Sabbāñjaho taṇhākkhaye vimutto, sayam abhiññāya kamuddiseyyam. (dha. pa. 353; mahāva. 11; kathā. 405; ma. ni. 1.285);

“Na me ācariyo atthi, sadiso me na vijjati;
Sadevakasmiṃ lokasmiṃ, natthi me paṭipuggalo.

“Ahañhi arahā loke, aham sathhā anuttaro;
Ekomhi sammāsambuddho, sītibhūtomhi nibbuto.

“Dhammacakkaṃ pavattetuṃ, gacchāmi kāsinaṃ puram;
Andhībhūtasmiṃ lokasmiṃ, āhañchaṃ amatadundubhi”nti. (mahāva. 11; kathā. 405; ma. ni. 1.285) –

Sathhārā attano sabbaññubuddhabhāve dhammacakkapavattane ca pavedite pasannacitto so “hupeyyapāvuso, arahasi anantajino”ti (mahāva. 11; ma. ni. 1.285) vatvā ummaggaṃ gahetvā pakkanto vaṅgahārajanapadaṃ agamāsi. So tattha ekaṃ migaluddakagāmakaṃ upanissāya vāsaṃ kappesi. Tam tattha jeṭṭhakamigaluddako upaṭṭhāsi. So ekadivasam dūraṃ migavaṃ gacchanto “mayham arahante mā pamajjī”ti attano dhītaraṃ cāpaṃ āṇāpetvā agamāsi saddhiṃ puttabhātukehi. Sā cassa dhītā abhirūpā hoti dassanīyā.

Atha kho upako ājīvako bhikkhācāraṇelāyaṃ migaluddakassa gharaṃ gato parivisitūṃ upagataṃ cāpaṃ disvā rāgena abhībhūto bhuñjitumpi asakkonto bhājanena bhattaṃ ādāya vasanaṭṭhānaṃ gantvā bhattaṃ ekamante nikkhipitvā “sace cāpaṃ labhissāmi, jīvāmi, no ce, marissāmi”ti nirāhāro nipajji. Sattame divase migaluddako āgantvā dhītaraṃ pucchi – “kiṃ mayham arahante na pamajjī”ti? Sā “ekadivasameva āgantvā puna nāgatapubbo”ti āha. Migaluddako ca tāvadevassa vasanaṭṭhānaṃ gantvā “kiṃ, bhante, aphāsuka”nti pāde parimajjanto pucchi. Upako nitthunanto parivattatiyeva. So “vadatha,

bhante, yaṃ mayā sakkā kātuṃ, sabbaṃ taṃ karissāmi”ti āha. Upako ekena pariyāyena attano ajjhāsayaṃ ārocesi. “Itaro jānāsi pana, bhante, kiñci sippa”nti. “Na jānāmi”ti. “Na, bhante, kiñci sippaṃ ajānantena sakkā gharaṃ āvasitu”nti. So āha – “nāhaṃ kiñci sippaṃ jānāmi, apica tumhākaṃ maṃsahārako bhavissāmi, maṃsañca vikkiṇissāmi”ti. Māgaviko “amhākampi etadeva rucati”ti uttarasāṭakaṃ datvā attano sahāyakassa gehe katipāhaṃ vasāpetvā tādise divase gharaṃ ānetvā dhītaṃ adāsi.

Atha kāle gacchante tesāṃ saṃvāsamanvāya putto nibbatti, **subhaddotissa** nāmaṃ akaṃsu. Cāpā tassa rodanakāle “upakassa putta, ājīvakaṃ putta, maṃsahārakaṃ putta, mā rodi mā rodī”tiādinā puttatosanagītena upakaṃ uppaṇḍesi. So “mā tvaṃ cāpe maṃ ‘anātho’ti maññi, atthi me sahāyo anantajino nāma, tassāhaṃ santikaṃ gamissāmi”ti āha. Cāpā “evamayaṃ atṭiyati”ti ñatvā punappunaṃ tathā kathesiyeva. So ekadivasāṃ tāya tathā vutto kujjhivā gantumāraddho. Tāya taṃ taṃ vatvā anuñyamānopi saññattim anāgacchanto pacchimadisābhimukho pakkāmi.

Bhagavā ca tena samayena sāvattiyāṃ jetavane viharanto bhikkhūnaṃ ācikkhi – “yo, bhikkhave, ajja ‘kuhiṃ anantajino’ti idhāgantvā pucchati, taṃ mama santikaṃ pesethā”ti. Upakopi “kuhiṃ anantajino vasati”ti tattha tattha pucchanto anupubbena sāvattim gantvā vihāraṃ pavisitvā vihāramajjhe ṭhatvā “kuhiṃ anantajino”ti pucchi. Taṃ bhikkhū bhagavato santikaṃ nayiṃsu. So bhagavantaṃ disvā “jānātha maṃ bhagavā”ti āha. “Āma, jānāmi, kuhiṃ pana tvaṃ ettakaṃ kālaṃ vasi”ti? “Vaṅghārajanapade, bhante”ti. “Upaka, idāni mahallako jāto pabbajitūṃ sakkhissāsi”ti? “Pabbajissāmi, bhante”ti. Satthā aññataraṃ bhikkhūṃ āṇāpesi – “ehi tvaṃ, bhikkhu, imaṃ pabbājehi”ti. So taṃ pabbājesi. So pabbajito satthu santike kammaṭṭhānaṃ gahetvā bhāvanāṃ anuyuñjanto na cirasseva anāgāmiṃphale patiṭṭhāya kālaṃ katvā avihesu nibbato, nibbattakkhaṇeyeva arahattaṃ pāpuṇi. Avihesu nibbattamattā satta janā arahattaṃ pattā, tesāṃ ayaṃ aññataro. Vuttañhetāṃ

“Avihaṃ upapannāse, vimuttā satta bhikkhavo;
Rāgadosaparikkhīṇā, tiṇṇā loke visattikaṃ.

“Upakopalagaṇḍo ca, pakkusāti ca te tayo;
Bhaddiyo khaṇḍadevo ca, bāhuraggi ca siṅgiyo;
Te hitvā mānusaṃ dehaṃ, dībbayogaṃ upaccagu”nti. (saṃ. ni. 1.105);

Upake pana pakkante nibbindahadayā cāpā dāraṃ ayyakassa niyyādetvā pubbe upakena gatamaggaṃ gacchantī sāvattim gantvā bhikkhūnānaṃ santike pabbajitvā vipassanāya kammaṃ karontī maggaṃ paṭipāṭiyā arahatte patiṭṭhitā, attano paṭipattim paccavekkhitvā pubbe upakena attanā ca kathitaḡāthāyo udānavasena ekajjhaṃ katvā –

292. “Laṭṭhihattho pure āsi, so dāni migaluddako;
Āsāya palipā ghorā, nāsakkhi pārametave.

293. “Sumattaṃ maṃ maññamānā, cāpi puttamatosayi;
Cāpāya bandhanaṃ chetvā, pabbajissaṃ punopahaṃ.

294. “Mā me kujjhi mahāvīra, mā me kujjhi mahāmuni;
Na hi kodhaparetassa, suddhi atthi kuto tapo.

295. “Pakkamissañca nālāto, kodha nālāya vacchati;
Bandhantī itthirūpena, samaṇe dhammajīvino.

296. “Ehi kāla nivattassu, bhuñja kāme yathā pure;

Ahañca te vasīkatā, ye ca me santi ñātakā.

297. “Etto cāpe catubbhāgaṃ, yathā bhāsasi tvañca me;
Tayī rattassa posassa, uḷāraṃ vata taṃ siyā.
298. “Kālaṅginiva takkāriṃ, pupphitaṃ girimuddhani;
Phullaṃ dālimalatthiṃva, antodīpeva pāṭaliṃ.
299. “Haricandalittaṅgiṃ, kāsikuttamadhāriṃ;
Taṃ maṃ rūpavatiṃ santiṃ, kassa ohāyaṃ gacchasi.
300. “Sākuntikova sakuṇiṃ, yathā bandhitumicchati;
Āharimena rūpena, na maṃ tvamaṃ bādhayissasi.
301. “Imañca me puttaphalaṃ, kāḷa uppāditaṃ tayā;
Taṃ maṃ puttavatiṃ santiṃ, kassa ohāya gacchasi.
302. “Jahanti putte sappaññā, tato ñātī tato dhanam;
Pabbajanti mahāvīrā, nāgo chetvāva bandhanaṃ.
303. “Idāni te imaṃ puttaṃ, daṇḍena churikāya vā;
Bhūmiyaṃ vā nisumbhissaṃ, puttasokā na gacchasi.
304. “Sace puttaṃ siṅgālānaṃ, kukkurānaṃ padāhisi;
Na maṃ puttakatte jammi, punarāvattayissasi.
305. “Handa kho dāni bhaddante, kuhiṃ kāḷa gamissasi;
Katamaṃ gāmanigamaṃ, nagaraṃ rājadhāniyo.
306. “Ahumha pubbe gaṇino, assamaṇā samaṇamānino;
Gāmena gāmaṃ vicarimha, nagare rājadhāniyo.
307. “Eso hi bhagavā buddho, nadiṃ nerañjaraṃ pati;
Sabbadukkhappahānāya, dhammaṃ deseti pāṇinaṃ;
Tassāhaṃ santikaṃ gacchaṃ, so me satthā bhavissati.
308. “Vandanaṃ dāni me vajjāsī, lokanāthaṃ anuttaraṃ;
Padakkhiṇaṃ katvāna, ādiseyyāsī dakkhiṇaṃ.
309. “Etaṃ kho labbhamamhehi, yathā bhāsasi tvañca me;
Vandanaṃ dāni te vajjaṃ, lokanāthaṃ anuttaraṃ;
Padakkhiṇaṃ katvāna, ādisissāmi dakkhiṇaṃ.
310. “Tato ca kāḷo pakkāmi, nadiṃ nerañjaraṃ pati;
So addasāsī sambuddhaṃ, desentaṃ amataṃ padaṃ.
311. “Dukkhamaṃ dukkhasamuppādaṃ, dukkhassa ca atikkamaṃ;
Ariyaṃ caṭṭhaṅgikaṃ maggaṃ, dukkhūpasamagāmiṇaṃ.
312. “Tassa pādāni vanditvā, katvāna naṃ padakkhiṇaṃ;
Cāpāya ādisitvāna, pabbajiṃ anagāriyaṃ;
Tisso vijjā anuppattā, kataṃ buddhassa sāsana”nti. —

Imā gāthā abhāsi.

Tattha **laṭṭhihattho** daṇḍahattho. **Pureti** pubbe paribbājakakāle caṇḍagoṇakukkurādīnaṃ parihaṇaṭṭhaṃ daṇḍaṃ hatthena gahetvā vicaraṇako ahosi. **So dāni migaluddakoti** so idāni migaluddehi saddhiṃ sambhogasaṃvāsehi migaluddo māgaviko jāto. **Āsāyāti** taṇhāya. “Āsāyā”tipi pāṭho, ajjhāsayaṇetūti attho. **Palipāti** kāmapaṅkato diṭṭhipaṅkato ca. **Ghorāti** aviditavipulānatthāvahattā dāruṇato ghorā. **Nāsakkhi pārametaveti** tasseva palipassa pārabhūtaṃ nibbānaṃ etuṃ gantuṃ na asakkhi, na abhisambhunīti attānameva sandhāya upako vadati.

Sumattaṃ maṃ maññamānāti attani suṭṭhu mattaṃ madappattaṃ kāmagedhavasena laggamaṃ pamattaṃ vā katvā maṃ sallakkhantī. **Cāpā puttamatosayīti** migaluddassa dhītā cāpā “ājīvakassa puttā”tiādīnā maṃ ghaṭṭentī puttaṃ tosesi keḷāyasi. “Supati maṃ maññamānā”ti ca paṭhanti, supatīti maṃ maññamānāti attho. **Cāpāya bandhanaṃ chetvāti** cāpāya tayi uppannaṃ kilesabandhanaṃ chinditvā. **Pabbajissaṃ punopahanti** puna dutiyavāraṃpi ahaṃ pabbajissāmi.

Idāni tassā “mayhaṃ attho natthī”ti vadati, taṃ sutvā cāpā khamāpentī “**mā me kujjhī**”ti gāthamāha. Tattha **mā me kujjhīti** keḷikaraṇamattena mā mayhaṃ kujjhi. **Mahāvīra, mahāmunīti** upakaṃ ālapati. Tañhi sā pubbepi pabbajito, idānipi pabbajitukāmoti katvā khantiṇca paccāsīsanti “mahāmunī”ti āha. Tenevāha – “**na hi kodhaparetassa, suddhi atthi kuto tapo**”ti, tvaṃ ettakampi asahanto kathaṃ cittaṃ damessasi, kathaṃ vā tapaṃ carissasīti adhippāyo.

Atha nālaṃ gantvā jīvitukāmosīti cāpāya vutto āha – “**pakkamissaṇca nālāto, kodha nālāya vacchati**”ti ko idha nālāya vasissati, nālātova ahaṃ pakkamissāmeva. So hi tassa jātagāmo, tato nikkhamitvā pabbaji. So ca magadharaṭṭhe bodhimaṇḍassa āsannapadesa, taṃ sandhāya vuttaṃ. **Bandhantī itthirūpena, samaṇe dhammajīvinoti** cāpe tvaṃ dhammena jīvante dhammike pabbajite attano itthirūpena itthikuttākappehi bandhantī tiṭṭhasi. Yenāhaṃ idāni ediso jāto, tasmā taṃ pariccajāmīti adhippāyo.

Evamaṃ vutte cāpā taṃ nivattetukāmā “**ehi, kālā**”ti gāthamāha. Tassattho – kālavaṇṇatāya, **kāla**, upaka, ehi **nivattassu** mā pakkamī, pubbe viya kāme paribhuñja, ahaṇca ye ca me santi ñātakā, te sabbeva tuyhaṃ mā pakkamitukāmatāya **vasikatā** vasavattino katāti.

Taṃ sutvā upako “**etto cāpe**”ti gāthamāha. Tattha **cāpeti** cāpe. Cāpasadisaaṅgalaṭṭhitāya hi sā, cāpāti nāmaṃ labhi, tasmā, cāpāti vuccati. Tvaṃ cāpe, yathā bhāsasi, idāni yādisaṃ kathesi, ito **catubbhāgameva** piyasamudācāraṃ kareyyāsī. Tayi **rattassa** rāgābhībūtassa purisassa uḷāraṃ vata taṃ siyā, ahaṃ panetarahi tayi kāmesu ca viratto, tasmā cāpāya vacane na tiṭṭhāmīti adhippāyo.

Puna, cāpā, attani tassa āsattiṃ uppādetukāmā “**kālaṅgini**”nti āha. Tattha, **kālāti** tassālapanaṃ. **Āṅgininti** aṅgalaṭṭhisampannaṃ. **Ivāti** upamāya nipāto. **Takkāriṃ pupphitaṃ girimuddhanīti** pabbatamuddhani ṭhitāṃ supupphitadālimalaṭṭhiṃ viya. “Ukkāgāri”nti ca keci paṭhanti, aṅgathilaṭṭhiṃ viyāti attho. Girimuddhanīti ca idaṃ kenaci anupahatasobhatādassanattaṃ vuttaṃ. Keci “kālaṅgini”nti pāṭhaṃ vatvā tassa kumbhaṇḍalatāsadisanti atthaṃ vadanti. **Phullaṃ dālimalaṭṭhiṃvāti** pupphitaṃ bījapūralataṃ viya. **Antodīpeva pāṭalinti** dīpakabbhantare pupphitapāṭalirukkhaṃ viya, dīpaggahaṇaṇcetta sobhāpāṭihāriyadassanattameva.

Haricandanalittaṅginti lohitaandanena anulittasabbaṅgiṃ. **Kāsikuttamadhārininti** uttamakāsikavatthadharaṃ. **Taṃ manti** tādisaṃ maṃ. **Rūpavatiṃ santinti** rūpasampannaṃ samānaṃ. **Kassa ohāya gacchasīti** kassa nāma sattassa, kassa vā hetuno, kena kāraṇena, ohāya pahāya pariccajitvā gacchasi.

Ito parampi tesāṃ vacanaṇaṭṭhāva ṭhapetvā pariyosāne tisso gāthā. Tattha **sākuntikovāti**

sakuṇaluddo viya. **Āharimena rūpenā**ti kesamaṇḍanādinā sarīrajagganena ceva vatthābharaṇādinā ca abhisāṅkhārikena rūpena vaṇṇena kittimena cāturiyenāti attho. **Na maṃ tvam bādhayissasī**ti pubbe viya idāni maṃ tvam na bādhituṃ sakkhissasi.

Puttaphalanti puttasaṅkhātama phalama puttapasavo.

Sappaññāti paññavanto, saṃsāre ādīnavavibhāvinīyā paññāya samannāgatāti adhippāyo. Te hi appama vā mahantaṃ vā ñātiparivaṭṭama bhogakkhandama vā pahāya pabbajanti. Tenāha – “**pabbajanti mahāvīrā, nāgo chetvāva bandhana**”nti, ayabandhanaṃ viya hatthināgo ghibandhanaṃ chinditvā mahāvīriyāva pabbajanti, na nihīnavīriyāti attho.

Daḍḍenāti yena kenaci daḍḍena. **Churikāyāti** khurena. **Bhūmiyaṃ vā nisumbhissanti** pathaviyaṃ pātetvā pothanaṃvijjhanādinā vibādhissāmi. **Puttasokā na gacchasī**ti puttasoṇanimittaṃ na gacchissasi.

Padāhisīti dassasi. **Puttakatteti** puttakāraṇā. **Jammī**ti tassā ālapanama, lāmaketi attho.

Idāni tassa gamaṇama anujānitvā gamaṇaṭṭhāṇama jānituma “**handā kho**”ti gāthamāha.

Itaro pubbe ahaṃ anīyyānikaṃ sāsanaṃ paggayha aṭṭhāsima, idāni pana niyyānike anantaṃjinassa sāsane ṭhātukāmo, tasmā tassa santikaṃ gamissāmīti dassento “**ahumhā**”tiādīmāha. Tattha **gaṇinoti** gaṇadharā. **Assamaṇāti** na samitapāpā. **Samaṇamaṇinoti** samitapāpāti evama saññino. **Vicarimhāti** pūraṇādīsu attāṇama pakkhipitvā vadati.

Nerañjaraṃ patīti nerañjarāya nadiyā samīpe tassā tīre. **Buddhoti** abhisambodhiṃ patto, abhisambodhiṃ patvā dhammaṃ desento sabbakālaṃ bhagavā tattheva vasīti adhippāyena vadati.

Vandanaṃ dāni me vajjāsīti mama vandanaṃ vadeyyāsī, mama vacanena lokanāthaṃ anuttaraṃ vadeyyāsīti attho. **Padakkhiṇaṇca katvāna, ādiseyyāsī dakkhiṇanti** buddhaṃ bhagavantaṃ tikkhattuma padakkhiṇama katvāpi catūsu ṭhānesu vanditvā, tato puññato mayhaṃ pattidānaṃ dento padakkhiṇama ādiseyyāsī buddhaguṇāṇama sutapubbattā hetusampannaṭṭāya ca evama vadati.

Etaṃ kho labbhamamhehīti etaṃ padakkhiṇakaraṇama puññaṃ amhehi tava dātuma sakkā, na nivattanaṃ, pubbe viya kāmūpabhogo ca na sakkāti adhippāyo. **Te vajjanti** tava vandanaṃ vajjama vakkhāmi.

Soti kāḷo, addasāsīti addakkhi.

Satthudesanāyama saccakathāya padhānattā tabbinimuttāya abhāvato “**dukkha**”ntiādi vuttaṃ, sesama vuttanayameva.

Cāpātherīgāthāvaṇṇanā niṭṭhitā.

4. Sundarītherīgāthāvaṇṇanā

Petāni bhoti puttānītiādīkā sundariyā theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī ito ekatīmaṃsakappe vessabhussa bhagavato kāle kulagehe nibbattitvā viññutaṃ patvā ekadīvasama sathāraṃ piṇḍāya carantaṃ disvā pasannaṃ mānasā bhikkhaṃ datvā pañcapatiṭṭhitena vandī. Sathā tassā cittaṃpasādaṃ ñatvā anumodanaṃ katvā pakkāmi. Sā tena puññakammaṇa tāvatiṃsesu nibbattitvā tattha yāvatāyukaṃ ṭhatvā dibbasampattiṃ anubhavitvā

tato cutā aparāparam sugatīsuyeva saṃsarantī paripakkaññā hutvā imasmiṃ buddhuppāde bārāṇasiyaṃ sujātassa nāma brāhmaṇassa dhītā hutvā nibbatti. Tassā rūpasampattiyā **sundarī**ti nāmaṃ ahosi. Vayappattakāle cassā kaniṭṭhabhātā kālamakāsi. Athassā pitā puttasokena abhibhūto tattha tattha vicaranto vāsiṭṭhittheriyā samāgantvā taṃ sokavinodanakāraṇaṃ pucchanto “petāni bhoti puttāni”tiādikā dve gāthā abhāsi. Therī taṃ sokābhibhūtaṃ ñatvā sokaṃ vinodetukāmā “bahūni puttasatāni”tiādikā dve gāthā vatvā attano asokabhāvaṃ kathesi. Taṃ sutvā brāhmaṇo “kathaṃ tvam, ayye, evaṃ asokā jātā”ti āha. Tassa therī ratanattayaguṇaṃ kathesi.

Atha brāhmaṇo “kuhiṃ satthā”ti pucchitvā “idāni mithilāyaṃ viharatī”ti taṃ sutvā tāvadeva rathaṃ yojetvā rathena mithilaṃ gantvā satthāraṃ upasaṅkamtivā vanditvā sammodanīyaṃ kathaṃ katvā ekamantaṃ nisīdi. Tassa satthā dhammaṃ desesi. So dhammaṃ sutvā paṭiladdhasaddho pabbajitvā vipassanaṃ paṭṭhapetvā ghaṭento vāyamanto tatiye divase arahattaṃ pāpuṇi. Atha sārathi rathaṃ ādāya bārāṇasiṃ gantvā brāhmaṇiyā taṃ pavattiṃ ārocesi. Sundarī attano pitu pabbajitabhāvaṃ sutvā, “amma, ahampi pabbajissāmi”ti mātaraṃ āpucchi. Mātā “yaṃ imasmiṃ gehe bhogajātaṃ, sabbam taṃ tuyhaṃ santakaṃ, tvam imassa kulassa dāyādikā paṭipajja, imaṃ sabbabhogaṃ paribhuñja, mā pabbajī”ti āha. Sā “na mayhaṃ bhogehi attho, pabbajissāmevāhaṃ, ammā”ti mātaraṃ anujānāpetvā mahatiṃ sampattiṃ khelaṇḍaṃ viya chaḍḍetvā pabbajī. Pabbajitvā ca sikkhamānāyeva hutvā vipassanaṃ vaḍḍhetvā ghaṭentī vāyamantī hetusampannatāya ñāṇassa paripākaṃ gatattā saha paṭisambhidāhi arahattaṃ pāpuṇi. Tena vuttaṃ **apadāne** –

“Piṇḍapātaṃ carantassa, vessabhussa mahesino;
Kaṭacchubhikkhamuggayha, buddhasetṭhassadāsahaṃ.

“Paṭiggahetvā sambuddho, vessabhū lokanāyako;
Vīthiyā saṅṭhito satthā, akā me anumodanaṃ.

“Kaṭacchubhikkhaṃ datvāna, tāvatimsaṃ gamissasi;
Chattimsadevarājūnaṃ, mahesittaṃ karissasi.

“Paññāsaṃ cakkavattīnaṃ, mahesittaṃ karissasi;
Manasā patthitaṃ sabbam, paṭilacchasi sabbadā.

“Sampattiṃ anubhotvāna, pabbajissasi kiñcanā;
Sabbāsava pariññāya, nibbāyissasināsavā.

“Idaṃ vatvāna sambuddho, vessabhū lokanāyako;
Nabhaṃ abbhuggamī vīro, haṃsarājāva ambare.

“Sudinnaṃ me dānavaraṃ, suyitṭhā yāgasampadā;
Kaṭacchubhikkhaṃ datvāna, pattāhaṃ acalaṃ padaṃ.

“Ekatiṃse ito kappe, yaṃ dānamadadiṃ tadā;
Duggatiṃ nābhijānāmi, bhikkhādānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā phalasukhena nibbānasukhena ca viharantī aparabhāge “satthu purato sīhanādaṃ nadissāmi”ti upajjhāyaṃ āpucchitvā bārāṇasito nikkhamitvā sambahulāhi bhikkhunīhi saddhiṃ anukkamena sāvatthiṃ gantvā satthu santikaṃ upasaṅkamtivā satthāraṃ vanditvā ekamantaṃ ṭhitā satthārā katapaṭisanthārā satthu orasadhītubhāvādivibhāvanena aññaṃ byākāsi. Athassā mātaraṃ ādiṃ katvā sabbo ñātigaṇo parijano ca pabbajī. Sā aparabhāge attano paṭipattiṃ paccavekkhitvā pitarā vuttagāthaṃ ādiṃ katvā udānavasena –

313. “Petāni bhoti puttāni, khādamānā tuvaṃ pure;
Tuvaṃ divā ca ratto ca, atīva paritappasi.
314. “Sājja sabbāni khāditvā, sataputtāni brāhmaṇī;
Vāseṭṭhi kena vaṇṇena, na bālhaṃ paritappasi.
315. “Bahūni puttāsātāni, ñātisaṅghasātāni ca;
Khāditāni atītaṃse, mama tuñhañca brāhmaṇa.
316. “Sāhaṃ nissaraṇaṃ ñatvā, jātiyā maraṇassa ca;
Na socāmi na rodāmi, na cāpi paritappayim.
317. “Abbhutaṃ vata vāseṭṭhi, vācaṃ bhāsasi edisim;
Kassa tvaṃ dhammamaññāya, giraṃ bhāsasi edisim.
318. “Esa brāhmaṇa sambuddho, nagaraṃ mithilaṃ pati;
Sabbadukkhappahānāya, dhammaṃ desesi pāṇinaṃ.
319. “Tassa brahme arahato, dhammaṃ sutvā nirūpadhim;
Tattha viññātasaddhammā, puttasokaṃ byapānudim.
320. “So ahampi gamissāmi, nagaraṃ mithilaṃ pati;
Appeva maṃ so bhagavā, sabbadukkhā pamocaye.
321. “Addasa brāhmaṇo buddhaṃ, vippamuttaṃ nirūpadhim;
Svassa dhammadesesi, muni dukkhassa pārāgū.
322. “Dukkhāṃ dukkhasamuppādaṃ, dukkhassa ca atikkamaṃ;
Ariyaṃ caṭṭhaṅgikaṃ maggaṃ, dukkhūpasamagāminaṃ.
323. “Tattha viññātasaddhammo, pabbajjaṃ samarocayi;
Sujāto tīhi rattīhi, tisso vijjā aphassayi.
324. “Ehi sārathi gacchāhi, rathaṃ niyyādayāhimam;
Ārogyaṃ brāhmaṇim vajja, pabbaji dāni brāhmaṇo;
Sujāto tīhi rattīhi, tisso vijjā aphassayi.
325. “Tato ca rathamādāya, sahassañcāpi sārathi;
Ārogyaṃ brāhmaṇimvoca, ‘pabbaji dāni brāhmaṇo;
Sujāto tīhi rattīhi, tisso vijjā aphassayi.
326. “Etañcāhaṃ assarathaṃ, sahassañcāpi sārathi;
Tevijjaṃ brāhmaṇaṃ sutvā, puṇṇapattaṃ dadāmi te.
327. “Tuyheva hotvassaratho, sahassañcāpi brāhmaṇi;
Ahampi pabbajissāmi, varapaññassa santike.
328. “Hatthī gavassaṃ maṇikuṇḍalañca, phītañcimam gahavibhavaṃ pahāya;
Pitā pabbajito tuyhaṃ, bhuñja bhogāni sundarī;
Tuvaṃ dāyādikā kule.
329. “Hatthī gavassaṃ maṇikuṇḍalañca, rammaṃ cimam gahavibhavaṃ pahāya;

Pitā pabbajito mayhaṃ, puttasokena aṭṭito;
Ahampi pabbajissāmi, bhātusokena aṭṭitā.

330. “So te ijjhatu saṅkappo, yaṃ tvaṃ patthesi sundarī;
Uttiṭṭhapiṇḍo uñcho ca, paṃsukūlañca cīvaram;
Etāni abhisambhontī, paraloke anāsavā.
331. “Sikkhamānāya me ayye, dibbacakkhu visodhitam;
Pubbenivāsam jānāmi, yattha me vusitam pure.
332. “Tuvaṃ nissāya kalyāṇi, theri saṅghassa sobhane;
Tisso vijjā anuppattā, kataṃ buddhassa sāsanaṃ.
333. “Anujānāhi me ayye, icche sāvatti gantave;
Sīhanādam nadissāmi, buddhaseṭṭhassa santike.
334. “Passa sundari satthāram, hemavaṇṇam harittacam;
Adantānam dametāram, sambuddhamakutobhayaṃ.
335. “Passa sundarimāyantim, vipparamuttam nirūpadhim;
Vītarāgam viṣamyuttam, katakiccamanāsavaṃ.
336. “Bārāṇasito nikkamma, tava santikamāgatā;
Sāvikā te mahāvīra, pāde vandati sundarī.
337. “Tuvaṃ buddho tuvaṃ satthā, tuyhaṃ dhītāmi brāhmaṇa;
Orasā mukhato jātā, katakiccā anāsavā.
338. “Tassā te svāgataṃ bhaddo, tato te adurāgataṃ;
Evañhi dantā āyanti, satthu pādāni vandikā;
Vītarāgā viṣamyuttā, katakiccā anāsavā”ti. —

Imā gāthā paccudāhāsi.

Tattha **petānī**ti matāni. **Bhotī**ti taṃ ālapati. **Puttānī**ti līngavipallāsena vuttam, pete putteti attho. Eko eva ca tassā putto mato, brāhmaṇo pana “cirakālam ayaṃ sokena aṭṭa hutvā vicari, bahū maññe imissā puttā matā”ti evaṃsaññī hutvā bahuvacanenāha. Tathā ca “sājja sabbāni khādītva sataputtānī”ti. **Khādamānā**ti lokavohāravasena khumsanavacanametam. Loke hi yassā itthiyā jātajātā puttā maranti, taṃ garahantā “puttakhādīnī”tiādīṃ vadanti. **Atīvā**ti ativiya bhusam. **Paritappasī**ti santappasi, pureti yojanā. Ayañhettha saṅkhepattho – bhoti vāseṭṭhi, pubbe tvaṃ mataputtā hutvā socantī paridevantī ativiya sokāya samappitā gāmanigamarājadhāniyo āhiṇḍasi.

Sāj jāti sā ajja, sā tvaṃ etarahīti attho. “Sāj jā”ti vā pāṭho. **Kena vaṇṇenā**ti kena kāraṇena.

Khādītānīti therīpi brāhmaṇena vuttapariyāyeneva vadati. Khādītāni vā byagghadīpibīlārādijātiyo sandhāyevamāha. **Atītamseti** atītakoṭṭhāse, atikkantabhavesūti attho. **Mama tuyhañcā**ti mayā ca tayā ca.

Nissaraṇam nātvā jātiyā maraṇassa cāti jātijarāmarāṇānam nissaraṇabhūtam nibbānam maggañāṇena paṭivijjhītvā. **Na cāpi paritappayinti** na cāpi upāyāsasiṃ, ahaṃ upāyāsam na āpajjinti attho.

Abbhutaṃ vatāti acchariyaṃ vata. Tañhi abbhutaṃ pubbe abhūtaṃ abbhutanti vuccati. **Edisinti** evarūpiṃ, “na socāmi na rodāmi, na cāpi paritappayi”nti evaṃ socanādīnaṃ abhāvādīpaniṃ vācaṃ. **Kassa tvaṃ dhammamaññāyāti** kevalaṃ yathā ediso dhammo laddhuṃ na sakkā, tasmā kassa nāma satthuno dhammamaññāya girāṃ bhāsasi edisanti satthāraṃ sāsanañca pucchati.

Nirūpadhinti niddukkhaṃ. **Viññātasaddhammāti** paṭividdhaariyasaccadhammā. **Byapānudinti** nīhariṃ pajahiṃ.

Vippamuttanti sabbaso vimuttaṃ, sabbakilesehi sabbabhavehi ca viṣaṃyuttaṃ. **Svassāti** so sammāsambuddho assa brāhmaṇassa.

Tatthāti tassaṃ catusaccadhammadesanāyaṃ.

Rathaṃ niyyādayāhimanti imaṃ rathaṃ brāhmaṇiyā niyyādehi.

Sahassañcāpīti maggaparibbayatthaṃ nītaṃ kahāpaṇasahassañcāpi ādāya niyyādehīti yojanā.

Assarathanti assayuttarathaṃ. **Puṇṇapattanti** tuṭṭhidānaṃ.

Evaṃ brāhmaṇiyā tuṭṭhidāne diyyamāne taṃ asampaṭicchanto sārathi “tuyheva hotū”ti gāthaṃ vatvā satthu santikameva gantvā pabbaji. Pabbajite pana sārathimhi brāhmaṇī attano dhītaraṃ sundariṃ āmantetvā gharāvāse niyojenti “**hatthi gavassa**”nti gāthamāha. Tattha **hatthīti** hatthino. **Gavassanti** gāvo ca assā ca. **Maṇikuṇḍalañcāti** maṇi ca kuṇḍalāni ca. **Phītañcimāṃ gahavibhavaṃ pahāyāti** imaṃ hatthiādippabhedāṃ yathāvuttaṃ avuttañca khattavatthuhiraññasuvaṇṇādibhedāṃ phītaṃ pahūtañca gahavibhavaṃ gehūpakaraṇaṃ aññañca dāsīdāsādikaṃ sabbāṃ pahāya tava pitā pabbajito. **Bhuñja bhogaṇi sundarīti** sundari, tvaṃ ime bhoge bhuñjassu. **Tuvaṃ dāyādikā kuleti** tuvañhi imasmīṃ kule dāyajjārahāti.

Taṃ sutvā sundarī attano nekkhammajjhāsayaṃ pakāsentī “**hatthigavassa**”ntiādīmāha.

Atha naṃ mātā nekkhammeyeva niyojenti “**so te ijjhātū**”tiādīnā diyaḍḍhagāthamāha. Tattha **yaṃ tvaṃ patthesi sundarīti** sundari tvaṃ idāni yaṃ patthesi ākaṅkhasi. So tava pabbajjāya **saṅkappo** pabbajjāya chando **ijjhātu** anantarāyena sijjhātu. **Uttiṭṭhapiṇḍoti** ghare ghare patiṭṭhitvā laddhabbhikkhāpiṇḍo. **Uñchoti** tadatthaṃ gharapaṭipāṭiyā āhiṇḍanaṃ uddissa ṭhānañca. **Etānīti** uttiṭṭhapiṇḍādīni. **Abhisambhontīti** anibbinnarūpā jaṅghabalaṃ nissāya abhisambhavanti, sādhentīti attho.

Atha sundarī “sādhu, amma”ti mātuyā paṭissuṇitvā nikkhamitvā bhikkhunupassayaṃ gantvā sikkhamānāyeva samānā tisso vijjā sacchikatvā “satthu santikaṃ gamissāmī”ti upajjhāyaṃ ārocetvā bhikkhunīhi saddhiṃ sāvattiṃ agamāsi. Tena vuttaṃ “**sikkhamānāya me, ayye**”tiādi. Tattha **sikkhamānāya meti** sikkhamānāya samānāya mayā. **Ayyeti** attano upajjhāyaṃ ālapati.

Tuvaṃ nissāya kalyāṇi, theri saṅghassa sobhaneti bhikkhunisaṅghe vuddhatarabhāvena thiraguṇayogena ca saṅghattheri sobhanehi sīlādīhi samannāgatattā sobhane kalyāṇi kalyāṇamitte, ayye, taṃ nissāya mayā tisso vijjā anuppattā kataṃ buddhassa sāsanti yojanā.

Iceheti icchāmi. **Sāvatti gantaveti** sāvattiṃ gantaṃ. **Sihanādaṃ nadissāmīti** aññābyākaraṇameva sandhāyāha.

Atha sundarī anukkamena sāvattiṃ gantvā vihāraṃ pavisitvā satthāraṃ dhammāsane nisinnaṃ

disvā ulāraṃ pītisomanassaṃ paṭisaṃvedayamānā attānameva ālapantī āha “**passa sundarī**”ti. **Hemavaṇṇanti** suvaṇṇavaṇṇaṃ. **Harittacanti** kañcanasannibhattacaṃ. Ettha ca bhagavā pītavaṇṇena “suvaṇṇavaṇṇo”ti vuccati. Atha kho sammadeva ghaṃsitvā jātihiṅgulakena anulimpitvā suparimajjitakañcanādāsasannibhoti dassetuṃ “hemavaṇṇa”nti vatvā “harittaca”nti vuttaṃ.

Passa sundarimāyantinti taṃ sundarināmikaṃ maṃ bhagavā āgacchanti passa. “**Vippamutta**”ntiādinā aññaṃ byākarontī pītivipphāravasena vadati.

Kuto pana āgatā, kattha ca āgatā, kīdisā cāyaṃ sundarīti āsaṅkantānaṃ āsaṅkaṃ nivattetuṃ “bārāṇasito”ti gāthaṃ vatvā tattha “sāvīkā cā”ti vuttamatthaṃ pākātataṃ kātuṃ “**tuvaṃ buddho**”ti gāthamāha. Tassattho – imasmiṃ sadevake loke tuvameveko sabbaññubuddho, diṭṭhadhammikasamparāyikaparamatthehi yathārahaṃ anusāsanato tuvaṃ me **satthā**, ahañca khīṇāsavabrāhmaṇī bhagavā tuyhaṃ ure vāyāma janitābhijātītāya **orasā**, mukhato pavattadhammaghosena sāsanassa ca mukhabhūtena ariyamaggena jātattā **mukhato jātā**, niṭṭhitapariññātādikaraṇīyatāya **katakiccā**, sabbaso āsavānaṃ khepitattā **anāsavāti**.

Athassā satthā āgamaṃ abhinandanto “**tassā te svāgata**”nti gāthamāha. Tassattho – yā tvaṃ mayā adhigataṃ dhammaṃ yāthāvato adhigacchi. Tassā te, **bhadde** sundari, idha mama santike āgataṃ āgamaṃ suāgataṃ. Tato eva taṃ **adurāgataṃ** na durāgataṃ hoti. Kasmā? Yasmā **evañhi dantā āyantī**ti, yathā tvaṃ sundari, evañhi uttamaṃ ariyamaggadamathena dantā tato eva sabbadhi **vītarāgā**, sabbesaṃ saṃyojanānaṃ samucchinnattā **visaṃyuttā** katakiccā anāsavā satthu pādānaṃ vandikā āgacchanti, tasmā tassā te svāgataṃ adurāgataṃ yojanā.

Sundarītherīgāthāvaṇṇanā niṭṭhitā.

5. Subhākammāradhītherīgāthāvaṇṇanā

Daharāhantiādīkā subhāya kammāradhītāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī anukkamena sambhāvitakusalāmūlā upacitavimokkhasambhārā sugatīsuyeva saṃsarantī paripakkaññā hutvā imasmiṃ buddhuppāde rājagahe aññatarassa suvaṇṇakārassa dhītā hutvā nibbatti, rūpasampattisobhāya **subhāti** tassā nāmaṃ ahoṣi. Sā anukkamena viññutaṃ patvā, satthu rājagahappavesane satthari sañjātappasādā ekadivasam bhagavantaṃ upasaṅkamitvā vanditvā ekamantaṃ nisīdi. Satthā tassā indriyaparipākaṃ disvā ajjhāsayanurūpaṃ catusaccagabbhadhammaṃ desesi. Sā tāvadeva sahasanayapaṭimaṇḍite sotāpattiphale patiṭṭhāsi. Sā aparabhāge gharāvāse dosaṃ disvā mahāpajāpatiyā gotamiyā santike pabbajitvā bhikkhunīsile patiṭṭhitā uparimaggatthāya bhāvanamanuyuñji. Taṃ ñātakā kālena kālaṃ upasaṅkamitvā kāmehi nimantentā pahūtadhaṇaṃ vibhavajātañca dassetvā palobhenti. Sā ekadivasam attano santikaṃ upagatānaṃ gharāvāsesu kāmesu ca ādīnavaṃ pakāsentī “daharāha”ntiādhī catuvīsatiyā gāthāhi dhammaṃ kathetvā te nirāse katvā vissajjetvā vipassanāya kammaṃ karontī indriyāni pariyaḍapentī bhāvanaṃ ussukkāpetvā na cirasseva saha paṭisambhidāhi arahattaṃ pāpuṇi. Arahattaṃ pana patvā –

339. “Daharāhaṃ suddhavasanaṃ, yaṃ pure dhammamassuṇiṃ;
Tassā me appamattāya, saccābhisamayo ahu.

340. “Tatohaṃ sabbakāmesu, bhusaṃ aratimajjhagaṃ;
Sakkāyasmim bhayaṃ disvā, nekkhammaeva pīhaye.

341. “Hitvānaṃ ñātigaṇaṃ, dāsakammakarāni ca;
Gāmakhetāni phītāni, ramaṇīye pamodite.

342. “Pahāyahaṃ pabbajitā, sāpateyyamanappakam;
Evaṃ saddhāya nikkhamma, saddhamme suppavedite.
343. “Netam assa patirūpaṃ, ākiñcaññañhi patthaye;
Yo jātarūpaṃ rajataṃ, chaḍḍetvā punarāgame.
344. “Rajataṃ jātarūpaṃ vā, na bodhāya na santiyā;
Netam samaṇasārappaṃ, na etaṃ ariyaddhanaṃ.
345. “Lobhanaṃ madanañcetaṃ, mohanaṃ rajavaḍḍhanaṃ;
Sāsaṅkaṃ bahuāyāsaṃ, natthi cettha dhuvaṃ ṭhiti.
346. “Ettha rattā pamattā ca, saṃkiliṭṭhamaṇā narā;
Aññaṃaññaṇa byāruddhā, puthū kubbanti medhagaṃ.
347. “Vadho bandho parikleso, jāni sokapariddavo;
Kāmesu adhipannānaṃ, dissate byasanaṃ bahuṃ.
348. “Taṃ maṃ ñātī amittāva, kiṃ vo kāmesu yuñjatha;
Jānātha maṃ pabbajitaṃ, kāmesu bhayadassinim.
349. “Na hiraññasuvaṇṇena, parikkhīyanti āsavā;
Amittā vadhakā kāmā, sapattā sallabandhanā.
350. “Taṃ maṃ ñātī amittāva, kiṃ vo kāmesu yuñjatha;
Jānātha maṃ pabbajitaṃ, muṇḍaṃ saṅghāṭipārutaṃ.
351. “Uttiṭṭhapiṇḍo uñcho ca, paṃsukūlañca cīvaram;
Etaṃ kho mama sārappaṃ, anagārūpanissayo.
352. “Vantā mahesīhi kāmā, ye dibbā ye ca mānusā;
Khematṭhāne vimuttā te, pattā te acalaṃ sukhaṃ.
353. “Māhaṃ kāmehi saṃgacchim, yesu tāṇaṃ na vijjati;
Amittā vadhakā kāmā, aggikkhandhūpamā dukhā.
354. “Paripantho esa bhayo, savighāto sakaṇṭako;
Gedho suvisamo ceso, mahanto mohanāmukho.
355. “Upasaggo bhīmarūpo, kāmā sappasirūpamā;
Ye bālā abhinandanti, andhabhūtā puthujjanā.
356. “Kāmapaṅkena sattā hi, bahū loke aviddasū;
Pariyantaṃ na jānanti, jātiyā maraṇassa ca.
357. “Duggatigamaṇaṃ maggaṃ, manussā kāmahetukaṃ;
Bahuṃ ve paṭipajjanti, attano rogamāvahaṃ.
358. “Evaṃ amittajananā, tāpanā saṃkilesikā;
Lokāmisā bandhanīyā, kāmā maraṇabandhanā.
359. “Ummādanā ullapanā, kāmā cittappamāthino;

Sattānaṃ saṃkilesāya, khippaṃ mārena oḍḍitaṃ.

360. “Anantādīnavā kāmā, bahudukkhā mahāvisā;
Appassādā raṇakarā, sukkapakkhavisosānā.
361. “Sāhaṃ etādisaṃ katvā, byasanaṃ kāmahetukaṃ;
Na taṃ paccāgamiṃsāmi, nibbānābhiraṭṭā sadā.
362. “Raṇaṃ taritvā kāmānaṃ, sītibhāvābhikaṅkhinī;
Appamattā vihassāmi, sabbasaṃyojanakkhaye.
363. “Asokaṃ virajaṃ khemaṃ, ariyaṭṭhaṅgikaṃ ujum;
Taṃ maggaṃ anugacchāmi, yena tiṇṇā mahesino.
364. “Imaṃ passatha dhammaṭṭhaṃ, subhaṃ kammāradhītaṃ;
Anejaṃ upasampajja, rukkhamaṃlamhi jhāyati.
365. “Ajjaṭṭhamī pabbajitā, saddhā saddhammasobhanā;
Vinītipalavaṇṇāya, tevijjā macchāyini.
366. “Sāyaṃ bhujissā aṇaṇā, bhikkhuni bhāvitindriyā;
Sabbayogavisamūyuttā, katakicā anāsavā.
367. “Taṃ sakko devasaṅghena, upasaṅkamma iddhiyā;
Namassati bhūtapati, subhaṃ kammāradhītaṃ”nti. – imā gāthā abhāsi;

Tattha **daharāhaṃ suddhavasanaṃ, yaṃ pure dhammamassuṇinti** yasmā ahaṃ pubbe daharā taruṇī eva suddhavasanaṃ suddhavatthanivattā alaṅkatappaṭiyattā satthu santike dhammaṃ assosiṃ. **Tassā me appamattāya, saccābhisamayo ahūti** yasmā ca tassā me mayhaṃ yathāsutaṃ dhammaṃ paccavekkhitvā appamattāya upaṭṭhitassatiyā sīlaṃ adhiṭṭhahitvā bhāvanaṃ anuyuṇṇantiyāva catunnaṃ ariyasaccānaṃ abhisamayo “idaṃ dukkha”ntiadinā (paṭi. ma. 1.32) paṭivedho ahoṣi.

Tatohaṃ sabbakāmesu, bhusaṃ aratimajjhaganti tato tena kāraṇena satthu santike dhammassa sutattā saccānaṅca abhisamitattā manussesu dibbesu cāti sabbesupi kāmesu bhusaṃ ativiya aratiṃ ukkaṅṭhiṃ adhigacchiṃ. **Sakkāyasmim** upādānakkhandhapaṅcake, **bhayaṃ** sappaṭibhayaabhāvaṃ ṇānacakkhunā disvā, **nekkhamameva** pabbajjaṃ nibbānameva, **pihaye** pihayāmi patthayāmi.

Dāsakammakarāni cāti dāse ca kammakāre ca, liṅgavipallāsena hetuṃ vuttaṃ. **Gāmakhetānīti** gāme ca pubbaṇṇāparaṇṇaviruhanakkhetāni ca, gāmapariyāpannāni vā khetāni. **Phitānīti** samiddhāni. **Ramaṇīyeti** manuṇṇe. **Pamoditēti** pamudite, bhogakkhandhe hitvāti sambandho. **Sāpateyyanti** santakaṃ dhanam, maṇikanakaraṇatādipariggahavattuṃ. **Anappakanti** mahantaṃ, pahāyāti yojanā. **Evaṃ saddhāya nikkhamāti** “hitvānaṃ nātigaṇa”ntiadinā vuttappakāreṇa mahantaṃ nātīparivaṭṭaṃ mahantaṅca bhogakkhandhaṃ pahāya kammakammaphalāni ratanattayaṅcāti saddheyyavattuṃ saddhāya saddahitvā gharato nikkhamma, **saddhamme suppedite** sammāsambuddhena suṭṭhu pvedite ariyavinaye ahaṃ pabbajitā.

Evaṃ pabbajitāya pana **netam assa patirūpaṃ**, yadidaṃ chaḍḍitānaṃ kāmānaṃ paccāgamaṃ. **Ākiṅcaṅṇāhi patthayeti** ahaṃ ākiṅcanabhāvaṃ apariggahabhāvameva patthayāmi. **Yo jātarūparajataṃ, chaḍḍetvā punarāgame**ti yo puggalo suvaṇṇaṃ rajataṃ añṇampi vā kiṅci dhanajātaṃ chaḍḍetvā puna taṃ gaṇheyya, so paṇḍitānaṃ antare kathaṃ sīsaṃ ukkhipeyya?

Yasmā **rajataṃ jātarūpaṃ vā, na bodhāya na santiyā** na maggañāyāya na nibbānāya hotīti attho. **Netam samaṇasārūppanti** etaṃ jātarūparajataḍipariggahavatthu, tassa vā pariggaṇhanaṃ samaṇānaṃ sārūppaṃ na hoti. Tathā hi vuttaṃ “na kappati samaṇānaṃ sakyaputtiyānaṃ jātarūparajata”ntiādi (cūḷava. 446). **Na etaṃ ariyaddhanaṃ** etaṃ yathāvuttapariggahavatthu saddhādidhanaṃ viya ariyadhammamayampi dhanaṃ na hoti, na ariyabhāvāvahato. Tenāha “lobhana”ntiādi.

Tattha **lobhananti** lobhuppādanaṃ. **Madananti** madāvahaṃ. **Mohananti** sammohajananaṃ. **Rajavaḍḍhananti** rāgarajādisaṃvaḍḍhanaṃ. Yena pariggahitaṃ, tassa āsaṅkāvahattā saha āsaṅkāya vattaṭīti **sāsaṅkaṃ**, yena pariggahitaṃ, tassa yato kuto āsaṅkāvahanti attho. **Bahuāyāsanti** sajjanarakkhaṇādivasena bahuparissamaṃ. **Natthi cettha dhuvam ̥hitīti** etasmiṃ dhane dhuvabhāvo ca ̥hitibhāvo ca natthi, cañcalamanavaṭṭhitamevāti attho.

Ettha rattā pamattā cāti etasmiṃ dhane rattā sañjātarāgā dasakusaladhammesu satiyaṃ vipavāsenā pamattā. **Samkiliṭṭhamaṇā** lobhādisaṃkilesena samkiliṭṭhacittāva nāma honti. Tato ca **aññamaññaṃ byāruddhā, puthū kubbanti medhagaṃ** antamaso mātāpi puttēna, puttōpi mātārāti evaṃ aññamaññaṃ paṭiruddhā hutvā puthū sattā medhagaṃ kalahaṃ karonti. Tenāha bhagavā – “puna caparaṃ, bhikkhave, kāmahetu kāmanidānaṃ kāmadhikaraṇaṃ...pe... mātāpi puttēna vivadati puttōpi mātārā vivadatī”tiādi (ma. ni. 1.168, 178).

Vadhoti maraṇaṃ. **Bandhoti** addubandhanāḍibandhanaṃ. **Pariklesoti** hatthacchedāḍiparikilesāpatti. **Jānīti** dhanajāni ceva parivārajāni ca. **Sokapariddavoti** soko ca paridevo ca. **Adhipannānanti** ajjhositānaṃ. **Dissate byasanaṃ bahunti** yathāvuttavadhabandhanāḍibhedam avuttañca domanassupāyāsāḍim diṭṭhadhammikaṃ samparāyikañca bahuṃ bahuviddham byasanaṃ anatto kāmesu dissateva.

Tam maṃ ñāti amittāva, kiṃ vo kāmesu yuñjathāti tādisaṃ maṃ yathā kāmesu virattaṃ tumhe ñāti ñātakā samānā anattakāmā amittā viya kiṃ kena kāraṇena kāmesu yuñjatha niyojetha. **Jānātha maṃ pabbajitaṃ, kāmesu bhayadassininti** kāme bhayato passantiṃ pabbajitaṃ maṃ ājānātha, kiṃ ettakaṃ tumhehi anaññānti adhippāyo.

Na hiraññasuvaṇṇena, parikkhīyanti āsavāti kāmasavādayo hiraññasuvaṇṇena na kadāci parikkhayaṃ gacchanti, atha kho tehi eva parivaḍḍhanteva. Tenāha – “**amittā vadhakā kāmā, sapattā sallabandhanā**”ti. Kāmā hi ahitāvahattā mettīyā abhāvena **amittā**, maraṇahetutāya ukkhittāsikavadhakasāḍisattā **vadhakā**, anubandhitvāpi anattāvahanaṭāya verānubandhasapattasāḍisattā **sapattā**, rāgāḍinaṃ sallānaṃ bandhanaṭo **sallabandhanā**.

Muḍanti muḍitakesaṃ. Tattha tattha nantakāni gahetvā saṅghāṭicīvarapārūpanena **saṅghāṭipārutaṃ**.

Uttiṭṭhapiṇḍoti vivaṭadvāre ghare ghare patiṭṭhitvā labhanakapiṇḍo. **Uñchoti** tadatthaṃ uñchācariyā. **Anagārūpanissayoti** anagārānaṃ pabbajitānaṃ upagantvā nissitabbato upanissayabhūto jīvitaparikkhāro. Tañhi nissāya pabbajitā jīvanti.

Vantāti chaḍḍitā. **Mahesīhīti** buddhāḍihi mahesīhi. **Khematṭhāneti** kāmayogāḍihi anupaddavaṭṭhānabhūte nibbāne. **Teti** mahesayo. **Acalaṃ sukhanti** nibbānasukhaṃ pattā. Tasmā tam patthentena kāmā pariccajittabātī adhippāyo.

Māhaṃ kāmehi samgacchinti ahaṃ kadācīpi kāmehi na samāgaccheyyaṃ. Kasmāti ce āha – “**yesu tāṇaṃ na vijjati**”tiādi, yesu kāmehi upaparikkhīyamānesu ekasmīpi anattaparittāṇaṃ nāma natthi. **Aggikkhandhūpamā** mahābhittāpaṭṭhena. **Dukhā** dukkhamaṭṭhena.

Paripantho esa bhayo yadidaṃ kāmā nāma aviditavipulānatthāvahattā. **Savighāto** cittavighātakarattā. **Sakaṅṭako** vinivijjanattā. **Gedho suvisamo cesoti** giddhihetutāya gedho. Suṭṭhu visamo mahāpalibodho so. Duratikkamanaṅṭhena **mahanto**. **Mohanāmukho** mucchāpattihetuto.

Upasaggo bhīmarūpoti atibhiṃsanakasabhāvo, mahanto devatūpasaggo viya anattakādidukkhāvahanato. **Sappasirūpamā kāmā** sappaṭibhayatṭhena.

Kāmapaṅkena sattāti kāmasaṅkhātena paṅkena sattā laggā.

Duggatigamaṇaṃ magganti nirayādiapāyagāmināṃ maggaṃ. **Kāmahetukanti** kāmopabhogahetukaṃ. **Bahunti** pāṇātipātādibhedena bahuviddhaṃ. **Rogamāvahanti** rujjanaṅṭhena rogasaṅkhātassa diṭṭhadhammikādibhedassa dukkhassa āvahanakaṃ.

Evanti “amittā vadhakā” tiādinā vuttappakārena. **Amittajananāti** amittabhāvassa nibbattanakā. **Tāpanāti** santāpanakā, tapanīyāti attho. **Samkilesikāti** samkilesāvahā. **Lokāmisāti** loke āmisabhūtā. **Bandhaniyāti** bandhabhūtehi saṃyojanehi vaḍḍhitabbā, saṃyojanīyāti attho. **Maraṇabandhanāti** bhavadīsu nibbattinimittatāya pavattakāraṇato ca maraṇavibandhanā.

Ummādanāti vipariṇāmadhammānaṃ viyogavasena sokummādarkarā, vaḍḍhiyā vā uparūparimadāvahā. **Ullapanāti** “aho sukhaṃ aho sukha” nti uddhaṃ uddhaṃ lapāpanakā. “Ullolanā” tipi pāṭho, bhattapiṇḍanimittaṃ naṅguṭṭhaṃ ullolento sunakho viya āmisahetu satte uparūparilālanā, parābhavāvaññātapāpanakāti attho. **Cittappamāthinoti** pariḷāhuppādanādinā sampati āyatiṅca cittassa pamathanasīlā. “Cittappamaddino” ti vā pāṭho, so evattho. Ye pana “cittappamādinō” ti vadanti, tesāṃ cittassa pamādāvahāti attho. **Samkilesāyāti** vibādhanāya upatāpanāya vā. **Khippaṃ mārena oḍḍitanti** kāmā nāmete mārena oḍḍitaṃ kuminanti daṭṭhabbā sattānaṃ anattāvahanato.

Anantādīnavāti “lobhanaṃ madanañceta” ntiādinā, “idha sītassa purakkhato uṇhassa purakkhato” tiādinā (ma. ni. 1.167) ca dukkhakkhandhasuttādīsu vuttanayena apariyantādīnavā bahudosā. **Bahudukkhāti** āpāyikādibahuviddhadukkhānubandhā. **Mahāvisāti** kaṭukāsayaphalatāya halāhalādīmahāvisasadisā. **Appassādāti** satthadhārāgatamadhubindu viya parittassādā. **Raṇakarāti** sārāgādisaṃvaḍḍhakā. **Sukkapakkhavisosanāti** sattānaṃ anavajjakoṭṭhāsassa vināsakā.

Sāhanti sā ahaṃ, heṭṭhā vuttanayeneva satthu santike dhammaṃ sutvā paṭiladdhasaddhā kāme pahāya pabbajitvā ṭhitāti attho. **Etādisanti** evarūpaṃ vuttappakāraṃ. **Katvāti** iti katvā, yathāvuttakāraṇenāti attho. **Na taṃ paccāgamissāmīti** taṃ mayā pubbe vantakāme puna na paribhuñjissāmi. **Nibbānābhiratā sadāti** yasmā pabbajitakālato paṭṭhāya sabbakālaṃ nibbānābhiratā, tasmā na taṃ paccāgamissāmīti yojanā.

Raṇaṃ taritvā kāmānanti kāmānaṃ raṇaṃ taritvā, taṅca mayā kātabbaṃ ariyamaggasaṃpahāraṃ katvā. **Sītībhāvābhikaṅkhinīti** sabbakilesadarathapariḷāhavūpasamena sītībhāvasaṅkhātaṃ arahattaṃ abhikaṅkhantī. **Sabbasaṃyojanakkhayeti** sabbesaṃ saṃyojanānaṃ khayabhūte nibbāne abhiratā.

Yena tiṇṇā mahesinoti yena ariyamaggena buddhādayo mahesino saṃsāramahoghaṃ tiṇṇā, ahampi tehi gatamaggaṃ anugacchāmi, sīlādipaṭipattiyā anupāpuṇāmīti attho.

Dhammaṅṭhanti ariyaphaladhamme ṭhitaṃ. **Anejanti** paṭippassaddha ejaṭāya anejanti laddhanāmaṃ aggaphalaṃ. **Upasampajjāti** sampādetvā aggamaggādhigamena adhigantvā. **Jhāyatīti** tameva phalajjhānaṃ upanijjhāyati.

Ajjaṭṭhamī pabbajitāti pabbajitā hutvā pabbajitato paṭṭhāya ajja aṭṭhamadivaso, ito atīte aṭṭhamiyaṃ pabbajitāti attho. **Saddhāti** saddhāsampannā. **Saddhammasobhanāti** saddhammādhigamena sobhanā.

Bhujissāti dāsabhāvasadisānaṃ kilesānaṃ pahānena bhujissā. Kāmacchandādiṇṇāpagamena **aṇaṇā**.

Imā kira tisso gāthā pabbajitvā aṭṭhame divase arahattaṃ patvā aññatarasmiṃ rukkhamūle phalasaṃpattim samāpajjitvā nisinnaṃ therim bhikkhūnaṃ dassetvā pasamsantena bhagavatā vuttā.

Atha sakko devānamindo taṃ pavattim dibbena cakkhunā disvā “evaṃ sathārā pasamsīyamānā ayaṃ therī yasmā devehi ca payirupāsītābbā”ti tāvadeva tāvatimsehi devehi saddhim upasaṅkamtivā abhivādetvā añjalim paggayha aṭṭhāsi. Taṃ sandhāya saṅgītikārehi vuttaṃ –

“Taṃ sakko devasaṅghena, upasaṅkamma iddhiyā;
Namassati bhūtapati, subhaṃ kammāradhītara”nti.

Tattha tīsu kāmabhavesu bhūtānaṃ sattānaṃ pati issaroti katvā **bhūtapatī** laddhanāmo sakko devarājā devasaṅghena saddhim taṃ subhaṃ kammāradhītaraṃ attano deviddhiyā upasaṅkamma namassati, pañcapatīṭṭhitena vandatīti attho.

Subhākammāradhītutherīgāthāvaṇṇanā niṭṭhitā.

Vīsatinipātavaṇṇanā niṭṭhitā.

14. Tiṃsanipāto

1. Subhājīvakambavanikātherīgāthāvaṇṇanā

Tiṃsanipāte **jīvakambavanaṃ rammantiādikā** subhāya jīvakambavanikāya theriyā gāthā. Ayampi purimabuddhesu katādhikārā tattha tattha bhava vivaṭṭūpanissayaṃ kusalaṃ upacinantī, sambhāvitakusalamūlā anukkamena paribrūhitavimokkhasambhārā paripakkaññā hutvā, imasmiṃ buddhuppāde rājagahe brāhmaṇamahāsālakule nibbatti, **subhātissā** nāmamahosi. Tassā kira sarīrāvayavā sobhanaṃvaṇṇayuttā ahesuṃ, tasmā subhāti anvatthameva nāmaṃ jātaṃ. Sā satthu rājagahappavesane paṭiladdhasaddhā upāsikā hutvā aparabhāge saṃsāre jātasamvegā kāmesu ādīnavaṃ disvā nekkhamañca khemato sallakkhantī mahāpajāpatiyā gotamiyā santike pabbajitvā vipassanāya kammaṃ karontī katipāheneva anāgāmiphale patiṭṭhāsi.

Atha naṃ ekadivasaṃ aññataro rājagahavāsī dhuttapuriso taruṇo paṭhamayobbane ṭhito jīvakambavane divāvihārāya gacchantim disvā paṭibaddhacitto hutvā maggaṃ ovaranto kāmehi nimantesi. Sā tassa nānappakārehi kāmānaṃ ādīnavaṃ attano ca nekkhammajjhāsayaṃ pavedentī dhammaṃ kathesi. So dhammakathaṃ sutvāpi na paṭikkamati, nibandhatiyeva. Therī naṃ attano vacane atiṭṭhantaṃ akkhiṃhi ca abhirattaṃ disvā, “handā, tayā sambhāvitaṃ akkhi”nti attano ekaṃ akkhiṃ uppātetvā tassa upanesi. Tato so puriso santāso samvegajāto tattha vigatarāgo va hutvā therim khamāpetvā gato. Therī satthu santikaṃ agamāsi. Satthuno saha dassanenevassā akkhi paṭipākatikam ahoṣi. Tato sā buddhagatāya pītiyā niraṇṭaraṃ phuṭā hutvā aṭṭhāsi. Satthā tassā cittācāraṃ ṇatvā dhammaṃ desetvā aggamaṃgatthāya kammaṭṭhānaṃ ācikkhi. Sā pītim vikkhambhetvā tāvadeva vipassanaṃ vaḍḍhetvā saha paṭisambhidāhi arahattaṃ pāpuṇi. Arahattaṃ pana patvā phalasukhena nibbānasukhena viharantī attano paṭipattim paccavekkhitvā attanā tena ca dhuttapurisena vuttagāthā udānavasena –

368. “Jīvakambavanaṃ rammaṃ, gacchantiṃ bhikkhuniṃ subhaṃ;
Dhuttako sannivāresi, tamenāṃ abravī subhā.
369. “Kiṃ te aparādhitaṃ mayā, yaṃ maṃ ovariyāna tiṭṭhasi;
Na hi pabbajitāya āvuso, puriso samphusanāya kappati.
370. “Garuke mama satthusāsane, yā sikkhā sugatena desitā;
Parisuddhapadaṃ anaṅgaṇaṃ, kiṃ maṃ ovariyāna tiṭṭhasi.
371. “Āvilacitto anāvilaṃ, sarajo vītarajaṃ anaṅgaṇaṃ;
Sabbattha vimuttamānaṃ, kiṃ maṃ ovariyāna tiṭṭhasi.
372. “Daharā ca apāpikā casi, kiṃ te pabbajjā karissati;
Nikkhīpa kāsāyacīvaraṃ, ehi ramāma supupphite vane.
373. “Madhurañca pavanti sabbaso, kusumarajena samuṭṭhitā dumā;
Paṭhamavasanto sukho utu, ehi ramāma supupphite vane.
374. “Kusumitasikharā ca pādapā, abhigajjantiva māluteritā;
Kā tuyhaṃ rati bhavissati, yadi ekā vanamogahissasi.
375. “Vālamigasaṅghasevitaṃ, kuñjaramattakareṇuloḷitaṃ;
Asahāyikā gantumicchasi, rahitaṃ bhiṃsanakaṃ mahāvanaṃ.
376. “Tapanīyakatāva dhītikā, vicarasi cittalateva accharā;
Kāsikasukhumehi vaggubhi, sobhasī suvasanehi nūpame.
377. “Ahaṃ tava vasānugo siyaṃ, yadi viharemase kānanantare;
Na hi matthi tayā piyattaro, pāṇo kinnarimandalocane.
378. “Yadi me vacanaṃ karissasi, sukhitā ehi agāramāvasa;
Pāsādanivātavāsini, parikammaṃ te karontu nāriyo.
379. “Kāsikasukhumāni dhārāya, abhiropehi ca mālavaṇṇakaṃ;
Kañcanaṃamuttakaṃ bahuṃ, vividhaṃ ābharaṇaṃ karomi te.
380. “Sudhotarajapachadaṃ subhaṃ, gonakatūlikasanthataṃ navāṃ;
Abhiruha sayanaṃ mahārahaṃ, candanamaṇḍitasāragandhikaṃ.
381. “Uppalaṃ cudakā samuggataṃ, yathā taṃ amanussasevitaṃ;
Evaṃ tvaṃ brahmacārini, sakesaṅgesu jaraṃ gamissasi.
382. “Kiṃ te idha sārasammataṃ, kuṇapapūramhi susānavaḍḍhane;
Bhedanadhamme kaḷevare, yaṃ disvā vimano udikkhasi.
383. “Akkhīni ca tūriyāriva, kinnariyāriva pabbatantare;
Tava me nayanāni dakkhiya, bhiyyo kāmaratī pavaḍḍhati.
384. “Uppalasikharopamāni te, vimale hāṭakasannibhe mukhe;
Tava me nayanāni dakkhiya, bhiyyo kāmaguṇo pavaḍḍhati.
385. “Api dūragatā saramhase, āyatapamhe visuddhadassane;

Na hi matthi tayā piyattaro, nayanā kinnarimandalocane.

386. “Apathena payātumicchasi, candaṃ kīlanakaṃ gavesasi;
Meruṃ laṅghetumicchasi, yo tvaṃ buddhasutaṃ maggayasi.
387. “Natthi hi loke sadevake, rāgo yatthapi dāni me siyā;
Napi naṃ jānāmi kīriso, atha maggena hatto samūlako.
388. “Ingālakuyāva ujjhito, visapattoriva aggito kato;
Napi naṃ passāmi kīriso, atha maggena hatto samūlako.
389. “Yassā siyā apaccavekkhitam, satthā vā anupāsito siyā;
Tvam tādīsikaṃ palobhaya, jānantim so imaṃ vihaññasi.
390. “Mayhañhi akkuṭṭhavandite, sukhadukkhe ca satī upaṭṭhitā;
Saṅkhatamasubhanti jāniya, sabbattheva mano na limpati.
391. “Sāhaṃ sugatassa sāvīkā, maggaṭṭhaṅgikayānāyāyinī;
Uddhaṭasallā anāsavā, suññāgāragatā ramāmahaṃ.
392. “Diṭṭhā hi mayā sucittitā, sombhā dārukapiḷlakāni vā;
Tantihi ca khīlakehi ca, vinibaddhā vividhaṃ panaccakā.
393. “Tamhuddhaṭe tantikhīlake, vissaṭṭhe vikale parikrite;
Na vindeyya khaṇḍaso kate, kimhi tattha manaṃ nivesaye.
394. “Tathūpamā dehakāni maṃ, tehi dhammehi vinā na vattanti;
Dhammehi vinā na vattati, kimhi tattha manaṃ nivesaye.
395. “Yathā haritālena makkhitam, addasa cittaṃ bhittiyā kataṃ;
Tamhi te viparītadassanaṃ, saññā mānusikā niratthikā.
396. “Māyaṃ viya aggato kataṃ, supinanteva suvaṇṇapādapaṃ;
Upagacchasi andha rittakaṃ, janamajjheriva rupparūpakaṃ.
397. “Vaṭṭaniriva koṭarohitā, majjhe pubbulaḷakā saassukā;
Pīlakolīkā cettha jāyati, vividhā cakkhuvīdhā ca piṇḍitā.
398. “Uppāṭiya cārudassanā, na ca pajjittha asaṅgamānasā;
Handa te cakkhuṃ harassu taṃ, tassa narassa adāsi tāvade.
399. “Tassa ca viramāsi tāvade, rāgo tattha khamāpayī ca naṃ;
Sotthi siyā brahmacārinī, na puno edisakaṃ bhavissati.
400. “Āsādiya edisaṃ janaṃ, aggaṃ pajjalitaṃva liṅgiya;
Gaṇhiya āsīvisaṃ viya, api nu sotthi siyā khamehi no.
401. “Muttā ca tato sā bhikkhunī, agamī buddhavarassa santikaṃ;
Passiya varapuññalakkhaṇaṃ, cakkhu āsi yathā purāṇaka’’nti. —

Imā gāthā paccudāhāsi.

Tattha **jīvakambavananti** jīvakassa komārabhaccassa ambavanaṃ. **Rammanti** ramaṇīyaṃ. Taṃ kira bhūmibhāgasampattiyā chāyūdakasampattiyā ca rukkhānaṃ ropitākārena ativiya manuññaṃ manoramaṃ. **Gacchantinti** ambavanaṃ uddissa gataṃ, divāvihārāya upagacchantiṃ. **Subhanti** evaṃnāmikaṃ. **Dhuttakoti** itthidhutto. Rājagahavāsī kireko mahāvibhavassa suvaṇṇakārassa putto yuvā abhirūpo itthidhutto puriso matto vicarati. So taṃ paṭipathe disvā paṭibaddhacitto maggaṃ uparundhitvā aṭṭhāsi. Tena vuttaṃ – “dhuttako sannivāresī”ti, mama gamaṇaṃ nisedhesīti attho. **Tamenaṃ abravī subhāti** tamenam nivāretvā ṭhitam dhuttam subhā bhikkhunī kathesi. Ettha ca “gacchantiṃ bhikkhuniṃ subham, abravī subhā”ti ca attānameva therī aññaṃ viya katvā vadati. Theriyā vuttagāthānaṃ sambandhadassanavasena saṅgītikārehi ayaṃ gāthā vuttā.

“Abravī subhā”ti vatvā tassā vuttākāradassanattam āha “**kiṃ te aparādhita**”ntiādi. Tattha **kiṃ te aparādhitaṃ mayāti** kiṃ tuyham, āvuso, mayā aparaddham. **Yaṃ maṃ ovariyāna tiṭṭhasīti** yena aparādheṇa maṃ gacchantiṃ ovaritvā gamaṇaṃ nisedhetvā tiṭṭhasi, so natthevāti adhippāyo. Atha itthīsaññāya evaṃ paṭipajjasi, evampi na yuttanti dassenti āha – “**na hi pabbajitāya, āvuso, puriso samphusanāya kappatī**”ti, āvuso suvaṇṇakāraputta, lokiyacārittenapi purisassa pabbajitānaṃ samphusanāya na kappati, pabbajitāya pana puriso tiracchānagatopi samphusanāya na kappati, tiṭṭhatu tāva purisaphusanā, rāgavasenassā nissaggiyena purisassa nissaggiyassāpi phusanā na kappateva.

Tenāha “**garuke mama satthusāsane**”tiādi. Tassattho – **garuke** pāsānacchattam viya garukātabbe mayham satthu sāsane yā sikkhā bhikkhuniyo uddissa **sugatena** sammāsambuddheṇa **desitā** paññatā. Tāhi **parisuddhapadam** parisuddhakusalakoṭṭhāsaṃ, rāgādiangaṇānaṃ sabbaso abhāvena **anaṅgaṇam**, evaṃbhūtam maṃ gacchantiṃ kena kāraṇena āvaritvā tiṭṭhasīti.

Āvilacittoti cittassa āvilabhāvakarānaṃ kāmavitakkādīnaṃ vasena āvilacitto, tvaṃ tadabhāvato **anāvilam**, rāgarajādīnaṃ vasena **sarajo**, sāngaṇo tadabhāvato **vītarajam anaṅgaṇam sabbattha** khandhapañcake samucchedavimuttiyā **vimuttamānasam**, maṃ kasmā ovaritvā tiṭṭhasīti?

Evaṃ theriyā vutte dhuttako attano adhippāyaṃ vibhāvento “**daharā cā**”tiādinā dasa gāthā abhāsi. Tattha **daharāti** taruṇī paṭhame yobbane ṭhitā. **Apāpikā casīti** rūpena alāmikā ca asi, uttamarūpadharā cāhosīti adhippāyo. **Kiṃ te pabbajjā karissatīti** tuyham evaṃ paṭhamavaye ṭhitāya rūpasampannāya pabbajjā kiṃ karissati, vuḍḍhāya bībhaccharūpāya vā pabbajjātabbanti adhippāyena vadati. **Nikkhipāti** chaḍḍehi. “Ukkhipā”ti vā pāṭho, apanehīti attho.

Madhuranti subham, sugandhanti attho. **Pavantīti** vāyanti. **Sabbasoti** samantato. **Kusumarajena samuṭṭhitā dumāti** ime rukkhā mandavātena samuṭṭhahamānakusumareṇujātena attano kusumarajena sayam samuṭṭhitā viya hutvā samantato surabhī vāyanti. **Paṭhamavasanto sukho utūti** ayaṃ paṭhamo vasantamāso sukhasamphasso ca utu vattatīti attho.

Kusumitasikharāti supupphitaggā. **Abhigajjantiva māluteritāti** vātena sañcalitā abhigajjantiva abhitthanitā viya tiṭṭhanti. **Yadi ekā vanamogahissasīti** sace tvaṃ ekikā vanamogāhissasi, kā nāma te tattha rati bhavissatīti attanā baddhasukhābhīrattatā evamāha.

Vālamigasaṅghasevanti sīhabyagghādivālamigasamūhehi tattha tattha upasevitaṃ. **Kuñjaramattakareṇuloṭanti** mattakuñjarehi hatthinīhi ca migānaṃ cittatāpanena rukkhagacchādīnaṃ sākhaḥhañjanena ca āloṭitapadesaṃ. Kiñcāpi tasmim vane īdisaṃ tadā natthi, vanaṃ nāma evarūpanti taṃ bhīṃsāpetukāmo evamāha. **Rahitanti** janarahitaṃ vijanaṃ. **Bhīṃsanakanti** bhayajanakaṃ.

Tapanīyakatāva dhītikāti rattasuvaṇṇena vicaritā dhītalikā viya sukusalena yantācariyena yantayogavasena sajjitā suvaṇṇapaṭimā viya vicarasi, idāneva ito cito ca sañcarasi. **Cittalateva accharāti** cittalatānamake uyyāne devaccharā viya. **Kāsikasukhumeḥīti** kāsiraṭṭhe uppannehi ativiya sukhumehi. **Vaggbhīti** siniddhamatṭhehi. **Sobhasī suvasanehi nūpameti** nivāsanapārūpanavattthehi

anupame upamārahite tvam idāni me vasānugo sobhasīti bhāvinam attano adhippāyavasena ekantikam vattamānam viya katvā vadati.

Aham tava vasānugo siyanti ahampi tuyham vasānugo kiṃkārapaṭissāvī bhaveyyam. **Yadi viharemase kānanantareti** yadi mayam ubhopi vanantare saha vasāma ramāma. **Na hi matthi tayā piyattaroti** vasānugabhāvassa kāraṇamāha. **Pāṇoti** satto, añño kocipi satto tayā piyatara mayham na hi atthīti attho. Atha vā **pāṇoti** attano jīvitam sandhāya vadati, mayham jīvitam tayā piyataram na hi atthīti attho. **Kinnarimandalocaneti** kinnariyā viya mandaputhuvilocane.

Yadi me vacanam karissasi, sukhitā ehi agāramāvasāti sace tvam mama vacanam karissasi, ekāsanaṃ ekaseyyam brahmacariyadukkham pahāya ehi kāmabhogehi sukhitā hutvā agāram ajjhāvasa. “Sukhitā heti agāramāvasantī”ti keci paṭhanti, tesam sukhitā bhavissati, agāram ajjhāvasantīti attho. **Pāsadanivātavāsini**ti nivātesu pāsādesu vāsini. “Pāsādavimānavāsini”ti ca pāṭho, vimānasadesu pāsādesu vāsini ti attho. **Parikammanti** veyyāvaccam.

Dhārayāti paridaha, nivāsehi ceva uttariyañca karohi. **Abhiropehīti** maṇḍanavibhūsanavasena vā sarīram āropaya, alaṅkarohīti attho. **Mālavanṇakanti** mālañceva gandhavilepanaṅca. **Kañcanamaṇimuttakanti** kañcanena maṇimuttāhi ca yuttam, suvaṇṇamayamaṇimuttāhi khacitanti attho. **Bahunti** hatthūpagādibhedato bahuppakāram. **Vividhanti** karaṇavikatiyā nānāvīdham.

Sudhotarajapacchadanti sudhotāya pavāhitarajam uttaracchadam. **Subhanti** sobhanam. **Gonakatūlikasanthatanti** dīghalomakālakojavena ceva haṃsalomādipunṇāya tūlikāya ca santhatam. **Navanti** abhinavam. **Mahārahanti** mahaggham. **Candanamaṇḍitasāragandhikanti** gosīsakādisāracandanena maṇḍitatāya surabhogandhikam, evarūpaṃ sayanamāruha, tam āruhitvā yathāsukham sayāhi ceva nisīda cāti attho.

Uppalam cudakā samuggatanti ca-kāro nipātamattam, udakato uggatam utthitam accuggamma ṭhitam suphullamuppalam. **Yathā tam amanussasevīti** tañca rakkhasapariggahitāya pokkharāṇiyā jātatā nimmanussehi sevītam kenaci aparibhuttameva bhaveyya. **Evam tvam brahmacārinīti** evameva tam suṭṭhu phullamuppalam viya tuvam brahmacārinī. **Sakesaṅgesu** attano sarīrāvayavesu kenaci aparibhuttasueva jaram gamissasi, mudhāyeva jarājiṇṇā bhavissasi.

Evam dhuttakena attano adhippāye pakāsīte therī sarīrasabhāvavibhāvanena tam tattha vicchindenti “**kiṃ te idhā**”ti gāthamāha. Tassattho – āvuso suvaṇṇakāraputta, kesādikuṇapapūre ekantena bhedanadhamme susānavaḍḍhane, **idha** imasmiṃ kāyasaññite asucikaḷevare kiṃ nāma tava sāranti sammattam sambhāvitam, yam disvā vimano aññatarasmiṃ ārammaṇe vigatamanasaṅkappo, ettheva vā avimano somanassiko hutvā udikkhasi, tam mayham kathehīti.

Tam sutvā dhuttako kiñcāpi tassā rūpaṃ cāturiyasobhitam, paṭhamadassanato pana paṭṭhāya yasmim diṭṭhipāte paṭibaddhacitto, tameva apadisanto “**akkhīni ca tūriyārīvā**”tiādimāha. Kāmañcāyam therī suṭṭhu saṃyatatāya santindriyā, tāya thiravippasannasommasantanayanānīpātesu kammānubhāvanipphanesu pasannapañcappasādapaṭimaṇḍitesu nāyanesu labbhamāne pabhāvisiṭṭhacāturiye diṭṭhipāte, yasmā sayam caritahāvabhāvavilāsādīparikappavañcīto so dhutto jāto, tasmāssa diṭṭhirāgo savisesam vepullam agamāsi. Tattha **akkhīni ca tūriyārīvāti** tūri vuccati migī, ca-saddo nipātamattam, migacchāpāya viya te akkhīnīti attho. “Koriyārīvā”ti vā pālī, kuñcakārakukkuṭiyāti vuttam hoti. **Kinnariyāriva pabbatantareti** pabbatakucchiyam vicaramānāya kinnarivanitāya viya ca te akkhīnīti attho. **Tava me nayanāni dakkhiyāti** tava vuttaguṇavisesāni nayanāni disvā, **bhiyyo** uparūpari me kāmābhīrati pavaḍḍhati.

Uppalasikharopamāni teti rattuppalaaggasadisāni pamhāni tava. **Vimaleti** nimmale. **Hāṭakasannibheti** kañcanarūpakassa mukhasadise te mukhe, nayanāni dakkhiyāti yojanā.

Api dūragatāti dūraṃ ṭhānaṃ gatāpi. **Saramhaseti** aññaṃ kiñci acintetvā tava nayanāni eva anussarāmi. **Āyatapamheti** dīghapakhume. **Visuddhadassaneti** nimmalalocane. **Na hi matthi tayā piyattaro nayanāti** tava nayanato añño koci mayhaṃ piyattaro natthi. Tayāti hi sāmīatthe eva karaṇavacanaṃ.

Evaṃ cakkhusampattiyā ummāditassa viya taṃ taṃ vippalapato tassa purisassa manorathaṃ viparivattentī therī “**apathenā**”tiādīnā dvādasa gāthā abhāsī. Tattha **apathena payātumicchāsīti**, āvuso suvaṇṇakāraputta, sante aññaṣmiṃ itthijane yo tvaṃ **buddhasutaṃ** buddhassa bhagavato orasadhītaraṃ maṃ **maggayasi** patthesi, so tvaṃ sante kheme ujumagge apathena kaṇṭakanivutena sabhayena kummaggena payātumicchasi paṭipajjitukāmosi, **candaṃ kīlanakaṃ gavesasi** candamaṇḍalaṃ kīlāgoḷakaṃ kātukāmosi, **meruṃ laṅghetumicchasi** caturāsītiyojanasahassubbedhaṃ sinerupabbatarājaṃ laṅghayitvā aparabhāge ṭhātukāmosi, so tvaṃ maṃ buddhasutaṃ maggayasīti yojanā.

Idāni tassa attano avisayabhāvaṃ patthanāya ca vighātāvahataṃ dassetuṃ “**natthi**”tiādi vuttaṃ. Tattha **rāgo yatthapi dāni me siyāti** yattha idāni me rāgo siyā bhaveyya, taṃ ārammaṇaṃ sadevake loke natthi eva. **Napi naṃ jānāmi kīrisoti** naṃ rāgaṃ kīrisotipi na jānāmi. **Atha maggena hatto samūlakoti athāti** nipātamattaṃ. Ayonisomanasikārasaṅkhātena mūlena samūlako rāgo ariyamaggena hatto samugghātito.

Īngālakuyāti aṅgārakāsuyā. **Ujjhitoti** vātukkhitto viya yo koci, dahaniyā indhanaṃ viyāti attho. **Visapattorivāti** visagatabhājanaṃ viya. **Aggito katoti** aggito aṅgārato apagato kato, visassa lesampi asesetvā apanīto vināsītoto attho.

Yassā siyā apaccavekkhitanti yassā itthiyā idaṃ khandhapañcakaṃ ñāṇena appaṭivekkhitaṃ aparīññātaṃ siyā. **Sattā vā anusāsito siyāti** sattā vā dhammasarīrassa adassanena yassā itthiyā ananusāsito siyā. **Tvaṃ tādisikaṃ palobhayāti**, āvuso, tvaṃ tathārūpaṃ aparimadditasāṅkhāraṃ apaccavekkhitalokuttaradhammaṃ kāmehi palobhaya upagaccha. **Jānantim so imaṃ vihaññasīti** so tvaṃ pavattim nivattiñca yāthāvato jānantim paṭividhasaccaṃ imaṃ subhaṃ bhikkhuniṃ āgamma vihaññasī, sampati āyatiñca vighātaṃ dukkhaṃ āpajjasi.

Idāni vighātāpattitaṃ karaṇavibhāvanena dassentī “**mayhaṃ hī**”tiādimāha. Tattha **hīti** hetuatthe nipāto. **Akkuṭṭhavanditeti** akkose vandanāya ca. **Sukhadukkheti** sukhe ca dukkhe ca, itṭhāniṭṭhavisayasamāyoge vā. **Satī upaṭṭhitāti** paccavekkhaṇayuttā satī sabbakālaṃ upaṭṭhitā. **Saṅkhatamasubhanti jāniyāti** tebhūmakāṃ saṅkhāragataṃ kilesāsucipaggharaṇena asubhanti ñatvā. **Sabbatthevāti** sabbasmimyeva bhavattaye mayhaṃ mano taṇhālepādinā na upalimpati.

Maggaṭṭhaṅgikayānāyāyinīti aṭṭhaṅgikamaggasaṅkhātena ariyayānena nibbānapuraṃ yāyinī upagatā. **Uddhaṭasallāti** attano santānato samuddhaṭarāgādisallā.

Sucittitāti hatthapādāmukhādiākārena suṭṭhu cittitā viracitā. **Sombhāti** sumbhakā. **Dārukapiḷlakāni vāti** dārudaṇḍādīhi uparacitarūpakāni. **Tantīhīti** nhārusuttakehi. **Khīlakehīti** hatthapādapiṭṭhikaṇṇādīatthāya ṭhapitandaṇḍehi. **Vinibaddhāti** vividhenākārena baddhā. **Vividhaṃ panaccakāti** yantasuttādīnaṃ añchanavissajjanādinā paṭṭhapitanaccakā, panaccantā viya diṭṭhāti yojanā.

Tamhuddhaṭe tantikhīlaket sannivesavisiṭṭharacānāvisesayuttaṃ upādāya rūpakasamaññā tamhi tantimhi khīlake ca ṭhānato uddhaṭe bandhanto **vissatṭhe**, viṣuṃ karaṇena aññaṃaññaṃ **vikale**, tahiṃ tahiṃ khipanena **parikrite** vikirite. **Na vindeyya khaṇḍaso kateti** potthakarūpassa avayave khaṇḍākhaṇḍite kate potthakarūpaṃ na vindeyya, na upalabheyya. Evaṃ sante **kimhi tattha manam nivesaye** tasmim potthakarūpāvayave kimhi kim khāṇuke, udāhu rajjuke, mattikāpiṇḍādike vā manam manasaññaṃ niveseyya, viśāṅkhāre avayave sā sañña kadācīpi napateyyāti attho.

Tathūpamāti taṃsadiṣā tena potthakarūpena sadiṣā. Kinti ce āha “**dehakānī**”tiādi. Tattha **dehakānī**ti hatthapādāmukhādidehāvayavā. **Manti** me paṭibaddhā upaṭṭhahanti. **Tehi dhammehī**ti tehi pathaviādīhi ca cakkhādīhi ca dhammehi. **Vinā na vattantī**ti na hi tathā tathā sanniviṭṭhe pathaviādiddhamme muñcivā dehā nāma santi. **Dhammehi vinā na vattatī**ti deho avayavehi avayavadhammehi vinā na vattati na upalabbhati. Evaṃ sante **kimhi tattha manam nivesayeti** kimhi kim pathaviyaṃ, udāhu āpādike dehoti vā hatthapādādīnīti vā manam manasaññaṃ niveseyya. Yasmā pathaviādipasādadhammamate eṣā samañña, yadidaṃ dehoti vā hatthapādādīnīti vā sattoti vā itthīti vā purisoti vā, tasmā na ettha jānato koci abhiniveso hotīti.

Yathā haritālena makkhitaṃ, addasa cittaṃ bhittiyā katanti yathā kusalena cittaṃ karena bhittiyam haritālena makkhitaṃ littam tena lepaṃ datvā kataṃ ālikhitaṃ cittaṃ itthirūpaṃ addasa passeyya. Tattha yā upathambhanakhepanādīkiriyāsampattiyā mānusikā nu kho ayaṃ bhitti apassāya ṭhitāti sañña, sā niratthakā manussabhāvasaṅkhātassa atthassa tattha abhāvato, mānusīti pana kevalaṃ tahiṃ tassa ca viparītadassanaṃ, yāthāvato gahaṇaṃ na hoti, dhammapuñjamatte itthipurisādīgahaṇampi evaṃ sampadamidaṃ daṭṭhabbanti adhippāyo.

Māyaṃ viya aggato katanti māyākārena purato upaṭṭhāpitaṃ māyāsadiṣaṃ. **Supinanteva suvaṇṇapādapanti** supinameva supinantaṃ, tattha upaṭṭhitasuvaṇṇamayarukkhaṃ viya. **Upagacchasi andha rittakanti** andhabāla rittakaṃ tucchakaṃ antosārarahitaṃ imaṃ attabhāvaṃ “etaṃ mamā”ti sāravantaṃ viya upagacchasi abhinivisasi. **Janamajjheriva rupparūpakanti** māyākārena mahājanamajjhe dassitaṃ rūpiyarūpasadiṣaṃ sāraṃ viya upaṭṭhahantaṃ, asāraṃti attho.

Vaṭṭanirivāti lākhāya guḷikā viya. **Koṭarohitāti** koṭare rukkhasusire ṭhapitā. **Majjhe pubbulaḷakāti** akkhidalamajjhe ṭhitajalapubbulaṣadiṣā. **Saassukāti** assujalasahitā. **Pīlakolīkāti** akkhigūthako. **Ettha jāyatīti** etasmiṃ akkhimaṇḍale ubhosu koṭṭisu visagandhaṃ vāyanta nibbattati. **Pīlakolīkāti** vā akkhidalesu nibbattanakā pīlakā vuccati. **Vividhāti** setanīlamaṇḍalānañceva rattapītādīnaṃ sattanaṃ paṭalānañca vasena anekavidhā. **Cakkhividhāti** cakkhubhāgā cakkhuppakārā vā tassa anekakalāpagatabhāvato. **Piṇḍitāti** samuditā.

Evaṃ cakkhusmiṃ sārājantassa cakkhuno asubhataṃ anavaṭṭhitatāya aniccatañca vibhāvesi. Vibhāvetvā ca yathā nāma koci lobhanīyaṃ bhaṇḍaṃ gahetvā corakantāraṃ paṭipajjanto corehi palibuddho taṃ lobhanīyabhaṇḍaṃ datvā gacchati, evameva cakkhumhi sārattena tena purisena palibuddhā therī attano cakkhum uppāṭetvā tassa adāsi. Tena vuttaṃ “**uppāṭiya cārudassanā**”tiādi. Tattha **uppāṭiyāti** uppāṭetvā cakkhukūpato nīharitvā. **Cārudassanāti** piyadassanā manoharadassanā. **Na ca pajjitthāti** tasmīṃ cakkhusmiṃ saṅgaṃ nāpajji. **Asaṅgamānasāti** katthacipi ārammaṇe anāsattacittā. **Handa te cakkhanti** tayā kāmītaṃ tato eva mayā dinnattā te cakkhusaññaṃ asucipiṇḍaṃ gaṇha, gahetvā harassu pasādayuttaṃ icchitaṃ ṭhānaṃ nehi.

Tassa ca viramāsi tāvadeti tassa dhuttapurisassa tāvadeva akkhimhi uppāṭitakkhaṇe eva rāgo vigacchi. **Tatthāti** akkhimhi, tassaṃ vā theriyaṃ. Atha vā **tatthāti** tasmīṃyeva ṭhāne. **Khamāpayīti** khamāpesi. **Sotthi siyā brahmacārīnīti** seṭṭhacārīni mahesike tuyhaṃ ārogyameva bhavēyya. **Na puno edisakaṃ bhavissatīti** ito paraṃ evarūpaṃ anācāracaraṇaṃ na bhavissati, na karissāmīti attho.

Āsādiyāti ghaṭṭetvā. **Edisanti** evarūpaṃ sabbattha vītarāgaṃ. **Aggiṃ pajjalitaṃva liṅgiyāti** pajjalitaṃ aggiṃ āliṅgetvā viya.

Tatoti tasmā dhuttapurisā. **Sā bhikkhunīti** sā subhā bhikkhunī. **Agamī buddhavarassa santikanti** sammāsambuddhassa santikaṃ upagacchi upasaṅkami. **Passiya varapuññalakkhaṇanti** uttamehi puññasambhārehi nibbattamahāpurisalakkhaṇaṃ disvā. **Yathā purāṇakanti** porāṇaṃ viya uppāṇato pubbe viya cakkhu paṭipākatikaṃ ahoṣi. Yamettha antarantārā na vuttaṃ, taṃ vuttanayattā suviññeyyameva.

Subhājīvakambavanikātherīgāthāvaṇṇanā niṭṭhitā.

Tiṃsanipātavaṇṇanā niṭṭhitā.

15. Cattālīsanipāto

1. Isidāsītherīgāthāvaṇṇanā

Cattālīsanipāte **nagaramhi kusumanāmeti**ādikā isidāsīyā theriyā gāthā. Ayampi purimabuddhesu katādhikārā tattha tattha bhavē purisattabhāve ṭhatvā vivaṭṭūpanissayaṃ kusalaṃ upacinantī carimabhavato sattame bhavē akalyāṇasannissayena paradārikakammaṃ katvā, kāyassa bhedā niraye nibbattitvā tattha bahūni vassasatāni niraye paccitvā, tato cutā tīsu jātīsu tiracchānayanīyaṃ nibbattitvā tato cutā dāsīyā kucchimimṃ napuṃsako hutvā nibbatti. Tato pana cutā ekassa daliddassa sākaṭikassa dhītā hutvā nibbatti. Taṃ vayappattaṃ giridāso nāma aññatarassa satthavāhassa putto attano bhariyaṃ katvā gehaṃ ānesi. Tassa ca bhariyā atthi sīlavatī kalyāṇadhammā. Tassaṃ issāpakatā sāmīno tassā viddesanakammaṃ akāsi. Sā tattha yāvajīvaṃ ṭhatvā kāyassa bhedā imasmimṃ buddhuppāde ujjeniyaṃ kulapadesasīlācārādiguṇehi abhisammatassa vibhavasampannassa seṭṭhissa dhītā hutvā nibbatti, **isidāsītissā** nāmaṃ ahosi.

Taṃ vayappattakāle mātāpitaro kularūpavayavibhavādisadisassa aññatarassa seṭṭhiputtassa adāṃsu. Sā tassa gehe patidevatā hutvā māsamattaṃ vasi. Athassā kammabalena sāmīko virattarūpo hutvā taṃ gharato nīhari. Taṃ sabbaṃ pālīto eva viññāyati. Tesamṃ tesamṃ pana sāmīkānaṃ aruccaneyyatāya saṃvegajātā pitaraṃ anujānāpetvā, jinadattāya theriyā santike pabbajitvā vipassanāya kammaṃ karontī nacirasseva saha paṭisambhidāhi arahattaṃ patvā, phalasukhena nibbānasukhena ca vītināmentī ekadivasamṃ pāṭaliputtanagare piṇḍāya caritvā pacchābhattaṃ piṇḍapātaṭaṭikkantā mahāgaṅgāyaṃ vālukapuline nisīditvā bodhittheriyā nāma attano sahāyattheriyā pubbapaṭipattiṃ pucchitā tamatthaṃ gāthābandhavasena vissajjesi “ujjeniyā puravare”tiādīnā. Tesamṃ pana pucchāvissajjanānaṃ sambandhaṃ dassetuṃ –

402. “Nagaramhi kusumanāme, pāṭaliputtamhi pathaviyā maṇḍe;
Sakyakulakulīnāyo, dve bhikkhuniyo hi guṇavatiyo.
403. “Isidāsī tattha ekā, dutiyā bodhīti sīlasampannā ca;
Jhānajjhāyanaratāyo, bahussutāyo dhutakilesāyo.
404. “Tā piṇḍāya caritvā, bhattatthaṃ kariya dhotapattāyo;
Rahitamhi sukhanisinnā, imā girā abbhudīresu”nti. –

Imā tisso gāthā saṅgītikārehi ṭhapitā.

405. “Pāsādikāsī ayye, isidāsī vayopi te aparihīno;
Kiṃ disvāna byālikamṃ, athāsī nekkhammanuyuttā.
406. “Evamanuyuñjīyamānā sā, rahite dhammadesanākusalā;
Isidāsī vacanamabravi, suṇa bodhi yathāhamhi pabbajitā.

Ito paraṃ vissajjanagāthā.

407. “Ujjeniyaṃ puravare, mayhaṃ pitā sīlasamvuto seṭṭhi;
Tassamhi ekadhītā, piyā manāpā ca dayitā ca.

408. “Atha me sāketato varakā, āgacchumuttamakulīnā;
Seṭṭhī pahūtaratano, tassa mamaṃ suṇumadāsi tāto.
409. “Sassuyā sasurassa ca, sāyaṃ pātaṃ paṇāmamupagamma;
Sirasā karomi pāde, vandāmi yathāmhī anusīṭṭhā.
410. “Yā mayhaṃ sāmikassa, bhaginiyo bhātuno parijano vā;
Tamekavarakampi disvā, ubbiggā āsanaṃ demi.
411. “Annena ca pānena ca, khajjena ca yañca tattha sannihitaṃ;
Chāдеми upanayāmi ca, demi ca yaṃ yassa patirūpaṃ.
412. “Kālena upaṭṭhahitvā, gharaṃ samupagamāmi ummāre;
Dhovaṅṭī hatthpāde, pañjalikā sāmikamupemi.
413. “Kocchaṃ pasādaṃ añjaniñca, ādāsakañca gaṇhitvā;
Parikammakārikā viya, sayameva paṭiṃ vibhūsemi.
414. “Sayameva odanaṃ sādhyāmi, sayameva bhājanaṃ dhovaṅṭī;
Mātāva ekaputtakaṃ, tathā bhattāraṃ paricarāmi.
415. “Evaṃ maṃ bhattikataṃ, anurattaṃ kārikaṃ nihataṃānaṃ;
Uṭṭhāyikaṃ analasaṃ, sīlavatiṃ dussate bhattā.
416. “So mātarañca pitarañca, bhaṇati āpucchahaṃ gamissāmi;
Isidāsiyā na saha vacchaṃ, ekāgārehaṃ saha vatthum.
417. “Mā evaṃ putta avaca, isidāsī paṇḍitā pariabyattā;
Uṭṭhāyikā analasā, kiṃ tuyhaṃ na rocate putta.
418. “Na ca me hiṃsati kiñci, na cahaṃ isidāsiyā saha vacchaṃ;
Dessāva me alaṃ me, apucchāhaṃ gamissāmi.
419. “Tassa vacanaṃ suṇitvā, sassu sasuro ca maṃ apucchimsu;
Kissa tayā aparaddhaṃ, bhaṇa vissaṭṭhā yathābhūtaṃ.
420. “Napihaṃ aparajjhaṃ kiñci, napi hiṃsemi na bhaṇāmi dubbacanaṃ;
Kiṃ sakkā kātuyye, yaṃ maṃ viddessate bhattā.
421. “Te maṃ pitugharaṃ paṭinayimsu, vimaṇā dukhena adhibhūtā;
Puttamanurakkhamānā, jītāmhase rūpinim lakkhim.
422. “Atha maṃ adāsi tāto, aḍḍhassa gharamhi dutiyakulikassa;
Tato upaḍḍhasuṅkena, yena maṃ vindatha seṭṭhi.
423. “Tassapi gharamhi māsaṃ, avasiṃ atha sopi maṃ paṭiccharayi;
Dāsīva upaṭṭhahantiṃ, adūsikaṃ sīlasampannaṃ.
424. “Bhikkhāya ca vicarantaṃ, damakaṃ dantaṃ me pitā bhaṇati;
Hohisi me jāmatā, nikkhipa poṭṭhiñca ghaṭikañca.
425. “Sopi vasitvā pakkhaṃ, atha tātaṃ bhaṇati ‘dehi me poṭṭhim;

Ghaṭikañca mallakañca, punapi bhikkhaṃ carissāmi’.

426. ‘‘Atha maṃ bhaṇatī tāto, ammā sabbo ca me ñātigaṇavaggo;
Kiṃ te na kīratī idha, bhaṇa khippaṃ taṃ te karihiti.
427. ‘‘Evaṃ bhaṇito bhaṇati, yadi me attā sakkoti alaṃ mayhaṃ;
Isidāsiyā na saha vacchaṃ, ekagharehaṃ saha vatthum.
428. ‘‘Vissajjito gato so, ahampi ekākinī vicintemi;
Āpucchitūna gacchaṃ, marituye vā pabbajissaṃ vā.
429. ‘‘Atha ayyā jinadattā, āgacchī gocarāya caramānā;
Tāta kulaṃ vinayadharī, bahussutā sīlasampannā.
430. ‘‘Taṃ disvāna ambhākaṃ, uṭṭhāyāsanaṃ tassā paññāpayiṃ;
Nisinnāya ca pāde, vanditvā bhojanamadāsiṃ.
431. ‘‘Annena ca pānena ca, khajjena ca yañca tattha sannihitaṃ;
Santappayitvā avacaṃ, ayye icchāmi pabbajitum.
432. ‘‘Atha maṃ bhaṇatī tāto, idheva puttaka carāhi tvaṃ dhammaṃ;
Annena ca pānena ca, tappaya samaṇe dvijātī ca.
433. ‘‘Athahaṃ bhaṇāmi tātaṃ, rodantī añjaliṃ paṇāmetvā;
Pāpañhi mayā pakataṃ, kammaṃ taṃ nijjaressāmi.
434. ‘‘Atha maṃ bhaṇatī tāto, pāpuṇa bodhiñca aggadhammañca;
Nibbānañca labhassu, yaṃ sacchikarī dvipadaseṭṭho.
435. ‘‘Mātāpitū abhivāda, yitvā sabbañca ñātigaṇavaggaṃ;
Sattāhaṃ pabbajitā, tisso vijjā aphassayiṃ.
436. ‘‘Jānāmi attano satta, jātiyo yassayaṃ phalavipāko;
Taṃ tava ācikkhissaṃ, taṃ ekamaṇā nisāmehi.
437. ‘‘Nagaramhi erakacche, suvaṇṇakāro ahaṃ pahūtadhano;
Yobbanamadena matto, so paradāraṃ asevihaṃ.
438. ‘‘Sohaṃ tato cavitvā, nirayamhi apaccisaṃ ciraṃ;
Pakko tato ca uṭṭhahitvā, makkaṭṭiyā kucchimokkamim.
439. ‘‘Sattāhajātakaṃ maṃ, mahākapi yūthapo nillacchesi;
Tassettaṃ kammaphalaṃ, yathāpi gantvāna paradāraṃ.
440. ‘‘Sohaṃ tato cavitvā, kālaṃ karitvā sindhavāraññe;
Kāṇāya ca khañjāya ca, eḷakiyā kucchimokkamim.
441. ‘‘Dvādasa vassāni ahaṃ, nillacchito dārake parivahitvā;
Kimiṇāvatto akallo, yathāpi gantvāna paradāraṃ.
442. ‘‘Sohaṃ tato cavitvā, govāṇijakassa gāviyā jāto;
Vaccho lākhātambo, nillacchito dvādase māse.

443. “Voḍhūna naṅgalamaḥaṃ, sakatañca dhārayāmi;
Andhovaṭṭo akallo, yathāpi gantvāna paradāraṃ.
444. “Sohaṃ tato cavitvā, vīthiyā dāsiyā ghare jāto;
Neva mahilā na puriso, yathāpi gantvāna paradāraṃ.
445. “Timsativassamhi mato, sākaṭīkakulamhi dārikā jātā;
Kapaṇamhi appabhoge, dhanikapurisapātabahulamhi.
446. “Taṃ maṃ tato sathavāho, ussannāya vipulāya vaḍḍhiyā;
Okaddhati vilapantiṃ, acchinditvā kulagharasmā.
447. “Atha soḷasame vasse, disvā maṃ pattayobbanam kaññam;
Orundhatassa putto, giridāso nāma nāmena.
448. “Tassapi aññā bhariyā, sīlavatī guṇavatī yasavatī ca;
Anurattā bhattāraṃ, tassāhaṃ viddesanamakāsiṃ.
449. “Tassetam kammaphalam, yaṃ maṃ apakīritūna gacchanti;
Dāsīva upaṭṭhahantiṃ, tassapi anto kato mayā”ti.

Tattha **nagaramhi kusumanāmeti** “kusumapura”nti evaṃ kusumasaddena gahitanāmake nagare, idāni taṃ nagaraṃ **pāṭaliputtamhīti** sarūpato dasseti. **Pathaviyā maṇḍeti** sakalāya pathaviyā maṇḍabhūte. **Sakyakulakulīnāyoti** sakyakule kuladhītaro, sakyaputtassa bhagavato sāsane pabbajitatāya evaṃ vuttam.

Tatthāti tāsu dvīsu bhikkhunīsu. **Bodhīti** evaṃnāmikā therī. **Jhānajjhāyanaratāyoti** lokiyalokuttarassa jhānassa jhāyane abhiratā. **Bahussutāyoti** pariyattibāhusaccena bahussutā. **Dhutakilesāyoti** aggamaggena sabbaso samugghātīkilesā. **Bhattattham kariyāti** bhattakiccaṃ niṭṭhāpetvā. **Rahitamhīti** janarahitamhi vivittaṭṭhāne. **Sukhanisinnāti** pabbajjāsukhena vivekasukhena ca sukhanisinnā. **Imā girāti** idāni vuccamānā sukhā lāpanā. **Abbhudīresunti** pucchāvissajjanavasena kathayiṃsu.

“**Pāsādikāsī**”ti gāthā bodhittheriyā pucchāvasena vuttā. “**Evamanuyuñjyamānā**”ti gāthā saṅgītikāreheva vuttā. “**Ujjeniyā**”tiādīkā hi sabbāpi isidāsiyāva vuttā. Tattha **pāsādikāsīti** rūpasampattiyā passantānaṃ pasādāvahā asi. **Vayopi te aparihīnoti** tuyhaṃ vayopi na parihīno, paṭhamavaye ṭhītāsīti attho. **Kim disvāna byālikanti** kīdisaṃ byālikaṃ dosaṃ gharāvāse ādīnavaṃ disvā. **Athāsi nekkhammanuyuttāti athāti** nipātamattaṃ, nekkhammaṃ pabbajjaṃ anuyuttā asi.

Anuyuñjyamānāti pucchiyamānā, sā isidāsīti yojanā. **Rahiteti** suññaṭṭhāne. **Suṇa bodhi yathāmhi pabbajitāti** bodhittheri ahaṃ yathā pabbajitā amhi, taṃ taṃ purāṇaṃ suṇa suṇāhi.

Ujjeniyā puravareti ujjennāmake avantiraṭṭhe uttamanagare. **Piyāti** ekadhītubhāvena piyāyitabbā. **Manāpāti** sīlācāraguṇena manavaḍḍhanakā. **Dayitāti** anukampitabbā.

Athāti pacchā mama vayappattakāle. **Me sāketato varakāti** sāketanagarato mama varakā maṃ vārentā āgacchuṃ. **Uttamakulīnāti** tasmīṃ nagare aggakulikā, yena te pesitā, so seṭṭhi pahūtaratano. **Tassa mamaṃ suṇhamadāsi tātoti** tassa sāketasetṭhino suṇisaṃ puttassa bhariyaṃ katvā mayhaṃ pitā maṃ adāsi.

Sāyaṃ pātanti sāyanhe pubbaṇhe ca. **Paṇāmamupagamma sirasā karomīti** sassuyā sasurassa ca

santikaṃ upagantvā sirasā paṇāmaṃ karomi, tesam pāde vandāmi. **Yathāmbhi anusitṭhāti** tehi yathā anusitṭhā amhi, tathā karomi, tesam anusitṭhim na atikkamāmi.

Tamekavarakampīti ekavallabhampī. **Ubbiggāti** tasantā. **Āsanaṃ demīti** yassa puggalassa yaṃ anucchavikaṃ, taṃ tassa demī.

Tatthāti parivesanaṭṭhāne. **Sannihitanti** sajjitaṃ hutvā vijjamānaṃ. **Chādemīti** upacchādemī, upacchādetvā upanayāmi ca, upanetvā demī, dentīpi yaṃ yassa patirūpaṃ, tadeva demīti attho.

Ummāreti dvāre. **Dhavantī hatthapādeti** hatthapāde dhovinī āsiṃ, dhovitvā gharaṃ samupagamāmīti yojanā.

Kocchanti massūnaṃ kesānañca ullikhanakocchaṃ. **Pasādanti** gandhacunṇādimukhavilepanaṃ. ‘‘Pasādhana’’ntipi pāṭho, pasādhanabhaṇḍaṃ. **Añjaninti** añjananāḷiṃ. **Parikammakārikā viyāti** aggakulikā vibhavasampannāpi patiparicārikā ceṭṭikā viya.

Sādhayāmīti pacāmi. **Bhājananti** lohabhājanañca. Dhavantī paricarāmīti yojanā.

Bhattikatanti katasāmbhatikaṃ. **Anurattanti** anurattavantiṃ. **Kārikanti** tassa tasseva iti kattabbassa kārikaṃ. **Nihatamānanti** apanītamānaṃ. **Uṭṭhāyikanti** uṭṭhānavīriyasampannaṃ. **Analasanti** tato eva akusītaṃ. **Silavatinti** sīlacārasampannaṃ. **Dussateti** dussati, kujjhivā bhaṇāti.

Bhaṇāti āpucchahaṃ gamissāmīti ‘‘ahaṃ tumhe āpucchitvā yattha katthaci gamissāmī’’ti so mama sāmiko attano mātarañca pītarañca bhaṇāti. Kiṃ bhaṇātīti ce āha – ‘‘**isidāsiyā na saha vacchaṃ, ekāgārehaṃ saha vatthu**’’nti. Tattha **vacchanti** vasissaṃ.

Dessāti appiyā. **Alaṃ meti** payojanaṃ me tāya itthīti attho. **Apucchāhaṃ gamissāmīti** yadi me tumhe tāya saddhiṃ saṃvāsaṃ icchatha, ahaṃ tumhe apucchitvā videsaṃ pakkamissāmi.

Tassāti mama bhattuno. **Kissāti** kiṃ assa tava sāmikassa. **Tayā aparaddhaṃ** byālikaṃ kataṃ.

Napihaṃ aparajjhanti napi ahaṃ tassa kiñci aparajjhīṃ. Ayameva vā pāṭho. **Napi himsemīti** napi bādhehi. **Dubbacananti** duruttavacanaṃ. **Kiṃ sakkā kātuyyēti** kiṃ mayā kātuṃ ayye sakkā. **Yaṃ maṃ viddessate bhattāti** yasmā akāraṇeneva bhattā mayhaṃ viddessate viddessaṃ cittappakopaṃ karoti.

Vimanāti domanassikā. **Puttamanurakkhamānāti** attano puttaṃ mayhaṃ sāmikaṃ cittamanurakkhaṇena anurakkhantā. **Jitāmhase rūpinīṃ lakkhinti** jitā amhase jitā vatāmha rūpavatiṃ sirīṃ, manussavesena carantiyā siridevatāya parihīnā vatāti attho.

Aḍḍhassa gharamhi dutiyakulikassāti paṭhamasāmikaṃ upādāya dutiyassa aḍḍhassa kulaputtassa gharamhi maṃ adāsi, dento ca tato paṭhamasuṅkato upaḍḍhasuṅkena adāsi. **Yena maṃ vindatha seṭṭhīti** yena suṅkena maṃ paṭhamaṃ seṭṭhi vindatha paṭilabhi, tato upaḍḍhasuṅkenāti yojanā.

Sopīti dutiyasāmikopi. **Maṃ paṭiccharayīti** maṃ nīhari, so maṃ gehato nikkāḍḍhi. **Upaṭṭhahantinti** dāsī viya upaṭṭhahantiṃ upaṭṭhānaṃ karontiṃ. **Adūsikanti** adubbhanakaṃ.

Damakanti kāruññādhīṭṭhānatāya paresaṃ cittassa damakaṃ. Yathā pare kiñci dassanti, evaṃ attano kāyaṃ vācañca **dantaṃ** vūpasantaṃ katvā paradattabhikkhāya vicaraṇakaṃ. **Jāmātāti** duhitupatī. **Nikkhipa poṭṭhiñca ghaṭikañcāti** tayā paridahitaṃ pilotikākhaṇḍaṇca bhikkhākapālañca

chaḍḍehi.

Sopi vasitvā pakkhanti sopi bhikkhako puriso mayā saddhiṃ addhamāsamattaṃ vasitvā pakkāmi.

Atha naṃ bhaṇatī tātoti taṃ bhikkhakaṃ mama pitā mātā sabbo ca me ñātigaṇo vaggavaggo hutvā bhaṇati. Kathaṃ? **Kim te na kīrati idha** tuyhaṃ kiṃ nāma na kirati na sādhiyati, bhaṇa khippaṃ. **Taṃ te karihitī** taṃ tuyhaṃ karissati.

Yadi me attā sakkotī yadi mayhaṃ attā attādhīno bhujisso ca hoti, **alam mayhaṃ isidāsiyā** tāya payojanaṃ natthi, tasmā **na saha vacchaṃ** na saha vasissaṃ, ekaghare ahaṃ tāya saha vatthunti yojanā.

Vissajjito gato soti so bhikkhako pitarā vissajjito yathārucci gato. **Ekākinī** ekikāva. **Āpucchitūna gacchanti** mayhaṃ pitarāṃ vissajjivā gacchāmi. **Marituyeti** marituṃ. **Vāti** vikappatthe nipāto.

Gocarāyāti bhikkhāya, tāta-kulaṃ āgacchīti yojanā.

Tanti taṃ jinadattatheriṃ. **Uṭṭhāyāsanam tassā paññāpayinti** uṭṭhahitvā āsanam tassā theriyā paññāpesiṃ.

Idhevāti imasmiṃ eva gehe ṭhitā. **Puttakāti** sāmāññavohārena dhītaram anukampento ālapati. **Carāhi tvam dhammanti** tvam pabbajitvā caritabbaṃ brahmacariyādidhammaṃ cara. **Dvijātī** brāhmaṇajātī.

Nijjaressāmīti jīrāpessāmi vināsessāmi.

Bodhinti saccābhisambodhiṃ, maggañāṇanti attho. **Aggadhammanti** phaladhammaṃ, arahattaṃ. **Yaṃ sacchikarī dvipadaseṭṭhoti** yaṃ maggaphalanibbānasaññitaṃ lokuttaradhammaṃ dvipadānaṃ seṭṭho sammāsambuddho sacchi akāsi, taṃ labhassūti yojanā.

Sattāhaṃ pabbajitāti pabbajitā hutvā sattāhena. **Aphassayinti** phusiṃ sacchākāsiṃ.

Yassayaṃ phalavipākoti yassa pāpakammaṃ, ayaṃ sāmikassa amanāpabhāvasaṅkhāto nissandaphalabhūto vipāko. **Taṃ tava ācikkhissanti** taṃ kammaṃ tava kathessāmi. **Tanti** ācikkhiyamānaṃ tameva kammaṃ, taṃ vā mama vacanaṃ. **Ekamanāti** ekaggamanā. Ayameva vā pāṭho.

Nagaramhi erakaccheti evaṃnāmake nagare. **So paradāraṃ asevihanti** so ahaṃ parassa dāraṃ aseviṃ.

Ciraṃ pakkoti bahūni vassasatasahassāni nirayagginā daḍḍho. **Tato ca uṭṭhahitvāti** tato nirayato vuṭṭhito cuto. **Makkaṭiyā kucchimokkaminti** vānariyā kucchimhi paṭisandhiṃ gaṇhiṃ.

Yūthapoti yūthapati. **Nillacchesīti** purisabhāvassa lakkhaṇabhūtāni bījakāni nillacchesi nīhari. **Tassetam kammaphalanti** tassa mayhaṃ etaṃ atīte katassa kammaṃ phalaṃ. **Yathāpi gantvāna paradāranti** yathā taṃ paradāraṃ atikkamitvā.

Tatoti makkaṭayonito. **Sindhavāraññeti** sindhavaratṭhe araññatṭhāne. **Eḷakiyāti** ajiyā.

Dārake parivahitvāti piṭṭhiṃ āruya kumārake vahitvā. **Kimināvattoti** abhijātātṭhāne kimiparigatova hutvā aṭṭo aṭṭito. **Akalloti** gilāno, ahoṣīti vacanaseso.

Govāñjakassāti gāviyo vikkiñitvā jīvakassa. **Lākhātamboti** lākhārasarattehi viya tambehi lomehi samannāgato.

Voḍhūnāti vahitvā. **Nañgalanti** sīraṃ, sakaṭaṇca dhārayāmīti attho. **Andhovaṭṭoti** kāṇova hutvā aṭṭo pīlito.

Vīthiyāti nagaravīthiyaṃ. **Dāsiyā ghare jātoti** gharadāsiyā kucchimhi jāto. “Vaṇṇadāsiyā” tipī vadanti. **Neva mahilā na purisoti** itthīpi purisopi na homi, jātinapuṃsakoti attho.

Tiṃsativassamhi matoti napuṃsako hutvā tiṃsavassakāle mato. **Sākaṭikakulamhīti** sūtakakule. **Dhanikapurisapātabahulamhīti** iñāyikānaṃ purisānaṃ adhipatanabahule bahūhi iñāyikehi abhibhavitabbe.

Ussannāyāti upacitāya. **Vipulāyāti** mahatiyā. **Vaḍḍhiyāti** iṇavaḍḍhiyā. **Okaḍḍhatīti** avakaḍḍhati. **Kulagharasmāti** mama jātakulagehato.

Orundhatassa puttoti assa sathavāhassa putto, mayi paṭibaddhacitto nāmena giridāso nāma avarundhati attano pariggahabhāvena gehe karoti.

Anurattā bhattāranti bhattāraṃ anuvattikā. **Tassāhaṃ viddesanamakāsinti** tassa bhattuno taṃ bhariyaṃ sapattim viddesanakammaṃ akāsiṃ. Yathā taṃ so kujjhati, evaṃ paṭipajjim.

Yaṃ maṃ apakīritūna gacchantīti yaṃ dāsī viya sakkaccaṃ upaṭṭhahantiṃ maṃ tattha tattha patino apakiritvā chaḍḍetvā anapekkhā apagacchantī. Etaṃ tassā mayhaṃ tadā katassa paradārikakammassa sapattim viddesanakammassa ca nissandaphalaṃ. **Tassapi anto kato mayāti** tassapi tathā anumayapāpakammassa dāruṇassa pariyaṇto idāni mayā aggamaṃ adhigacchantiyā kato, ito paraṃ kiñci dukkhaṃ natthīti. Yaṃ panettha antarantarā na vibhattaṃ, taṃ vuttanayattā uttānatthameva.

Isidāsītherīgāthāvaṇṇanā niṭṭhitā.

Cattālīsanipātavaṇṇanā niṭṭhitā.

16. Mahānipāto

1. Sumedhātherīgāthāvaṇṇanā

Mahānipāte **mantāvatiyā nagareti**ādikā sumedhāya theriyā gāthā. Ayampi purimabuddhesu katādhikārā tattha tattha bhava vivaṭṭupānissayaṃ kusalaṃ upacinantī, sakkaccaṃ vimokkhasambhāre sambhārentī koṇāgamanassa bhagavato kāle kulagehe nibbattitvā viññutaṃ patvā, attano sakhīhi kuladhītāhi saddhim ekajjhāsaya hutvā mahantaṃ āramāṃ kāretvā buddhappamukhassa bhikkhusaṅghassa niyyādesi. Sā tena puññakamma kāyassa bhedā tāvatimsaṃ upagacchi. Tattha yāvātāyukaṃ dibbasampattim anubhavitvā tato cutā yāmesu upapajji. Tato cutā tusitesu, tato cutā nimmānaratīsu, tato cutā paranimmitavasavattīsūti anukkamena pañcasu kāmasaggesu uppajjitvā tattha tattha devarājūnaṃ mahesī hutvā tato cutā kassapassa bhagavato kāle mahāvibhavassa seṭṭhino dhītā hutvā anukkamena viññutaṃ patvā sāsane abhippasannā hutvā ratanattayaṃ uddissa uḷārapuññakammaṃ akāsi.

Tattha yāvājīvaṃ dhammūpajīvinī kusaladhammaniratā hutvā tato cutā tāvatimsesu nibbattitvā aparāparaṃ sugatīsuyeva saṃsarantī, imasmim buddhuppāde mantāvatinagare koñcassa nāma rañño

dhīta hutvā nibbatti. Tassā mātāpitaro **sumedhā**ti nāmaṃ akaṃsu. Taṃ anukkamena vuddhippattavayappattakāle mātāpitaro “vāraṇavatīnagare anikarattassa nāma rañño dassāmā”ti sammantesuṃ. Sā pana daharakālato paṭṭhāya attano samānavayāhi rājakaññāhi dāsijanehi ca saddhiṃ bhikkhunupassayaṃ gantvā bhikkhunīnaṃ santike dhammaṃ sutvā cirakālato paṭṭhāya katādhikāratāya saṃsāre jātasamvegā sāsane abhippasannā hutvā vayappattakāle kāmehi vinivattitamānasā ahosi. Tena sā mātāpitūnaṃ ñātīnaṃ sammantanaṃ sutvā “na mayhaṃ gharāvāsena kiccaṃ, pabbajissāmaha”nti āha. Taṃ mātāpitaro gharāvāse niyojentā nānappakārena yācantāpi saññāpetuṃ nāsakkhiṃsu. Sā “evaṃ me pabbajituṃ labbhatī”ti khaggaṃ gahetvā sayameva attano kese chinditvā te eva kese ārabha paṭikkūlamanasikāraṃ pavattenti tatha katādhikāratāya bhikkhunīnaṃ santike manasikāraviddhānassa sutapubbattā ca asubhanimittaṃ uppādetvā tatha paṭhamajjhānaṃ adhigacchi. Adhigatapaṭhamajjhānā ca attanā gharāvāse uyyojetuṃ upagate mātāpitaro ādiṃ katvā anto janaparijanaṃ sabbaṃ rājakulaṃ sāsane abhippasannaṃ kāretvā gharato nikkhamitvā bhikkhunupassayaṃ gantvā pabbaji. Pabbajitvā ca vipassanaṃ paṭṭhapetvā sammadeva paripakkaññā vimutti paripācanīyānaṃ dhammānaṃ visesitāya na cirasseva saha paṭisambhidāhi arahattaṃ pāpuṇi. Tena vuttaṃ **apadāne** (apa. therī 2.1.1-19) –

“Bhagavati koṇāgamane, saṅghārāmamhi navanivesamhi;
Sakhiyo tisso janiyo, vihāradānaṃ adāsīmha.

“Dasakkhattuṃ satakkhattuṃ, dasasatakkhattuṃ satāni ca satakkhattuṃ;
Devesu upapajjimha, ko pana vādo manussesu.

“Devesu mahiddhikā ahumha, mānusakamhi ko pana vādo;
Sattaratanassa mahesī, itthiratanā ahaṃ āsiṃ.

“Idha sañcitakusalā, susamidhakulappajā;
Dhanañjānī ca khemā ca, ahampi ca tayo janā.

“Ārāmaṃ sukataṃ katvā, sabbāvayavamaṇḍitaṃ;
Buddhappamukhasaṅghassa, niyyādetvā pamoditā.

“Yattha yatthūpapajjāmi, tassa kammaṃ vāhasā;
Devesu aggataṃ pattā, manussesu tatheva ca.

“Imasmiṃyeva kappamhi, brahmabandhu mahāyaso;
Kassapo nāma gottena, uppajji vadataṃ varo.

“Upaṭṭhāko mahesissa, tadā āsi narissaro;
Kāsirājā kikī nāma, bārāṇasipuruttame.

“Tassāsuṃ satta dhītaro, rājakaññā sukhedhitā;
Buddhopaṭṭhānaniratā, brahmacariyaṃ carimṃsu tā.

“Tāsaṃ sahāyikā hutvā, sīlesu susamāhitā;
Datvā dānāni sakkaccaṃ, agāreva vataṃ carimṃ.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsūpagā ahaṃ.

“Tato cutā yāmamagaṃ, tatohaṃ tusitaṃ gatā;
Tato ca nimmānaratimṃ, vasavattipuraṃ gatā.

“Yattha yatthūpapajjāmi, puññakammasamohitā;
Tattha tattheva rājūnaṃ, mahesittamahārayiṃ.

“Tato cutā manussatte, rājūnaṃ cakkavattinaṃ;
Maṅḍalīnañca rājūnaṃ, mahesittamakārayiṃ.

“Sampattimanubhotvāna, devesu mānusesu ca;
Sabbattha sukhitā hutvā, nekaḷātīsu saṃsariṃ.

“So hetu so pabhavo, tammūlaṃ sāva sāsane khantī;
Taṃ paṭhamasamodhānaṃ, taṃ dhammaratāya nibbānaṃ.

“Kilesā jhāpitā mayhaṃ, bhavā sabbe samūhatā;
Nāgīva bandhanaṃ chetvā, viharāmi anāsavā.

“Svāgataṃ vata me āsi, buddhaseṭṭhassa santike;
Tisso vijjā anuppattā, kataṃ buddhassa sāsanaṃ.

“Paṭisambhidā catasso, vimokkhāpi ca aṭṭhime;
Chaḷabhiññā sacchikatā, kataṃ buddhassa sāsana’nti.

Arahattaṃ pana patvā attano paṭipattiṃ paccavekkhitvā udānavasena –

450. “Mantāvatiyā nagare, rañño koñcassa aggamaheṣiyā;
Dhītā āsiṃ sumedhā, pasādītā sāsanakarehi.
451. “Sīlavatī cittakathā, bahussutā buddhasāsane vinitā;
Mātāpitaro upagamma, bhaṇati ubhayo nisāmetha.
452. “Nibbānābhiratāhaṃ, asassataṃ bhavagataṃ yadipi dibbaṃ;
Kimaṅgaṃ pana tucchā kāmā, appassādā bahuvighātā.
453. “Kāmā kaṭukā āsī, visūpamā yesu mucchitā bālā;
Te dīgharattaṃ niraye, samappitā haññante dukkhitā.
454. “Socanti pāpakammā, vinipāte pāpavaddhino sadā;
Kāyena ca vācāya ca, manasā ca asaṃvutā bālā.
455. “Bālā te duppaññā, acetanā dukkhasamudayoruddhā;
Desente ajānantā, na bujjhare ariyasaccāni.
456. “Saccāni ‘amma’buddhavaradesi, tāni te bahutarā ajānantā ye;
Abhinandanti bhavagataṃ, pihenti devesu upapattiṃ.
457. “Devesupi upapatti, asassatā bhavagate aniccami;
Na ca santasanti bālā, punappunaṃ jāyitabbassa.
458. “Cattāro vinipātā, duve ca gatiyo kathañci labbhanti;
Na ca vinipātagatānaṃ, pabbajjā atthi nirayesu.
459. “Anujānātha maṃ ubhayo, pabbajituṃ dasabalassa pāvacane;

Appossukkā ghaṭissaṃ, jātimaraṇappahānāya.

460. “Kiṃ bhavagate abhinandi, tena kāyakalinā asārena;
Bhavataṇhāya nirodhā, anujānātha pabbajissāmi.
461. “Buddhānaṃ uppādo, vivajjito akkhaṇo khaṇo laddho;
Sīlāni brahmacariyaṃ, yāvajjivaṃ na dūseyyaṃ.
462. “Evaṃ bhaṇati sumedhā, mātāpitaro ‘na tāva āhāraṃ;
Āharissaṃ gahaṭṭhā, maraṇavasāṃ gatāva hessāmi’.
463. “Mātā dukkhitā rodati pitā ca;
Assā sabbaso samabhihato;
Ghaṭenti saññāpetuṃ, pāsādatale chamāpatitaṃ.
464. “Uṭṭhehi puttaka kiṃ soci, tena dinnāsī vāraṇavatimhi;
Rājā anīkaratto, abhirūpo tassa tvaṃ dinnā.
465. “Aggamahesī bhavissasi, anīkarattassa rājino bhariyā;
Sīlāni brahmacariyaṃ, pabbajjā dukkarā puttaka.
466. “Rajje āṇā dhanamissariyaṃ, bhogā sukhā daharikāsī;
Bhuñjāhi kāmabhoge, vāreyyaṃ hotu te putta.
467. “Atha ne bhaṇati sumedhā, mā edisikāni bhavagatamasāraṃ;
Pabbajjā vā hohiti, maraṇaṃ vā me na ceva vāreyyaṃ.
468. “Kimiva pūtikāyamasuciṃ, savanagandhaṃ bhayānakaṃ kuṇapaṃ;
Abhisāṃviseyyaṃ bhastaṃ, asakiṃ paggharitaṃ asucipuṇṇaṃ.
469. “Kimiva tahaṃ jānantī, vikūlakaṃ maṃsasoṇitupalittaṃ;
Kimikulalayaṃ sakuṇabhattaṃ, kaḷevaraṃ kissa diyatīti.
470. “Nibbuyhati susānaṃ, aciraṃ kāyo apeta viññāṇo;
Chuddho kaḷiṅgaram viya, jigucchamānehi ñātīhi.
471. “Chuddhūna naṃ susāne, parabhattaṃ nhāyanti jigucchantā;
Niyakā mātāpitaro, kiṃ pana sādharmaṇā janatā.
472. “Ajjhositā asāre, kaḷevare aṭṭhinhārusaṅghāte;
Kheḷassuccārassavaparipuṇṇe pūtikāyamhi.
473. “Yo naṃ vinibbhujitvā, abbhantaramassa bāhiraṃ kayirā;
Gandhassa asahamānā, sakāpi mātā jiguccheyya.
474. “Khandhadhātuāyatanam, saṅkhataṃ jātimūlakaṃ dukkham;
Yoniso anuvicinantī, vāreyyaṃ kissa iccheyyaṃ.
475. “Divase divase tisatti, satāni navanavā pateyyuṃ kāyamhi;
Vassasatampi ca ghāto, seyyo dukkhassa cevaṃ khayō.
476. “Ajjhupagacche ghātaṃ, yo viññāyevaṃ satthuno vacanaṃ;

Dīgho tesam̐ saṃsāro, punappunaṃ haññamānānaṃ.

477. “Devesu manussesu ca, tiracchānayoniyā asurakāye;
Petesu ca nirayesu ca, aparimitā dissante ghātā.
478. “Ghātā nirayesu bahū, vinipātagatassa pīḷiyamānassa;
Devesupi attānaṃ, nibbānasukhā paraṃ natthi.
479. “Pattā te nibbānaṃ, ye yuttā dasabalassa pāvacane;
Appossukkā ghaṭenti, jātimaraṇappahānāya.
480. “Ajjeva tātabhinikkhamissaṃ, bhogehi kiṃ asārehi;
Nibbinnā me kāmā, vantasamā tālavatthukatā.
481. “Sā cevaṃ bhaṇati pitaramanīkaratto, ca yassa sā dinnā;
Upayāsi vāraṇavate, vāreyyamupaṭṭhite kāle.
482. “Atha asitanicitamuduke, kese khaggena chindiya sumedhā;
Pāsādaṃ pidahitvā, paṭhamajjhānaṃ samāpajji.
483. “Sā ca tahiṃ samāpannā, anīkaratto ca āgato nagaraṃ;
Pāsāde ca sumedhā, aniccaśāññaṃ subhāveti.
484. “Sā ca manasi karoti, anīkaratto ca āruhī turitaṃ;
Maṇikanakabhūsitāṅgo, katañjalī yācati sumedhaṃ.
485. “Rajje āṇā dhanamissariyaṃ, bhogā sukhā daharikāsi;
Bhuñjāhi kāmabhoge, kāmasukhā dullabhā loke.
486. “Nissatṭhaṃ te rajjaṃ, bhoge bhuñjassu dehi dānāni;
Mā dummanā ahosi, mātāpitaro te dukkhitā.
487. “Taṃ taṃ bhaṇati sumedhā, kāmehi anattikā vigatamohā;
Mā kāme abhinandi, kāmesvādīnavāṃ passa.
488. “Cātuddīpo rājā, mandhātā āsi kāmabhoginamaggo;
Atitto kālaṅkato, na cassa paripūritā icchā.
489. “Satta ratanāni vasseyya, vuṭṭhimā dasadisā samantena;
Na catthi titti kāmānaṃ, atittāva maranti narā.
490. “Asisūnūpamā kāmā, kāmā sappasiropamā;
Ukkopamā anudahanti, aṭṭhikaṅkalasannibhā.
491. “Aniccā adhuvā kāmā, bahudukkhā mahāvisā;
Ayogūlova santatto, aghamūlā dukhapphalā.
492. “Rukkhaphalūpamā kāmā, maṃsapesūpamā dukhā;
Supinopamā vañcaniyā, kāmā yācitakūpamā.
493. “Sattisūlūpamā kāmā, rogo gaṇḍo aghaṃ nighaṃ;
Aṅgārakāsusadisā, aghamūlaṃ bhayaṃ vadho.

494. “Evaṃ bahudukkhā kāmā, akkhātā antarāyikā;
Gacchatha na me bhavagata, vissāso atthi attano.
495. “Kiṃ mama paro karissati, attano sīsamhi ḍayhamānamhi;
Anubandhe jarāmaraṇe, tassa ghātāya ghaṭṭitabbam.
496. “Dvāraṃ apāpuritvānaḥam, mātāpitaro anīkarattañca;
Disvāna chamaṃ nisinne, rodante idamavocaṃ.
497. “Dīgho bālānaṃ saṃsāro, punappunañca rodataṃ;
Anamatagge pitu maraṇe, bhātu vadhe attano ca vadhe.
498. “Assu thaññaṃ rudhiraṃ, saṃsāraṃ anamataggato saratha;
Sattānaṃ saṃsarataṃ, sarāhi aṭṭhīnañca sannicayaṃ.
499. “Sara caturodadhī, upanīte assuthaññaṃrudhiraṃ;
Sara ekakappamaṭṭhīnaṃ, sañcayaṃ vipulena samaṃ.
500. “Anamatagge saṃsarato, mahiṃ jambudīpamupanītaṃ;
Kolaṭṭhimattaguḷikā, mātā mātusveva nappahonti.
501. “Tiṇakaṭṭhasākhāpalāsaṃ, upanītaṃ anamataggato sara;
Caturaṅgulikā ghaṭṭikā, pitupitusveva nappahonti.
502. “Sara kāṇakacchapaṃ pubbasamudde, aparato ca yugachiddaṃ;
Siraṃ tassa ca paṭimukkaṃ, manussalābhamhi opammaṃ.
503. “Sara rūpaṃ pheṇapiṇḍopamassa, kāyakalino asārassa;
Khandhe passa anicce, sarāhi niraye bahuvighāte.
504. “Sara kaṭasaṃ vaḍḍhente, punappunaṃ tāsū tāsū jātīsū;
Sara kumbhīlabhayāni ca, sarāhi cattāri saccāni.
505. “Amatamhi vijjamāne, kiṃ tava pañcakaṭukena pītena;
Sabbā hi kāmaratiyo, kaṭukatarā pañcakaṭukena.
506. “Amatamhi vijjamāne, kiṃ tava kāmehi ye pariḷāhā;
Sabbā hi kāmaratiyo, jalitā kuthitā kampitā santāpitā.
507. “Asapattamhi samāne, kiṃ tava kāmehi ye bahusapattā;
Rājaggicoraudakappiyehi, sādharmaṇā kāmā bahusapattā.
508. “Mokkhamhi vijjamāne, kiṃ tava kāmehi yesu vadhabandho;
Kāmesu hi asakāmā, vadhabandhadukkhāni anubhonti.
509. “Ādīpitā tiṇukkā, gaṇhantaṃ dahanti neva muñcantaṃ;
Ukkopamā hi kāmā, dahanti ye te na muñcanti.
510. “Mā appakassa hetu, kāmasukhassa vipulaṃ jahī sukhaṃ;
Mā puthulomova baḷisaṃ, gilitvā pacchā vihaññasi.
511. “Kāmaṃ kāmesu damassu, tāva sunakhova saṅkhalābaddho;

Kāhinti khu taṃ kāmā, chātā sunakhaṃva caṇḍālā.

512. “Aparimitañca dukkhaṃ, bahūni ca cittadomanassāni;
Anubhohisi kāmuyutto, paṇinissaja addhuve kāme.
513. “Ajaramhi vijjamāne, kiṃ tava kāmehi yesu jarā;
Maraṇabyādhigahitā, sabbā sabbattha jātiyo.
514. “Idamajaramidamaramaṃ, idamajarāmaramaṃ padamasokaṃ;
Asapattamasambādhaṃ, akhalitamabhayaṃ nirupatāpaṃ.
515. “Adhigatamidam bahūhi, amataṃ ajjāpi ca labhanīyamidaṃ;
Yo yoniso payuñjati, na ca sakkā aghaṭamānena.
516. “Evaṃ bhaṇati sumedhā, saṅkhāragate ratiṃ alabhamānā;
Anunentī anikarattaṃ, kese ca chamaṃ khipi sumedhā.
517. “Uṭṭhāya anikaratto, pañjaliko yācatassā pītaraṃ so;
Vissajjetha sumedhaṃ, pabbajituṃ vimokkhasaccadassā.
518. “Vissajjitā mātāpitūhi, pabbaji sokabhayaabhītā;
Cha abhiññā sacchikatā, aggaphalaṃ sikkhamānāya.
519. “Acchariyamabbhutaṃ taṃ, nibbānaṃ āsi rājakaññāya;
Pubbenivāsacaritaṃ, yathā byākari pacchime kāle.
520. “Bhagavati koṇāgamane, saṅghārāmaṃhi navanivesamhi;
Sakhiyo tisso janiyo, vihāradānaṃ adāsīmha.
521. “Dasakkhattuṃ satakkhattuṃ, dasasatakkhattuṃ satāni ca satakkhattuṃ;
Devesu upapajjimha, ko pana vādo manussesu.
522. “Devesu mahiddhikā ahumha, mānusakamhi ko pana vādo;
Sattaratanassa mahesī, itthiratanam aham āsiṃ.
523. “So hetu so pabhavo, taṃ mūlaṃ sāva sāsane khantī;
Taṃ paṭhamasamodhānaṃ, taṃ dhammaratāya nibbānaṃ.
524. “Evaṃ karonti ye saddahanti, vacanaṃ anomapaññassa;
Nibbindanti bhavagate, nibbinditvā virajjantī”’ti. –

Imā gāthā abhāsi.

Tattha **mantavatiyā nagareti** mantavatīti evaṃnāmake nagare. **Rañño koñcassāti** koñcassa nāma rañño mahesiyā kucchimhi jātā dhītā āsiṃ. **Sumedhāti** nāmena sumedhā. **Pasādītā sāsanakarehīti** sathusāsanakarehi ariyehi dhammadesanāya sāsane pasādītā sañjātaratanattayappasādā katā.

Sīlavatīti ācārasīlasampannā. **Cittakathāti** cittadhammakathā. **Bahussutāti** bhikkhunīnaṃ santike pariyattidhammassutiyaṭṭā. **Buddhasāsane vinītāti** evaṃ pavatti, evaṃ nivatti, iti sīlaṃ, iti samādhi, iti paññāti suttānugatena (dī. nī. 2.186) yonisomanasikārena tadaṅgato kilesānaṃ vinivattattā buddhānaṃ sāsane vinītā saṃyatakāyavācācittā. **Ubhayo nisāmethāti** tumhe dvepi mama vacanaṃ nisāmetha,

mātāpitaro upagantvā bhaṇatīti yojanā.

Yadipi dibbanti devalokapariyāpannampi bhavagataṃ nāma sabbampi **asassataṃ** aniccaṃ dukkhaṃ vipariṇāmadhammaṃ. **Kimaṅgaṃ pana tucchā kāmāti** kimaṅgaṃ pana mānusakā kāmā, te sabbepi asārakabhāvato tucchā rittā, satthadhārāyaṃ madhubindu viya **appassādā**, etarahi āyatiṅca vipuladukkhatāya **bahuvighātā**.

Kaṭukāti anitṭhā. Sappaṭibhayaṭṭhena **āsivisūpamā**. **Yesu** kāmesu. **Mucchitāti** ajjhositā. **Samappitāti** sakammunā sabbaso appitā khittā, upapannāti attho. **Haññanteti** bādhīyanti.

Vinipāteti apāye.

Acetanāti attahitacetanāya abhāvena acetanā. **Dukkhasamudayoruddhāti** taṇhānimittasaṃsāre avaruddhā. **Desenteti** catusaccadhamme desiyamāne. **Ajānantāti** atthaṃ ajānantā. **Na bujjhare ariyasaccānīti** dukkhādīni ariyasaccāni na paṭibujjhanti.

Ammāti mātaraṃ pamukhaṃ katvā ālapati. **Te bahutarā ajānantāti** ye abhinandanti bhavagataṃ pihenti devesu upapattim buddhavaradesitāni saccāni ajānantā, teyeva ca imasmiṃ loke bahutarāti yojanā.

Bhavagate aniccambhīti sabbasmiṃ bhave anicce devesu upapatti na sassatā, evaṃ santepi na ca **santasanti** bālā na uttasanti na saṃvegaṃ āpajjanti. **Punappunaṃ jāyitabbassāti** aparāparaṃ upapajjamānassa.

Cattāro vinipātāti nirayo tiracchānayoni pettivisayo asurayonīti ime cattāro sukhasamussayato vinipātagatiyo. Manussadevūpapattisaññitā pana dveva **gatiyo kathañci** kicchena kasirena labbhanti puññakammassa dukkarattā. **Nirayesūti** sukharahitesu apāyesu.

Appossukkāti aññakiccesu nirussukkā. **Ghaṭissanti** vāyamissaṃ bhāvanaṃ anuyuñjissāmi, kāyakalinā asārena bhavagate kiṃ abhinanditenāti yojanā.

Bhavataṇhāya nirodhāti bhavagatāya taṇhāya nirodhahetu nirodhatthaṃ.

Buddhānaṃ uppādo laddho, vivajjito nirayūpapattiādiko aṭṭhavidho akkhaṇo, **khaṇo** navamo khaṇo laddhoti yojanā. **Sīlānīti** catupārisuddhisīlāni. **Brahmacariyanti** sāsanabrahmacariyaṃ. **Na dūseyyanti** na kopeyyāmi.

Na tāva āhāraṃ āharissaṃ gahaṭṭhāti “neva tāva ahaṃ gahaṭṭhā hutvā āhāraṃ āharissāmi, sace pabbajjaṃ na labhissāmi, maraṇavasameva gatā bhavissāmī”ti evaṃ sumedhā mātāpitaro bhaṇatīti yojanā.

Assāti sumedhāya. **Sabbaso samabhihatoti** assūhi sabbaso abhihatamukho. **Ghaṭenti saññāpetunti** pāsādātaṃ chamāpatitaṃ sumedhaṃ mātā ca pitā ca gihibhāvāya saññāpetuṃ ghaṭenti vāyamanti. “Ghaṭenti vāyamanti”tipi pāṭho, so evattho.

Kiṃ socitenāti “pabbajjaṃ na labhissāmī”ti kiṃ socanena. **Dinnāsi vāraṇavatimhīti** vāraṇavatīnagare dinnā asi. “Dinnāsi”ti vatvā punapi “tvam dinnā”ti vacanaṃ daḷhaṃ dinnabhāvadassanattaṃ.

Rajje añāti anikarattassa rajje tava añā pavattati. **Dhanamissariyanti** imasmiṃ kule patikule ca

dhanam issariyañca, **bhogā sukhā** ativiya iṭṭhā bhogāti sabbamidam tuyham upaṭṭhitam hatthagatam. **Daharikāsīti** taruṇī cāsi, tasmā bhuñjāhi kāmabhoge. Tena kāraṇena vāreyyam hotu te puttāti yojanā.

Neti mātāpitaro. **Mā edisikānīti** evarūpāni rajje āṇādīni mā bhavantu. Kasmāti ce āha “**bhagavatamasāra**”ntiādi.

Kimivāti kimi viya. **Pūtikāyanti** imam pūtikaḷevaram. **Savanagandhanti** vissatṭhavissagandham. **Bhayānakanti** avītarāgānam bhayāvaham. **Kuṇapam abhisamvisēyyam bhastanti** kuṇapabharitam cammapasibbakaṃ, **asakim paggharitam asucipuṇṇam** nānappakāraṣsa asucino puṇṇam hutvā asakim sabbakālam adhipaggharantam “mama ida”nti abhiniveseyyam.

Kimiva taḥam jānantī, vikūlakanti ativiya paṭikkūlam asucīhi maṃsapēsīhi soṇitehi ca upalittam anekesam kimikulānam ālayam sakuṇānam bhattabhūtam. “Kimikulālasakuṇabhatta”ntipi pāṭho, kimīnam avasiṭṭhasakuṇānañca bhattabhūtanti attho. Tam aham kaḷevaram jānantī ṭhitā. Tam mam idāni vāreyyavasena **kissa** kena nāma kāraṇena diyyatīti dasseti. Tassa tañca dānam kimiva kim viya hotīti yojanā.

Nibbuyhati susānam, aciram kāyo apeta viññāṇoti ayam kāyo acireneva apagataviññāṇo susānam nibbuyhati upanīyati. **Chuddhoti** chaḍḍito. **Kaḷiṅgaram viyāti** niratthakakaṭṭhakhaṇḍasadiso. **Jigucchamānehi nātīhīti** nātījanehipi jigucchamānehi.

Chuddhūna nam susāneti nam kaḷevaram susāne chaḍḍetvā. **Parabhattanti** paresam soṇasiṅgālādīnam bhattabhūtam. **Nhāyanti jigucchantāti** “imassa pacchato āgatā”ti ettakenāpi jigucchamānā sasīsam nimujjantā nhāyanti, pageva phuṭṭhavanto. **Niyakā mātāpitaroti** attano mātāpitaropi. **Kim pana sādharmaṇā janatāti** itaro pana samūho jigucchati kimeva vattabham.

Ajjhositāti taṇhāvasena abhiniviṭṭhā. **Asāreti** niccasārādisārahite.

Vinibbhujitvāti viññānavinibbhogaṃ katvā. **Gandhassa asahamānāti** gandham assa kāyassa asahantī. **Sakāpi mātāti** attano mātāpi jiguccheyya koṭṭhāsānam vinibbhujanena paṭikkūlabhāvāya suṭṭhutam upaṭṭhahanato.

Khandhadhātuāyatananti rūpakkhandhādayo ime pañcakkhandhā, cakkhudhātuādayo imā aṭṭhārasadhātuyo, cakkhāyatanādīni imāni dvādasāyatanānīti evam khandhā dhātuyo āyatanāni cāti sabbam idam rūpārūpadhammajātam samecca sambhuyya paccayehi katattā **saṅkhatam**, tayidam tasmim bhava pavattamānam **dukkham**, jātipaccayattā **jātimūlakanti**. Evam **yoniso** upāyena **anuvicinantī** cintayantī, **vāreyyam** vivāham, **kissa** kena kāraṇena icchissāmi.

“Sīlāni brahmacariyam, pabbajjā dukkarā”ti yadetaṃ mātāpitūhi vuttam tassa paṭivacanaṃ dātum “**divase divase**”tiādi vuttam. Tattha **divase divase tisattisatāni navanavā pateyyum kāyamhīti** dine dine tīṇi sattisatāni tāvadeva pītanisitabhāvena abhinavāni kāyasmim sampateyyum. **Vassasatampi ca ghāto seyyoti** nirantaram vassasatampi patamāno yathāvutto sattighāto seyyo. **Dukkassa cevam khayoti** evam ce vaṭṭadukkassa parikkhayo bhaveyya, evam mahantampi pavattidukkham adhvāsetvā nibbānādhigamāya ussāho karaṇīyoti adhippāyo.

Ajjhupagacchēti sampaṭiccheyya. **Evanti** vuttanayena. Idam vuttam hoti – yo puggalo anamataggaṃ saṃsāram aparimāṇaṃ vaṭṭadukkham dīpentam satthuno vacanaṃ viññāya ṭhito yathāvuttam sattighādadukkham sampaṭiccheyya, tena ceva vaṭṭadukkassa parikkhayo siyāti. Tenāha – “**dīgho tesam saṃsāro, punappunañca haññamānāna**”nti, aparāparam jātijarābyādhimaraṇādīhi

bādhiyamānānanti attho.

Asurakāyeti kālakañcīkādi petāsuranikāye. **Ghātāti** kāyacittānaṃ upaghātā vadhā.

Bahūti pañcavidhabandhanādīkammakāraṇavasena pavattiyamānā bahū anekaghātā.

Vinipātagatassāti sesāpāyasānkhātāṃ vinipātāṃ upagatassāpi. **Pīḷiyamānassāti** tiracchānādiattabhāve abhigghātādīhi ābādhiyamānassa. **Devesupi attāṇanti** devattabhāvesupi tānaṃ natthi rāgapariḷhādīnā sadukkhāsavighātābhāvato. **Nibbānasukhā param natthīti** nibbānasukhato paraṃ aññaṃ uttamaṃ sukhaṃ nāma natthi lokiyasukhassa vipariṇāmasānkhāradukkhāsabhāvattā. Tenāha bhagavā – ‘‘nibbānaṃ paramaṃ sukha’’nti (dha. pa. 203-204).

Pattā te nibbānanti te nibbānaṃ pattāyeva nāma. Atha vā teyeva nibbānaṃ pattā. **Ye yuttā dasabalassa pāvacaṇeti** sammāsambuddhassa sāsane ye yuttā payuttā.

Nibbinnāti virattā. **Meti** mayā. **Vantasamāti** suvānavamathusadisā. **Tālavatthukatāti** tālassa patitṭhānasadisā katā.

Athāti pacchā, mātāpitūnaṃ attano ajjhāsayaṃ pavedetvā anikarattassa ca āgatabhāvaṃ sutvā. **Asitanicitamuduketi** indanīlabhamarasamānavāṇṇatāya asite, ghanabhāvena nicite, simbalitūlasamasamphassatāya muduke. **Kese khaggena chindiyāti** attano kese sunisitena asinā chinditvā. **Pāsādaṃ pidahitvāti** attano vasanapāsāde sirigabbhaṃ pidhāya, tassa dvāraṃ thaketvāti attho. **Paṭhamajjhānaṃ samāpajjīti** khaggena chinne attano kese purato ṭhapetvā tattha paṭikkūlamanasikāraṃ pavattenti yathāupaṭṭhite nimitte uppannaṃ paṭhamāṃ jhānaṃ vasībhāvaṃ āpādetvā samāpajjī.

Sā ca sumedhā taṃ pāsāde samāpannā jhānanti adhippāyo. **Aniccasaññaṃ subhāvetīti** jhānato vuṭṭhahitvā jhānaṃ pādakaṃ katvā vipassanaṃ paṭṭhapetvā ‘‘yaṃkiñci rūpa’’ntīdīnā (a. ni. 4.181; ma. ni. 1.244; paṭi. ma. 1.48) aniccānupassanaṃ suṭṭhu bhāveti, aniccasaññaṃ gahaṇeva cettha dukkhasaññaṃ dīnampi gahaṇaṃ katanti veditabbaṃ.

Maṇikanakabhūsitāṅgoti maṇivicittehi hemamālālānkārehi vibhūsitagatto.

Rajje añātiādi yācītākāranidassanaṃ. Tattha **añāti** ādhipaccaṃ. **Issariyanti** yaso vibhavasampatti. **Bhogā sukhāti** iṭṭhā manāpiyā kāmūpabhogā. **Daharikāsīti** tvaṃ idāni daharā taruṇī asi.

Nissaṭṭhaṃ te rajjanti mayhaṃ sabbampi tiyojanikaṃ rajjaṃ tuyhaṃ pariccattaṃ, taṃ paṭipajjitvā bhoge ca bhūñjassu, ayaṃ maṃ kāmehiyeva nimanteti mā dummanā ahoṣi. **Dehi dānānti** yathāruciya mahantāni dānāni samaṇabrāhmaṇesu pavattehi, mātāpitāro te dukkhitā domanassappattā tava pabbajjādhippāyaṃ sutvā tasmā kāme paribhūñjanti. Tepi upaṭṭhahanti tesāṃ cittaṃ dukkhā mochehīti evamettha padatthayojanā veditabbā.

Mā kāme abhinandīti vatthukāme kilesakāme mā abhinandī. Atha kho tesu kāmesu ādīnaṃ dosaṃ mayhaṃ vacanānusārena **passa** ñāṇacakkhunā olokehi.

Cātuddīpoti jambudīpādīnaṃ catunnaṃ mahādīpānaṃ issaro. **Mandhātāti** evaṃnāmo rājā, kāmabhogīnaṃ **aggo** aggabhūto āsi. Tenāha bhagavā – ‘‘rāhuggaṃ attabhāvīnaṃ, mandhātā kāmabhogīna’’nti (a. ni. 4.15). **Atitto kālaṅkatoti** caturāsītivassasahassāni kumārakīḷāvasena caturāsītivassasahassāni oparajjivasena caturāsītivassasahassāni cakkavattī rājā hutvā devabhogasādise bhoge bhūñjitvā chattiṃsāya sakkānaṃ āyuppamāṇakālaṃ tāvatīṃsabhavane saggasampattiṃ anubhavitvāpi kāmehi atittova kālaṅkato. **Na cassa paripūrītā icchā** assa mandhāturañño kāmesu āsā

na ca paripuṇṇā āsi.

Satta ratanāni vasseyyāti sattapi ratanāni, **vuṭṭhimā** devo dasadisā byāpetvā, **samantena** samantato purisassa rucivasena yadipi vasseyya, yathā taṃ mandhātumahārājassa evaṃ santepi na catthi titti kāmānaṃ, atittāva maranti narā. Tenāha bhagavā – “na kahāpaṇavassena, titti kāmesu vijjati”ti (dha. pa. 186; jā. 1.3.23).

Asisūnūpamā kāmā adhikuṭṭanaṭṭhena, **sappasiropamā** sappatiḥhayaṭṭhena, **ukkopamā** tiṇukkūpamā anudhanaṭṭhena. Tenāha “**anudahantī**”ti. **Aṭṭhikaṅkalasannibhā** appassādaṭṭhena.

Mahāvisāti halāhalādīmahāvisasadisā. **Aghamūlāti** aghassa dukkhassa mūlā kāraṇabhūtā. Tenāha “**dukhapphalā**”ti.

Rukkhapphalūpamā aṅgapaccaṅgānaṃ phalibhañjanaṭṭhena. **Mamsapesūpamā** bahusādhāraṇaṭṭhena. **Supinopamā** ittarapaccupaṭṭhānaṭṭhena māyā viya palobhanato. Tenāha “**vañcaniyā**”ti, vañcakāti attho. **Yācitakūpamāti** yācitakabhaṇḍasadisā tāvakālikaṭṭhena.

Sattisūlūpamā vinivijjanaṭṭhena. Rujjanaṭṭhena **rogo** dukkhatāsulabhata. **Gaṇḍo** kilesāsucipaggharaṇato. Dukkuppādanaṭṭhena **aghaṃ**. Maraṇasampāpanena **nighaṃ**. **Aṅgārakāsusadisā** mahābhitāpanaṭṭhena. Bhayaḥhetutāya ceva vadhakapahūtātāya ca **bhayaṃ vadho** nāma, kāmāti yojanā.

Akkhātā antarāyikāti “saggamaggādhiḡamassa nibbānagāmmimaggassa ca antarāyakarā”ti cakkhubhūtehi buddhādīhi vuttā. **Gacchathāti** anikarattaṃ saparisamaṃ vissajjeti.

Kim mama paro karissatīti paro añño mama kiṃ nāma hitaṃ karissati attano **sīsamhi** uttamaṅge ekādasahi aggīhi ḡayhamāne. Tenāha “**anubandhe jarāmarañe**”ti. **Tassa** jarāmarañassa sīsāḡhassa, **ghātāya** samugghātāya, **ghaṭṭitabbaṃ** vāyamitabbaṃ.

Chamanti chamāyaṃ. **Idamavocanti** idamaṃ “dīgho bālānaṃ saṃsāro”tiādikaṃ saṃvegasamaṃvattanakaṃ vacanaṃ avocaṃ.

Dīgho bālānaṃ saṃsāroti kilesakammavipākavaṭṭabhūtānaṃ khandhāyatanādīnaṃ paṭipāṭipavattisaṅkhāto saṃsāro apariññātavatthukānaṃ andhabālānaṃ dīgho buddhañāṇenapi aparicchindaniyo. Yathā hi anupacchinnatā avijjātaṅhānaṃ aparicchinnatāyeva bhavapabandhassa pubbā koṭi na paññāyati, evaṃ parāpi koṭīti. **Punappunañca rodatanti** aparāparaṃ sokavasena rudantānaṃ. Imināpi avijjātaṅhānaṃ anupacchinnatāyeva tesamaṃ vibhāveti.

Assu thaññaṃ rudhiranti yaṃ ñāti byasanādīnā phuṭṭhānaṃ rodantānaṃ assu ca dāraḡakāle mātuthanato pītaṃ thaññañca yañca paccatthikehi ghātītānaṃ rudhiraṃ. **Saṃsāraṃ anamataggato** saṃsārassa anu amataggatā ñāṇena anugantvāpi amataaggatā aviditagattā iminā dīghena addhunā sattānaṃ **saṃsaratamaṃ**, aparāparaṃ saṃsarantānaṃ saṃsaritamaṃ **sarāhi**, taṃ “kīva bahuka”nti anussarāhi, aṭṭhīnaṃ sannicayaṃ sarāhi anussara, upadhārehīti attho.

Idāni ādīnavassa bahubhāvañca upamāya dassetaṃ “**sara caturōdadhī**”ti gāthamāha. Tattha **sara caturōdadhī upanīte assuthaññarudhiramhīti** imesamaṃ sattānaṃ anamataggasamaṃsāre saṃsarantānaṃ ekekassapi assumhi thaññe rudhiramhi ca pamāṇato upametabbe caturōdadhī cattāro mahāsamudde upamāvasena buddhehi upanīte sara sarāhi. **Ekakappamaṭṭhīnaṃ, sañcayamaṃ vipulena samanti** ekassa puggalassa ekasmiṃ kappe aṭṭhīnaṃ sañcayamaṃ vepullapabbatena samaṃ upanītaṃ sara. Vuttampi cesamaṃ –

“Ekassekena kappena, puggalassaṭṭhisañcayo;
Siyā pabbatasamo rāsi, iti vuttaṃ mahesinā.

“So kho paṇāyaṃ akkhāto, vepullo pabbato mahā;
Uttaro giṃḥhakūṭassa, magadhānaṃ giribbaje”ti. (saṃ. ni. 2.133);

Mahiṃ jambudīpamupanītaṃ. Kolaṭṭhimattagūlikā, mātā mātūsveva nappahontī
jambudīpotisaṅkhātā mahāpathaviṃ kolaṭṭhimattā badaraṭṭhimattā gūlikā katvā tatthekekā “ayaṃ me mātu, ayaṃ me mātumātū”ti evaṃ vibhājjiyamāne tā gūlikā mātā mātūsveva nappahonti, mātā mātūsu akhīṇāsveva pariyaṅtikā tā gūlikā parikkhayaṃ pariyaḍānaṃ gaccheyyūṃ, na tveva anamatagge saṃsāre saṃsarato sattassa mātumātaroti. Evaṃ jambudīpamahiṃ saṃsārassa dīghabhāvena upamābhāvena upanītaṃ manasi karohīti.

Tiṇakaṭṭhasākhāpalāsanti tiṇaṅca kaṭṭhaṅca sākāpalāsaṅca. Upanītanti upamābhāvena upanītaṃ. Anamataggatoti saṃsārassa anamataggabhāvato. Caturaṅgulikā ghaṭikāti
caturaṅgulappamāṇāni khaṇḍāni. **Pitupitusveva nappahontī** pitupitāmahesu eva tā ghaṭikā nappahonti. Idaṃ vuttaṃ hoti – imasmim loke sabbam tiṇaṅca kaṭṭhaṅca sākāpalāsaṅca caturaṅgulikā katvā tatthekekā “ayaṃ me pitu, ayaṃ me pitāmahassā”ti vibhājjiyamāne tā ghaṭikāva parikkhayaṃ pariyaḍānaṃ gaccheyyūṃ, na tveva anamatagge saṃsāre saṃsarato sattassa pitupitāmahāti. Evaṃ tiṇaṅca kaṭṭhaṅca sākāpalāsaṅca saṃsārassa dīghabhāvena upanītaṃ sarāhīti. Imasmim pana ṭhāne –

“Anamataggoyam, bhikkhave, saṃsāro, pubbā koṭi na paññāyati avijjānīvaraṇānaṃ sattānaṃ taṇhāsaṃyojanānaṃ sandhāvataṃ saṃsarataṃ. Taṃ kiṃ maññatha, bhikkhave, katamaṃ nu kho bahutaraṃ, yaṃ vā vo iminā dīghena addhunā sandhāvataṃ saṃsarataṃ amanāpasampayogā manāpavippayogā kandantānaṃ rodantānaṃ assupassannaṃ paggharitaṃ, yaṃ vā catūsu mahāsamuddesu udaka”ntiādikā (saṃ. ni. 2.126) – ‘anamataggapāli’ āharitabbā.

Sara kāṇakacchapanti ubhayakkhikānaṃ kacchapaṃ anussara. Pubbasamudde aparato ca yugachiddanti puratthimasamudde aparato ca pacchimuttaradakkhiṇasamudde vātavegena paribbhamantassa yugassa ekacchiddaṃ. Siraṃ tassa ca paṭimukkanti kāṇakacchapassa sīsaṃ tassa ca vassatassa vassatassa accayena gīvaṃ ukkhipantassa sīsassa yugacchidde pavesanaṅca sara. Manussalābhamhi opammanti tayidaṃ sabbampi buddhuppādadhammadesanāsu viya manussatalābhe opammaṃ katvā paññāya sara, tassa atīva dullabhasabhāvattaṃ sārājjabhayassāpi aticcasabhāvattā. Vuttañhetam – “seyyathāpi, bhikkhave, puriso mahāsamudde ekacchiggaḷhaṃ yugam pakkhipeyyā”tiādī (ma. ni. 3.252; saṃ. ni. 5.1117).

Sara rūpaṃ pheṇapiṇḍopamassāti vimaddāsahanato pheṇapiṇḍasadisassa anekānatthasannipātato kāyasaṅkhātassa kalino, nicasārādivirahena asārassa rūpaṃ asuciduggandham jegucchapaṭikkūlabhāvaṃ sara. Khandhe passa anicceti pañcapi upādānakkhandhe hutvā abhāvaṭṭhena anicce passa ñānacakkhunā olokehi. **Sarāhi niraye bahuvighāte**ti aṭṭha mahāniraye soḷasaussadaniraye ca bahuvighāte bahudukkhe mahādukkhe ca anussara.

Sara kaṭasim vaḍḍhentiti punappunaṃ tāsū tāsū jātīsū aparāparaṃ uppattiyā punappunaṃ kaṭasim susānaṃ āḷahanaṃeva vaḍḍhente satte anussara. “Vaḍḍhanto”ti vā pāli, tvaṃ vaḍḍhantoti yojanā. **Kumbhīlabhayānī**ti udaraposaṇattham akiccakāritāvasena odarikattabhayāni. Vuttañhi “kumbhīlabhayanti kho, bhikkhave, odarikattasetam adhivacana”nti (a. ni. 4.122). **Sarāhi cattāri saccānī**ti “idaṃ dukkham ariyasaccaṃ...pe... ayaṃ dukkhanirodhagāminipaṭipadā ariyasacca”nti cattāri ariyasaccāni yāthāvato anussara upadhārehi.

Evaṃ rājaputtī anekākāravokāraṃ anussaraṇavasena kāmesu saṃsāre ca ādīnavaṃ pakāsetvā idāni byatirekenapi tam pakāsetuṃ “**amatamhi vijjamāne**”tiādīmāha. Tattha **amatamhi vijjamāneti**

sammāsambuddhena mahākaruṇāya upanīte saddhammāmate upalabbhamāne. **Kim tava pañcakaṭukena pītenā** pariyesanā pariggaho ārakkhā paribhogo vipāko cāti pañcasupi ṭhānesu tikhiṇataradukkhānubandhatāya savighātattā saupāyāsattā kiṃ tuyhaṃ pañcakaṭukena pañcakāmaguṇarasena pītena? Idāni vuttamevatthaṃ pākaṭataraṃ karontī āha – “**sabbā hi kāmaratiyo, kaṭukatarā pañcakaṭukenā**”ti, ativiya kaṭukatarāti attho.

Ye pariḷāhāti ye kāmā sampati kilesapariḷāhena āyatiṃ vipākapariḷāhena ca saporīḷāhā mahāvighātā. **Jalitā kuthitā kampitā santāpitāti** ekādasahi aggīhi pajjalitā pakkuthitā ca hutvā taṃsamaṅgīnaṃ kampanakā santāpanakā ca.

Asapattamhīti sapattarahite nekkhamme. **Samāneti** sante vijjamāne. “Bahusapattā”ti vatvā yehi bahū sapattā, te dassetuṃ “**rājaggi**”tiādi vuttaṃ. Rājūhi ca agginā ca corehi ca udakena ca dāyādādiappiyehi ca rājaggicoraudakappiyehi sādharmaṇato tesvevopamā vuttā.

Yesu vadhabandhoti yesu kāmesu kāmanimittaṃ maraṇapothanādiparikkilesa andubandhanādibandho ca hotīti attho. **Kāmesūti**ādi vuttassevatthassa pākaṭakaraṇaṃ. Tattha **hīti** hetuatthe nipāto. Yasmā kāmesu kāmahetu ime sattā vadhabandhanadukkhāni anubhavanti pāpuṇanti, tasmā āha – “**asakāmā**”ti, kāmā nāmete asanto hīnā lāmakāti attho. “Ahakāmā”ti vā pāṭho, so evattho. Ahāti hi lāmakapariyāyo “ahalokitthiyo nāmā”tiādīsu viya.

Ādīpitāti pajjalitā. **Tiṇukkāti** tiṇehi katā ukkā. **Dahanti ye te muñcantīti** ye sattā te kāme na muñcanti, aññadatthu gaṇhanti, te dahantiyeva, sampati āyatiṇca jhāpentī.

Mā appakassa hetūti pupphassādasadisassa parittakassa kāmasukhassa hetu vipulaṃ uḷāraṃ paṇītaṇca lokuttaraṃ sukhaṃ **mā jahi** mā chaḍḍehi. **Mā puthulomova baḷisaṃ gilitvāti** āmisalobhena baḷisaṃ gilitvā byasaṇaṃ pāpuṇanto “puthulomo”ti laddhanāmo maccho viya kāme apariccajivā **mā pacchā vihaññasi** pacchā vighāṭaṃ āpajjasi.

Sunakhova saṅkhalābaddhoti yathā gaddulena baddho sunakho gaddulabandhena thambhe upanibaddho aññato gantuṃ asakkonto tattheva paribbhamati, evaṃ tvaṃ kāmataṇhāya baddho, idāni **kāmaṃ** yadipi kāmesu tāva **damassu** indriyāni damehi. **Kāhinti khu taṃ kāmā, chātā sunakhaṃva caṇḍālāti khūti** nipātamattaṃ. Te pana kāmā taṃ tathā karissanti, yathā chātajjhataṃ sapākā sunakhaṃ labhitvā anayabyasaṇaṃ pāpentīti attho.

Aparimitaṇca dukkhanti aparimāṇaṃ “ettaka”nti paricchindituṃ asakkuṇeyyaṃ nirayādīsu kāyikaṃ dukkhaṃ. **Bahūni ca cittadomanassānīti** citte labbhamānāni bahūni anekāni domanassāni cetodukkhāni. **Anubhohisīti** anubhavissasi. **Kāmayuttoti** kāmehi yutto, te appaṇissajjanto. **Paṇissaja addhve kāmehi** addhvehi aniccehi kāmehi vinissaja apehīti attho.

Jarāmarañabyādhigahitā, sabbā sabbattha jātiyoti yasmā hīnādibhedabhinnā sabbattha bhavādīsu jātiyo jarāmarañabyādhinā ca gahitā, tehi aparimuttā, tasmā **ajaramhi** nibbāne vijjamāne jarādīhi aparimuttehi kāmehi kiṃ tava payojananti yojanā.

Evaṃ nibbānaguṇadassanamukhena kāmesu bhavesu ca ādīnaṃ pakāsetvā idāni nibbattitaṃ nibbānaguṇameva pakāsentī “**idamajara**”ntiādīnā dve gāthā abhāsī. Tattha **idamajaranti** idamevekaṃ attani jarābhāvato adhigatassa ca jarābhāvahetuto ajaraṃ. **Idamamaranti** etthāpi eseva nayo. **Idamajarāmaranti** tadubhayamekajjhaṃ katvā thomaṇavasena vadati. **Padanti** vaṭṭadukkhato mucchitukāmehi pabbajitabbato paṭipajjitabbato padaṃ. Sokahetūnaṃ abhāvato sokābhāvato ca **asokaṃ**. Sapattakaradhammābhāvato **asapattaṃ**. Kilesasambādhabhāvato **asambādhaṃ**. Khalitasankhātānaṃ duccharitānaṃ abhāvena **akhalitaṃ**. Attānuvādādibhayaṇaṃ vaṭṭabhayaṇaṃ ca sabbaso abhāvā **abhayaṃ**. Dukkūpatāpassa kilesassāpi abhāvena **nirupatāpaṃ**. Sabbametaṃ amatamahānibbānameva sandhāya

vadati. Tañhi sã anussavãdisiddhena ãkãrena attano upaṭṭhahantĩ tesam paccakkhato dassentĩ viya ‘‘ida’’nti avoca.

Avigatamidam bahũhi amatanti idam amataṃ nibbãnaṃ bahũhi anantaaparimãñehi buddhãdĩhi ariyehi adhigataṃ ñãtaṃ attano paccakkham kataṃ. Na kevalaṃ tehi adhigatameva sandhãya vadati, atha kho **ajjãpi ca labhanĩyaṃ** idãnipi adhigamañiyaṃ adhigantaṃ sakkã. Kena labhanĩyanti ãha ‘‘yo yoniso payuñjati’’ti, yo puggalo yoniso upãyena satthãrã dinnaovãde ṭhatvã yuñjati sammãpayogañca karoti, tena labhanĩyanti yojanã. **Na ca sakkã aghaṭamañenãti** yo pana yoniso na payuñjati, tena aghaṭamañena na ca sakkã, kadãcipi laddhuṃ na sakkãyevãti attho.

Evaṃ bhañati sumedhãti evaṃ vuttappakãrena sumedhã rãjakaññã saṃsãre attano saṃvegadĩpaniṃ kãmesu nibbedhabhãginiṃ dhammakathaṃ katheti. **Sãñkhãragate ratim alabhamãñãti** aṇumattepi sañkhãrapavatte abhiratiṃ avindantĩ. **Anunentĩ anikarattanti** anikarattaṃ rãjãnaṃ saññãpentĩ. **Kese ca chamaṃ khiptĩ** attano khaggena chinne kese ca bhũmiyaṃ khipi chaḍḍesi.

Yãcatassã pitaraṃ sotĩ so anikaratto assã sumedhãya pitaraṃ koñcarãjãnaṃ yãcati. Kinti yãcatĩti ãha ‘‘vissajjetha sumedhaṃ, pabbajituṃ vimokkhasaccadassã’’ti, sumedhaṃ rãjaputtiṃ pabbajituṃ vissajjetha, sã ca pabbajitvã vimokkhasaccadassã aviparĩtanibbãnadassãvinĩ hotũti attho.

Sokabhayabhĩtãti ñãtiviyogãdihetuto sabbasmãpi saṃsãrabhayato bhĩtã ñãñuttaravasena utrãsitã. **Sikkhamãñãyãti** sikkhamãñãya samãñãya cha abhiññã sacchikatã, tato eva aggaphalaṃ arahattaṃ sacchikataṃ.

Acchariyamabbhutaṃ taṃ, nibbãnaṃ ãsi rãjakaññãyãti rãjaputtiyã sumedhãya kilesehi parinibbãnaṃ acchariyaṃ abbhutañca ãsi. Chaḷabhiññãva siddhiyã kathanti ce **pubbenivãsaritaṃ, yathã byãkari pacchime kãleti**, pacchime khandhaparinibbãnakãle attano pubbenivãsapariyãpannacariṃtaṃ yathã byãkãsi, tathã taṃ jãnitabbanti.

Pubbenivãsaṃ pana tãya yathã byãkataṃ, taṃ dassetuṃ ‘‘bhagavati koñãgamane’’tiãdi vuttaṃ. Tattha **bhagavati koñãgamaneti** koñãgamane sammãsambuddhe loke uppanne. **Saṅghãrãmamhi navanivesamhĩti** saṅghaṃ uddissa abhinavanivesite ãrãme. **Sakhiyo tisso janiyo, vihãradãnaṃ adãsimhãti** dhanañjãñĩ khemã ahañcãti mayaṃ tisso sakhiyo ãrãmaṃ saṅghassa vihãradãnaṃ adamha.

Dasakkhattuṃ satakkhattuntĩ tassa vihãradãnassa ãnubhãvena dasavãre devesu upapajimha, tato manussesu upapajitvã puna satakkhattuṃ devesu upapajimha, tatopi manussesu upapajitvã puna dasasatakkhattuṃ sahasavãraṃ devesu upapajimha, tatopi manussesu upapajitvã puna satãni satakkhattuṃ dasasahasavãre devesu upapajimha, ko pana vãdo manussesu. Evaṃ manussesu uppannavãresu kathãva natthi, anekasahasavãraṃ upapajimhãti attho.

Devesu mahiddhikã ahumhãti devesu upannakãle tasmim tasmim devanikãye mahiddhikã mahãnubhãvã ahumha. **Mãnusakamhi ko pana vãdotĩ** manussattalãbhe mahiddhikatãya kathãva natthi. Idãni tameva manussattabhãve ukkaṃsataṃ mahiddhikataṃ dassentĩ ‘‘sattaratanassa mahesĩ, itthiratanam aham ãsi’’nti ãha. Tattha cakkaratanãdĩni satta ratanãni etassa santĩti sattaratano, cakkavattĩ, tassa sattaratanassa. Chadosarahitã pañcakalyãñã atikkantamanussavaññã apattadibbavaññãti evamãdiguñasamannãgamena itthĩsu ratanabhũtã aham ahoñim.

So hetũti yaṃ taṃ koñãgamanassa bhagavato kãle saṅghassa vihãradãnaṃ kataṃ, so yathãvuttãya dibbasampattiyã ca hetu. **So pabhavo taṃ mũlanti** tasseva pariyañyavacanaṃ. **Sãva sãsane khantĩti** sã eva idha satthusãsane dhamme nijjhãnakkhantĩ. **Taṃ paṭhamasamodhãnantĩ** tadeva satthusãsanadhammena paṭhamam samodhãnaṃ paṭhamo samãgamo, tadeva satthusãsanadhamme

abhiratāya pariyosāne nibbānanti phalūpacārena kāraṇaṃ vadati. Imā pana catasso gāthā theriyā apadānassa vibhāvanavasena pavattatā apadānapāliyaṃ saṅghaṃ āropitā.

Osānagāthāya **evaṃ karontīti** yathā mayā purimattabhāve etarahi ca kataṃ paṭipannaṃ, evaṃ aññepi karonti paṭipajjanti. Ke evaṃ karontīti āha – “**ye saddahanti vacanaṃ anomapaññassā**”ti, ñeyyapariyantikaññatāya paripuṇṇapaññassa sammāsambuddhassa vacanaṃ ye puggalā saddahanti “**evameta**”nti okappanti, te evaṃ karonti paṭipajjanti. Idāni tāya ukkaṃsagatāya paṭipattiyā taṃ dassetuṃ “**nibbindanti bhavagate, nibbinditvā virajjanti**”ti vuttaṃ. Tassattho – ye bhagavato vacanaṃ yāthāvato saddahanti, te visuddhipaṭipadaṃ paṭipajjantā sabbasmiṃ bhavagate tebhūmake saṅkhāre vipassanāpaññāya nibbindanti, nibbinditvā ca pana ariyamaggena sabbaso virajjanti, sabbasmāpi bhavagatā vimuccantīti attho. Virāge ariyamagge adhigate vimuttāyeva hontīti.

Evametā therikādayo sumedhāpariyosānā gāthāsabhāgena idha ekajjhaṃ saṅghaṃ ārūḷhā “**tisattatiparimāṇā**”ti. Bhāṇavārato pana dvādhikā chasatamattā theriyō gāthā ca. Tā sabbāpi yathā sammāsambuddhassa sāvīkābhāvena ekavidhā, tathā asekhābhāvena ukkhittapalighatāya saṃkiṇṇaparikkhatāya abbūḷhesikatāya niraggalatāya pannabhāratāya visaññuttatāya dasasu ariyavāsesu vuṭṭhavāsātāya ca, tathā hi tā pañcaṅgavippahīnā chaḷaṅgasamannāgatā ekārakkhā caturāpassenā paṇunnapaccekasaccā samavayasatṭhesanā anāvilasaṅkappā passaddhakāyasaṅkhārā suvimuttacittā suvimuttapaññā cāti evamādinā (dī. ni. 3.360) nayena ekavidhā.

Sammukhāparammukhābhedato duvidhā. Yā hi satthudharamānakāle ariyāya jātiyā jātā mahāpajāpatigotamiādayo, tā sammukhāsāvīkā nāma. Yā pana bhagavato khandhapariniḅbānato pacchā adhigatavisesā, tā satīpi satthudhammasarīrassa paccakkhabhāve satthusarīrassa apaccakkhabhāvato parammukhāsāvīkā nāma. Tathā ubhatobhāgavimuttipaññāvimuttitāvasena. Idha pāliyaṅgatā pana ubhatobhāgavimuttāyeva. Tathā sāpadānanāpadānabhedato. Yāsañhi purimesu sammāsambuddhesu paccakabuddhesu sāvakabuddhesu vā puññakiriyāvasena katādhikāratāsaṅkhātāṃ atthi apadānaṃ, tā sāpadānā. Yāsaṃ taṃ natthi, tā nāpadānā. Tathā satthuladdhūpasampadā saṅghato laddhūpasampadāti duvidhā. Garudhammapaṭiggahaṇaṃhi laddhūpasampadā mahāpajāpatigotamī satthusantikāva laddhūpasampadattā satthuladdhūpasampadā nāma. Sesā sabbāpi saṅghato laddhūpasampadā. Tāpi ekatoupasampannā ubhatoupasampannāti duvidhā. Tattha yā tā mahāpajāpatigotamiyā saddhiṃ nikkhantā pañcasatā sākiyāniyo, tā ekatoupasampannā bhikkhusaṅghato eva laddhūpasampadattā mahāpajāpatigotamiṃ ṭhapetvā. Itarā ubhatoupasampannā ubhatosaṅghe upasampadattā.

Ehibhikkhuduko viya ehibhikkhuniduko idha na labbhati. Kasmā? Bhikkhunīnaṃ tathā upasampadāya abhāvato. Yadi evaṃ yaṃ taṃ therigāthāya subhaddāya kuṇḍalakesāya vuttaṃ –

“Nihacca jāṇuṃ vanditvā, sammukhā añjaliṃ akaṃ;
Ehi bhaddeti maṃ avaca, sā me āsūpasampadā”ti. (therīgā. 109);

Tathā apadānepi –

“Āyācito tadā āha, ehi bhaddeti nāyako;
Tadāhaṃ upasampannā, parittaṃ toyamaddasa”nti. (apa. therī 2.3.44);

Taṃ kathanti? Nayidaṃ ehibhikkhunibhāvena upasampadaṃ sandhāya vuttaṃ. Upasampadāya pana hetubhāvato yā satthu āṇatti, sā me āsūpasampadāti vuttaṃ.

Tathā hi vuttaṃ aṭṭhakathāyaṃ “ehi, bhaddeti, bhikkhunupassayaṃ gantvā bhikkhunīnaṃ santike pabbajja upasampajjassūti maṃ avoca āṇāpesi. Sā satthu āṇā mayhaṃ upasampadāya kāraṇattā upasampadā ahoṣī”ti. Eteneva apadānagāthāyapi attho saṃvaṇṇitoti daṭṭhabbo.

Evampi bhikkhunivibhaṅge ehi bhikkhunīti idaṃ kathanti? Ehibhikkhunibhāvena bhikkhunīnaṃ upasampadāya asabhāvajotanavacanaṃ tathā upasampadāya bhikkhunīnaṃ abhāvato. Yadi evaṃ, kathaṃ ehibhikkhunīti vibhaṅge niddeso katoti? Desanānayasotapatitabhāvena. Ayañhi sotapatitatā nāma katthaci labbhamānassāpi anāhaṭaṃ hoti.

Yathā abhidhamme manodhātuniddese (dha. sa. 566-567) labbhamānampi jhānaṅgaṃ pañcaviññāṇasotapatitatāya na uddhaṭaṃ katthaci desanāya asambhavato. Yathā tattheva vatthuniddese hadayavatthu, katthaci alabbhamānassāpi gahaṇavasena. Tathā ʒhitakappiniddese. Yathāha –

“Katamo ca puggalo ʒhitakappī? Ayañca puggalo sotāpattiphalaśacchikiriyaṃ paṭipanno assa, kappassa ca uḍḍayhanavelā assa, neva tāva kappo uḍḍayheyya, yāvāyaṃ puggalo na sotāpattipalaṃ śacchikarotī”ti (pu. pa. 17).

Evamidhāpi alabbhamānagahaṇavasena veditabbaṃ, parikappavacanañhetam sace bhagavā bhikkhunibhāvayogyaṃ kañci mātugāmaṃ ehi bhikkhunīti vadeyya, evampi bhikkhunibhāvo siyāti. Kasmā pana bhagavā evaṃ na kathesīti? Tathā katādhikāraṇaṃ abhāvato. Ye pana “anāsannasannihitabhāvato”ti kāraṇaṃ vatvā “bhikkhū eva hi satthu āśannacārī sadā sannihitāva, tasmā te ‘ehibhikkhū’ti vattabbaṃ arahanti, na bhikkhuniyo”ti vadanti, taṃ tesam matimattaṃ. Satthu āśannadūrabhāvassa bhābhābhābhābhāvāsiddhattā. Vuttañhetam bhagavatā –

“Saṅghāṭikaṇṇe cepi, bhikkhave, bhikkhu gahetvā piṭṭhito piṭṭhito anubandho assa pade padaṃ nikkhipanto, so ca hoti abhijjhālu kāmesu tibbasārāgo byāpannacitto paduṭṭhamanaśaṅkappo muṭṭhassati aśampajāno aśamāhito vibbhantacitto pākatindriyo, atha kho so ārakāva mayhaṃ, ahañca tassa. Taṃ kissa hetu? Dhammañhi so, bhikkhave, bhikkhu na passati, dhammaṃ aśassanto na maṃ passati.

“Yojanasate cepi so, bhikkhave, bhikkhu vihareyya. So ca hoti anabhijjhālu kāmesu na tibbasārāgo abyāpannacitto appaduṭṭhamanaśaṅkappo upaṭṭhitassati śampajāno śamāhito ekaggacitto śaṃvutindriyo, atha kho so śantikeva mayhaṃ, ahañca tassa. Taṃ kissa hetu? Dhammañhi so, bhikkhave, bhikkhu passati, dhammaṃ śassanto maṃ passati”ti (itivu. 92).

Tasmā akāraṇaṃ śesato satthu āśannānāsannatā. Akatādhikāratāya pana bhikkhunīnaṃ tattha ayogyatā. Tena vuttaṃ – “ehibhikkhuniduko idha na labbhatī”ti. Evaṃ duvidhā.

Aggasāvika, mahāsāvika, pakatisāvikaṭi tividhā. Tattha khemā, uppalaṇṇatī imā dve therīyo aggasāvika nāma. Kāmaṃ śabbāpi khīṇāśavattherīyo śīlasuddhiādike śampādentiyo catūsu śatipaṭṭhānesu śupaṭṭhitacittā śatṭabojjhaṅge yathābhūtaṃ bhāvetvā maggaṭipāṭiyā anavaśesato kileśe khetvā aggaṭhale paṭiṭṭhahanti. Tathāpi yathā śaddhāvimuttato diṭṭhippaṭṭassa paññāvimuttato ca ubhaṭabhāgavimuttassa pubbaḥāgabhāvanāvisesāśiddho icchito viśeso, evaṃ abhinīhāraśahantatāpubbaṭyogamaśahantatāhiśaśantāne śātiśayaguṇaviśeśassa niṭṭhāditattā śīlādīhi guṇehi maśantā śāvikaṭi maśāsāvika. Teśueva pana bodhipakkaḥiyadhammeśu pāmoḥkkaḥbhāvena dhuraḥbhūtānaṃ śammādiṭṭhiśammāśadhīnaṃ śātiśayakiccānubhāvanibbaṭṭiyā kāraṇabhūtāya taṭṭābhinihāratāya śakkaṇṇaṃ niśantaraṃ ciraḥāśaśambhūtāya śammāṭipāṭiyā yathākkamaṃ paññāya śamādhiṃhi ca ukkaṃśapāraśippāṭiyā śaviśeśaṃ śabbaguṇehi aggaḥbhāve ʒhitattā tā dvepi aggasāvika nāma. Maśāpaṭāṭigotaśiādāyo pana abhinīhāraśahantatāya pubbaṭyogamaśahantatāya ca ṭāṭiśadhaḥguṇaviśeśavaśena maśatiyo śāvikaṭi maśāsāvika nāma. Itarā therikaṭi tiśśā vīrā dhīrāti evamaḥdikā abhinīhāraśahantatādīnaṃ abhāvena pakatisāvika nāma. Tā pana aggasāvika viya maśāsāvika viya ca na paśimitā, atha kho aneśaśatāni aneśaśaśaśāni veditabbaṇi. Evaṃ aggasāvikaḥdibhedato tividhā. Tathā śuññataviśmoḥkkaḥdibhedato tividhā.

ṭāṭipadādivibhāgena catubbidhā. Indriyādhiḥkaviḥbhāgena pañcavidhā. Tathā ṭāṭipāṭiyādivibhāgena

pañcavidhā. Animittavimuttādivasena chabbidhā. Adhimuttibhedena sattavidhā. Dhurapaṭipadādivibhāgena aṭṭhavidhā. Vimuttivibhāgena navavidhā dasavidhā ca. Tā panetā yathāvuttena dhurabhedena vibhajjamānā vīsati hontī, paṭipadāvibhāgena vibhajjamānā cattālīsa hontī. Puna paṭipadābhedenā dhurabhedena vibhajjamānā asīti hontī. Atha vā suññatāvimuttādivibhāgena vibhajjamānā cattālīsādhikāni dvesatāni hontī. Puna indriyādhikavibhāgena vibhajjamānā dvisatuttarasahassaṃ hontīti. Evametāsaṃ therīnaṃ attano guṇavaseneva anekabhedabhinnatā veditabbā. Ayamettha saṅkhepo, vitthāro pana heṭṭhā theragāthāsaṃvaṇṇanāyaṃ vuttanayeneva gahetabboti.

Sumedhātherīgāthāvaṇṇanā niṭṭhitā.

Mahānipātavaṇṇanā niṭṭhitā.

Nigamanagāthā

Ettāvatā ca –

“Ye te sampannasaddhammā, dhammarājassa satthuno;
Orasā mukhajā puttā, dāyādā dhammanimmitā.

“Sīlādiguṇasampannā, katakiccā anāsavā;
Subhūtiādayo therā, therīyo therikādayo.

“Tehi yā bhāsītā gāthā, aññabyākaraṇādīnā;
Tā sabbā ekato katvā, theragāthāti saṅgahaṃ.

“Āropesaṃ mahātherā, therīgāthāti tādino;
Tāsaṃ atthaṃ pakāsetuṃ, porāṇaṭṭhakathānayaṃ.

“Nissāya yā samāraddhā, atthasaṃvaṇṇanā mayā;
Sā tattha paramatthānaṃ, tattha tattha yathārahaṃ.

“Pakāsanā **paramatthadīpanī**, nāma nāmato;
Sampattā pariniṭṭhānaṃ, anākulavinicchayā;
Dvānavutiparimāṇā, pāḷiyā bhāṇavārato.

“Iti taṃ saṅkharontena, yaṃ taṃ adhigataṃ mayā;
Puññaṃ tassānubhāvena, lokanāthassa sāsanaṃ.

“Ogāhetvā visuddhāya, sīlādipaṭipattiyā;
Sabbepi dehino hontu, vimuttīrasabhāgino.

“Ciraṃ tiṭṭhatu lokasmiṃ, sammāsambuddhasāsanaṃ;
Tasmīṃ sagāravā niccaṃ, hontu sabbepi pāṇino.

“Sammā vassatu kālena, devopi jagatīpati;
Saddhammanirato lokaṃ, dhammeneva pasāsātū’’ti.

Badaratitthavīhāravāsīnā **ācariyadhammapālattherena**

Katā

Therīgāthānaṃ atthasaṃvaṇṇanā niṭṭhitā.

Therīgāthā-aṭṭhakathā niṭṭhitā.